

**GULIELMI DE
VVAHA
MELREUSII E
SOCIETATE
JESU LABORES...**

Guillaume : de Waha
Baillonville





7. 14-a-13

—
GUILIELMI DE VVAHA
MELREUSII

E SOCIETATE JESU

LABORES

HERCVLIS
CHRISTIANI

GODEFREDI
BULLIONII

Editio Altera



MONACHI,

TYPIS SEBASTIANI RAUCH.

M. DC. LXXX.



Cum facultate Superiorum.

THE UNIVERSITY OF CHICAGO

LIBRARY

OF THE

PHYSICS DEPARTMENT

CHICAGO, ILL.

1950

PHYSICS DEPARTMENT

CHICAGO, ILL.

1950

PHYSICS DEPARTMENT

CHICAGO, ILL.

1950

PHYSICS DEPARTMENT

EPISTOLA NUNCUPATORIA

*Admodum Reverendo, Prænobili,
& Gratiſſo Domino,*

**HIERONYMO AMBROSIO
LANGENMANTL,**

**Patritio Auguſtano, & Inſignis
Eccleſiæ Collegiatæ ad S. Mauritium
ibidem Canonico.**

DOMINO GRATIſſo.

LIBR. I. I. T. E. C. A. NAZ.
ROMA
V. G. B. I. O. E. M. A. N. T. L.

DUosunt, quæ alterum hujus ope-
ris typum perſuaſerunt, Admo-
dum Reverende, Prænobilis, &
Gratiſſe Domine, materiæ im-
primis & gravitas & maje-
ſtas; modus deinde proponendi, ab amæna no-
vitate ſingularis. Illud effecit Candidus Bul-
lionij erga Deiparentem amor, ad uſque Virgi-
nitatis illibatæ aram constantiſſimus, & Iero-
ſolyma per tam difficiles caſus Saracenico jugo
ſubtracta: hoc inde naſcitur, quòd eruditum Le-
ctorem ingenioſo Historici Ordinis neglectu ſic
liber detineat, ut plura citiùs intelligendi ore-
xis ſub ipſâ voluminis creſcat evolutione, erro-
ris patiens gratiſſi. Quæ duo, niſi mea me ve-

hementer fallit opinio, Tibi pariter, Gratioſe Domine, anſam porrexere, ut, poſtquam hunc librum modicè delibâſti, temporis inopiâ tum à libri totius lectione præpeditus, plurium deſiderijs fieri ſatis expeteres, & conceptum animo noſtro de ſecundâ editione decretum in opus quàm celerrimè cuperes deduci. Tuus ſcilicet in Virgineam Matrem ardor, & eximius politioris litteraturæ cultus, quem plura jam Tuo ſub nomine typis vulgata, loquuntur affatim, Te inſtigârunt, ut pergeres de re litteraria bene mereri, & puriſſimum Mariani amoris lac, quolibet hic redundat, per aureum concinna latinitatis canalem in parthenias mentes amplius derivare. Patere igitur, Admodum Reverende, Pranobilis, & Gratioſe Domine, ut alienum opus, labore noſtro repetitum, Tuo ſub patrocinio, plurium proſit affectui & ſequela. Noſtrum putabimus, Patronæ Noſtræ pro incolunitate Tuâ precum hoſtias crebrò immolare. Monachij Calendis Novembris. M. DC. XC.

Admodum Reverendæ, Præ-
nobilis, & Gratiolæ Domina-
tionis Tuæ

Ad obſequia

Congregatio Minor B. V.
MARIA ab Angelo ſalutata.



LABORUM
HERCULIS
CHRISTIANI

LIBER PRIMUS



NTENDEBAT se prima ve-
spera pridie idus Octobres
anni post partum Virgi-
neum millesimi octogesi-
mi, cum ad paludem, quam
accolæ Saxones Gronam appellant, tan-
quam ad conditum locum duo celebra-
tissimi famâ duces adversis equis pro-
currere. Verum simul ac propius adve-
cti sunt, mutuus conspectus ita mentes
eorum, quemadmodum solent improvise
casus, affecit. Alter alterum aliò teten-
disse ratî, profecti tamen ad utramque
ripam in se præter spem inciderant. Ad-
miratio primùm, deinde lætitia quædam
cepit ambos solâ jam palude distantes,

A

æte-

cæterùm longissimè disjunctos animis. Æmulos dudum, ferrióque non semel inter se congressos supremæ pugnæ cupido versabat. Ingens corporum, armorúmque species, paria insignia dignitatis, & cultus utrique Cæsareus. Licet invicem ora noscere riparum intervallum, & lux inclinata non sinerent, protinus tamen ambos æmulationis instinctus submonuerat adesse hostem. Id deinde certò compererant, utrimque conspecto comitatu procerum, auditóque sequentium agminum fremitu. Impetus fuit è vestigio venire ad manus, irámque diu collectam non sustinere in crastinum. Verùm pariter locus, ac tempus obstabant. Grona media per latè stagnantes aquas non aperiebat vadum. Partem ejus paludis ad Orientem versam, quàm propiùs terminabatur, præterfluens amnis Ellestra claudebat: pars altera longè porrigebatur, udo, & infido solo prætenta. Cujus caput nequibat peti nisi circuitu; nec ante noctem gradus conferri poterat. Igitur ambobus ducibus, ceu communicatis

con-

consilij, mane proximum expectari placuit ad pugnam luce dignam, quâ nempe decernerent de Occidentis imperio. Mox digressi copias suas, quas non longo intervallo præcesserant explorandi loci causâ, repetunt. Horum alter Henricus Cæsaris Henrici cognomento Nigri filius erat. Is super Ellestræ ripam castra posuit, seu forte, prout tulit diei tempus; seu consilio, ut suis interclusâ fugâ strenuè pugnandi necessitatem imponeret. Objectus à tergo fluvijs, à dextrâ palus, in propinquo erat hostilis exercitus, rerumque discrimen. Militibus jussis intentiore curâ servare vigilias, corpora curare, primoque diluculo præsto in armis esse, ipse in tabernaculum se recepit. Ibi menti inquietæ cœpit obversari magnitudo periculi. Reputabat æmulum imperij Rudolphum Saxonie Regem, belli artibus, victoriisque notum imminere; seque mox allaturum ejus gloriæ vel finem, vel cumulum. Post unam noctem palàm futurum, ex duobus, qui Cæsares à partibus appellabantur, uter esset. Tantam in militum fide, ac dexteris verti fortunam. At

Rudolphum adesse cum universis copijs se (a) verò partem exercitus in Italiam misisse adversus Proreginam Mathildem stantem pro hoste. Inde irâ in ambos commotus, sollicitudinemque suam increpans statuebat sibi ad eos profligandos sat virium futurum, si satis animi foret. Agitabat deinde quo ordine instrueret aciem, quos in fronte, quos in subsidjs locaret, ac præsertim quem ex omnibus crearet signiferum principem. Erat id munus dignitate, momentoque præcipuum. Optimum factu censuit, hac de re primores exercitus sententiam rogare; non ignarus eum fore lectissimum, quem sibi ipsis prætulissent. Ubi illuxit postero die, quemadmodum decreverat, impigrè dispositâ acie ductores ordinum convocat. Cohortatus omnes ad rem fortiter gerendam, (b) Cæsareum vexillum proferri jubet aquilâ insigne, auróque collucens. Tum præfatus quanti interesset id committi spectatæ fidei, virtutisq; viro, quæsit, cuinam tutissimè credi posse censerent illud decus exercitus, ac
fatale

(a) *Bertold.* (b) *Divans.*

fatale victoriæ pignus. (a) Eques erat in
ijs castris gloriâ militari florens, qui ta-
met si non multò major viginti annis, e-
minebat simul indole animi, simul corpo-
ris robore. Quas suas dotes sic approbabat,
ut his licet præriperet laudem omnibus,
omnium sibi voluntates adjungeret. Ita
non belli socios modò, sed & invidiam
superarat. (b) Mirabili consensione re-
sponsum est, hunc præ reliquis aquiliferi
munere dignum esse. Quare iuveni à
tot proceribus electo, & iudicijs omnium
eximio Cæsar aquilam offert. Ad quem
ille accedens, elegantîâ oris; & sermonis
non minore, quàm modestiâ, excusavit
ætatem, & imparem onerî manum. Se
munerum bellicorum minimè cupidum
esse, ut minimè dignum. Militis nomine
contentum, titulos alios perlubenter ce-
dere potiori. Et forsitan se in prælio fore
minùs inutilem, si manum conferat cum
hoste, quàm si implicet gloriosâ gesta-
tione vexilli. Deprecatione illâ permo-
destâ nihil effecit apud Henricum, nisi ut
censeretur dignior aquilâ gestandâ,

A 3

quam

(a) *God. Viterb.* (b) *Guil. Tyr.*

6 LABORUM HERCULIS

quam ei, quantumvis renitenti, tradidit. Interim ultra paludem Rudolphus instructam aciem ostenderat, Saxonibus ferè, Suevisque conflatam. Ergo canentibus tubis Aquilifer equo conscenso cum omnibus Henrici copijs procedit tanti agminis caput. Converterat in se utriusque exercitus oculos, non modò splendore novi honoris, sed etiam heroicâ corporis specie. Micabat ardore animi vultus; artus torosi, latum pectus, caput militariter erectum, & multâ pinnarum amœnitate inumbratum. Cæterùm virilis armorum cultus, non auro, aut gemmis, sed perpolito in argenti nitorem ferro lucebat. Honestabantur hæc corporis magnitudine, cui adjicere videbatur Cæsareum vexillum, quod gerebat, tantò signis reliquis celsius, quantum præstabat ipse signiferis. Verùm acrior, quàm hilarior vadebat ad pugnam. Urebat animum ex arcano dolor privatus, quem insolens, ac probrosa de Proreginâ Mathilde fama inusserat. Ægritudinem hanc licet fictâ oris alacritate, fortibusque ad socios verbis dissimulare niteretur, suspirijs tamen iden-

identidem prodebat. Excidebant etiam quandoque gementi, stupentique voces ejusmodi: amat Mathildis, & principem hostium cæsaris amat. Sed ea scilicet erat origo doloris, quæ juvenem à pugna non averteret, sed ad capeßendam magis accenderet. Duo (a) Imperatores, inter quos belli causa erat, admotas primùm ad utramque paludis ripam copias, deinde ad caput ejus subduxere. Hinc subtelijactum exhortati militem voce, & manu, invadunt invicem ordines. Principiò acriter, & ancipiti eventu pugnare, utrimque modò pellentes, modò pulsi. Henricus, & Rudolphus prælium accendebant, restituebantque pari robore animorum. Ambos delecti tuebantur conferti, cohærentesque, ante oculos principum certi aut virtute vincere, aut cum gloriâ cadere. At dispar Henricianorum vigor notari cœpit; non clamor, non tela missa vim eandem habere, adhuc tamen Imperatoris sui, & Aquiliferi maximè exemplis animati stare. Rudolphus ubi inclinatham aciem sensit, eò acrius se-

A 4

fe

(a) *Bruno.*

8 LABORUM HERCULIS

se invehere & hostibus nullum spatium respirandi, recipiendique se dare. Hi referre pedem, & vincente ver cundiam metu aperte tandem fugere. Henricus rebus desperatis, ne in hostis veniret potestatem, terga vertit, (a) antè tamen intuitus Aquiliferi sui fidem, atque audax incœptum. Quod ex claris auctoribus referam, quantumvis factu arduum, ac præceptis, fuit intra juvenis ejus audaciam. Digna res visa (b) Viterbiensi, quam prædicaret versibus historiæ suæ interjectis, ex quibus hæc æterni elogij pars:

DUM FUGIT HENRICUS COMITUM
FUGIENTE CATERVA,

MILES EI SIGNUM MEDIA STATIO-
NE RESERVAT.

Quisnam miles ille, aut quod ejus nomen, non prodidit is scriptor, sive quod hæc essent ignota vulgò, sive aliâ de causâ. Invictus signifer indignatus suorum ignaviam non modò stetit, & medio in campo tenuit aquilam, sed designavit inauditum post hominum memoriam facinus. Vociferatus ad suos se vel solum,

(a) *G. Tyr.* (b) *God. Vit. part. 17.*

lum, si nemo alius consistat, hosti restitutum, excepturumque potius mortem obvio pectore, quàm Rudolphus omnium Henricianorum terga videat, sensit se verba perdere. Atque ut faceret animos exemplo, quos voce non poterat, fortitus oculo Rudolphum Imperatoris insignibus, factisque spectabilem adoriri statuit. Non infestæ, victricisque multitudinis aspectus, non mortis facies terruere. Omnium, præter hostem, oblitus procurrat(a) vexilli hastile dextrâ quatiens, & terribili quâ gestu, quâ voce Rudolphum provocavit ad pugnam. Qui cum tardiùs prodiret, in ipsam aciem, sicut erat desertus, ac furenti similis irruit. Henricus, qui nondum procul aberat, Aquiliferum hostibus circumfufum advertit, indoluitque strenuū juvenis infelici virtute. Nec jam dubitans, quin is periisset, aversus per jacentia passim militum suorum arma, & corpora fugam expedit ad Ellestam. Ibi luctus ejus funesto spectaculo cumulat. Amnis alveum simul equi, simul homines impleverant. Fugientium

A S

entium

(a) Tyr.

entium alios aliò , plurimos huc compulerat metus : sed remedium malo pejus invenêre. (a) Fluvius eo loco profundus, vorticofus, ut adeò præruptis utrimque ripis erat, & nec in aquam descendere , nisi præcipientes, nec inde possent emergere. Ergo armis graves, multi vulneribus, omnes fatigatione , metûque ipso debilitati cruentatis vorticibus haustiolvebantur inter jumenta. Pauci ægrè per obluctantes undas enifi, ex equis insiliebant ripæ, arreptisqûe virgultis repentes evadebant in crepidinem. Hanc gladijs emoliri, & complanare conati, tandem opere fatigati, relictis, quos extrahere nequiverant, equis, projectisqûe armis fugiebant. Cæsar è citeriore ripâ, vidit tot malis accessisse id quoque, ut ne fugere quidem posset. Incertus animi, vestigansqûe vadum ferebatur, cùm audijt equitem à tergo inclamantem, ut confisteret. Id seu hostis, seu civis juberet, intempestivum Cæsari visum. Quem fugere perseverantem revocare pergit idem eques, & insequi. Tandémque propior,

(a) *Bruno.*

pior, (a) quò, Henrice , raperis ? inquit. Refer oculos ad campum , ubi Rudolphum ego hac dextrâ peremi. Vide subsistentem hostium aciem, & amisso duce, ceu capite, exanimatam metu. Sta, tuóque exemplo militum fugam siste. Henricus vociferantem respiciens agnovit Aquiliferum. Cujus insperatâ salute motus exporrexit tantisper vultum : at mox in mœrorem rursus dejecit, & concitavit equum, vel fugæ viam, vel latibulum quæsiturus. Aquilifer iterum asseverat cæsum Rudolphum : at cum tristi risu abnuît Cæsar , juvenemque facinus narrare exordientem auribus respuit. Videbatur loqui portentum, aut veriùs fabulam. Perruptam ab eo primam aciem oportebat, & Rudolphum laceffitum inter suos, rectumque suorum armis. Et quantumvis usque eò seu virtute, seu dolo penetratum foret, noverat Rudolphi ipsius non solùm militare robur, sed etiam arma nullâ vi ferri penetrabilia. (b) Memoriam infidebat victoria, quæ ante defectionem Rudolphi reportata fuerat
ejus

(a) *Viterb.* (b) *Lamb. Schaf.*

ejus præsertim operâ, quando inter prima signa fortissimè dimicans, nebulâque pulveris, & hostium globo involutus, incognitûsque jam militibus suis, utrorumque telis tantùm non obrutus erat. Ubi, licet undique gladijs, lanceisque pulsatus, tamen cassidis, & loricæ firmitate vitatis vulneribus, laborarat tantùm contusione membrorum. Ergo censebat Henricus, quantumvis ille validè ictus, aut etiam prostratus ab Aquilifero esset, rem citra vulnus futuram. Itaque victum se citra dubium, & desperatis cæteris restare, ut saluti consuleret. Hic Aquilifer cum verbis non proficeret, confidenter, frenum equi Cæsaris corripit, volentemque eluctari trahit, ac retinet. Tum elatâ, ventilatâque aquilâ palantes revocare milites, voce, & intrepido vultu sistere, hæsitantésque inter spem, & desperationem animare. Inter turbam accedentium Cæsar è manibus tenentis seu dimissus, seu elapsus, videri desijt. Credibile est Aquiliferum militi in agmen cogendo intentum primùm non advertisse discessum. Eo notato, dubitasse fugisset-
ne

ne feriò Cæsar; nec secutum esse, ne subito investigatione, ac fortè supervacaneâ collectos jam milites rursus in pavorem, fugamque converteret. Deinde illo non comparente, nescientem quâ sequi oporteret, hæsisse sollicitum. Denique quando imperatore destitutus repetere pugnam cum paucis non poterat, cum ijs (a) trajecisse fluvium, ut reliquos tuto loco revocaret. Hi, ut quisque redierat ad signa, sciscitabantur de salute Cæsaris. Aquilifer à se, alijsque visum sospitem respondebat, divertisse tantisper, mox affuturum. Nox insicura texit Principis absentiam, & desiderium leniit apud milites. Verùm Aquilifer magis, magisque anxius non ferebat fructum sibi facinoris eripi, cursumque victoriæ sisti. Postero die cum non rediret in conspectum Imperator, diutius militibus imponi non potuit. Eo quæsito quaquaversus, nec invento, nullisque extantibus fugæ vestigijs, omnes uno impetu mœror afflixit. Captum, cæsúmve, aut aquis haustum querebantur, fugituri iterum, nisi rescissent

(a) *Idem.*

issent hostem procul jam fugisse. Aquilifero sæpius asserenti, alterum Imperatorum à se peremptum, alterum incolumem visum, jam non habebatur fides, & obrectatione gloriæ (ut fit) clàm exprobrabatur plausûs affectatione finxisse, quæ diceret, nullo facti teste, nisi absente, vel mortuo. Id quoque faciebat contra Aquiliferi narrationem, quòd rumor è castris hostilibus ferebat, Rudolphum quidem fauciatum, sed manu unius è suis imprudentis: cæterùm delatum Martiopolim vivere. At Saxones id commenti erant eo consilio, ut Henricianis eriperent decus cæsi Rudolphi; quem interiisse, pòst paulò constitit. Non desistebant interim Henriciani Cæsarem investigare. (a) Sex diebus quæsitus frustra, pro deplorato habitus est, creditumq: in utroq; exercitu, Imperatorem utrumque occidisse. Septimo die Aquilifer, cum mota castra essent, forte inambulans diverterat à socijs. Is in usu familiari comis, aditu facilis, ac mirum quàm affabilis erat, cæterùm (b) nemoribus, alijsque locis solis

(a) *Sabellie. Blond.* (b) *Guib. Abb.*

solis delectabatur. Olim adolefcens itare folitus ad anachoretam, quo magiftro bonas artes didicerat, ac militarem difciplinam, ab eo quoque amorem quemdam feceffus, & folitudinis hauferat. Non quòd juvenem ad otium dulcedo inertiae pelliceret, fed magnis cogitationibus illuc ducebatur. Plerumque meditabatur in umbrâ folus, quid in folc, atque in acie poffet. Eo die volvebat cum animo fuo mœftus perturbationem fubitam rerum: Cæfarem ereptum militibus in articulo victoriæ: Conradum Cæfaris filium præftanti quidem indole præditum effe, fed adhuc ætate tenerum, & immaturum imperio. Deinde inconstantiam humanarum rerum cogitabat. Perquàm mutabilem effe tum fortunam, tum voluntatem mortalium. Mathildem heu, quam crediderat fidei, ac pudicitiae abfolutiffimum exemplar, & vel ideo non fuo tantum, fed cunctorum amore digniffimam, turpiter defeciffe, odio jam, & Cæfarianis perfequendam armis. Inter has cogitationes crebrò fufpirans, incertusq; animi longius à castris progreflus eft. Spe-

lunca

lunca erat in eo tractu, aut speluncæ similis latebra occultissima, ad quam fortè pervênit. Vestigijs ad os ferentibus, aut aliâ causâ motus accessit, & more humani ingenij oculos in interiora coniecit. Ibi quantum obscuro loco prospici poterat, jacentem hominem vidit. Miserum esse crebri, quos edebat, gemitus indicabant. Nec anachoretæ, aut rusticani hominis cultus erat, sed militis. Qui ex acie cum Henrico fugerant, nec ad signa redierant, alij aliò palantes (a) incredibile dictu est, quas calamitates non solum in fluvijs, paludibusq; pertulerint, sed & in agris, ac silvis. Fortes viri plurimi ab agrestibus trucidati securibus, ac fustibus; multi nobiles à vilibus capti, multi fame premente arma, equos, vestes frustulo cibarij panis mutare compulsi. His miseris immixtus Cæsar ipse in fugâ, varijs casibus, periculisq; jactatus, nactus denique, quam dixi, latebram subierat. Ibi memorabili fortunæ ludo ex Imperatore specûs incola victitarât, squalidus, pavens, nec satis antri sui tenebris tectus.

Non

(a) *Bruno*,

Non jam de imperio sollicitus , quod amissum penitus existimabar, sed de vita anxius trepidavi , cùm adesse vidit inspectorem. Eo loco rerum inscium, & à suis pro deplorato habitum Aquilifer præter suam, & omnium spem, vel primus, vel in primis invênit. Qui postquam agnovit Cæsarem, miseratus simul, & a-versatus indignum Principe latibulum , deinde lætitiâ gestiens, (a) surge , Henricce Cæsar, inquit, magna tecum resurget gloria. Saxones fugêre, quia, quemadmodum narrare cæperam , Rudolphus occubuit. Tu festina, insta fugientibus , & partâ victoriâ frueri. Henricus audito juvene, atque agnito, quasi suscitatus è somno , adhuc tamen de suâ felicitate dubitabat. Re in castris nunciatâ frequentes alij confluunt ad Imperatorem velut prodigio restitutum. Circumfusi lætis vocibus confirmant omnes ipsum vicisse, Rudolphum occidisse , Numen ab ipso rebellium capite orsum in omne nomen Saxonum expetiturum pœnas. Henrico jam non tantum præbenti aures,

B

sed

(a) *Viterb.*

sed ultro flagitanti narratur Aquiliferi facinus; quod hunc in modum patraverrat. (a) Diffugientibus socijs in aciem hostibus irruerat Rudolpho infestus, aquilæ hastili pro lanceâ utens. Quandoque heroicus animus virium, fortunæque fiducia consilia cauta pro ignavis habet. Portabat juvenem prævalens equus, quo in Rudolphi custodes corporis effusis habenis evehitur. Primis, qui se, atque arma objecerant, incredibili celeritate prostratis, sequentium occupat ictus, hunc equo pulsat, illum hastili excipit, alios ipso audaciæ miraculo turbat. Quibus hinc, atque hinc submotis infert se medium, & cruento telo viam sibi ad hostem facere pergit, magnisq; vocibus, si vir sit, vocat ad pugnam. Erat Rudolphus & alijs, & illo imprimis, quod dixi, prælio clarus, quo virtutis, & armorum præstantiâ mortem evaserat. Tanta vir jam victoriâ, & parto Cæsaris nomine ferox congregi cum vocante non renuit. Aquilifer obstantium perruptâ morâ procurrit in hostem, quem nulla satis virtus,

(a) *Tyr. Viterb. M. Chron. Belg.*

rus, nulla arma texêre. Infestam vexilli
cuspidem sub ejus pectus sic fixit, ut illa
perfoderit. Concurrentibus ad opem fe-
rendam Saxonibus, altero ictu brachium
Rudolpho præciditur. Incertum, idne
factum ab aliquo Saxonum imprudente,
cujus ferrum ab Aquilifero declinatum
peccarit in Imperatorem, an Aquilifer
ipse hastili, quo inter confertos jam uti
non poterat, strenuè in lævam translato,
dextrâabilem ensẽ strinxerit, & repe-
titum Rudolphum mutilarit. Certè usum
hîc etiam (a) gladio Viterbiensis auctor
est. Mox surrigens aquilam Imperatoris
sanguine respersam, tantum aciei vel stu-
porem, vel terrorem incussit, ut impunè
abscesserit Henricum retractaturus ex
fugâ. Proximi quique circum Rudolphũ
substitere, & lugubri, inconditòq; clamo-
re turbavere socios. Dum hæc pars Saxo-
num Imperatorem semianimem in ten-
torium reducit, pars altera ignara tanti
casus, emensâque spatium illud totum,
quod Henriciani in prælio occupaverant,
castris eorum potitur. Quibus direptis ad

B 2

sua

(a) *Viterb.*

sua ovantes, prædâque onusti redibant, cum cognitis Rudolphi vulneribus, quorum alterum lethale, alterum deforme erat, lætitiâ repentè in luctum versa erat. Illo mox elato Martiopolim vicinum oppidum, ibique post paucas horas extincto consternati diffluxere, visi sibi ex victoribus victi. Ita deserti à suis Aquiliferi virtus pro numero fuit. Rarum, immo singulare decus, ut unius stantis manu fugientibus sit parta victoria. Henricus ejusmodi narratione, ac (a) publicâ famâ adductus, rem incredibilem ut crederet, juvenem complexus, inter excusationes incredulitatis suæ, fassus palàm in acie suâ nullum fuisse virum, præter ipsum; appellavit victorem unicum, exercitûs decus, Imperatoris, atque imperij servatorem genium. Pollicitusq; se memorem tanti accepti officij excogitaturum præmij genus eo non indignum, prodijt in apertum, castrisque restitutus excipitur ingenti omnium lætitiâ, summâque Aquiliferi laude. At Saxones compertâ Henrici incolumitate animos, quos

(a) *Viterb.*

quos colligere cœperant , despondere. Cæsar rebus in Germaniâ sic ad votum fluentibus comparavit sese ad bellum in Italiam transferendum. Cumque inaudiisset Rudolpho à Saxonibus strui Martiopoli sepulchrum regio apparatu, interrogatus cur id pateretur, (a) utinam, inquit, inimici mei omnes æquè splendide jacerent. Proreginam Italiæ Mathildem infestis signis petere statuit. Ad eam expeditionem maximè conductura visa est Aquiliferi virtus, ut, quo adminiculo erecta erat fortuna imperij, eodem innixa staret. At ne videretur à juvene exigere operam novam prioris oblitus, quam præmij expertem relinqueret, venit in mentem ornare eum connubio , quale filium ipsum Cæsaris deceret. Et Conrado filio suo, heredique imperij statuerat sponsam eligere. Ambobus illis, quas desponderet , circumspicienti occurrere sorores famâ patris illustres. Robertus erat cognomento Guiscardus , Normanni nominis potentissimus dux , qui illatis Italiæ armis potitus Apuliâ, ac

B 3

Siciliâ,

(a) *Frising.*

sua ovantes, prædâque onusti redibant, cum cognitis Rudolphi vulneribus, quorum alterum lethale, alterum deforme erat, lætitia repentè in luctum versa erat. Illo mox elato Martiopolim vicinum oppidum, ibique post paucas horas extincto consternati diffluxere, visi sibi ex victoribus victi. Ita deserti à suis Aquiliferi virtus pro numero fuit. Rarum, immo singulare decus, ut unius stantis manu fugientibus sit parta victoria. Henricus ejusmodi narratione, ac (a) publicâ famâ adductus, rem incredibilem ut crederet, juvenem complexus, inter excusationes incredulitatis suæ, fassus palàm in acie suâ nullum fuisse virum, præter ipsum; appellavit victorem unicum, exercitûs decus, Imperatoris, atque imperij servatorem genium. Pollicitusq; se memorem tanti accepti officij excogitaturum præmij genus eo non indignum, prodijt in apertum, castrisque restitutus excipitur ingenti omnium lætitiâ, summâque Aquiliferi laude. At Saxones compertâ Henrici incolumitate animos, quos

(a) *Viterb.*

quos colligere cœperant, despondere. Cæsar rebus in Germaniâ sic ad votum fluentibus comparavit sese ad bellum in Italiam transferendum. Cumque inaudiisset Rudolpho à Saxonibus strui Martiopoli sepulchrum regio apparatu, interrogatus cur id pateretur, (a) utinam, inquit, inimici mei omnes æquè splendide jacerent. Proreginam Italiæ Mathildem infestis signis petere statuit. Ad eam expeditionem maximè conductura visa est Aquiliferi virtus, ut, quo adminiculo erecta erat fortuna imperij, eodem innixa staret. At ne videretur à juvene exigere operam novam prioris oblitus, quam præmij expertem relinqueret, venit in mentem ornare eum connubio, quale filium ipsum Cæsaris deceret. Et Conrado filio suo, heredique imperij statuerat sponsam eligere. Ambobus illis, quas desponderet, circumspicienti occurrere sorores famâ patris illustres. Robertus erat cognomento Guiscardus, Normanni nominis potentissimus dux, qui illatis Italiæ armis potitus Apuliâ, ac

B 3 Siciliâ,

(a) *Frising.*



Siciliâ, nunc ad Græcorum imperium sibi subijciendum grassabatur. Hunc simul ut à Mathilde armis juvandâ deduceret, simul devinciret sibi, cogitavit filiarum ejus alteram petere Conrado conjugem, alteram Aquilifero. Missi ad Guiscardum oratores. Ubi cum Aquilifero actum de petendâ bello Mathilde, juvenis audito Mathildis nomine tacitus fremuit. Tangebatur occultum animi vulnus. Æstulare varijs intus motibus, famam Mathildis priorem conferre cum præsentī, hac impelli quidem ad bellum, sed avocari pristinæ virtutis, ac mutæ necessitudinis memoriâ, ipsâque reverentiâ sexûs. Ubi nutantem advertēre proceres alij, eò magis institere, iret, atque ulcisceretur impotentem puellam, generis, ac sexûs sui probrum, inimicam consanguinei Cæsaris, Hildebrandi præstigiatoris amicam. His expensis Aquilifer, etsi repugnabat animus in Mathildem ire, tamen officij sui esse censuit Principem sequi. Cùm denique se in Italiam proficisci paratum ostendisset, tanta in castris hilaritas, & gratulatio militum fuit,

fuit, ut victoriam præciperent, triumphumque sibi, non bellum, decretum dicerent. Inter hæc læti nuncij afferuntur Henrico de præmissis in Italiam copijs. (a) Conjunctas hæc cum exercitu penè totius Longobardiæ improvisò ad Mantuam aggressas Mathildanos. Victos eos, atque in fugam conjectos eodem die, quo Rudolphus ab ipso victus occiderat. Geminâ victoriâ exultans (b) Italiam per Boios ingressus, Veronam pervenit, quam in bellis Italicis sedem armorum habuit, ac receptum. Urbs splendore, ac magnificentiâ nitet, & maximè illustribus antiquitatis Romanæ monumentis. Amplissima durat amphitheatri moles, cujus exterior paries quatuor zonis insignibus cinctus, totidem columnarum ordinibus quadruplici opere in mirandam altitudinem extollitur. Ibi splendidè exceptus est Henricus inter gratulationes civium voventium, ut Romanorum veterum Imperatorum victorias, ac triumphos æquaret. Mathildis arcem sibi in rupe ultra Padum amnem incolendam, mun-

B 4

nien-

(a) *Bertold.* (b) *An. 1081.*

niendamque delegerat. Canisium arcis nomen erat visendæ situ, vetustóq; opere. (a Ad Apenninum montem in agri Rhegiensis finibus rupes est teres & undique abscissa, quam inter colles sub arbutis latentem, & vulgò incognitam ab avus Mathildis, dum venatur, sorte observatam amplexus erat inexpugnabili munimento. Planitiem verticis occupat castello, triplicique murorum ambitu firmaverat. Subjectam vallem interfluit amnis Lencia, qui ex Apennini jugo præceps, ac torrens, inde leniore tractu ripis partim silvestribus, partim cultis in vicinum Padum evolvitur. Alia quoque loca munita non pauca habebat in ditio- ne Mathildis, quippe quæ nulli Regina- rum vel opulentiâ, vel generis nobilitate cedebat. Elucebant in puellâ præstantes corporis, animique dotes. Formæ digni- tatem commendabat juvenus, eaque re- bus gerendis matura. Quamvis innupta, & utroque parente orbata, vi mentis par erat regendæ Italiæ, quæ pleraque ei pa- rebat partim optimo jure, partim Cæsa-
rum

(a) *Pigna. Albert.*

rum beneficio. Etsi (a) Proregina Italiæ, tamen Canusij Comes, quod ibi plurimum degeret, & magna Italiæ Comes vulgò appellata. Orta erat domo imprimis clarâ, utpote quæ propinquâ cognatione attingebat Cæsarem. Erudita supra fœminarum modum linguas complures callebat (b) etiam latinè docta. Ad hæc pudicitia, pietatis, & virtutum generis omnis famâ mirificos amores nuper excitarat per Europam. (c) Nunc obtinebat quidem eandem opinionem probitatis in quorundam animis, verum apud plurimos, ac præsertim in castris Cæsaris ingenti flagrabat infamiâ. Utri fallerentur, belli exitus aperiet. Ipsa, ubi primum comperit in se comparari bellum à Cæsare, collecto civium exercitu auxilia externa circumspexit, atque advocare statuit. Primus occurrit animo juvenis Belga, quo nec cariorum habebat quemquam, nec habere opportuniorem bello poterat. Reputabat secum hunc genere, ac fortitudine insignem, post memorabilem nuper in patriæ finibus partam

B 5

fin-

(a) *Pigna.* (b) *Florentin.* (c) *Lamb. Schaf.*

singulari certamine victoriam, Antuerpiano limiti præfectum esse. Verùm ad majora virtutis opera, præmiâq; natum, & ut vaticinio editum erat, Ducem, & inter Principes inclytum fore. Deinde quodnam esset illud inusitatum decoris genus, ad quod destinabatur juvenis, suspensâ mente scrutabatur. Certè illi nihil regium deesse, præter regnum. Quid si Dei consilio, ac numine electus erat ad se juvandam, nobilitandus inter omnes Principes reportatâ de Cæsare victoriâ? Ejusmodi cogitationibus læta, atque animata (a) litteras dedit tum ad alios Transalpinos procures, tum imprimis ad eum limitaneum præfectum, seu, ut vocabant tunc, Marchionem Antuerpiæ. Sub hæc acceptâ ad Mantuam clade audit Henricum acie eodem die in Saxoniâ conflixisse. De quo prælio incredibilia, nec non primâ fonte pugnancia afferebantur; Henricum victum esse, & victorem; periisse eundem, & vivere. Verùm posteriores nuncij celebrarunt, Rudolphum signiferi Henriciani manu cæsum, inven-

(a) *Domnizo.*

ventúmque in latibulo Henricum , & victoriâ ovariantem adventare. Tanti belli expectatione trepidavêre populi, qui regebantur Mathildis imperio, Longobardi, Tusci, Ligures. Ipsa infestas Henrici vires jam experta ad Mantuam, tamen Henricianas omnes copias minùs sibi timendas audiebat, quàm unum earum Aquiliferum, admirandi roboris juvenem. Quippe qui ad victoriam Saxoniam attulisset omne momentum. Contrà non suppeditabatur speratum à Transalpinis auxilium , nec adveniebat ille Antuerpiæ Marchio, qui unus videbatur posse cum Henrici Aquilifero virtute componi. Ecce autem nuncij pleni stuporis superveniunt Mathildi , Belgam illum Antuerpiæ Marchionem in castris Henrici visum , sub hoc militare , cum hoc advenire infestum , denique Marchionem illum eundem esse atque Henrici Aquiliferum , cæso Rudolpho terribilem. Obstupuit Canusina ad hanc narrationem. Angebatur, cùm reputaret sibi cum eo bellatore nuper intercessisse necessitudinem , & animorum conjunctionem

tionem summam, abruptam nunc iniquitate fortunæ. Ad litteras autem suas responsum deinde ab Aquilifero accepit eò acerbius, quòd intellexit profectum ab animo quidem modesto, & adhuc reverenti, sed tamen prorsus averso. Respondebat is in hanc sententiam: cur Henrico, non Mathildi militaret, suam ipsa famam consuleret; se quidem eâ non sine ingenti dolore cognitâ suum consuluisse officium. Proregina famam suam tandem exploratam, & cognitam quo animo tulerit, infrâ prodetur: nunc illud ad ejus mala accessit, quod certis nuncijs accepit Liguriam totam, multosque, ut in Longobardiâ, ita & in Tusciâ defecisse, (a) ratos dominam amentem, quæ juvenis, & innupta Cæsaris tantæ potentæ auderet adversari. Hunc junctis binis exercitibus formidabilem adesse, huic Germanos procures, Italosque sub signis esse: quin expectari Guiscardum cum Normannicis copijs, Cæsari affinitate, & armorum societate jungendum. Missos oratores filiarum ejus unam in matrimonio

(a) *Greg. VII. ep. 3. l. 9.*

nium Conrado Principi, alteram Aquilifero petiuros. Mathildis inter hanc defectionem suorum, & hostium multitudinem non habebat, cujus ope niteretur. Cæterum cum tanti terrores circumstarent, animum minimè despondit, cujus magnitudine sexum vicerat. Compertaque legatione Cæsaris ad Guiscardum de nuptijs & auxilijs orandum, ipsa contra litteris institit, ut neutrum concederet Normannus, sed subsidio sibi adesset, causæque meliori. Interim ditionis suæ locis valida imposuit præsidia. Curæ imprimis fuit Canusio providere, muros firmare extructis turribus, multoque milite comunire. Neque enim dubitabat, quin summo impetu, atque odio impugnaturus esset principem illam arcem Henricus, in quâ se hospitem ante tres annos ludificatum fuisse à Mathilde, & ab Hildebrando ejus præstigiatore querebatur. At Cæsar pluribus oppidis, atque arcibus vario Marte tentatis in transcurso, cum, quid destinasset animo, lateret, improvise viâ Æmiliâ progressus, (a)

omissa

(a) *Domnia*

omisso in præsens Canusio, petijt Romam, atque obsedit. Verùm non fefellit providentiam Canusinæ, quæ eò (a) quoque præsidium validum præmiserat. Henricus insigni dolo usus ad intercipiendam urbem, prodigioso defensionis genere principiò repulsus est. Erant intus seditiosi nonnulli, qui ab eo facerent. (b) Per hos curaverat in ædificia Vaticana conjici ignes, ratus, quo tempore accurrerent præsidiarij restincturi incendium, se parte aliâ perrupturum urbis portam defensoribus destitutam. Et videbatur procedere res; jamque hinc lucentes flammis primæ domus pestem ulterioribus minabantur; inde Henriciani milites muris instabant. Hærebantque Mathilduni ambigui, utrò se converterent; cùm vir canitie visendus supervenit cunctantibus. Quibus missis ad muros propugnandos, ipse solus processit ad incendium. Mira dictu, visûque res. Id ille gestu manus unico stitit, atque extinxit, spectatorum silentio primùm orto ex admiratione, deinde plurimo clamore ad insolens pro-

(a) *Crantz.* (b) *Bertold.*

prodigium secuto. Obstupuere Henriciani, frementésque id imputavere præstigijs Mathildani amasij. Diu tenuit obsidio. Cujus eventum dum anxia Proregina expectat Canusij, post lætos plures nuncios de invictâ præsidiariorum suorum constantiâ, tristes denique accepit, Romam captam esse. (a) Rem autem miro hoc modo gestam. (b) Mediâ die, cùm obsessi pariter, obsidentésq; pugnâ, atque æstu fessi sese ad curanda corpora recepissent, repentè murum Vaticanum, quâ negligentius servabatur, grandibus verberatum ictibus. Excitatos præsidarios illuc concurrisse. Verùm tam validâ manu interim esse pulsatum, ut perruptus viam dederit, quæ hominem transmitteret. Principiò eum, qui ingressum moliebatur, ruderibus, & evolutâ nube pulveris tectum, ingestâque telorum vi tantisper prohibitum latuisse. Mox per saxa, & tela irrumpentem apparuisse juvenem, qui murum perfoderat, lævâ scutum, dextrâ Cæsareum vexillum præferentem, & insolentiâ roboris,

(a) *An. 1083.* (b) *Vita Hen. IV. Monach.*

boris, atque audaciæ obstupefecisse Romanos. (a) Hunc insignem corporis, atque armorum specie principem ipsum signiferum Marchionem Belgam agnitum esse. Accedentibus Romanis intulisse trepidationem hastili illo intentato, quo nuper in acie tantam ediderat cædem. Exemplo ejus, aquilæque in muro propositâ animatos Cæsarianorum promptissimos partim per eundem aditum, partim aliâ per scalas admotas, quæ cuique proximum fuit, subsecutos. Ita consternatos fuisse præsidiarios ab Aquilifero, ut minor moles fuerit socijs intrantibus muros, quàm ascendentibus fuerat. Inde stragem ab eis, fugamque à Romanis factam. Tum apertam urbis portam. Verùm Cæsarem hâc ingredi dedignatum, gloriosius per muri ruinam, & victoris (b) Aquiliferi vestigia subire voluisse. Ergo ejusjussu mœnia, amplissimæque duas porticus tam latè perfractas esse, ut exercitus structis ordinibus invehì posset. Ita expugnatam Romam Leoninam: postmodum (c) reliquam urbem

(a) *Malmesb. Antoni.* (b) *Pandulph.* (c) *An. 1054*

hem corruptis pecuniâ civibus venisse in potestatem. Jâmque admotis copijs oppugnari castrum. Mathildis cùm hæc intelligeret, & Marchionis quidem illius fatali manu cladem rursus acceptam, incredibili dolore affici alternis odij, atque amoris affectibus comoveri, hære aniceps consilij, quonam modo Romanæ arcis succurreret. Una ratio erat, reliquas suas copias Romam traducere: sed ita Canusio, aliisque locis creari periculum videbat. Dum hæc animo versat, ecce ad eam speculator incerto vultu pavens accurrit. Nunciabat exercitum grandem improvisò conspectum (a) in vicino agro Mutinensi, & infestis signis Canusium versus tendere, duce quodam Marchione. Quàm subita, ac certa hæc, tam mira Mathildi visa. Cæterùm non segniter irruptioni Marchionis illius, quisquis erat, sustinendæ pro viribus se accinxit. Raptim omnia stimulante fortunâ agebantur à Canusino milite, & in quo quisque cessasset, prodi ab se Mathildis salutem rebatur. (b) Cæsar cum exercitum

C

clàm

(a) *Vita Ans. Luc. Domnizo.* (b) *Florentin.*

clàm per Longobardiæ proceres cogendum curaverat, & in Mathildem subito immittendum, ut belli clade pressam prohiberet opem ferre Romanis. Marchio, qui huic expeditioni præerat, fretus suorum multitudine, & Mathildanorum paucitate existimabat, se his facile superatis cum victrici manu affuturum tempori castro Romano expugnando. Mutinensem agrum ingressus Sorbaram arcem improvise adventu occupare conatus est: at ingruentibus tenebris circumfedit. Securus proximæ victoriæ nec fossam castris circumducere laboravit, nec vallum. (a) Nox adulta erat, cum ex adverso per vicinos campos Canusinus paucorum, sed lectorum militum globus signis silentibus advolat. Præibat eleganti specie dux expedito equo vehens, quem insigni dexteritate flectebat. Agmine subsistere jussu, ut erat sagax, & providens, in editum locum provehitur. Ex hoc, atque ex tenebris Marchionis castra visu facilia erant. Jacebat passim solo fusus miles, rari interlucebant ignes, non castren-

(a) *Ijdem*

castrensis strepitus audiebatur, non vigiles in stationibus apparebant. Ubique signa præfidentis, & consopiti exercitus. His cum curâ observatis dux suos repetit gaudens, parvam instruit aciem, & ad irruptionem paucis hortatur: (a) Item cum, inquebat, milites, junctis ordinibus, atque animis. Ad hostis castra usque pergite silentio: ibi vocem tollite subito, & Divi Petri nomine conclamato irrumpite. Hoc sit vobis pugnae signum, oménque victoriæ. Omnes quidem ista verba ducis, sed plus moverat animus, & virtus hortantis. Ejus alacritatem, ac fiduciam, quarum notas in formoso vultu occulebant tenebræ, declarabat vivida vox, licet suavis, & gracilis. Atque eo solo indicio feminam agnosceres. Mathildis hæc erat puella virilis animi, & à teneris educata viriliter, (b) militiæq; rudimentis imbuta. Quæ explorato consilio, atque itinere hostium, (c) eodem die delectos suorum eduxerat. Confisa superis statuerat pro opportunitate vel in arcem obsessam introducere subsidium,

C 2

vel

(a) *Florent.* (b) *Pigna.* (c) *Florent.*

vel cum Marchione ferro decerneret. Nunc animadversâ obsidentium incautâ securitate, suam occasionem, ut erat, existimavit. Ibat in eos imperterrita, sed hoc uno tamen, quòd Marchionem peteret fortè Belgam suum, trepida ; non metu ejus, sed caritate. Peramicum nuper, licet nunc hostem, odissè non poterat, mallétque in castris invenire Marchionem alium, quem armis opprimeret. At videt se fatali lege belli conjectam in discrimen, quo, nisi officium deferere velit, perire debeat ipsa, vel eò niti, ut ille pereat. Ergo in castra hostium impetum facit. Henricianos ignoto, atque horribili sonitu repentè excitos stupor primùm, deinde timor oppressit eò gravior, quòd incompertum esset, quid timerent. Nox horrorem geminabat. Attoniti neque arma, neque fugam corrèpere, neque omnino providere quidquam poterant. Strepitus, clamor, Mathildis circumsonans armis, & obvios quosque sternens, fauciorum, & morientium gemitus inter tenebras omnia tumultu, ac terrore impleverat. Nullius sub-

subveniente imperio , quasi vecordia
 cunctos Henricianos ceperat præter Marchionem. (a) Is subito excitatus correpto
 ferro, scutoque extra tabernaculum profiliens strenui militis partes (cum ducis
 jam non posset) explicuit. Circumventus ab hostibus dextrâ, sinistrâ, solus, atque incognitus inter tela nunc vitabundus, nunc invadens incursum sustinuit usquè, donec pluribus acceptis vulneribus corruit. Cecidere alij non pauci, reliqui fusi, fugatique, & castra impetu capta. Arma, & signa militaria cum tentorijs, impedimentisque omnibus, & quingentis equis, centuriones sex, primores nobilitatis Longobardicæ centum, & Parmæ Episcopus venere in potestatem, Dux Canusina tribus tantum desideratis campo, victoriâque potitur, & cumulatâ prudentiæ, ac fortitudinis laude. Arcem Sorbaram triumphantis more ingreditur inter plausus, & laudationes oppidanorum liberatrici acclamantium. Tunc ejus fortitudo celebrata est ijs elogijs, quorum alia in alijs historicis memoriæ

C 3 pro-

(a) *Vita Ans. Luc. Domniz.*

proditæ sunt. Tres horum Mathildis familiares fuere. Primus piationum præfectus, qui prælio interfuit, prædicat (a) eam generosè ac magnificè, insolitòque mulieribus more, & plusquam viriliter egisse, nullumque ferè metuuisse periculum. Et quisnam, inquit, potentium unquam exercitum suum, ut illa, duxit? Alter Domnizo Poëta, cujus opus hodieque extat de Proreginæ rebus historicâ fide conscriptum hexametris, canit Mathildem nocte, dièque bellantem claruisse victorijs, & nominatim illatâ Henrieanis ad Sorbaram clade. Tertius Hugo, (b) meritò, ait, nominetur Virago, quæ virtute animi etiam viris præibat. Malmesberienfis quoque ferè horum æqualis scribit, Mathildem armata virorum agmina egisse in bellum, antiquis Amazonibus non disparem. Suppar ætate Frisingensis prodit, eandem instar fortissimi Principis, ac velut Deborah fuisse. Nuperrimè Florentinus (c) non dubitavit in hanc sententiam magnificè scri-

(a) *In vita Ans. Lucens.* (b) *In Chr. Virdun.*

(c) *Memor. di Mathil.*

scribere, Mathildem tranquillitati animi
semper compositi junxisse spiritus aded
militares, & masculos, ut feminam belli-
cosiorem proferre non possit historia.
Quo nec minus dicendum putavit scri-
ptor egregius, nec majus dicere potuit.
Victrix Amazon inter ejusmodi acclama-
tiones civium, & luctus captivorum, Sor-
baram arcem inuenta est. In vultu, cultu-
que nihil non erat plenum concinnæ ma-
jestatis. Oculorum aciem vividam simul
ac placidam circumferebat ad veneran-
tes, media inter resalutantem, & dignita-
tis retinentem. Gestus, habitusq; cor-
poris non exultans, sed ita modestus pa-
riter ac militaris, ut etiam captivos in ad-
mirationem raperet. Ajebant dolendum
Mathildem à mago corruptam, egregiam
cæteroqui principem, & dignam, quæ
pudica esset. At cives, atque inter eos
eques eximiâ fide Lanfrancus, prædica-
bant Amazonem suam omni genere vir-
tutum, atque imprimis fortitudine, ac
pudiciâ præstantem, laudibus sexûs u-
triusque excellere. Illa & vituperijs im-
mota, & laudibus major, quàm vicisse

gaudebat, tam sine sanguine pro suâ clementiâ vicissè mallet. Nempe magnis animis succedit post victoriam adversus hostes victos humanitas. Habebat sollicitam Cæsarianorum læsorum salus, atque imprimis incolumitas prostrati Marchionis. Quem non apparentem, & requiri jussum, ubi audijt inter occisos repertum exanimem, dolore corripitur. Id mœrorem temperavit, quòd hunc Marchionem, non Belgam Aquiliferum, sed alium esse, Obertum nomine, comperit. Verùm non diuturna luctûs intermissio fuit. Jam antè relatum erat obscuro rumore Aquilifero illi nescio quid funesti Romæ in cellâ subterraneâ contigisse. Sed nihil dum creditum erat, præsertim cùm id sit clarorum ducum fatum, ut famâ sæpius elati reviviscant. At idem deinde confirmatum est ab alijs. Captivi super eâ re interrogati respondere frementes, juvenem fortissimum, cùm armis non posset, Romæ veneficio victum haud dubiâ Mathildani præstigiatoris operâ. Nunc jacere moribundum, aut mortuum ex veneno, quo prostratus sit

Ma.

Mathildani illius amasij fraude, ac flagitio plusquam hostili. Voluit Proregina rei feriem audire, quæ à Lanfranco explorata sic narrabatur. Marchionem Belgam, cum nuper Romam expugnarat, perrupto muro Vaticano æstuantem victoriâ, & labore, per muros, ac plateas, quâ quemque hostium abstulerat metus, persecutum. Sanguine eorum, & suo sudore madidum, inhærentemque fugientium tergis, cellam subterraneam fortè subijisse. Ibi latentem invenisse pestem. Inde regredientem, nullo licet accepto vulnere, pallere, arma remittere, submitti genu cœpisse, atque inter suorum manus, ac gemitus relatum in tabernaculum prope Tiberis ripam. (a) Mali causas fuisse has, aut unam ex his; vinum veneno corruptum in vase isthîc hostili fraude inventum, & ab incauto bibitum; æstum nimium subito loci subterranei frigore irritatum; noxios denique ex Tiberi vapores. Primam illam causam de veneno ab Henricianis odiosè jactari, addentibus (b) eodem alios undecim periisse. Certè

C 5 qui.

(a) *Malmesb.* (b) *Pegavien.*

quidem Marchionem ægritudine correptum, mox amissis capillis, & unguibus deformatum, pòst febris conflictatum in speciem lentâ, sed virulentâ, perpetuâq; languere. His auditis, animo ægra Mathildis extra conspectum se proripuit. Lanfrancus, Domnizo, aliique familiares ejus, sicut acceptas ab Aquilifero clades gravissimè tulerant, ita postquam aut desiturus ille mox erat, aut jam desierat esse, quem timerent, egregij bellatoris calamitas inimicitiam abstulit. Irâ in misericordiam versâ memorabant inter se, invictum robur, & bellica opera juvenis illius, ut virtute, ita infortunio ad exemplum insignis. At Mathildis quantò altius icta, quâ vi affectuum perculsa fuerit, æstimari non poterat, nisi à paucis intimis, qui causas eorum à principio perspectas habebant. In oculis erat moribundus ille carus hostis, à quo summa omnia simul formidaverat ex diffidio, simul speraverat ex vaticinij fide. Aspergi quoque se maleficij infamiâ sentiebat, quando præstigiatoris & amore capta, & usâ ministerio ferebatur. Sic affectam, dolore

lore non sedato, sed victo , Amazonem novis curis implicuit repentinus adventus Cæsaris Româ redeuntis. Non ambigebat hunc nocturnam cladem ad Sorbaræ muros acceptam, si posset, ulturû. Ergo irati impetum ut sustineret, omni ope providit. Verûm non jam bellum adornabat Henricus, sed (a) in Germaniam redire festinabat, Romanæ arcis obsidione desertâ. Recedere compulerat, tum adventus Roberti Guiscardii partes Mathildanas secuti, tum creatus in Germaniâ novus à Saxonibus Cæsar, in quem erat properandum. Mœsta rerum facies erat in castris Henrici. Pudebat recessisse Româ quasi fugatum, omni per æstum pestiferum amisso præsidij Romani milite, & salute Aquiliferi tantûm non desperatâ. Novam maculam ad Sorbaram à Mathilde susceperat, & relinquebat inultam. Conradum Cæsaris filium nunquam satis laudatæ indolis Principem, vel maximè afficiebat valetudo Aquiliferi, amicissimi capitis. Erat Conradus ætatis flore, venustate formæ, aliis-

(a) *An. 1085.*

aliisque ornamentis corporis, & animi, propter quæ Belgam Marchionem amabat, ipse amabilis. Minima laudum ejus dicenda, quòd Cæsaris filius esset. Natus inter strepitus armorum, atque educatus in castris, multisque exercitus casibus, in spem præclari Imperatoris adolevit. Ab ipsis incunabulis miles, antequam præire posset, præfuit, triennis à patre Prorex Lothariæ Brabantinæ creatus. Hinc in Belgas benevolentia, hinc amor in Belgam Marchionem oriri cœpit, sed maxime conciliari ex ejus suavissimo usu, rerumque gestarum famâ, atque adeo conspectu. Belgæ quoque probitas sensim pueri Principis tetigit animum. Neque verò magis quidquam in Aquilifero laudarem, quàm quòd inter ætatis illecebras, licentiamque castrorum, atque exempla Cæsaris voluptatum studiosi, probos, castosque mores perpetuò colerit, haud sanè temporum juvenis. Conradus vel monita Bertæ matris, vel inductione animi oculos in ejus virtutes intenderat. Certè quasi effectus ad exemplum Aquiliferi, insolens malarum artium,

artium, jam tum pollicebatur (a) probum pudicum, & magnanimum Principem, quem postmodum exhibuit. In venatu, in decoris armis, ac militaribus equis, non in epulis, ac voluptatibus ejusmodi libidinem habebat. Quâ laude nulli dissimilior erat quàm patri Cæsari, nulli, quàm Aquilifero similior. Atque hæc consensio morum, & studiorum inter eos amicitiae non omen modò, sed & vinculum fuit. Is animorum nexus tantò arctiùs adstrictus erat, ex quo per ætatem intellexerat Conradus, quid Aquilifero Cæsar, quid ipse Cæsaris hæres deberent, tantum nempe, quantum persolvere difficile esset. Nimirum eo rerum cardine, quo utrique peribat imperium, aut veriùs cum victoriâ Saxonica jam perierat, id Belgam cæso Rudolpho victorem utrique restituisse. Hinc in ingenuo Conradi pectore incaluit vis amoris ex sensu gratæ memoriæ, atque etiam doloris, quem amici morbus attulerat. Nullum præclaræ indolis specimen omisit amicus Princeps, assiduus ægri lectulo adfuit,

(a) *Vrsperg.*

fuit, nullique pepercit curæ. Cùm medi-
ci, remedijs omnibus frustra tentatis,
censerent revehendum in Belgicam, si
quo modo subveniret cælum patrium,
idque Cæsar jussisset, Conradus à juvene
miserando avelli non poterat. Versabat
animo præclara ejus facinora, nec ullum
præmium esse repensum tantorum in
Cæsarem, ac sese meritorum, tamque in-
defessæ operæ ad mortis usque discrimē.
Jam fatali morbo conflictatum procul
avectum iri, nec, ut signa erant, visum iri
posthac. Inter hæc manantibus ubertim
lacrymis Cæsareus adolescens apud se
non erat, extremisq; implicitus amplexi-
bus recedere non sustinebat. Nec verò
recessit, nisi quando adesse ultrà nequijt
per debitum parenti officium. Sequi Cæ-
sarem debuit rursus de imperio in Ger-
mania periclitantem, moventemque ad-
versus electum à Saxonibus Imperatorē
Herimannum Lucemburgij Comitissæ fra-
trem, Salmensis in Arduennâ Comitē.
Eo bello princeps juventutis Conradus
supra ætatem strenuus multa specimina
virtutis edidit. Vario eventu pugnatum
est.

est. Debellatum denique morte Herimanni, genere , & multis imperatorijs virtutibus clari, dignique, qui gloriosius caderet. Eum, (a) ut fidem præsidij sui exploraret, fortè in castellum quoddam hostili specie irrumpentem femina dejecto in caput molari confecisse fertur. Interim Conradus nullum finem faciebat de amico Marchione cogitandi , & sciscitandi, quî valeret. Febri eâdem continente teneri comperit magno cum incremento doloris sui. Nihilominus intendit animum in occasiones ei non tantum amoris testificandi , sed etiam referendæ gratiæ. Qui Marchionem in Belgicam reduxerant, Cæsari, ac filio referebant, vidisse se feminam nomine Adalaidam, ut natalibus illustrem, ita corporis, animique dotibus. Formæ, ac morum dignitate simillimam esse Aquilifero , (b) cujus erat soror. Tam piè mœrere fratris causâ, tam venustè lacrymari, ut pietatem, & formam dolore comendaret. Permultum illa Principi utrique placuit, sed aliter Cæsari, aliter filio. Pater in amo-

res

(a) *Sigeb. Vita Henr.* (b) *Orderic. Vit.*

res proclivis, Adelaidæ cognitâ specie continuò capitur: verùm Conradi laus prima, vel in primis erat pudicitiae proposito amicum Aquiliferum imitari. Nec castissimo adolescenti placuisset Adelaida ore illo formoso, nisi eo juxtâ ac probitate retulisset fratrem. Hoc sororis nomine, & similitudine fraternorum morum diligere meruit à Conrado. Cæsar, sublatâ nuper è vivis Bertâ, diu conjugè carere non potuit. Multæ, ac nobilissimæ feminæ iminebant tantæ spei, fortunamque, ac nomen Augustæ ambiebant: at una indole suâ, & Conradi commendatione præstabat. Nec enim dubitem, quin hic amici gratiâ sororem ejus præ alijs ad id dignitatis fastigium provehere, quoad opus fuit, contenderit laudatione formæ, & virtutum apud patrem. Sed Henrico jam per se illa nimisquàm arriserat. Igitur nuptiali pompæ constituitur dies. In ejus temporis solemnem lætitiâ non satis fuit amici sororem evehere, nisi & amicum ipsum in gradum celsiorem extolleret. In amoris, & grati animi pignus manifestius non aliâ ornare eum maluit, quàm

quàm suâ ipsius dignitate. Lothariensis regni præfecturâ cedere, atque exui non consensit solùm, sed expetijt. A patre impetravit, ut amico ægro conferretur is titulus, solatio, atque amplitudini futurus, si mortem evaderet; sin oppeteret, funebri saltem ornamento. Ergo Colonia Agrippinæ Henricus augustâ pompâ Adelaidam, postmodum Praxedem nominatam, (a) ducit uxorem, atque (b) eodem tempore fratrem ejus Proregem Lothariæ jubet. Celebratæ magno apparatu nuptiæ, epulæ, equestrésque ludi, in quibus, ut Henrici magnificentia, ita Praxedis venustas, & dexteritas Conradi tenuere oculos. Inter festiva hilaria multus, ut fit, sermo de matrimonijs Principum, ac nominatim de Mathilde, quæ ferebatur, præstigiatore suo nuper mortuo, animum inflexisse ad nuptias. Plures juvenes regio sanguine, & virtutis opinionone præclaros eam petijssæ conjugem, sed passos repulsam. Ultimum advenisse (c) Guelfonem Boiorum Ducis filium,

D

opibus

(a) *Dodechin.* (b) *Sigeb. An. 1089.*(c) *Bertold.*

opibus in Italiâ florentem: Mathildem, obfirmato ad cælibem vitam animo, hunc quoque, rejecisse principio, sed credi tandem secum matrimonio conjunxisse. Concivit id Henrico vehementem iram, cogitanti Guelfonem, & Mathildem, jam antè hostes suos, nunc consociatis opibus, animisque vires auxisse. Ergo repetere Italiam, & iterato bello vindictam in utrumque expromere statuit. Id Praxedi conjugii pollicitus est, minatusque Mathildi, se huic erepturum Italiæ ditionem. Nimis diu mulierem armatam virilia arma tantâ impudentiâ fœdasse. Coacturum (a) se, ut pro hastâ, & gladio colum, & acum, sua tela, tractet inter Augustæ Praxedis ancillas. Secutum est bellum Italicum alterum, quod longè supra prius eminuit tum cladibus, & proditionibus, tum ingentibus aulæ Cæsareæ pariter ac Mathildanæ turbis. Henricus Italiam ingressus (b) Mantuam obsidet. Mox in monte vicino se ostendit Mathildis cum Guelfone, & instructissimis copijs. Præmonita de hostium accessu

(a) *Pigna.* (b) *An. 1070. Domniz.*

cessu propugnationi urbis, quoad potuerat, jam ante providerat. Nunc ex munitis ejus munimentis, in quibus castra posuerat, in occasiones rei bene gerendæ Amazon iminebat. Cum Henricianis frequenti velitatione concurrere, erumpentibus in hostem oppidanis subsidio venire, identidem novas in urbem superpetias immittere. Sed Amazoni, cui animus nunquam, fides obsessorum defuit in urbe, & præfectorum in castris. Interim rescierat per exploratores, cum Henrico adesse in obsidione Conradum, (a) adductâ etiam Augustâ Praxede. Fratrem hujus Marchionem, creatum nuper Lothariæ Proregem, non comparere, sed loco ejus in Aquiliferi munus substitutum Obertum strenuum juvenem, filium Marchionis occisi ad Sorbaram. Ex quibus colligere erat, Proregem illum Belgam vel non valere, vel etiam non vivere (quod erat Mathildi luctuosum) alioqui cum sorore fuisse affuturum. Mantua (b) diuturnâ obsidione pressa, tandem, Mathilde nequidquam opitulanti conatâ, proditione

D 2

dedi-

(a) Gerhohus, (b) Domizo.

deditur (a) Henrico. Qui tantâ urbe positus, armorû terrore, & dolis grassari pergit, & agrum omnem Mathildanû populari cis Padum. Hîc præter Mantuam, loca valida, Gubernulam, & Ripaltam capit. Inde ultra Padum obseffa Minervia in deditiorem venit. Sub hæc copijs maximam partem in hyberna dimissis, reliquas, ut satis valentes, trajecto flumine Mathildi propiùs admovet. Quibus cognitis illa suam occasione rata, nihil cunctandum censuit. Vocat Hugonem è præfectis unum, & præfata se eum exploratæ fidei, virtutisque virum elegisse, ut vinceret, aperit occasionem, consiliûmq; suum de hoste opprimendo. Committit ei delectos mille viros, copiarum florem, & silentij fidem, celeritatẽque commendat. Ille omnia pollicitus, nihil præstitit. Clàm studebat Cæsari proditor, cui rem patefecit, spatiûmq; dedit convocandi copias majores, cum quibus Henricus adortus Mathildanos partim cecidit. partim captivos abduxit, paucis fugâ in vicinum nemus elapsis. Primo deinde vere per-

rex

(a) An. 1091.

rexit terras Mathildis, ac Gue'lfonis ferro, flammâque vastare. (a) Monte Maurello, atque Alfredo, munitis oppidis, in potestatem redactis ad Montem Bellum magni momenti urbem admovit exercitum. Mox adest Mathildis, confidet in propinquo, & Henrico nequidquam impedire conato, præsidium in muros immitit. Horum virtute, Mathildisq; providentiâ tracta est in totam æstatem obsidio. Ecce autem in castra Cæsaris venit primùm fama magni auxilij, mox exercitus numerosus duce viro potente, Cæsaris amico, & ingentis eâ tempestate nominis, Giberto. Hinc terrefacti non pauci Mathildani. Quamprimum de pace, si quo modo obtineri posset, agendum censebant; ad quam & reliqui propendebant belli ærumnis pressi. Videbaturque Proregina tanquam necessariam debere in votis habere. Cæsar quoque pacem optabat. Obtulit Mathildi capta à se loca omnia, suamque in posterum benevolentiam, si modò illa animum induceret pace constitutâ inire cum Gi-

D3

berto

(a) An. 1092.

berto gratiam. Vetus erat inimicitia, ac dimicatio Giberto cum Mathilde. Quæ licet hominem multis, magnisque de causis averfaretur, tamen uti Cæsari, populisque satisfaceret longi belli pertæsis, non recusavit cœtum virorum sapientiũ convocare Carpinetum ad consultandũ de pace. Interim ad Montem Bellum ab armis utrimque cessatum est, liberioresq; partim inter se congressus, ac sermones instituti. (a) Sub id tempus eques ignotus, certè cujus plurimũ intererat non innotescere, ea castra versus contendit. Copias habebat sequentes: sed cum iter præcipitasset, adventũque, & consilium suum nesciri vellet, credibile est eas nec tam citò sequi omnes potuisse, & jussas nunc hærere eminus in locis saltuosis, nunc sparsim procedere avijs, nocturnisque itineribus ignoratas: ipsum verò cum paucis delectis præcessisse cultu corporis ad latendum appposito. Ingens equiti species, spiritus ingentiores erant. Vultus optimus, sed incertus, ut juvenis comoti, moderantisque animo quidem, violent-

(a) *Order. infra.*

violentissimos affectus, dolorem, iram, amorem non satis prementis, & vastum aliquid meditantis. (a) Moliebatur is privatis copijs rem vix totius Europæ viribus conficiendam. Nunc huic consilio, cui nunquam par extitit, moram iniecerat atrox, quâ provocabatur injuria. Hanc ulturus, & iram effulsurus in nocentem, advenerat. Intentus in occasionem ultor (ita nunc appelletur) nec Mathildis Castra, nec Henrici subijt. Cupidus latendi æquè ac rescindi, quid in utrisque ageretur comites modò huc, modò illuc mittebat exploratum. In hoc numero habebat (b) Tironem nobilẽ eximiã in ipsum caritate, ac fide, cujus operã in primis utebatur. Tiro in vijs, ac diversorijs, ut quemque accesserat occulto sermõni idoneum, exprimere aliquid ad rem ducis sui tentabat, dexterè illato colloquio nunc de Henrico, & Giberto, nunc de Conrado, & Praxede, aliàs de Mathilde. Atque, ut personam tegeret meliùs, & attentione suã, quæ cupiebat scire, proliceret, etiam quæ non nescie-

D 4

bat.

(a) *Lipsius.* (b) *Helmold.*

bat, narrari sibi ducto longè principio sinebat. Audiit Conradum è castris parentis discessisse: Augustam quoque Praxedem abesse. Illum in Allobroges missum: hæc quo profecta esset, vulgò nesciri. De Henrico, Giberto, & Mathilde ab alijs alia, eaque diversissima, pro studio partium, narrabantur. Henriciani prædicabant sum̃opere Henricum, & Gibertum: de Mathilde verò agebant præstantem antè virginem, nunc ita transversum actam à mago corruptore, ut dubitari possit, an non & ipsa venefica sit. Certè nuper sagarū modo, cū Canusij esset, sublimè per aërē translata procul ad militem suum nomine Lanfrancum bello captum, eumque mirabili modo vinculis liberasse. Hæc audita Tiro cū duci suo retulisset, movit sum̃opere animum ejus, iniecitque cupidinē Lanfrancum ipsum eā de re, atque alijs audiendi. Nec difficile fuit Tironi occasionem alloqui nancisci per eas inducias. Erat (a) Lanfrancus, cognomine Piola, vir equestris ordinis, fortitudine, & fide in Mathil-

(a) *Vita Ans. Luc.*

Mathildem invictâ clarissimus. Cui cum se insinuasset urbanè Tiro, postquam recter se cum socijs aliquot militiæ gratiâ advenisse in Italiam significasset, alia ex alijs de belli Italici causâ, & progressu sciscitatur. Captus Lanfrancus indole adolescentis hospitis, quâ præstantiorem pro eâ ætate non viderat, studuit eum cum socijs, ut solebat alios, Mathildanis partibus adungere. Non possum, inquit, tuis interrogationibus plenius satisfacere, quàm si breviter à principio repetam originem dissidiorum Mathildis, ac Cæsaris. Quare si tibi non est molestum, nihil mihi jucundius accidere potest, quàm invictæ Principis meæ res evolvere hostium mendacijs obscuratas. Per sibi gratam fore eam narrationem cum verbis, vultuque ostendisset Tiro, in hunc modum instituit loqui Lanfrancus. (a) Occidentis Cæsares (ut non nescis) tria regna tenent, Germanicum, Italicum, & (ut sic appellem) Belgicum. Hoc postremum, quod inter Scaldim, Rhenum, Mo-

D 5

samque

(a) PRIMORDIA *Mathildis*, & *Godefredi Bullionii*.

sámque porrigitur, olim Lotharius Rex de suo nomine Lothariam dixit. Lotharingia quoque, hoc est Lotharij regnum, vulgò nuncupatur. Ex his regnis Germanicum Cæsares per se regunt, Italicum & Belgicum per Proreges, quos Duces appellamus. Belgicum nunc tributum est in duas partes, quarum superior Mosellana dicitur, inferior Brabantiam complexa nomen (a) Lotharingæ, & Lothariensis regni propriè retinet. Pater (b) Mathildi fuit Bonifacius Italiæ Prorex, sive Dux, & Italici nominis longè princeps, è veteri Longobardiæ Regum sanguine per Marchiones Tusciæ oriundus: mater verò perinde clari generis Beatrix, Frederici Secundi Mosellanorum Ducis, & Barri Comitis filia, Cæsaris Henrici Nigri consobrina. Beatrix enim, & Niger erant nati sororibus, Beatrix Mathilde, Niger Gifsâ, utrâque filiâ Hermannii Sueviæ Ducis, & Gerbergæ, quæ Conrado Burgundiæ Rege, & Mathilde Franciâ genita erat. Cæterùm Nigri filius Henricus

(a) *Lamb. Sch. Fulch. carn.* (b) *Domniz. An.*
1046.

ricus Cæsar hodiernus Beatricem reverentiâ ætatis appellare amitam solitus , Amazonem verò Mathildem vocitare consobrinam. Bonifacio Prorege vivis erepto conjux Beatrix videns se cum teneris liberis (duos Præter Mathildem susceperat) tanto præsidio destitutam , denupsit Belgæ famâ virtutis clarissimo Godefredo Lothariæ inferioris, seu Brabantinæ Proregi. Cum quo profecta in Belgicam, filio ejus Gothiloni despondit Mathildem tunc novennem. Ibi in frequenti procerum coronâ spectaculum præbuere jucundum pueri sponsi, sed in quibus nihil erat puerile præter annos. Occasio se dederat patefaciendi in eâ ætatulâ liberalis animi. Ad piam quandam parentis utriusque (a) donationem firmandam evocati prodire, specie, & modestiâ, nec non hilaritate conspicui. Pares erant annis, similes indole, & mentis vigore , at non itidem habitu corporis. Mathildem comendabat dignitas formæ, in quâ jam tum nihil non amares. Gothilonem infra eam deprimebat corporis brevitatis,

(a) *Donatio Florinen. 1055.*

brevitas, etiam in puero notabilis, sed non inelegans, nisi quâ gibbus accesserat. Verum incedebat vestigio ita composito, eâque vividâ indolis lætitiâ, ut promiscantibus è vultu dotibus animi à corporis dehonestamento mentes, oculosque spectatorum statim averteret. Procefferant in medium sponsi nexis inter se manibus, quas mox disiunctas ritu gentis admovère tabulis donationis, toto ore renidentes. Non dubitares ideo lætari par nobile, quod concessum esset jam tum munificentix piæ specimen dare, quo genere laudis, uti & cæterarum, postea claruere. Cæterum hæc fœdera gemina, quæ Beatrix crediderat sibi, ac Mathildi præsidio futura, tempestatem excivere protinus. Revertens è Belgicâ cum Mathilde filiâ, & anu matre nominis ejusdem, (a) Augustum Nigrum convenit, Italiam ingressum. Feminae Principes Cæsarem propinquâ cognatione attingentes, invisentisque officij causâ, nihil sibi timendum in ejus aulâ putaverant. Verum frigidius exceptæ, mox cinctæ

cor-

(a) *Herm. Cont.*

corporum custodibus intellexere se esse
 (a) captivas. Percussit eas alter dolor ;
 cùm rescivere profectos jussu Nigri Ca-
 nusium satellites, qui (b) tenerum Princi-
 pem Mathildis fratrem Bonifaciū qua-
 rerent, captūque sorori conjungerent.
 Cumulavit ærumnas acerbior nuncius.
 Bonifacius puer, & soror parvula Beatrix
 turbati captivitate matris, sororis, & aviæ,
 exinde correpti morbo diem obierant.
 Ad hæc peracerbum illud nunciatur,
 suscitatas in Germaniâ, & Italiâ factiones
 in Godefredum Proregem, ac Gibberum
 filium : arceri illum ingressu Italix ; u-
 trumque de fortunis, ac salute periclitari.
 Tantis captivarum doloribus cumulus
 accesserat, quod non satis intelligerent,
 quâ de causâ, aut quo auctore impulsus
 Niger hæc designaret in propinquas. Et
 verò primarius consilij auctor is erat,
 quem minimè credidissent. Ventitabat
 ad eas honoris specie juvenis, inter Cæ-
 saris procures & gradu, & aulicarum ar-
 tium peritiâ longè primus Gibertus. Is
 Parmæ natus nobili Corrigiorum fami-
 liâ,

(a) An. 1054 (b) Pigna.

liâ, quæ principatum ejus urbis aliquando tenuit, adolescens paternâ domo emigrarat ambitiosâ indole tractus ad aulam Cæsaream, eminus nescio quas spes, & inusitatum decus ostentantem. Ibi (a) ingenio, doctrinâ, facundiâ spectatus, probus quoque habebatur; quippe qui non tantum mores probaverat mirâ caliditate, sed & hanc ipsam, prudentiæ specie. Apud Nigrum primum, deinde apud Augustam viduam, ac postea apud filium Henricum, gratiâ, & summâ auctoritate floruit. Probitatis sectator accuratus videri palàm studebat, non perinde clàm esse. Vestem quoque profanam exuerat, at non unâ mentem. Cæterum licet pullatus, profitebatur virtutem non severam illam, sed elegantiam, & molli quâdam suavitate conditam. Nullus eo munditiarum, nullus studiosior formæ suæ, nec, quatenus tutò poterat, (b) amantior alienæ. Hinc in aulâ nitens cultu corporis, incedere cum splendore, ac pompâ quâdam comitatus, super omnia solertissimè blandiri omnibus, etiâ quibus

(a) *Domniz.* (b) *Idem*

quibus malè vellet. Sæpius captivās Principes invisebat velut consolaturus, & doliturus sortem, cujus erat auctor; quippe cujus consilijs nihil non agebat Cæsar Niger. Causa captivitatis fuerant nuptiæ, & sponsalia nupera cum Belgis, quorum potentiam in Italiā metuendam Cæsari dicebat Gibertus, ipse certè metuebat, non tam Cæsaris causā, quàm suā. Nempe qui occultis machinis id agebat, ut redux in patriam sine tantis consortibus imperitaret Italiæ. Cæterum non iisdem oculis aspiciebat Mathildem, quibus Principes anus, homo amoribus inhærescens, tametsi ita cautè, ut diu apud plurimos fefellerit pro pudico. Florentiæ (a) desponsa erat Henrico sexenni Berta Ottonis Italici Marchionis filia. Magno apparatu acta res, magnoque omnium gaudio, nisi captivarum. Fortè jacebat Mathildis in sinu aviæ, lachrymāsque cum eā miscebat, assidente mœstā matre, cū ad illas admitti Gibertus rogavit. Postquam dolentibus similis mirā calliditate ita solatia adhibuit, ut quæ-

(a) *Lamb. Sch. Bertol.*

rere videretur , Mathildi delicias facere instituit. Nempe cujus formam amabat, at nondum indolem pernorat. Virginem blandè intuitus rogavit, ut, carorū duorum funerum memoriâ tantisper omiſſâ, parceret formam lacrymis corrumpere. Eſſe cur erigeret animum, unica jam paternarum, ac maternarum omnium, non virtutum modò, ſed & opum heres. Mathildis primam conſolationis partem moleſtè, alteram etiam indignè tulit. Deſiſſi verecundè in terram oculi primùm, deinde ſublatis ad matrem rediere. Subjecit paulò pòſt generoſo quodam ſpiritu ; utinam non tantùm hereditate totâ , ſed & ſanguine mihi redimere licuiſſet cara funera, matrîſque, & aviæ libertatem. Promiſit Gibertus, quod ſolebat, at quod nunquam præſtabat operam omnē ſe daturum, ut quamprimum liberarentur. Cæterùm ſenſerat Mathildem non capi laudibus ſuis, nedum pati verborum lenocinia, mollémve petulantiam oculorum. Ergo, ut eam ſibi demereretur , aliò ſe convertit. Conſolationis ſpecie nunc apud matrem Mathildis prædicare laudes

laudes ejus institit, nunc apud aviam, quam sciebat audita repetituram nepti vel invitæ. Primum virginis excellentem formam extollebat, sed eâ arte, tanquam ipse præteriret. Dicebat non esse suum de formis ferre sententiam, sed audiisse ab alijs, qui ad aulas Europæ primarias profecti essent, Mathildem nulli Principum virginum cedere oris dignitate. Et verò ex quo in aulâ Cæsaris apparuerit illa vel in captivæ habitu, cæterarum decorem suo velut extinxisse. Amari ab omnibus, quantumvis placere nolit, nihilque conferat ad sui amorem, nisi eas dotes, quas celare non possit. Nihil in eâ affectatum, nihil studiosè comptum, at inesse quiddam ori divinum, quod supra naturæ vires animos rapiat. Hæc alios prædicare. Jam quod ab ipsomet dici posset, ac deceret, in Mathilde miraculum formæ minimam esse laudum: corporis venustatem longè cedere animi præstantiæ. Se, ex quo penitus ejus mentem colloquendo inspexerit, ita sentire, si virginis ullius animus formosus unquam dici potuerit à præcoce excellentiâ inge-

E

nij,

nij, prudentiæ, generositatis, pietatis, & virtutum omnium, haud dubiè Mathildi talem inesse. Id unum dolere omnibus tantæ pulchritudinis virginē adolescenti Gibbero esse desponsam. Hæc, & similia Gibertus identidem garriebat; cæterum comperit Mathildem nullâ ingeniosæ nequitæ arte vincendam, horreréque denique cœpit intractabilem, ut appellabat, virginis animum. De finiendâ captivitate Principum nulla jam mentio. E contrario jubentur hæ præsto esse ad Germaniam cum Cæsare repetendam. Eò ducebat copias Niger adversus Godefredum, & Gothilonem Gibberum, qui offensi uxoris, & sponsæ captivitate arma ceperant, quibus compellerent Cæsarem vel exire Italia, vel captivas dimittere. Nec fortiùs bellum capeffivere, quàm feliciùs. Niger rebus malè cedentibus, dolore, mox & morbo correptus, paucos post dies (a) extinguitur. Vidua Agnes funere subito territa, & cælestem vindictam ob inhumanitatem in captivas con sanguineas interpretata, quidquid Gibertus

(a) *An.* 1056.

tus contrà nifus fuerit,folvi Principes custodiâ juffit. Quæ gratijs Actis Augustæ, falutaróque Henrico filio septenni Cæfare, repetiere Italiam. Beatrix experta hostes effe, ubi minimè timeantur, cenfuit Mathildem ijs artibus imbuendam, quibus ipfa fibi præfidio foret. Ergo Canufij virginem (a) educat viriliter, nec civilibus folùm, fed & militaribus difciplinis excolendam curat. Puella nobilis, pro eâ, quâ jam tum erat, ingenij maturitate, præcepta virtutum, & artium celeriter haufit. Præter sexûs fui opera equum conscendere, peragrarè faltus venando, arcu tela dirigere, gladium, haftâmque torquere, aciem inftituere, ac ducere. Quæ quàm præclare didicerit in umbrâ illâ domesticâ, res in campo geftæ mox oftendêre, cùm cœpit arma tractare in Gibertum. Is munus imprimis fplendidum gerebat in aulâ Cæfaris. Post mortem Nigri gratiofus apud viduam Auguftam, cum eâ custos erat pueritiæ Henrici filij. Principiò placebat fibi, & applaudebatur in hoc officio. Admotus folio, &

E 2

rector

(a) *Pigna.*

rector Cæsareæ pueritiæ, videbatur sibi quiddam Cæsaris obtinere. Verùm homo ingenio vafro, & audaci, nec unquam quantacùmque sorte contentus ardebat cupiditate repetendi patriam, & in Italia dominandi. Libidinem imperandi causam turbarum, & belli habuit. Convenit Augustam, & exponit operosè, nisi maturè caveatur, Henricum filium de imperio periclitari in Italia, non tam ab externis Normannis, quàm ab ijs ipsis, quorum procurationi, actutellæ id regnum commissum sit. Mathildis potentiam augescentibus in dies viribus metuendam esse. Nempe malle eam suo, quàm alieno nomine imperare, jamque nolle regi à Cæsare, qui nondum seipsum per ætatem regere posset. Non de nihilo esse, quòd à pueritiâ militiæ rudimentis imbuatur tum suâ, tum matris voluntate, nempe imperij cupiditate flagrantium. Ideo fœderibus arctissimis Proregi Godefredo, filiòq; Gibbero conjunctas. Meminisset Augusta eum esse Godefredum, qui non semel arma cepit in Cæsarem Nigrum. Quo mortuo

Bea-

Beatricem quidem libertati, & Godefredum ejus virum gratiæ Cæsareæ restitutum ab Augusta, sed (si per eam dicere liceat) quanto periculo imperij? Modò per occasionem pueritiæ Cæsaris conatum esse Stephanum Pontificem (a) creare Godefredum fratrem suum ex Prorege Regem Italiæ, ut nempe imperium deinceps hæredibus Gibbero filio, Mathildique obveniret. Nunc successisse Stephano in Pontificatum, eandemque motionem Nicolaum II. nimirum opera Godefredi electum, Romanque perductum. Quare tempestivè obviam eundū ambitioni, ac furori. Se, si Augustæ videatur, petiturum Italiam, & quidquid erat in eo negotio molis, ac periculi subitum. Denique ab Augusta credulā impetravit munus Italiæ Cancellarij, seu præfecturam juris, ut scilicet ibi jus daret sceleri, & cuncta misceret. Profectus Romanam, sub tempus, (b) quo Alexander ejus appellationis secundus Romanus Pontifex renunciatus est, electionem non probavit optimi viri. Nempe Gibertus ita

E 3

pro-

(a) *An. 1057. Ostiens.* (b) *An. 1061.*

probus homo est, ut probitatem aliquam
 nimiam putet. Non censet is quidem,
 quâ moderatione est, palàm cupiditati-
 bus serviendum, sed indulgendum ta-
 men. Ergo adductis in suam sententiam
 multis sui similibus (si tamen similes ha-
 bet, nequitiâ princeps) (a) usque eò in
 aulâ Cæsaris, & Basilicæ in comitijs con-
 nixus est, ut alius nominaretur Pontifex,
 qui Alexandro illo severo mollior Lon-
 gobardis suis, alijsque in voluptates pro-
 nioribus non terrori esset, sed paternè
 indulgeret scilicet. Cadolus erat Parmæ
 Episcopus, Giberti civis, vetusq; familia-
 ris. Non alius summo Pontificatu di-
 gnior visus, utpote inter homines illius
 humanæ imbecillitatis conscius impri-
 mis, & particeps. Huic adulterino Ponit-
 fici, Gibertoque suo repetentibus Italiam
 cum militari, & splendido comitatu ple-
 rique procerum Italarum vel faverunt,
 vel non ausi sunt adversari. (b) At Ma-
 thildis cum matre obstitit, & ingressu fi-
 nium ditionis suæ interdixit. Nihilomi-
 nus cum illi porrò accederent, magnani-
 ma

(a) *Cardin. Aragon.* (b) *An. 1062, Pigna.*

ma virgo, quam nunc inverecundiæ in-
 simulant, in illum pudicum gregem arma
 cepit, non modò suæ, sed & pnblicæ li-
 bertatis vindex. Dixerim ijs de morum
 honestate, ac pudicitia fuisse certamen,
 quam impugnante Giberto propugnarit
 Mathildis. Quæ collatis ad Parmam signis
 repressit impetum, & iter hostium, vicit-
 que tanta sua gloria, quanto Giberti, Ca-
 dolique dedecore. Irâ percitus in Ma-
 thildem Gibertus, vindictæ studio arde-
 bat, sed astu felicius pugnaturus, quàm
 armis. Spe dejectus, stabiliendæ Pontifici
 suo in Longobardia sedis, speravit rem
 melius Romæ successuram. Eò profectus
 cum Cadolo repentè se, & exercitum mu-
 ris ostentat, factaque cæde castra in pratis
 Neronianis locat, æmulus Neronis. (a)
 Mathildis cum copijs validis sequebatur.
 Romam præcesserat Belga Mathildis vi-
 tricus Prorex Godefredus, Alexandro
 Pontifici, qui isthîc agebat, præsidio futu-
 rus, dum interim filius Gibber in Belgicâ
 rerum satagit. Is Prorex tantisper distu-
 lit Gibertum adoriri, Mathildem cum

E 4

agmi-

(a) An. 1063. Pigna. Florentin. Pet. Damian.

agmine venientem operiens. Quâ appropinquante erumptionem fecit, Gibertumque veritum, ne ab tergo intercluderetur, in fugam coniecit, multis hostium partim cæsis, partim flumine haustis. Decus Giberti cumulavit, quod sub id tempus Germaniæ procures, non ferentes Cæsarem, atque imperium à femina regi, & ab homine Parmensi malorū omnium auctore, Henricum matri, Gibertoque subduxere. Ille simul custodiâ pueritiæ Cæsaris, simul titulo Cancellarij in Italia. & præfecturâ juris exuitur. Coactus in ordinem vir superbus ad privatam, in honoremque vitam recidisse impatientissimè tulit. Cæterum pervicax, Cadoli pecunia reparatis copijs, clàm communicato cum aliquot Romanis seditiosis consilio in urbem Leoninam pervadit. Est hæc pars urbis cis Tiberim ad Vaticanum, quam pro munimento sanctæ Sedis operibus egregijs firmavit Leo IV. & de suo nomine appellavit. Mathildis audito Giberti facinore vitricum Proregem, qui in arce Romana Pontificem Alexandrum tutari pergebat, certiores fecit sibi in
animo.

animo esse Gibertum in urbe Leoninâ adoriri. Quare ad operam constituto die conferendam paratus, intentûsque esset. Adest deinde ipsa cum matre, & impetû in Gibertum facit, egregiè auxiliante Godofredo. Non sustinuerunt vim utriusque Gibertini. Fugâ elapsus Gibertus recurrit in Germaniam, coràm docet adolescentem Cæsarem, quo statu Romana res sit, quæritur unius puellæ opibus, atque opera totam misceri Italiam. Satis intellexit Henricus, irâ, & pudore exprimi eas Giberto querelas, nec præbuit tunc aures vindictam deposcenti. Miratus est autem egregiam indolem consobrinæ Amazonis, quam (a) in Normannos quoque post paulò feliciter pugnasse audiit. Gibertus, licet non auditus à Cæsare, & mox etiam desertus à Cadolo, non tamen resipuit. Tot probris restingui non potuit furor hominis nihilo magis irâ, quam ambitione flagrantis. Stimulabat animum insana cupido adipiscendi summi fastigij, quo se dignum credebatur, & credi volebat. Eò ut perveniret, gradus, & modos

1066. E 5 com.

(a) *An. 1066.*

commentus, destinata exequi sic aggreditur. Cùm videret armis adhuc rem non processisse, aliâ viâ ad opulentiam, potentiâque summam aspirare statuerat. Primùm omnium ad suas artes se recipiens fingit se factorum pœnitentem, Alexandrôque, & Mathildi placatum, addictûmque. In eum vultum compositus Agnetem Augustam convenit, quæ exuta filij tutelâ, & aulæ pertæsa, sanctioris vitæ studio Romam se receperat. Summâ religionis specie obtinet ab eâ comendationem, ut ab Alexandro creetur Ravennatum Archiepiscopus. Pontifici illum ipsum, quem vultu simulabat, animum probare nititur; temporum vitio, non suo, ante peccasse asseverat; in fide posthac, officio, ac sanctæ Sedis auctoritate permanfurum spondet. Ita dexter omnes simulationis partes, atque observantiæ imitationem obijt, ut omnibus imposuerit, nisi Alexandro. Sensit Pontifex pessimum hominem non tegere venenum, nisi ut perniciosius vomeret; abnuîtque principiò concedere, quod petebatur. Verùm sollicitatus mul-

tis

tis precibus Augustæ, cujus magna erant in Ecclesiam merita, veritúsque ne Gibertus repulsâ exasperatus noceret magis, invitus denique concessit. Cæterùm inter (a) inaugurandum Gibertum dixit vaticinabundus (b) SE A MORTE PROPIUS ABESSE, AT EUM GRAVES ULTRICI ECCLESIAE PERSOLUTURUM POENAS. Alexandro è vivis sublato Gregorius VII. subrogatur. Venio nunc, hospes, ad diffidium inter Cæsarem, & Mathildem exortum concitatore Giberto. Venio, inquam, istuc, & quasi pro filio: nobis paulò post via pedetentim relegenda erit, ut dissidij illius causa manifestiùs perspicì possit. Est Henrico Cæsari magna vis animi, ingeniùmque perfervidum, & ad arma pariter voluptatésque proclive. Indolis propensione jam inde à teneris accessit materna indulgentia, & perpetuum aularum malum, adulatio. Puer rerum potitus bonus Princeps esse potuit, nisi incidisset in malos. Horum, atque imprimis Giberti consiliis modò lenocinantibus fluxit mollitijs adolescens Cæsar, modò

(a) *An. 1073.* (b) *Card. Arag.*

modò animum infantibus bellicam famam cœco quodam impetu quæsiit. Ubi ad juventæ florem accessit, avidus gloriæ, & quietis impatiens, palàm aliquando conquestus est, in imperio suo non esse, in quos vires experiretur. Inde Saxones, bellicosam gentem, contumelijs, & armis adortus, Germaniam longo bello implicuit, & factis grandem sibi peperit vel famam, vel invidiam. Collatis signis cùm vicisset, eò implacabiliùs habuit victos. Hinc alienati animi etiam non victorum. Sueviæ Dux Rudolphus, cujus imprimis operâ vicerat, & Saxoniz proceres in celebri conventu decernunt Henrico abdicato alium creare Germaniz Regem, nisi ille ante præstitutam diem pœnitens, atque expiatus satisfaceret populis. Sub hæc Germanis certatim deficientibus consternatus Henricus se respexit, & fortunæ remedium. Datis ad consanguineam Mathildem litteris, quibus eam arcani sui consilij admonebat, & ut opem ferrer, orabat, dedit se in viam per Alpes. Ubi immensis defunctus periculis (quæ non illibenter, opinor, infrà in-

intelliges) Canusium denique pervenit ad Mathildem. Relicto foris omni comitatu, & majestatis insignibus ingressus, intra secundum murorum ambitu subsistit. Porta mox clausâ latuit quid ageretur, omnibus foris rei expectatione suspensis. Abit dies unus, alter, tertius: Cæsar non exire, homines magis, magisque rumore crebrescente mirari. Giberus Ravennâ cum aliquot proceribus venerat Rhegium Lepidi, proximam Canusio urbem. Indignè ferens Cæsarem antehac consilijs suis plurimum uti solitum, nunc se non audito præbere Mathildi aures, secretum Canusini hospitij explorare conatur. Quo denique comperto, mox sparsis per se, ac suos rumoribus ingentem seditionem commovet. Jactabant Henrico ad asserendam dignitatem opus esse armatâ virorum manu, non feminæ consilijs, atque artibus. Licet ea vulgò fida, ac proba putetur, pro sexu mutabilem esse, & ut indicia jam erant, famæ non respondere mores. Certè ab eâ foveri Canusij latentem hospitem Cæsari metuendum. De eo hospite

cum

cùm alia multa, tum illud narrabant Hildebrandum esse fabri filium, & præstigiarum architectum, (a) quem quondam Henricus Niger Cæsaris parens ab aulâ dimisisset, somnio turbatus. Hildebrandum enim, cùm è fabrilis officina ad scholas transisset, & in litteris non parvos progressus fecisset, venisse ad aulam Cæsaris Nigri. Hic ab ejus filio Henrico puerilibus jocis, & contumelijs esse vexatum. Parenti Nigro deinde objectam in quiete speciem ejusmodi. Hildebrandum in capite habentem geminum cornu visum adstare Henrico filio, eumque arietare, & in lutum dejicere. Turbatum hoc ostento Cæsarem carceri inclusisse Hildebrandum, at deinde rogatu Agnetis Augustæ dimisisse. Hunc verò facinorosum hominem provectum ardore vel scientiæ, vel vindictæ (b) operam dedisse artibus magicis: magistro usum Laurentio maleficorum principe: cum hoc in silvas, & umbrosos recessus se abdere solitum. Infandis ijs præsidijs ad familiaritatem

Ma-

(a) *Gobelin. Persona.* (b) *Mar. Scot. Benno.*

Mathildis , atque ad honores adrepsisse. Porro verendum esse, ne, ut se dederant initia pessimis artibus infestus Henrico nitatur implere somnij fidem. Interim malè cautum Henricum credidisse se Mathildi amicæ Hildebrandi, & Canusij cum ipso Hildebrando versari. Quin Cæsarem in illo latibulo magico eò esse adductum fraudibus, ut indigna majestate committeret. Nempe ad opem in Saxones impetrandam Cæsarem (prò pudor) accidisse genibus non tantum feminæ, sed etiam magi. His, atque hujuscemodi in vulgus sparsis ingens suprâ quàm cuiquam credibile sit, (a) odium Cæsari ipsi conflatum est. Fremere proceres, populus tumultuari. Henricum, quem nuper in Italiam advenientem frequentes maximo honore sectati erant, nunc, ubi Canusio digressus est, averfis oculis, infestisque animis deserere, atque urbium ingressu prohibere. Adultâ seditione, omnium sententia esse, ut abdicato patre, qui ultro se abjecisset, atque indignum diademate præstitisset, filius

Con-

(a) *Lamb. Sch.*

Conradus substitueretur Rex Italiæ. Puerum omnibus indolis præclaræ notis insignem, ut vultu non referebat patrem, minimè moribus relaturum. Henricus inopinatâ voluntatum, rerûmque conversione perculsus, sensit se Germaniæ egressu non evasisse hostes, sed mutasse. Pressus gravi metu amittendæ apud Italos dignitatis eo factò, quo apud Germanos servare voluerat, sollicitum animum huc, illúcque versabat. Nec succurrebat ullum effugium, nisi Italorum animos, si quo modo posset, reconciliaret sibi. Inter has angustias profectus Rhegium Lepidi (a) Gibertum admisit ad colloquium. Homo vafer, disertusque juxtà, tempore usus, & ingenio Principis, cùm omnia Canusij acta improbavit, tum de seditione in hunc modum suasit. Si Cæsar quietem Italiæ, si sibi Italorum fidem, atque observantiam restitutam vellet, animadvertendum esse in seditionis auctores. Hos autem non alibi quærendos, quàm Canusij, nec alios esse, quàm Mathildem, atque

(a) *Pigna.*

que ejus hospitem Hildebrandum. Eorum occultas artes, arcanaque flagitia eò nocentiora esse, quòd tegantur non solum Canusinâ latebrâ, sed etiam specie probitatis. Ea verò sibi, aliisque procerum esse comperta. Innotuisse quoque vulgò Cæsarem tuendi in Germaniâ principatûs gratiâ supplicem accidisse duobus illis capitibus nefarijs. Id enim vero, nec proceres, nec populum ferre potuisse. Hoc illud esse ejus facinus majestate indignum, hanc unicum seditionis originem. Addidit Gibertus, quæ diceret de hospitum facinoribus, se in publicis comitijs orbi probaturum. Id se recipere famæ, capitisque periculo. Interim Cæsar ambos, seu vi, seu arte capi juberet, ad objecta crimina, si possent, responsuros. Detracturum se eis probitatis larvam, palamque facturum, latuisse sub alterâ magum, sub alterâ lupam. Mathildem enim egregiam illam puellam, quæ passim laudibus pudicitiae celebretur, non solum contubernio, sed etiam incestis amoribus esse conjunctam mago principi hostium Cæsaris. Meminisset

Cæsar paterni somnij, caverétque, ne verum evaderet. Adhuc pessimis artibus Hildebrandum provectum ad honores, & cladem Cæsaris : verendum esse, ne ipsum principatu apud Italos jam pariter, ac Germanos concussio, & nutante dejiceret. atque ita utrobique velut geminis cornibus humi decurbaret, nisi quàm citissimè cum amicâ captus arceretur. His dictis, & studiosè expositis traxit Henricum in suam sententiam. At quâ ratione rē aggredierentur, non erat expeditū. Apertâ vi non poterat agi, copijs Henrici partim dilapsis, partim fidei dubijs, præsertim adversus latentes in arce tam munitâ. Restabat ut arte niterentur larebrâ prolicere hospites. Conducere fraudi censuit Gilbertus, habere ambos non suspiciosos : quare Henrico nulla offensi animi signa esse edenda, ut ne dubitarent se ejus fidei credere. Interim fidissimos quosque custodum corporis armatos juberet adesse. Postquam & ratio rei, & tempus, locûsque convenit, Henricus Rhegio, ubi agebat à sex diebus, rediit Bibianellum, quod castellum à Ma-

à Mathilde conditum paucis milliaribus Canusio abest. Præ se tulit desiderium rursus agendi cum hospitibus, sed palàm. Ita necesse esse ad quietem Italiæ. Cùm illi non abnuissent, congressioni constitutus est dies, locusque ultra Padum. Eò Cæsar cum suis præcessit. Secuta mox Canusina cum hospite, splendidâque custodiâ corporis. Iamque transmisserant Padum, & conditum locum petebant. Gibertus plaudebat sibi, multumque calliditati, & fidei suæ imputabat, quòd in laqueos allexisset prædam, quam accedentem Cæsari monstrabat arridens. Laudum quoque diligentia tulit Mathildis, ejusque conspectus Gibertum in Italiâ tunc primùm delectavit. Verùm illa (a) subito substitit colloquens cum hospite: mox unà frenâ vertère, & admissis habenis reperiere Canusium. Gibertus, qui ubi cunctantes adverterat, cœperat trepidare, cùm abscedentes vidit, irâ pallefcere, fremere, nescire quid Henrico excusaret, nisi insidias mago detectas à genio malo. Cùm res non pro-

F 2

cessisset

(a) *Domniz.*

cessisset hâc arte. aliâ capiendos aiebat : comitia edicenda : in his scelerum convincendos, ac damnandos. Nec diu post Gibertus, ut erat intentus in res illorum hospitum explorandas, Cæsari à se digresso significavit, Mathildem mago suo patrimonium omne donasse, milites ad ejus tutelam contrahere, patramque contra Cæsarem facere. Cùm sic Canusinis hospitibus odium ingens, atque infamiam conflasset apud Henricum, ejusque proceres, allatæ his sunt litteræ Mathildis, quibus se purgabat, & culpam, quæcunque erat, conferebat in calumniatorem Gibertum. Ad cujus fraudes, vetusque in ipsam odium si adverteretur, dicebat se non dubitare, quin Cæsar, ac proceres facile ab opinionibus falsis avocarentur. Verùm adeo non persuasit, ut ab Henricianis remissus sit partim scripto, partim publico rumore nuncius, quo nullus ei inopinator principiò, nec acerbior unquam accidere posset. Is erat in hanc maximè sententiam. Mirum id populis videri, quòd amaret Mathildis, quem omnes odissent. Pudendum verò, quòd

pro-

procos alios Principes viros obtentu pudicitæ dedignata, hominis ignobilis, ac nefarij contubernio adhæssisset. Nihil esse, cur nunc erubesceret fateri palàm nomen amatoris sui, qui nimisquàm notus esset nobilis magus. Quantum ille suis egregijs artibus posset, abunde vel in ipsâ prodidisse. Sciri jam vulgò, quàm crebras ab eo litteras acceperit inscriptas dilectæ, quæ cum eo fœdera, quæ oscula in carcere Romano junxerit. Neque ignorari quàm sedula latus ejus, postquam fuit liberatus, stiparit diu, noctûque, & quâ familiaritate nuper exceperit Canusij hospitem. Quo autem amore foverit in illâ diuturnâ latebrâ Canusinâ, notari potuisse ab ipso Cæsare, cùm ibidem à sanctis amantibus ludificatus erat. Non esse opus nominato. Eum esse fabro genitum magum, cui palàm jam amica studeat, cui pecuniam, ac milites suppeditet, & patrimonium omne largita sit, capta præstigijs. Eum, cujus potentibus amoris poculis effectum sit, ut amans bellatrix arma in consanguineum Cæsarem paret, oblita sanguinis,

pudoris, & sexûs. Cæterùm quandoquidem audiendo amatoris nomine oblectetur, Hildebrandum vocari, hoc est amoris torrem, nec appellatione aliâ dignum. At videret ipsa tandem, cui militaret. Arma viris cederet, & desereret illum imbellem, non nisi præstigijs pugnantem, indignumque, qui & oppugnetur à viris, & propugnetur à feminâ. Sin autem fovere, ac tueri pergeret, affuturos vindices, & incestos amplexus ubivis ferro dirempturos. Hæc ubi primùm accepit Mathildis, obstupuit ad appellationem amatoris: at cùm audiit dici magum, exhorruit. Conscijs pudoris, & innocentiz animus hærebat, expectabatque, ut cederetur hominis nomen. Intellexit denique quis per contemptum, ac ludibrium appellaretur Hildebrandus, quàmque falsis criminibus oneraretur. Non aliud unquam acerbius Mathildis peccatori vulnus inflatum est. Nunquam gravius exercuit virtutem fortuna, majorem nunquam invênit. Video te expectare, Hospes, ut retro te revocem, & repetito longius itinere Canusium reducam

cam introspecturum clariùs. quem in illâ latebrâ hospitem invenerit Cæsar. Nempe is fuit, (a) de cujus vitæ rationibus, ac moribus narrationem Gibertus cum suis comentus est vel memoratu incredibile, dramaticisque figmentis similem. Is Hildebrandus, cujus natalium obscuritatem notant, omnibus summi viri dotibus claudit. Romæ, (b) ut constat, natus parentibus Romanis, iisque, quod caput est, perquam pijs, pueritiam egit sub optimorum hominum disciplinâ, non sine certis documentis, quæ futuram claritatem, ac magnitudinem ejus prænunciarent. Nec inauspicatò vocatus (c) Hildebrandus, qui cælestis amoris facem prælaturus erat orbi. Et visæ aliquando prodigiosæ ignis scintillæ existere, atque emicare parvuli vestibus. Ferunt quoque cum puerum (d) in officinâ fabri lignarij forte ludentem inter assulas, & præsegmina, ex his litteras, quas nondum norat, configurasse, atque ordinasse in sententiam. Id animadvertisse adstantem

F 4

quen-

(a) *Lamb. Sch.* (b) *Hugo in Chron. Virdun.*

(c) *Bernried.* (d) *Gobel.*

quendam sacerdotem, & legisse confectum illis litteris hoc epigramma, aut potius vaticinium, DOMINABITUR A MARI USQUE AD MARE. Inde præfagientem quiddam magnum de Hildebrando, impetrasse à patre, ut filium in ludum litterarum mitteret. Ergo puer (a) committitur avunculo suo cœnobij Virginei in Aventino monte antistiti. Ibi liberalibus studijs, & castis moribus imbitur auspice Virgine Matre loci tutelari. His, atque adeo Ecclesiasticis officijs ab ineunte ætate addictus, cum deinde in Gallias concessisset, adolescentiam inter sæculi contemptores, ipse contemptor, exegit, vitam asceticam Cluniaci professus. Aliquantisper quoque in aulâ Henrici Nigri cū laude versatus est. Certè Niger (quidquid somniarit) miratus viri eloquentiam, & intrepidum animum, dixit aliquando, neminem se unquam audiisse tantâ fiducia de rebus Divinis verba facientē. Romam redux Hildebrandus in publicas rei Christianæ utilitates incubuit. Hic ob singulatam eruditionem, & excellentis inge-

(a) *Bernried.* (b) *Bernried.*

ingenij, virtutisque decus creatus Ecclesiæ Romanæ Archidiaconus in totius orbis notitiam, & bonorum omnium amorem brevi pervênit. Enituit in eo semper vel maximè impavidum quoddam studium Ecclesiasticæ libertatis. Hoc Cæsarem Nigrum terruit ad ejus aulam missus orator, hoc Gibertum acriter juxtà, constantérque repressit. Eodem malorum odium non minùs, quàm bonorum amorem sibi peperit. Adversus hostium machinationes spem, fiduciàmque secundum Deum collocarat in ope Virginis, cujus cultu, & gratiâ florebat, non sine illustribus cælestis illius necessitudinis notis. (a) Erat ei solemne ad magnæ Virginis iconem in Romanâ Divi Petri Basilicâ cultam divertere, coram hâc procidere, frequentare preces, dulces lacrymas fundere. Quo loco aliquando de more supplex (mirum dictu) ipsam effigiem illacrymari vidit. Stupens, atque anxius, postquam fletus fletibus reddidit, ad palatium Alexandri Pontificis redit. Ibi falsâ criminatione exceptus

ab

(a) *Bernried.*

ab hostibus , intellexit huic suæ calamitati modò illacrymatam misericordiæ Matrem. Verùm ejus cælesti præsidio patuit mox clientis innocentia. Qui cùm ad Virgineam iconem rediisset grates acturus , vidit eam absterfo fletu nunc arridere sibi, velut triumphanti de hostibus. Hæc præsagia majorum fuere. Alexandro (a) Pontifici vivis ereptodum exequiæ Romæ celebrantur , ecce repente in templo maximus omnium ordinum concursus. Magnis omnes vocibus ingeminant Hildebrandum , clamant Hildebrandum à Divo Petro electum sacrorum Principem. Is Archidiaconus tunc exequiis Alexandri intentus, ubi audiit se vocari ad Pontificium fastigium , expavit , concussisque visceribus, quasi alienatus à sese , provolvit ad pulpitem , ut multitudinem ab eâ mente dehortaretur. At præventus est ab uno Patrum, qui concionabundus exposuit, à Divi Leonis temporibus nullum Hildebrando Archidiacono fuisse majori ornamento Ecclesiæ : virum pruden-

(a) *An. 1073. V. Baron.*

dentiz esse perspectæ : eum Urbem imminentibus maximis periculis liberasse : eumque à Cardinalibus unanimi voluntate Pontificem Romanum eligi. Sub hæc acclamans tota multitudo in Hildebrandum injicit manus. Induitur Pontificio cultu, & in solium rapitur, imposito Gregorij Septimi nomine. Hic ille est Gregorius, quem velut sacrorum principatu indignum Gibertus, ac Gibertini vocant nomine jam non suo Hildebrandum. Atqui nullus eo gradu dignior exstitit, omnium bonorum votis electus, nisi suis. Hic, quâ modestiâ, & submissione animi erat, sub onere tanto æstuans, & secum investigans quam ejus deponendi causam afferret, postridie specimen edidit modestissimi juxtâ, fortissimique Pontificis. Litteras dedit ad Henricum Cæsarem, quibus orabat eum majorem in modum, ut ne electioni assentiretur, (a) alioqui fore ut experiretur certum commissorum vindicem. Ejusmodi scriptione Gregorius alterutrum se consecuturum censuerat, ut vel dignitate liberaretur,

(a) *V. Baron.*

tur, vel viam aperiret vindicandæ Ecclesiasticæ libertati. Henricus licet ijs, quibus dixi, moribus Princeps, quique insuper, monitis Pontificijs antè non auditis, sacerdotia habebat venalia, uxores Clericis permittebat, nec consortio abstinebat notatorum anathemate; nihilo tamen minùs acceptâ Gregorij epistolâ non tantùm ejus electionem probavit, sed gratulabundus litteras remisit indices lætitiæ, pœnitentiæ, obedientiæque in futurum suæ, qualésque nunquam antea missæ à Cæsaribus essent. Scripsit & Gregorius Mathildi, Ducique Gothiloni Mathildis jam conjugi (de quo mox) collaudatisque ijs de constanti in Ecclesiam fide, significavit mentem suam in eo obfirmatam, ut quantocùmque suo periculo Cæsarem ad officium, & sanctæ Sedis obedientiam revocaret. Mathildis admiratione tantæ virtutis amplexata est animo, ac devenerata impavidum Pontificem. Mox incubuit omni studio, tum ut consanguineum Cæsarem adduceret ad officium, uti verbis, ita re præstandû, tum ut ipsa Gregorio, tanto illo virtutum magi-

magistro, uteretur. Ergo impoſterum ex
ejus præceptis omnes vitæ rationes ſu-
ſpenſas habuit. Hîc omnis exempli opti-
mi documenta in illuſtri poſita monu-
mento vidit : hinc & alias virtutes , &
ſingularem imprimis religionem in Dei
Matrem hauſit. Neque Giberti curam
omiſit Gregorius , quem meritò ſuſpe-
ctum habens, veritûſque nequid in Ec-
cleſiam moliretur, illico hominem offi-
cio ſis litteris demereri ſtudit. At bonus
ille Ravennatum Pontifex , ambitionis
æſtu ſemel abreptus , memor ſuorum
cum Hildebrando, & cum Mathilde cer-
taminum, indignatus toties ſe ab utriſque
victum , ægrîſque oculis novos honores
Hildebrandi ſpectans , ejus humanitate ,
& beneficijs infeſtior redditur. Obedien-
tiæ ſpecie obtectis dolis , nihil non ma-
chinatur affiduè , ut & Gregorium ul-
ciſcatur, & Mathildem. Fato conceſſe-
rat vir magnus Godefredus Lothariæ
Dux, ille, quem dixi , Mathildis vitricus.
Hujus filio , hæredique, dudum ſponſo
ſuo Mathildis jam nupſerat, adoleſcenti
egre-

egregio, qui, quod corpori deerat pu-
fillo, nec eleganti, pensabat magnis for-
tunæ, atque animi bonis. Nomen ei, ut
patri, Godefredus, & Gothilo; cogno-
mentum, ut dixi, Gibber. Clarus omni-
no Princeps, qui se dignum præberet ma-
joribus suis, Mathildisque conjugio. Is
cùm liberis careret, ceu animo præsentiret
imminens fatum, statuit maturatè
adoptare dignum se, dignum tantis bonis
hæredem, tótque regendis populis parè.
Nec longè is quærendus fuit, nec verò
usquam alibi, quàm domi, reperiri potuit.
Aderat adolescens, Godefredus & ipse
nomine, omnibus animi, corporisque
dotibus ad miraculum ornatus. Ex utro-
que parente nobilissimus Imperatoris
Caroli Magni sanguis matrem habebat
Idam, sororem Gibberi; patrem verò
Eustachium Bononiæ Belgicæ, quæ ad li-
tus Anglicum posita est, Comitem. De-
vinciebat universos ipsâ dignitate for-
mæ, eleganti ore, sufflavâ cæsarie inter-
ga molliter fluente, prænitentibus oculis,
justâ corporis magnitudine, membrisque
omnibus aptissimè nexis. Non alius vel
morum

morum suavitate, vel probitate, vel ingenij lumine, aut etiam facundiâ comparari poterat. Cerneret jam tum in eo fulgentem indolem virtutis heroicæ. Vis animi, atque etiam corporis supra ætatē erat. Cū ludi equestres more gentis ederentur, congressus cum æqualibus, spectatorum plausus victor perpetuus auferebat. Spes de eo conceptas vel maximè in omnium animis auxit Ida mater, opinione sanctimonix venerabilis. Prædixit filium DUCEM FORE, NECNON INTER REGES INCLYTUM. Avunculus Gibber tot adolescentis dotibus accedente matris vaticinio motus, cū non modò bene sperare, sed etiam confidere posset futurum esse præclarum, scripsit ex æsse hæredem, filijque loco dilexit, & habuit. De hac adoptione cum conjuge Mathilde contulerat tum aliàs, tum quando ad eam in Italiam postremum profectus est. Mathildis, aliique gratulabantur simul Gibbero, quòd elegisset talem, simul adolescenti Godefredo, quòd eligi meruisset. Nullus hoc fortunatior videbatur,

(a) *Monum. Bononiens.*

tur, qui & suorum benevolentia, & virtute sua unus omnium maximè floureretur, & tantum possessionum ex adoptione, & testamento avunculi expectaret, nempe Lothariensis regni præfecturam, Bullioni dominium, Gennapiæ dynastiam, aliorumque locorum. Sed restam prosperas subito atrox fortuna prostravit. Gibber sub discessum ex Italiâ (a) promiserat gregorio Pontifici se eò rediturum cum copiis, & unâ cum Mathilde ducturum adversus Normannos usurpatores Ecclesiasticæ ditionis. Læta Mathildis expectabat eum, simulque præstantem illum famâ fortitudinis adolescentem Godfredum, qui jam non tantum certaminibus ludicris, sed Flandrico bello virtutem avunculo probaverat. At reversus Gibber in Germaniam à Cæsare implicatur bello Saxonico. Cùmque non repeteret Italiam cum promissis auxiliis, commotus est litteris à Gregorio, cui scilicet juxta ac Mathildi displicebat, quòd datæ fidei deesset. Verum non defuit huic occasioni Gibertus. Ad discordiam inter

(a) *An. 1074. Greg. Ep. 72. l. 1.*

ter eos conjuges serendam artes suas
 fedulò adhibuit, item ad Cæsaris, ac Gib-
 beri animos à Pontifice alienandos. Re-
 bus turbatis scelus horrendum aggredi-
 tur. Romam ad comitia evocatus cum
 alijs antistitibus, ansam patrandæ diu
 conceptæ vindiçtæ arripuit. Eòdem ad-
 venerat Mathildis cum militum manu,
 Pontifici, & convenientibus ad eum Præ-
 fulibus futura præsidio. Gibertus Romæ
 habebat junctum sibi (a) familiaritate, &
 occultâ conjuratione juvenem Cincium
 Stephani Præfecti Urbis filium. Hunc
 permovet ad perdendum Gregorium.
 Ipsam (b) natalem Christi servatoris no-
 ctem flagitio destinat. Horret animus ca-
 sibus Pontificis, & Mathildis, quos licet
 tunc spectarim, & spectare jam videar,
 memoriam tamen sentio rerum atroci-
 tate confundi. (c) Intentæ cælo densissi-
 mæ nubes geminarant tenebras. Mox
 effusis imbribus foeda nox inhibuit, ne
 sacrum pervigilium solitâ piorum fre-
 quentiâ celebraretur in templo. Plateæ

G

tor-

(a) *Bernried. Guil. Biblioth.* (b) *An. 1075.*

(c) *Bernried.*

torrentibus aquis inundatæ domorum
egressu plurimos arcuerant. At Mathil-
dis religionem nihil retardare, nedum
impedire potuit. Pontificem ad templum
secuta, coram arâ Virginei præsepis, ad
quam ille faciebat rem divinam, procu-
buerat, altóque sensu pietatis absorpta
Virginei partûs miranda volvebat ani-
mo. Nos cum eâ pauci, atque inermes, ut
eò loci, veneramus. Omnia Giberto,
Cincióque visa insidijs opportuna. Per
caliginem adest equitum loricatorum
turma, Cincio duce, qui ad templi atrium
relictis equorum, portæque custodibus
irrupunt, & districtis repentè gladijs in
Gregorium irruunt. Sublatus piorum cla-
mor, &, quod unum addere poterant,
gemendi atrocitas religiosam Mathildis
quietem horrore submoverat. Confe-
ctim reducto ab oculis velo cernit latro-
nes Pontificem ab aris abstrahentes. (a)
Cincius (nefas) injectâ in sacram cani-
tiem manu raptabat eum inter confertos
socios cædentes, trudentesque non reni-
tentem, ac tacitum, nisi quòd cælum iden-
tidem

(a) *Idem Bern.*

ridem suspiciens precibus conabatur pro-
 pitare superos hostibus. Exiliit in pedes,
 Mathildis, nec timidiùs, quàm si armata
 duceret agmen, ad impiam catervam so-
 la procurrit. Inopinatum exemplum au-
 daciæ stuporem omnibus incussit. Simul
 latrones restiterant, simul nos hæreba-
 mus; illi quid ausura, nos quid iussura
 esset, expectantes. Amazon primùm mi-
 naci vultu, & tanquam pro imperio solvi,
 reddique sibi Pontificem jubet. Cincius
 feminæ vanam sine viribus ferociam ri-
 sit, & socijs, ut porrò irent, edixit. At pro-
 gredientibus objicit se Mathildis, nudam-
 que oblita, per obversantes tot mucrones
 inferre se ad Pontificem parat. Incredi-
 bilia hæc videri possent, nisi ausa majora
 mox esset. Cincius licet eam quoque per-
 ditam cuperet, tamen Proreginam injussu
 consanguinei Cæsaris violare nondum
 ausus, ut molestum obicem amoliretur,
 habebis, inquit, Hildebrandum, quem pe-
 tis, at, prout meritus est, capite diminutū.
 Simul visus est, ubi Gregorius in turbâ
 tenebatur, gladij altè vibrati, & circum-
 acti terrificus fulgor, auditæque sonora

G 2



per

mam eieciens. Is erat Cincij minister in Pontificem modò ferrum ausus torquere, quem ad templi valvas genius malus arreptum, equóque præcipitatum saxis illiserat. Quo viso Mathildis, nihil formidamus, inquit, in sceleratos ire duce, & scelerum vindice Deo. His dictis avecta ad munitam turrin, in quam se Cincius cum suâ catervâ, prædâque condiderat, viâ & ipsa intrò vel invênit, vel fecit. Neque sic venienti repugnavit Cincius, qui nihil mallet, quàm eam cum suo Pontifice captam. Nec verò Mathildis aut vinculorum, aut vitæ periculum subire timuit, modò sancto captivo navare operam aliquam posset. Erat ibi Cincij soror, fratri similis, &, ut probam intelligas, nota, & cara Giberto. Quâ præeunte Mathildis ad locum, quo Gregorium incluserant, pervênit. Intranti spectaculum objicitur triste, & tantùm non ijs, qui fecerant, miserandum. (a) Raptum è templo Pontificem, & jumento post tergum latronis impositum adduxerant albatum adhuc, cætero cultu Pontificio spoliatum.

G 3

Ille

(a) *Idem Bern.*

Ille Rex sacrorum, modò conspectus ad
aram summi sacerdotij infulis cinctus, ma-
jestate, seniôque venerabilis, jacebat in
carcere graviter faucius. Tinxerat cruor
verendos canos, & mitissimi oris speciẽ
efferarat. Fluente capitis vulnere con-
creti capilli, fœdata genæ, oculi madidi,
& velut sanguine lacrymantes. Circa
fauciatum, pro medentium coronâ, soli-
tudo erat, nisi quòd pro foribus excuba-
rent satellites barbari. Vestẽ carbasinam
albam, jam non albam, tabum, illuviẽsque
fœdarant. Mathildis dolore pariter, &
indignatione flagrans coram Servatoris
Vicario, & imitatore venerabunda humi
provolvitur cum viro comite. Audies
nunc, hospes, quæ libata in hoc carcere
basia exprobrentur Mathildi. Postquam
sacros jacentis pedes osculis fixit, riga-
vitque lacrymis, dum eos argentes pelli-
bus refovet comes, ipsa capiti prospicere
festinat. Capillos à læsâ fronte dimove-
re; vulnus crudum, & profluvio tabidũ
parcente manu detergere; fomentis, qua-
liacũque nancisci potuit, curare atque
obli-

obligare. Inter hæc cruentam sancti viri canitiem præ impetu miserationis, osculo semel, iterumque ficare. Quibus observatis Cincij soror petulantibus jocis in Hildebrandi, & Mathildis amores ludere cœpit. Amazon conscia sibi castissimæ pietatis, eodem animo, quo prius virorum minas, & tela contempserat, sprexit dictæ feminæ procacis, basiisque, sed non cruentis, oblectari solita. Cæterum Mathildis Cincianorum fatellitum in Gregorium crudelitatem tacita ferre non potuit. Hi verò lenitati suæ grates agendas dicebant, quòd Hildebrandus faucibus, non obtruncatus esset. Interim fama facinoris, captivæque cum Pontifice Mathildis, nobis vulgantibus, totam Urbem impleverat. (a) Undique ad arma conclamatum. Omnes quæ nobiles, quæ plebei concurrere. Nos cum militibus multitudinem Urbanam rapi- entes in ipso diei crepusculo turrim adorimur. Fugatis, qui ad portam obstiterant, custodibus, undique tela, arietes, ignes admovemus. Quisquis Cinciano-

G 4

rum

(a) *Pigna.*

rum apparebat, Pontificem, ac Mathildem violasse credebatur. Amazon suorum omnium manibus pugnabat, votisque, ac precibus ad Deum fufis tendebat accelerare victoriam, & Pontificis libertatē. Cincius pugnae labore, periculoque æstuans, quò se jam verteret, non videbat. Denique furens in carcerem cum satellitibus irrupit. Quorum unus nihil cunctatus, Pontificem ulcisci, atque obtruncare aggreditur. Mathildis & ipsa captiva nihil hinc aliud Gregorij causā valebat, nisi ut cum eo, quando pro eo non poterat, moreretur. Eminebat in celatā satellitis non tantum manu, sed etiam voce, sacrilegij, quod parabat, immanitas. Verum istum cælestis vindicta prævertit. (a) Telum foris adactum in tempore guttur diræ vocis spiraculum intercepit, & carnificem stravit, furores, & animam cum sanguine evomentem. Everfuri eramus à fundamentis turrim, & ruinis Cincium cum suis sepulturi, nisi is consternatus imminente jam sibi, quod alteri parabat, exitio, Pontificem precibus, & red-

(a) *Idem. Bern.*

reddita libertate placasset. Clementissimo sene exorante, ira Mathildis, & concitatae multitudinis ægrè, sed tamen compressa est. Inter hos motus elapso fugâ Cincio, sceleris princeps auctor Gibertus, qui alibi latebat, tunc ignoratus est. Ac Giberti haud dubiè artibus, quò rei suspicionem, atque invidiam à se averteret, factum est, ut (a) nonnulli Proregem Gibberum conjurationis caput fuisse putaverint. Cæterùm Gibertus liberato sic Pontifice, hoc est, suâ re infectâ, impotens animi Ravennam redijt, Gregorio, & liberatrici Mathildi infestior. Ibi junctus proceribus ob libidines Pontificiâ censurâ notatis perniciem utrique machinatur. Ibidem fabula de mago, & amatore Hildebrando conditur, suo tempore in eum, & Mathildem edenda. Sub id tempus Cæsar magno prælio adversus Saxones pugnat, & superior evadit, maximè virtute Rudolphi Sueviæ Ducis, Præregisque Gibberi, & (b) adolescentis Godefredi. Inde Gibber Ultrajectum venit, quàm lætus belli præcla-

G 5

rè

(a) *Bertol.* (b) *Frising.*

rè gesti laude ; tam mœstus dissidio suo cum Mathilde, cui (a) componendo per certos homines dabat operam. Altera sollicitudinis accessit (b) causa gravissima. Nuncium non minùs verum, quàm certum accepit, imminere sibi necessitatem ultimam. Anno Coloniensium Archiepiscopus omnibus sanctimonix notis illustris biduo ante mortem suam voluerat alloqui, & adduci ad se intra duos dies amicissimum illum Ducem. Quem cum audiisset abesse tridui ut minimum ; subiecissetque, serò igitur esse venturum, iussit moneri duo. Alterum, ut pro eâ, quæ inter ipsos fuerat, necessitudine, studiosè Cæsarem à persequendo Saxonico bello dehortaretur ; alterum, ut intra annum expectaret vitæ finem. Gibber, prout debuit, utrâque curam complexus est animo. Verùm vir fortis, qui dudum mortis vicerat metum, sollicitudinem quoque celare contendit. At non ita potuit, ut lateret carum, & observantissimum Godefredum. Cum Ultrajecti domi-

(a) *Florent.* (b) *Vita S. Annonis.*

An. 1076.

dominicum Natalem celebrasset frequenti procerum concursu, Antuerpiam se retulit. Hac in urbe nondum elapso tertio post Annonis vaticinium mense, funesto casu opprimitur. Noctu immissus percussor cocus miserandum Proregem crudeliter confodit, adacto in tergum ferro, & relicto in vulnere. (a) Indignæ cædes tanti Principis simul ac innotuit, dici non potest quantum omnibus luctû, sed præ reliquis hæredi Godefredo crearit. Procurrere ad cruentum avunculi corpus, procumbere in amplexum, lugere tam informi mortis genere occubuisse in flore ætatis suum illum alterum patrem, sui tam amantem; illud imperij columen, cujus fortitudine, atque auctoritate Cæsar modò nitebatur; magnum illum Ducem, qui licet deformi corpore, animi tamen & fortunæ bonis plurimum inter cæteros Principes excelleret. Curæ imprimis fuit tristi Godefredo nunciare Mathildi funestam conjugis necem. Deinde justâ irâ stimulante exquirebat adolescens, quis ille ignavus, ac fœdus insidiator,

(a) An. 1076.

sidiator, à quo percussor submissus esset, Alij alium censebant; quidam Robertum Frisium Flandriæ Comitem, cui Gibber Hollandiam armis ademerat, & bello deinde Flandrico adversatus erat; quidam ipsum Cæsarem, alienum jam à Gibbero, non satis certâ de causâ. Vero hæc affinis videtur. Gibberi Proregis potentia formidolosa, suspectâque esse cœperat Henrico in dimicatione adversus Saxones. Hanc enim improbabat Gregorius Pontifex, & vel ideo probabat Gibertus. Prorex autem in posterum cum Pontifice staturus credebatur; ideo, quòd daret operam, ut cum Mathilde conjuge rediret in gratiam, ac proinde (quod consequens erat) cum Gregorio. Certè quidem mox patuit Henricum, unde unde, fuisse offensum Proregi, cum ejus hæredi Godefredo palàm adversatus est. Verùm animo non concidit adolescens impavidus. Eò primas curas intendit, ut avunculi corpus, quâ Principem tantum decebat, funebri pompâ ad paternum sepulchrum Virodunum deduceret. Interim Mathildis accepto acerbo nuncio de conjugis morte,

morte, mox funebribus officijs perfuncta, Gregorium, ut idem faceret, litteris oraverat. (a) Rescripsit Pontifex omnino se defuncti Principis misertum, nec ullâ inimiciâ impeditum, quò minùs ejus salutem voveret, & à Deo supplex exposeret. Quo responso satis declaravit se Proregem, quando pro eo sic preces adhibuit, non habuisse in numero fontium illorum, quos cœtu piorum amoverat, nec proinde censuisse suæ captivitatis auctorem. Hoc enim gravissimum scelus anathemate, quod in minùs gravia distrinxerat alioqui castigasset. Mathildis deinde profecta in Belgicam, quo animo in conjugem esset, testari perrexit. Venerat ad Charam fluvium, inde in Chiniaensem silvam tetendit. Animi tantisper à dolore avocandi causâ dum venatur, fortè devenit in vallem peramœnam arboribus clausam, limpidoque fonte irriguam. Vastæ ijs locis solitudines modò fuerant; religio ascetarum eremum Elysij mutare cœperat. Recenter ex Calabria profecti ascetæ, favente Gibbero Pro-

(a) *In Ep. (b) Bertelius.*

Prorege, rudem ibi domum, sed non invenustam excitant. Mathildis à loci moderatore deducta in ædē sacram, inde inter pios sermones alia, atque alia lustrans, tracta denique amœno frigore limpidi, quem dixi, fontis, in margine ejus ante fores ædis sacræ confedit. Dum lavat manus, identidémque confricat, & aquam cavâ palmâ haurit forbendam, imprudenti excidit è digito sponsalis annulus aureus, quem à Gibbero acceptum gestabat amoris pignus, & monumentum. Nempe eo casu recrudere Proreginæ luctus. Requiritur annulus ab adstantibus. Oculis, manibus frustra laboratur, donec Mathildis ipsa Dei matris opem (prout à sancto morum magistro Gregorio edocta erat) magnâ fiduciâ imploravit. Mox inter bullientes arenas apparuit annulus. Addit fama rostro piscis prehensum, & Mathildi exhibitum. Quem arreptum illa, gratijs beneficæ Virgini actis, ostentans, en, inquit, aurum, quod quærebam. Huic loco imposterum nomen Aurea Vallis esto.

Atque

Atque ea fuit origo appellationis Cænobio, quod ibi Mathildis tum comendatione apud Chiniaci Comitem, tum suâ liberalitate stabilivit. Inter hæc venit ad Mathildem Godefredus. Uterque lugubri habitu erat, eoque vultu, qui præferret animi mœrorem suum cum pari virtute certantem. Pulla amborum vestis dignitatem corporis, & juvenilis oris candorem sic honestabat, ut alterum alteri miserabiliorem faceret. Godefredus parentem alterum in Gibbero, Mathildis conjugem amiserat; cujus funeri paucis post diebus mater adjuncta est. Principem optimam Beatricem Pisis, Italiæ clarâ urbe, morbus absumpsit. Hinc utrique præter dolorem ingens negotiorum, & periculorum moles incuberat. Plurimi, ac potentissimi adversarii utriusque fortunis inhiabant, quas, ut Godefredus, amplissimas Mathildis adepta erat, Italiæ Proregina; Longobardiæ, Tusciæ, Liguriæ Dux; Parmæ, Mantuæ, Ferrariæ, Spoleti, Anconæ, Pisarum Marchio; Canusij Comes. Tam clara, atque opulenta Princeps satis intelli-

telligebat sibi id ætatis viduæ (non nisi tricesimum ætatis annum attigerat) multos vel procos, vel hostes comparatos. Si nubere vellet, nemo erat dignior vel Mathilde, quàm Godefredus, vel Godefredo, quàm Mathildis. Sed alia in præsens cogitanda erant, & uterque mirifico castimonix studio tenebatur. Atque hæc similitudo virtutum, & calamitatum initam inter eos necessitudinem auxerat. Godefredus consolatione, quâ ipsemet indigebat, Mathildis animum erigere, consilijs juvare, suam opem, vitamque, si usui esset, offerre. Proregina non recusare operam, si suis se ipse negotijs expediisset. At hæc primò, & maximè urgere. Et verò Godefredo Princeps consanguineus adversariorum ferocissimus diem coram Cæsare dixerat. Hinc Mathildi tristes cogitationes obortæ, tristisque voces. Cari adolescentis hinc famam, inde hæreditatem, ac vitam agi. Cæterum perpetuo cum contemptui obnoxium fore, si se hæreditate, quâ dignum avunculus judicasset, privari pateretur. Accedebat cumulus utriusque dolori,

lori, quòd invicem locis disiungi deberent, illámque in Italiam, hunc in aulam Cæsaris evocaret sua calamitas. Triste præsagium subibat mentibus ex hac separatione, quam licet corporum, non animorum fore ambo in discessu affirmarint sanctè, tamen per sumum infortunium Gibertiná fraude accidit, ut esset utrorumque. Reversa in Italiam Mathildis intellexit mox, quàm admirabiles casus exceperant Godefredum. Quos etsi relatu dignissimos, non institui referre, tibi fortasse, quàm mihi notiores. Cæsar nuperâ Saxonicâ victoriâ ferox, Gibertinis artibus impulsus, Pontificijs monitis, minisque neglectis, pessimo exemplo ruit in scelus. Sub id tempus, cùm Romæ comitia Pontifex, Episcopique celebrarent, & unâ Mathildis adesset, (a) extortum in Urbe prodigium eis nunciatur. Ovum erat à gallinâ editum mirâ specie velut cælatum. Cernebatur in eo gemina figura, serpentis, & scuti. Serpens tribus spiris ovo circumvolutus horrebat squamis, non planis illis, sed ex ovi

H

testâ

(a) *Domniz. Bernried.*

testâ sic prominentibus, ut manu prehendi, tractarique possent. Caudam extenderrat ad subjectum scutum nigricans, ex quo velut se evolveret, tortu corporis ad ovi sumum tendebat. Sed caput dum efferre nititur, tanquam ictu quodam re-percussum ventre tenus deflexerat. Visa res ejusmodi, quæ Pontificijs comitijs exhiberi mereretur. Ovum prodigiosum dum per manus Patrum, Mathildisque versatur, nec est qui, quid portendat, explicet; adest Henrici, & Gibertinx factionis nefarius nuncius, audetque Cæsaris nomine Imperare Gregorio, ut se Pontificatu abdicet. Hic Gregorius, en, inquit, interpretationem portenti, quod habetis in manibus. Tum docuit ovo illo adumbrari Ecclesiam, serpente Henricum; quem & (a) prægnans Augusta cum alvo containeret, somniasset se parturire serpentem, multisque id postea retulisset. Adhuc illum latuisse fraudibus tanquam scuto nigricante tectum, nunc caput attollere conspicuum contra Ecclesiæ Principem. Conclamantibus universis ple-

tendum

(a) *Domniz.*

stendum esse meritis pœnis, & retundendum impium caput, Pontifex lenitatis adhuc superflux exemplum severitatis subungere statuit. Diu, multumque lacesitus ab Henrico, & Giberto, utrumque tandem cœtu piorum eximit, hunc sede Ravennatum, illum Imperio movet, populis exemptis fidei Sacramento. Quo cognito (a) Saxones decernunt alium eligere Regem, nisi Henricus antea circumactum à die anathematis annum absolvatur. Hæc fuit causa Henrico consternato in Italiam contendendi, & confugiendi ad Mathildem. Hiemis summa vis erat ineunte anno supra millesimum septuagesimo septimo, cum in Alpibus Cæsarem ad horrenda vitæ pericula compulit periculum dignitatis. Contendebat ex Germaniâ in Italiam desertus à nobilibus omnibus, destitutusque subsidij. Sollicitus quaquaversum ducebat oculos, quippe qui & Saxonum hostium, & locorum fraudes metuendas eâ tempestate sentiret. Cari duo comites, Berta conjux, filiusque Conradus pulchritudi-

H a

nis,

(a) Lamb. Sch.

nis, atque indolis eximiæ puer, non tam viæ solatium erant, quàm curarum accessio. Montes, per quos ibatur, in immensam altitudinem editi, nivium mole, geluque terrebant. Via omnis præceps, ac lubrica non equitis vestigium, non peditis recipiebat. Summâ cum vexatione ascendentibus Alpium juga crescere visa sunt. Itineris labor eò gravior accidebat Bertæ, quòd fatigatione cogeatur amabilem filium in aliena brachia transmittere. Sed nec eum diu ferre, nec ejus desiderium poterat. Repetebat identidem dulcem sarcinam, & osculis frigentis ora refovebat. Tandem ad cacumen, ac simul ad cardinem periculi ventum. Ex summo apparuit, animosque percudit facies locorum. Cùm utrimque despexissent, quâ conscensum, & quâ descendendum esset, horrore, & tædio malorū obruti, tanquam ad viæ finem, substitere. Eminebat desperatio in vultu Henrici. Inops consilij versabat animo, se Germaniæ regno, ne privaretur, excessisse, nunc privandum etiam vitâ. Nec semet tantum, sed & conjugem, & filium, unicum

cum tunc imperij hæredem in exitium intulisse. Nec progredi fas esse per abruptum montis latus, nec regredi per hostium fraudes. Neque verò consistere patiebatur, non solum inhabitabilis algore locus, sed & instans dies anniversarius, qui præstitutus erat ad tuendum principatum. Ancipiti malo pressus undique, destinatum iter persequi statuit. Ipse cum famulis descendere pedibus parat, & periculum viribus superare. Conjugi, filioque ut consuleret, dum deliberabundus, anxiusque moratur, fortè coria bubula prolata sunt. His (a) ambos includi jubet, & à viæ peritioribus deorsum trahi. Nunquam tantæ sortis, speique puerum tale in vehiculum fortuna abjecerat. Subeunti corium filio flens Augusta osculum ex animo tanquam ultimū, fixit. Comoverat spectantes non magis Bertæ sollicitudo, quam pueri securitas, qui in tantis malis nihil querebatur, nisi se frigere. Cæsar descendere aggressus per glaciem, nunc virgulta, stirpesque circum eminentes arripere manibus,

H 3

(a) *Lamb. Sch.*

bus, ac se demittere, nunc humeris famulorum inniti. Jumentorum ibi nullus erat usus, quæ ingredi ipsa nequibant, nedum vehere. Ergo colligatis pedibus alia trahere, alia per machinas devolvere oportuit. At neque Cæsar, neque comitum ullus, cum titubassent, hæcere vestigio poterant, aut se à casu sustinere. Prolapso, seu manibus, seu genibus niterentur assurgere, adminicula ipsa fallebant. Ergo alij super alios ruere, collidique præcipites. Tetra species, cum afflicto solo Cæsar nunc inter famulos, ac jumenta luctaretur, nunc volutaretur per tabidam nivem, donec stirpes, aut saxa offenderet, ad quæ posset eniti. At non aliud ei gravius fuit, quam videre periclitantem cum conjuge filium. Seu vocem, seu gemitum mitterent, notus sonus miserum convertebat. Quippe nihil proclivius erat, quam ut agerentur in præceps, vel haurirentur foveis, quas nix ventis cumulata impleverat. Vix tandem per tot discrimina salutis in campestria pervenire, declinatis Saxonum infidijs. Equorum multi extincti, aut debilitati, integri

integri pauci. Continuò Bertam ad filium sollicitudo, & amor applicuit. Eductur è corio puer incolumis, arridensq; matri, non secus, ac si foret ludicro vehiculo per glaciem tractus. Longobardiam ingressos excepit alia non locorum magis, quàm rerum facies. Amœnissimũ Italiæ latus, mortaliũque concursus recreavit animos. Ingentem Italarum multitudinẽ undique exciverat studiũ videndi Cæsarem pugnacissimæ indolis, & belli Saxonici famã celebrem. (a) Confluxere certatim Proceres, magnoque apparatu salutavere Principem in Italiã nondum conspectum, diu exoptatum. Sed magnatum omnium splendorem longè vicit adveniens Proregina magnifico stipata comitatu. Qui simul ac eminens apparuit subita extitit admurmuratio sciscitantium, & respondentium, cujus esset. Per confertam spectatorum multitudinem, velut pompã transvehitur ad Cæsarem Mathildis. Quæ præmonita litteris ejus, quantum in discrimen adductus esset, & ut opem ferret, rogata,

H 4

nihil

(a) *Idem Lamb.*

nihil omiserat operæ. Primâ salute perfuncti palàm, secedentes paululùm, secreta inter se consilia contulêre. Tum ad cômune colloquium reversi de viæ periculis, ut sit, egêre, déque securitate Conradi. Observabat Mathildis in puerò, dilaudabátque raræ indolis signa. Mirabatur speciem oris, quo apprimè referebat non Cæsarem patrem, sed Sueviæ Principem. Berra scita imprimis femina vicissim certabat officijs. Non ignara quantum Mathildis posset Cæsaris causâ, nihil prætermisit, quod ad eam magis demerendam facere videretur. Arripere occasiones ejus colendæ, inferre sermones de rebus gratis, in perpetuo versari argumento vel laudum ejus, vel carorû. Nominatim prædicare illum insignem robore, & victoriâ nuperâ Belgam Godfredum, jam Marchionem Antuerpiæ, quem non nesciebat Mathildi esse in caris eximium. Et Henricus, licet curis gravioribus districtus, ad comitatem vultum, & verba fingeat, blanditiâsque faciebat subinde, & interrogabat Proreginam, quamdiu maneret innupta; cur,
cum

cùm ipsa omnibus, nullus Principum ei placeret: tempus esse, ut ipsa, vel Cæsar ipsi maritum eligeret. Ad quæ respondere illa verecundè juxta, ac ingeniosè, præ omnibus eligendum videri pudicitæ decus. Ex intervallo revolvebatur sermo ad Henrici res. Quas compositura Mathildis Canusium reversa est. Eòdem mox subsecutus Henricus, exercitu, qui apud eum ingens coaluerat, dimisso Veronam. Canusio appropinquans Cæsar spectandis turrium munimentis, triplicique murorum ambitu, & amœni loci naturâ tangi potuisset, nisi totus fuisset in eo cogitando, cujus causâ venerat. Per obliquam rupẽ ad arcem postquam evasit, rem cum animo suo, & Mathilde deliberatam, exequi aggreditur. Canusinam illam latebram, quam Gibertini magicâ vocant, audi, hospes, quàm præclaro facto nobilitarit Henricus. Ubi ad portam pervenit, (a) insignia majestatis posuit, (ut supra dicebam) & relicto foris omni comitatu, cultûque Cæsareo, vestem induit obsoletam. Inde nudis pedibus

H 5

pro-

(a) *Lamb. Sch.*

progressus intra secundum murorū ambitum constitit. Ibi pœnitentis, & supplicis habitu sub dio tempestate illâ perfrigidâ. quæ amnium maximos glaciârat, jejunos ab ortu solis ad vesp̄eram perstat. Vultu miserabili, perfususque lacrymis cum ejulatu identidem veniâ commissorum orabat voce sublatâ, ut exaudiretur à Gregorio Pontifice, quem Româ istuc Mathildis adduxerat. Idem altero die, idem tertio fecit supplex; cūque non afferretur responsum optatum, evocata Mathildi ad pedes accidit, oravitque infimis precibus, ut pro suâ insigni in consobrinum caritate, & apud Pontificem gratiâ, efficeret, ut placatus hac pœnitentiâ Gregorius infelicē Principem in piorum cœtum, quo propter noxas exemerat, restitueret. Mathildis ei se navasse operam omnem asseveravit, & porro navaturam recepit. Quarto tandem die Henricus in interiora arcis admittitur. Bene sperare jussus ibat solutiori animo, poruitque, quâ iret, advertere. Mirabatur locum naturâ, & opere munitissimum, substructionum elegantiam,

tiam, & nitorem, opulentiámque minimè
bellis exhaustam. Deductus à Mathilde
in aulam magnificam, quæ regiam or-
natu prorsus æquaret, in conspectû Ro-
mani Pontificis venit. Optimus pater se-
veritate hujusmodi cum Henrico cun-
ctandum censuerat, ut pœnitentiam ejus
non temporis causâ (ut aliàs) simulatâ,
sed seriam esse constaret. Denique geni-
bus suis advolutum Henricum, Mathil-
de exorante, obstrictum jurejurando, se
in potestate Romani Pontificis futurû,
absolvit, eâ conditione, ut, si promissis
non staret, jus principatûs amitteret.
Quæ omnia prolixè pollicitus, deinde
Pontifici rem divinam facienti adfuit.
Tum ad mensam adhibitus, benignèque
monitus ut Cæsaream majestatem deli-
ctis exolescentem in pristinum splendo-
rem daret, dimittitur ad suos, jam quatri-
duò foris rei expectatione suspensos. Pœ-
nitentiæ genus, quo vix ullum illustrius,
abunde satisfecerat Germaniæ, atque or-
bi universo, nisi id improbasset vir bo-
nus Gibertus, & calumnijs, dolisque rur-
sus

fus transversum egisset Henricum. Is
 digna Principe Christiano, digna maje-
 state Canusij gesserat pœnitens, supplēx-
 que genibus Mathildis, ac Pontificis ad-
 volutus. Nempe virtus ubique excelsa
 est. Inde tamen egrediens constantiam
 non tenuit. Ita sibi à Giberto imponi
 passus est, ut utrumque, velut nefarios,
 capere insidijs moliretur. Verùm quæ in
 ijs flagitiorum objectorum species, aut
 umbra? Ubi ille Canusij amator, aut
 magus? Omnino verum est Gregorium
 plures ad Mathildem dedisse litteras a-
 morem spirantes, sed cœlestem, inscri-
 ptas: Dilectæ in Christo filiæ. Extant illæ
 descriptæ, versanturque in omnium ma-
 nibus. Hortatur in ijs sanctus vir Ma-
 thildem nunc ad amorem, tutelamque
 sanctæ Sedis, nunc ad vitam Christianâ
 sanctitate excolendam. Alibi præcepta
 virtutum tradit, alibi demonstrat præsi-
 dia. Alicubi verbis planè aureis (a) in-
 culcat Mathildi magnæ Virginis Matris
 cultum, ac fiduciam, quia, inquit, quantò
 altior, melior, ac sanctior est omni ma-
 tre,

(a) *Ep. 47.*

tre, tantò clementior est, ac dulcior. Maximi Pontificis tum monitis, tum exemplo frera Proregina mirum dictu est, quantum in Christianis moribus, ac nominatim in studio colendæ Virginis profecerit, quantum item se supra omnes non modò feminas, sed & viros principes, ac Reges extulerit animi robore, etiam (a) militari. Jam de inverecundâ Gregorij cum eâ familiaritate constat apud omnes sanæ mentis, falsa (b) jactari. Nempe ex odio, studiòque vindictæ conficta illa ab Giberto, & castis ejus sectatoribus, præsertim ex Ecclesiastico ordine, quibus conjugia permissa ab Henrico, at proscripta legibus Gregorius severè interdixit. Hinc illæ in castissimum Pontificem iræ, calumniæ, insidiæ, quibus domi, foris petitus indiguit præsidio, nec aliud secundum superos invénit, quàm Mathildis. Hæc Romæ, hæc in itineribus enses à Gregorij jugulo repulit. Hac Amazone comitante venerat Româ Canusium versus, tendebátque in Germaniam compositurus dissidium Cæsaris cum Saxonibus.

(a) *Baron.* (b) *Lamb. Sch.*

xonibus, sed audito ejus adventu in Italiam, incertus quo animo is accederet cum collectis copiis Italicis, substitit cum Mathilde Canusij. Verùm (a) testes sumus universi, qui adfuimus, ubique luxisse Gregorij vitam Apostolicis moribus, quæ si labe aliquâ, vel etiam suspitione turpitudinis aspersa fuisset, id in illâ luce urbis Romæ, Canusinæ arcis, & locorum aliorum omnium, in tantâ civium, militum, clientium, domesticorum multitudine neutiquam potuisset latere. Sed perspicax Gibertus vidit, quæ videri non poterant. Auctor fuit Henrico, ut in hostes Gregorium, ac Mathildē quàm citissimè, quâcumque arte, manus injiceret. Infidix à peritissimo fraudum omnis generis architecto tantâ arte comparatæ sunt, quas necesse fuerit incurrere, nisi detectæ, ac proditæ fuissent, à genio scilicet. Sed quonam? Condicto die, ac loco prægressum Cæsarem secuti mox Pontifex, & Mathildis, quæ virago non suspiciosa quidem, sed prudentiâ nulli inferior, ut nulla dabat signa diffidentis animi,

(a) *Lamb. Sch.*

animi, ita omnia tuta timenda putaverat. Jusserat observari Cæsaris, Gibertique consilia. Vix Padum cum Pontifice transierat, cum adest fidus speculator, quo prodente insidias, repetiere Canusium, Gibertumque prædæ inhiantem morfu inani delusere. Interim stupebant Henricum post tanta pœnitentiæ, atque amicitie signa usque adeò pauculis diebus mutatum prorupisse subitò ad tantum facinus. Latentes rei causæ aperuere se sensim. Cæterum prævidit jam tum Mathildis turbas & calamitates impendentes tum Italiæ universæ, tum privatim ditioni suæ, quam statuit, quantacumque erat, abdicare, ac donare. Cuinam autem? quamente? audi, hospes, aliud, quod Mathildi objicitur, crimen ingens. Ut patrimonium suum amplissimum sub præsentiori cæli tutelâ constitueret, Principi Apostolorum Divo Petro cedere decrevit. Ergo mirabili juxta, sanctoque consilio Tusciam, Liguriam, Canusium, suaque omnia Gregorio Divi Petri successori, ac Romanæ Sedi obtulit, scriptoque donavit.

navit. Nempe optabat possessionum, atque imperij onere levata procul à tumultu rerum operam virtuti impensius dare. At Gregorius virtutis avidam monet, atque hortatur, ut in materiam ejus exercendæ, omisso otio, arma pareret, & Deboræ instar militiam pietati conjungeret, Cæsarémque, si quid contrà moliretur, prohibeat aditu nocendi, ditionémque sanctæ Sedi subitam invadendi. Cæterùm dissimulandum initio censuere, videndumque quatenus proderet se, ac procederet Henrici offensio. Ille autem, dum Giberto nimium præbet aures, & Italis placandis diutius vacat, graviori alterâ tempestate exceipitur. Cùm ad dictam diem non esset in Germaniam reversus ad objecta responsurus, Saxones certiores facti de iteratis ejus delictis aliû eligunt. Rudolphum Sueviæ Ducē, qui Henrici sororem habuerat in matrimonio, pro eo Saxoniz Regem salutant. Quo nuntio percussus Henricus recurrit in Germaniā, opem Gregorij postulans. A Saxonibus quoque rogatus Pontifex, ut electionem

Ru-

Rudolphi ratam haberet, (a) Gregorius, cui nihil propositum erat, nisi Romanæ Sedis decus, & reipublicæ Christianæ quies, rescripsit nolle se præproperè factum ejus momenti comprobare. Maturè se examinaturum causam duorum Principum, & secundùm merentẽ judicaturum. Sub hæc Mathildis cum fidâ manu Pontificem reduxit Romam, ubi prædicante ipso, quàm bene de se, ac sanctâ Sede merita esset, insigni populi Romani acclamatione salutata est, & posterum à bonis vulgò appellata Divi Petri Filia. Tum reversa Canusium audit bello ardere Germaniam. Magna Imperatorum nomina, jus imperij in medio positum, studium disceptandi, probandique causam vel æquiozem, vel gratiore, populũ distraxere in partes. Henricum, quem nuper proficiscentem in Italiam à nobilibus omnibus desertum diximus, reducem magnâ frequentiâ proceres tũ sacri, tum profani ordinis secuti, cum florentibus copijs. Vulgò movebat pristinum Cæsaris nomen, fama periculorũ,

I

&

(a) *V. Baron.*

& pœnitentiæ ; tum , si quid Henricus peccabat, innocentia Conradi filij, Principis ad summa nati, indignique, qui privaretur hæreditate paterni Imperij. Cæterum belli jus anceps initio fuit : de quo cum postea judicatum est à Pontifice , sumpta semel arma obstrepuere sententiæ. Collata sæpius signa, principio ad Rudolphum, deinde ad Henricum cum inclinante victoriâ. Ita prævalentis populi vires se ipsæ conficiebant. Advertit Mathildis hinc motus animorum in Italiâ crescere, & Henricum rebus prospere in Germaniâ cedentibus conspirare aperte cum Cибerto, quem scelerum nuper comperit Gregorius, ut dixi, diris ictum sede Ravennate dejecerat. Non distulit ergo Canusina palam arma pro Pontifice capere. At expende nunc, hospes, an omni retrò memoriâ fuerit unquam atrocius virtuti cum fortunâ certamen. Fama Mathildis antè privatis suspicionibus, litteris, ac rumusculis vexata fuerat : nunc publicè proscripta est. Cumque puellæ castæ nihil sit carius pudicitiam, nullum studium à naturâ inditum

majus

majus quàm ejus tuendæ, nullum vulnus acerbius accidat quàm famæ læsæ, Mathildis longè sui sexus princeps, consanguinea Cæsarum, illa modò omni genere laudum florens, & sui sæculi habitum miraculum, subitò passim fertur fœdo amore implicita. Cujus autem? Ejus, qui, quantò sublimior dignitate, & opinione sanctitatis fuerat, tantò nunc sibi, ac Mathildi majorem inurebat ignominiam. Nunquam post homines natos auditum fuerat sacrorum Christianorum Principem Principi feminæ illuisse. Nunc circumfertur vulgò à Gibertinâ factione Hildebrandum, hoc est, Pontificem Romanum, caput orbis ac religionis Christianæ, non solùm improbum, sed (horret animus referre) magum, & omni genere flagitiorum coopertum, nocte dièque volutari in Mathildis amplexibus. Eam verò Hildebrandi furtivis amoribus occupatam detrectare nuptias. Neque ibi substitit infamia. Non enim solùm vulgi tumultuarijs vocibus conflata est, sed publicâ comitiorum auctoritate mox asserta, & sententiâ atroce cumu-

lata. Id evênit, postquam Henricus non resipiscens, & semper in peius ruens, triennio toleratus à Gregorio, denique fulmen, quod diu lacessiverat, sensit, rursus diris Pontificijs peritus, & jure Imperij exutus, missâ Rudolpho coronâ inscriptâ hoc carmine:

PETRA DEDIT PETRO, PETRUS DIADE-
MA RUDOLPHO.

Quo cognito Gibertus suam occasionem existimans, accendit Henricum ad vindictam. Instat, ut Gregorius damnetur, & dignitate abdicetur. Ipse, qui malebat nullo esse loco quàm secundo, Pontificiam tiaram sibi, tantò nempe dignior, petit. Quid orationem differo? Indictis comitijs concurritur in Noricos, convenitur Brixinam, urbem turpissimo concilio congruentem. Locus horridus, asper, præaltis cinctus scopulis, & Alpinis nivibus semper vel rigens, vel tabidus. Ibi fames perpetua, & penè frigus æternum. Ibi adeò nihil bonæ frugis, ut etiam vix Christianæ rei nomen supersit. Eo loco collecti præter frequentissimos proceres tum Germanos, tum Italos, Episcopi

scopi malè feriatæ mentis à Giberto de-
mentati ad triginta. Hildebrandum per
ora traductum pro incesto, adultero, ma-
go, sacrilego, usurpatore Pontificiæ sedis
abdicant, substituunt ejus loco Gibertū,
hoc est, bestiam adorant. Mox Gibertus
(Clementem Tertium appellavere illū,
mortalium omnium maximè barbarum)
ornatus Pontificijs insignibus triumphali
pompâ repetit Italiam tum cætero cultu
superbus, tum assumptis armatis Ponti-
fex miles. Quid tunc animi fuisse Ma-
thildi censes, hæc inspectanti? Videbat
capitalem hostem Gibertum coronatum
tiarâ Pontificiâ, præmio scelerum; Gre-
gorium apud Gibertinos spoliatum di-
gnitate virtutibus debitâ: se verò alterius
honore non minùs, quàm alterius dede-
core violatam. Adde (ut Mathildis do-
lor quantus fuerit, assequaris) clades
duas mox secutas, alteram ad Mantuam à
Giberto illatam, alteram in Saxoniâ ad
paludem Gronam ab Henrico, aut veriùs
ab hujus Aquilifero, quem post paulò Ma-
thildis Godefredum illum suum Antuer-
piæ Marchionem esse cognovit. Huic

carī capitis ab alienationi adjice, quæ mox adjecta sunt, defectionem civium, fugam militum, rebellionem populorum. Nonne censes his omnibus malis obrutam ? An non lacrymis marcidam, luctu, ac dolore prostratam defecisse ? An non Gregorium infelicem ipsa tandem ab omnibus deserta deseruit ? Contemplantur mente, hospes, quod oculis usurpavimus, spectaculum dignum Deo, non dico virum cum adversâ fortunâ certantem, sed adversæ fortunæ victricem feminam. Mathildis, quis credat ? superante dolorem animo sua damna, cladésque audit non alio vultu, quàm si vicisset. Quin & Giberto triumphante fuit eo habitu oris, ut ridentis etiam speciem quandam præbuerit. Planè, ut verissimè de eâ cecinerit Poëta noster Domnizo :

PROSPERA NON MUTANT ILLAM ,
NON TRISTIA TURBANT.

EST HILARIS SEMPER FACIE.

Virgo magnanima atque imperterrita datis ad Pontificem litteris pollicita est Apostoli Pauli tum (a) verbis, tum spiritu,

(a) *V. Baron.*

tu, non angustijs, non fame, aut ullo periculo, non gladio, aut morte, non reliquis omnibus, quæ Apostolus adjicit, posse se à Petri caritate separari. Nec pollicita est animosius, quàm præstitit. Henrico victore Italiam ingressio, ut Gilbertum Romam, expulso Gregorio, induceret, deficientibus Germanis, Italisque proceribus, stetit inconcussa, & vel sola restitit, Divi Petri egregia filia, de qua sic idem Domnizo,

SOLA RESISTIT EI MATHILDIS FILIA
PETRI.

Amazon insuperabilis armis, ærumnis, doloribus, stabat, quantumvis animi vulnera exulcerarentur, quòd conata modis omnibus Gregorium, ac se purgare, non audiebatur. Hinc vulgò deserta ab Italis sacri profanique ordinis Principibus, hinc vexata hostium armis, atque convitijs. Non deerant inter eos cæteroqui probi, carique, in quibus eminebant Conradus, & Godefredus Aquilifer, ita Deo providente, ut inter tot Henricianorum scelera non deessent formæ virtutum. Quo magis mirabatur, dolebát-

que Mathildis Godefredum inter deceptos perstare in ijs castris , unde innocentia nihilò clementiùs linguis , quàm armis oppugnaretur. Pervulgatum erat famâ, quàm is nuper offensus ab Alberto adversario temperantis fuisset non linguæ modò, sed etiam manus , quando in ipso adolescentiæ, ac pugnæ singularis æstu lenitatem animi probaverat memorabili specimine. Ergo nunc simile prodigio erat , quòd juvenis sibi dissimilis innocentem armis invaderet immixtus convitiatoribus, tanquam re ipsa approbaret, quæ illi calumniabantur. Unde Mathildi videbatur is tantò verisimiliùs dici posse præstigijs in fraudem inductus à Cæsare, quàm ipsa ab Hildebrando. Inter hæc obsessa Româ accessit Mathildis doloribus, quòd non tantùm carebat conspectu , ac solatio sanctissimi magistri Gregorij, sed etiam sciebat obsessum periclitari. Id unicum aspergebat consolationis aliquid, quòd Pontificis jussu ac vice aderat Anselmus Lucensis Episcopus vir singulari vitæ sanctimoniâ, exulatus a Gibertinis , Gregoriòque similli-

mus.

mus. Utriusque præceptis imbuta Mathildis vitam piam, ac religiosam agebat in secreto, at palàm militarem, utramque Dei causâ. Romam, præter milites, ingentem vim pecuniæ misit, quâ domi deficiente thesaurum, à se ac majoribus Canusino templo donatum, Anselmo probante, transmisit obseſſo Pontifici. Neque interim ipsa otiata est. Dies me deficiat, si velim singula Heroïdis illius opera bellica recensere. Multos in Longobardiâ ab Henrico diſiunxit collatis muneribus, plures armis, nec pauciores injectis in castella flammis. Ferebat indignissimè Gibertus unam Mathildem suis votis obstare, cujus adversos conatus ut comprimeret, suo more recurrit ad dolos. Anselmo scripsit plenas fictæ pietatis litteras, quibus hortabatur, ut Mathildem defereret. Verùm Anselmus in eum exacuit styllum. Tres libros pro Gregorio edidit, in quorum secundo respondet hæc de Proreginâ: nobilissimam feminarum paratam pro defensione justitiæ non solum bona omnia prodigere, sed ad sanguinem

I 5

guinem usque pugnare, quoad ulciscatur Deus inimicum feminæ manu. Hoc sancti viri votum utinam etiam vaticinium fuerit. Et continuò favit cælum, concessâ nocturnâ ad Sorbaram victoriâ : sed Mathildem deinde perquam tristitia excipere. Roma partim expugnata ab Aquilifero, partim largitione corrupta ab Henrico : Gibertus in solium Pontificium e-
vectus : coronatus ab eo Henricus cum uxore Bertâ : Aquiliferi lethalis ægritudo veneficio Gregorij tributa : Gregorius cum Cardinalibus in arce muro clausus, & oppugnatus. Qui deinde cùm à Normanno Guiscardo liberatus esset, & Româ Salernum abductus, ad divos excessit, venerabilis vir magnitudine animi, eruditione, sanctimoniâ vitæ, & cùm aliis prodigijs clarus, tum imprimis miraculo vindictæ Ecclesiasticæ majestatis. Pontifex usquequaque sanctus viro comper-
tæ sanctitatis Laurentio Amalphitano Antistiti intimus fuerat, quo magistro didicerat, non magicam vanitatem (ut fabulantur) sed probitatem eximiam. Atque is, ut constat, multa naturæ vires

EXCE-

excedentia patravit, virtute nequaquam magicâ, sed Divinâ. Cujus generis fuit illud: cùm Româ obsessâ excitatum esset ab Henricianis incendium, sanctus senex contrâ sublatâ manu (a) crucem in aëre pingens flammâs repressit, & velut affusis omnibus Tiberis aquis extinxit. Anno circumactō secutus est ad superos Gregorium Anselmus, ille Mathildis sanctus custos, altérque moderator, qui dum viveret, Gregorij partes multum promoverat, at longè magis cum devixit, eo ipso anno miraculis illustris. Quid alia commemorem? Quid ipse sim expertus prodigiosi beneficij, simûlque magicum, quod vocant, Mathildis facinus mox accipies. (b) Suffectus erat Gregorio Victor Tertius. At Gibertus nihilo secius obfirmato ad schisma animo Romæ hærebatur, & Pantheon militari præsidio obtinebat pro castello. Nihil actum morte Gregorij censebat, nihil longo bello vastatâ Italiâ, si alius, quàm ipse, sacrum Principatum Romæ auderet capessere.

Vc.

(a) *Bertold. Bernried.* 1086. (b) *Chron. Cassin.*

Verùm accessit ad Urbem Mathildis cum militum manu, eoque Victorem è monteCassino evocatum induxit. Actum de se sensit Gibertus, nisi sibi festinato dolo, & largitione consuleret. Homo expilatis sacrorum locorum ærariis opulentus, ita contendit blanditijs, donis, minis, ut ingens multitudo partim decepta, partim corrupta conclamarit ad arma. Repentè in Mathildem, à quâ sibi malè metuebant, impetum faciunt, eamque, ac Pontificem trans Tiberim pellunt, rediguntque in Urbem Leoninam. Ingressos ibi castrum summâ vi oppugnant. Verùm Amazon ita strenuè restitit, ut neque pedem, neque pecuniâ, quâ plus possunt, inferre potuerint. Victore post paucos Pontificatûs menses (a) sanctè defuncto, mox urgente Mathilde, aliisque procerum ad nova suffragia itum. Mirabili, summâque consensione Victori successor datus Otto Episcopus Ostiensis, Urbanus Secundus appellatus, longè maximus Pontifex, qui nunc præest rei Christianæ. Cujus in-

augu-

(a) 1089.

augurationem eo majore plausu excepit Mathildis , quòd virum laudatissimum incredibiles dictu pro Ecclesiâ labores, carcerem, ac tormenta passum nôrat, & ex ejus litteris mox cognovit Gregorij vestigijs per omnia inhæsurum. Extemplo Urbanus convocato Romæ Concilio diras in perduelles renovavit , & à Romanis impetravit , ut Gibertum cum ignominiâ Urbe expellerent , adactum jurejurando nunquam amplius invasurû Apostolicam sedem. Verùm perfidi, ac perjuri hominis furor continuò patuit. Sub id tempus plures illustri genere, famâque juvenes , Mathildem ambierunt conjugem. Postremus advênit Guelfo. Hîc Lanfrancum interpellans auditor Tiro, transis, inquit , ad procorum postremum, prioribus omnibus silentio prætermisissis. Atqui eos quoque ex ordine referri à te, nisi molestum est, magnopere velim. Quando ita vis, excepit Lanfrancus, primùm nominarim Buamundum Guiscardi filium , excelsitate animi , & partâ bello Græco gloriâ celebratissimû. Verùm is subitâ conversione fortunæ simul

mul spe Græci imperij potiundi, simul
 obtinendæ Mathildis dejicitur veneno
 præbito à novercâ. Ita duo summi bel-
 latores orbis, Buamundus Normannus,
 & Godefredus Belga, (de cujus in Ma-
 thildem animo suprâ dixi) eodem tem-
 pore, eodémque potionis genere in
 discrimen salutis conjecti, quo an evase-
 rint, incertum est. (a) Alius Mathildis
 procus fuit egregiâ indole Princeps A-
 lexij Græcorum Augusti filius & hæres
 Caloioannes. Qui cùm splendidâ lega-
 tione Canusium missâ, Mathildi se, &
 diadema obtulisset, respondit illa, se qui-
 dem eum, vel sine coronâ placitum,
 pro eo quanti esset, facere; verùm sta-
 tuisse non nubere. Nihilominus alius
 palàm eandem ambijt; & Canusium in-
 signi pompâ venit insignis ipse natalibus,
 & fortitudinis opinione, (b) Robertus
 Guilielmi Nothi Angliæ Regis filius na-
 tu maximus. Sed & ille responsum idem,
 hoc est repulsam, tulit. Denique postre-
 mus advenit Canusium (c) Guelfo dissi-
 mulatâ

(a) *Pigna.* (b) *Vuestmonast.*

(c) *Cranz.*

mulatâ personâ Mathildis ante demerendâ gratiâ, quàm proderet genus. Is erat Guelfone Boiorum duce genitus, opibus in Italia florens. Cæterum non dubitamus; quin & hunc, ut alios, Mathildis obfirmato ad celibem vitam animo rejectura esset; verum mirantibus omnibus, conciliavit inter eos nuptiale fœdus Urbanus. Quo id pacto factum, non est meum scrutari; nec, si sciam, Dominæ arcana ejus injussu vulgare. Interim Gibertus vix Româ excesserat, cum dolis, & pecunijs reparato exercitu totam Italiam rursus commovit; totam certè Liguriam, aliósque subjectorum concitavit in Mathildem. (a) Revocatus ab eo in Italiam Henricus adest, & ditionem Mathildis, & Guelfonis, ferro, incendijs, & maximè proditionibus fœdat. Castrum Romanum, quod adhuc Pontifex obtinuerat, corrupti Romanorum quidam interceptere furto, ac Gibertum antè expulsum rursus admisere. Qui ad Sancti Petri se ijs operibus jam communijt, ut sine multo sanguine non possit expelli.

Man-

(a) 1090.

Mantua , aliáque munita loca Henrico dedita, aut vendita potiùs. In castris ipsis nostris Hugo dux transfuga florem copiarum prodidit. Tentata sæpe aliorum fides per colloquium , ac pecuniam cum successu. Ego sæpius ad defectionem sollicitatus cùm in fide perstarem inconcussus pollicitis, ac minis, in furorem egi scilicet Gibertum. Struuntur mihi infidix: captus in vincula conjicior, & diuturno mensium octo maceror carcere. Tandem morti destinor , at occultæ , quàmque homines nequam nolebant sciri suâ crudelitate irrogatam. Accipe nunc facinus Mathildis magicum, ut vocant, verùm, ut vocandum est, planè divinum. Dilatum erat exitium meum in proximam noctem, hoc est in sanctissimi Episcopi Anselmi nuper cælo recepti pervigilium. Oneratus gravibus catenis cùm mortem expectarem , opprimor somno. Per quietem video illum notissimum vultu Præfulem, & ejus opem inclamo. Qui renidens cælesti luce, octavo, inquit, die cultrum meum tibi mittā.

Ego,

(2) *Vita Ans. Luc.*

Ego, etsi quid id esset, quod promittebatur, ambigebam, spe tamen erectus expecto. Octavo die homo ignotus (quem post comperi esse civem Rhegiensem) ad me venit, & limam percomodam affert. Intellexi tunc eum esse cultrum, quē promiserat sanctus Antistes. Ergo hac acceptâ confidenter compedes, aliâque vincula, quantâ possum velocitate rescindo inspectantibus cunctis, nec prohibentibus ullis eorum qui aderant, custodibus carceris. Jam vinculis solutus hærebam tamen humi jacens, & custodum metu cunctabar egredi. Ecce verò repentè mirum spectaculum. Sanctissimus Anselmus ad me redit: Amazonem quoque Mathildem adesse video, & subsequenter hominum multitudinem. Qui cùm dicerent, quid exire cunctaris, surge confidenter, excede; animatus surrexi, videntibusque custodibus, nec contrà hiscentibus, ac velut torpore defixis, ejeci me foras, atque evasi incolumis ad Mathildem Canusij comorantem, licet eodem tempore visam in carcere. Gibertus fure-

re, Mathildis lætissima magno Anselmo
grates agere, omnes me viso stupere,
quemadmodum te quoque, hospes,
stupentem video. Nunc Henrico Mon-
tem Bellum (a) obsidenti venit auxilio
Gibertus, perterruitque multorum ani-
mos. Hic est tyrannus, qui vastitatem
Italiæ intulit, cujus furore ad viginti
hominum millia hoc bello cæsa, sacra
loca Romani imperij desolata, oppi-
da & arces dirutæ, cuncta passim fœ-
data populationibus, &, quod malo-
rum caput est, hæresi Gibertinâ. At
Mathildi Christianæ Amazoni nunc
offertur pax, & Cæsaris benevolentia,
si cum Giberto redire illa velit in gra-
tiam, de quo Carpineti jam cum con-
vocatis deliberat. Tu ex auditis, hospes,
vide utri parti favendum censeas. Hic
finem longæ narrationi imposuit Lan-
francus, tacitusque, quid Tiro re-
sponderet, expectavit. Ille animi sen-
sa regens ita se venerari Mathildem o-
stendit, ut Cæsari adversari nollet.
Responditque, liquidiùs ex decretis
illius

(a) 1092. *Chron. Cassin.*

illius Carpinetani conventûs constaturum, quid de partium causâ sentiendum esset. Sub hæc Lanfranco de narratione actis perhumaniter gratijs recessit, quæ audierat Ultori duci suo relaturus. Qui his nunciatis tantò impensiùs ad acceptam injuriam vindicandam incubuit, latens interim, quoad rei gerendæ obveniret occasio.



K 2

LABO-



LABORUM
HERCULIS
CHRISTIANI
LIBER SECUNDUS.



ONVENERANT (a) Carpine-
tum cum Mathilde Episco-
pi, aliique viri ex sacro or-
dine complures, id discussu-
ri, an Mathildis pacem, cæ-
teroqui necessariam, admittere salvâ le-
ge rectæ conscientiæ posset. Inter cæte-
ros Heribertus Rhegij Episcopus, de cu-
jus sapientiâ & probitate non parva erat
opinio, pacem in hunc modum suasit :
Inclytam Mathildem à principio mo-
tuum (b) Italiæ suscepisse tutelam sanctæ
Sedis, & adversus potentiam Cæsaream
fuisse Præsidio Pontificiæ majestati.
Omnibus admirationem attulisse non
magis

(a) *Domniz.* (b) *Florent.*

magis pietate, quàm intrepidâ animi firmitate. Pugnaſſe ſuperiori bello, contra Henricianos felici marte, & incredibili virtute adhuc tutatam Pontifices quatuor. At reſerſo nunc in Italiam Henrico mutatam rerum faciem. Exhaustis priore bello opibus, abſumptiſque militibus, redactos nunc cives ejus ad paucitatem, atque anguſtias. Mantuam cum tot munitis locis amiſſam, Liguriam denudò defeciſſe, Tuſciam tumultuari, Longobardiæ partem eam, quæ in fide maneat, habere in viſceribus Cæſarei exercitûs vires. Quòd Mons Bellus adhuc reſtiſſerit Cæſari obſidenti, tribuendum eſſe non robori præſidij, vel loci munimento, ſed ſupremo conatui desperabundorum militum. Mathildem ipſam, quòd ad eum uſque diem perſeveravit obſiſtere Henrico victori, edidiſſe quidem inſolitum, ac mirandum exemplum constantis in Romanam Sedem animi, at non ſequendû ab alijs adminiſtrationis politicæ peritis. Paucos ei ſupereſſe milites, & deſſe pecuniam, quâ novos con-

K 3 • ducat.

ducat. Siquos ad arma sumenda vi compellat, confidi ijs non posse post tot exempla proditorum. Ejusmodi homines animum non minùs, quàm operam, venalè ad licentium vocè circumferre. Nunc verò à Cæsare quantumvis ob potentiâ formidabili, benevolè offerri pacè conditionibus adeo commodis, quibus non possent peti comodiores, si modò rationis præscripto non repugnent. Deum ipsum amare pacem, quæ non adverse-
tur rectæ conscientiæ. Ei autem non adversari pacem oblatam, ad quam ratio necessitasque compellant. Et verò conducibilius Mathildi, & honorificentius reipublicæ Christianæ futurum, si Henrici, ac Giberti errata conetur ipsa corrigere positis armis. Cum ambobus felicius actum iri hortationum & monitorû suavitate, quàm severitate armorû. Henricum interrogatum cur tanta ausus esset contra Gregorium causam hanc attulisse, quòd is medicus ægro adhibuisset nimis acerba remedia. Igitur malum, quod ferro, & igni sanari nequierit, mitiori manu curandum. Adhæc justam esse

cen-

consensendam pacem ijs , quibus nulla nisi in pace salus relinquatur. Quare tandem arma non profutura exueret fortissima bellatrix. E virtute ejus , atque ex instituto Ecclesiæ esse , tot belli malis finem imponere. Nimium sanguinis innocui fufum. Tot incendijs, sacrórum profanationibus, stupris divinam vindictam provocari. Pacem Mathildi gloriosam, optatam omnibus obventuram. Hac oratione Heribertus non solùm Patrum maximæ potissimæque parti persuasit pacem, sed etiam Mathildis animum ita movit, ut parum abfuerit à consensu. At ecce anachoreta, qui isthic aderat, Ioannes nomine, homo vitæ severitate comparatus ad vitam negligendam, offerendamque in discrimen pro Dei, & Ecclesiæ causâ, surgit, & tacentibus cæteris priori sententiæ strenuè, & vaticinantis in modum, (a) contradicit. Quis metus, inquit, ô Domina, animi tui adhuc irrepidi constantiam turbat? Quod commodum , aut quæ possessionum amplitudo comparari cum cælesti mercede

K 4 potest?

(a) *Florent.*

potest? Nescitis vos Mathildem eam esse, quæ titulo filix divi Petri meritò gloriatur? Ignoratis eandem Gregorio sanctæ vitæ Pontifici promississe, nullis rerum creatarum viribus, aut illecebris se ab obedientiâ Romanæ Sedis dimoveri passuram? Quo vos obtentu, quibus argumentorum coloribus officitis luminibus veritatis? Potestisne Henrici partes amplecti, quin Gibertum Pontificem admittatis? Quid agatur hoc bello, quid pace, perpendite. Romæ arci Ecclesiæ imminet perditissimi Giberti spes. Seu bello vincat Henricus, seu pacem obtineat, regnabit Gibertus, & religionis virtutisque vestigium, ubi regnabit, relinquet nullum. Conditio pacis offertur speciosa, fateor, at reipsâ turpissima. Quanti esse debet profana quantacúmque quies, ac felicitas, si scelere comparanda est? Longè tibi conducibilius, magna Comes, omnia perdere, quàm cum damnatâ Gibertinâ hæresi conjuncta possidere. Macte igitur animo, & pristinâ illa virtute perge tueri Ecclesiam. Non potest Deus religiosæ

tuz

tux constantix non respondere efficaci
præsidio. Fidem tuam non potest non se-
qui prodigiosa victoria. Tibi ego, Do-
mina, nuncius adsum à Deo, quò minus
speras à milite, & ærario tuo, eò majus, &
præsentius è cælo adesse auxilium. His
vocibus divino spiritu plenis roborata
Mathildis ejuravit omnem de pace tra-
ctationem. Nec est variatum sententijs
inter alios. Omnes cum Proreginâ moti
oratione anachoretæ intrepidi, statuere
mortem potiùs, quàm oblatas à Cæsare
conditiones pacis accipere. Quibus au-
ditis Henricus iratus, iratiórque Giber-
tus clamant, domandum esse vi mulie-
bre pectus. Id ubi semel in pertinaciam
induruerit, non aliter vinci posse. Mox
machina ad murum diruendum admo-
ta. Hanc Mathildis improvisò injectis
ignibus redegit in cineres. Cæsar in-
flamatus majore iracundiâ jubet premi
obsessos, sed suâ majore jacturâ. In liberis
præter Conradum, & Henricum puerum
ex Berta susceptos habebat filium no-
thum, (a) cui Henrico quoque nomen.

K 5

Is

(a) *Domniz.*

Is priore bello dux paternarum copiarū junctus Giberto ad Mantuam fuderat Mathildanos. Idem in hac Montis Belli oppugnatione, dum murum invadit, occiditur. Cæsar ex dolore impotens sui, misso Veronam cadavere, obsidionem, cū minimè putaretur, abruptit repentino occultoque consilio, gravius aliquid moliturus in Mathildem. Abductis à Monte Bello copijs, primū Placentiam, inde Parmam versus movet. Omissō dein, quod finxerat, itinere, subito retrocedit Cavilianum, unde Canusium parvo intervallo distabat. Magna ex arcano inceserat Henrici animum cupido Canusium principem Mathildis arcem excindendi, & in eā Mathildē opprimēdi. Hæc meditati, nec rationem tantæ rei satis explicanti placebat tamen magis arcem adoriri subito impetu. At Giberto visum adhibere fraudem, & belli furtum. In eam rem omnes suas versat artes. Erat tunc Canusij Mathildis, cognovitque Cæsaris adventum, sed non consiliū. Cæterū ne is propinquam Caviliano arcem Bibianellum interciperet, dividit ipsa

ipsa copias, & parte earum Canusij reli-
ctâ, partem secum Bibianellum strenuè
ducit: (a) Mensis erat october, & vixdum
certa lux, quam ipsam premebat caligo.
Densa nebula ex amne Lenciâ humidis-
que vallibus exorta, condiderat cælum,
& Canusinum agrum involverat. Penè
totum diem duravit, belli furto accom-
moda. Usus occasione Henricus, qui non
de capiendo Bibianello, sed arce rerum
Canusio cogitabat, huc per caliginem
educit exercitum. Duo erant montes non
procul Bibianello, quorum alteri lumig-
næ, alteri nomen Lintregnano. Per illū
adventabat Mathildis, per hunc Henricus
densis copijs stipatus procedebat. Exerci-
tus alter alterius motum per tenebras
non visu, sed aure comperit. Mathildis
agnito strepitu gradientis hostilis agmi-
nis cum suo festinat intrare Bibianellū,
cui intercipiendo venire hostē putabat.
At Henricus prætergressus passis vexillis
Canusium lætus properat. Advertit serò
Mathildis se, dum Bibianello cavet, Ca-
nusio præsens creasse periculum, præci-
puâ

(a) *An. 1092. Domniz. Florent.*

puâ parte copiarum eductâ ; nec eò jam rediri posse à suis , intercluso ab Henricianis itinere. Neque verò fidendū quibusvis suorum didicerat defectione , ac proditione multorū. Sollicitudini cumulum ingentem addidit res ejusmodi. Mathildē Bibianellum cum agmine suo venientem secutus erat globus equitū paucorum, sed insignium. Proceres appellat Domnizo : at noti illi, an ignoti Mathildi essent, non scribit. Id addit, proceres illos, quicumque fuerint, subitò à Mathilde digressos, retrò abiisse ad hostilē exercitū. Inter hos proceres, atque adeo horum principem fuisse Ultorem ignotum, cujus familiarem Tironem suprà Lanfranco Mathildano loquentem fecimus , pronum est existimare ex re mox gestâ. Nunc ejus Ultoris grande facinus exequiar, cujus summam Orderico Vitali historico æquali, claróque debemus ; ordinem autem verisimilem ex adjunctis, quæ hîc Domnizo testis oculatus refert, eliciam. Ignotus Ultor ad id efficiendum , quod moliebatur, Mathildem & sequi cum socijs debebat, & volebat latere : cui rei

argu-

argumenta pòst dicam. Ut tardissimè, & ad latendum percomodè accessit ad eam hoc tenebricoso die socijs imixtus. Qui dum Mathildi operam adversus Henricum offerunt, ipse ne nimio latendi studio se proderet, elato modicè cassidis speculari tegmine vultus partem detexerat. Mathildis mirata adventum egregiæ juvenum manus, nec satis certa quid ab ijs sperandum, timendūne esset, hæcebat. An tunc habuerit spatium contemplandi singulos, sciscitandique, quinam essent, non habeo dicere. Cogitationum æstus mirum quantum in mente Amazonis invaluit, cum procures illi, observato Henriciani agminis transitu, continuò cœpere capita inter se conferre. Tum repentè dux Ultor è media turmâ evolat ad primos, seque, quantus erat, spectandum præbet Mathildi. Erat cæteris, si non cultu, certè specie corporis tantò augustior. Per galeæ licet clausæ cancellos majestas quædam emicabat, & ardor animi. Quem & toto gestu prodidit cum elatâ manu jubentis in modum significavit socijs, ut ipsum sequerentur. Mox subdit

subdit equo calcaria , conversisque frenis tota post eum turma flectit iter ad Henricum. Relicta Mathildis, tanquam viso monstro attonita, tantum non contremuit præ confusione affectuum. Rubor, pallor , & aliæ turbidi animi notæ percurrissent ejus faciem, nisi pro eâ insigni, quâ erat in perturbationes potestate, erumpentes illico repressisset. Cæterum invaserant momento pectus Amazonis gravissimi motus. Visa sibi erat agnoscere in eo duce Aquiliferum Godfredum. Reputabat illum hostem suum semper infensum, nullus litteris suis placatum , novis beneficijs & affinitate Cæsari obstrictum, adesse, moliturum prioribus graviora : illum moribundum aut, ut fama erat, mortuum , subito prodigio excitatum, ut labantem fortunæ Canusinæ statum impelleret seu proditione , seu ferro. Inter justam iram ac stuporem hærebat tacita , atque incerta an arma stringeret, eumque sequeretur. At succurrebat deinde animo hunc aliū, quàm ex gestu apparebat, esse posse. Lineamenta

menta oris per galeæ cancellos, & obscuro die non satis perspicui posse. Mentem suam Aquiliferi imagine plenam facile posse sibi fingere quod oculis non usurpet. Ad hæc non semel inventos homines gestu vultûque simili, cætera diversissimos. Ita Conradum Henrici filium ore referre Sueviæ Principem. Et verò Belgam Godefredum revixisse, vel etiam tam subito convaluisse, speciem veri non habebat. Ex hac recordatione fatalis morbi ejus subeunte mœstitiâ prior animi impetus elanguit; ambigebatque Canusina quid statueret. Cæterum proceres illi sic discessere magis suspecti, quàm venerant. Cogitabat Mathildis, si amici erant, præsens vitæ discrimen adire egregios juvenes; sin proditores, intelligebat se deceptâ tantò magis ab ijs periclitari Canusium. Verùm ad hanc arcem propugnandam si reduceret ipsa copias suas non magnas, videbat & has insidijs per tenebras, & relictum Bibianellum obijci discrimini. Satiùs denique esse duxit Bibianello consulere, & partem servare, quàm rerum sumam in discrimen

con.

conjicere. Ergo Bibianellum ingressa, Canusium supplex comendavit Numinis providentiæ. Interim Cæsar appropinquabat Canusio, magnisque cum eo lætitijs incedebat Gibertus. Robur prævalentis exercitus, atque ipsæ tenebræ spem certam faciebant potiundæ desertæ arcis. Vapor tam denso nimbo urbem operuerat, ut conspectum ejus eriperet agmini. Etiam Henrico, Gibertoque vacabat joculari de magico illo latibulo, nunc caligine velut magicâ circumfuso. Henricus universæ militum multitudinis adventu lætatus, Giberto adulate solitâ vanitate spem ejus inflante, duplicem instruxit aciem. Alteram ad invadendam arcem misit, alteram in colle vicino retinuit, quam vel Mathildanis, si Bibianello regrederentur, objiceret, vel oppugnatoribus arcis auxilio submitteret. Milites alloquens repetijt haud sanè jucundam memoriam illius temporis, quo ante portam Canusinæ arcis iniquissimâ hieme per triduum expectarat responsum Hildebrandi. Cohortatus est omnes ad ulciscendas illatas sibi in eâ latebrâ à ma-

go, & magi amicâ injurias. Tum conversus ad Obertum vexilliferum novum, præfer, inquit, signum, & teque in caliginem magicam infer intrepidè, securus Pontificis & Cæsaris auspicijs. Gilbertus hac sui mentione cum honore illatâ provocatus, & ex consuetudine immodicus laudator Cæsaris, cœpit prædicare militibus, quæ Henricus gesserat, quæque non gesserat. Multitudine operum eum non solum meruisse Magni cognomentum, sed antecessisse Iulij Cæsaris facinora, ac propemodum fidem. Ad quinquagies contulisse signa plerumque fortunâ, semper gloriâ superiorem. Deinde orsus recensere victorias, in ijs etiâ, quæ alieni operis erant, Henrico tribuit. Imprimis Godefredi Aquiliferi virtute & sanguine partam gloriam intercepti non semel. Quin addidit illum transfugam non tam valetudine debilitatum, quàm femineis armis terrefactum latere, non aliàs quàm simulato morbo tutiorem, nec alio præmio quàm morte dignum. Postquam multiplices addidit militibus stimulos, Henricus jussit oppugnari

L

pugnari

pugnari Canusium. Interim Lanfrancus, alique Mathildani, qui in præsidio relictæ erant, quanto in periculo versarentur, non sine dolore cogitabant. Stabant tamen nihilò segniùs armati in muris certi pro fide ultima experiri. Ecce autem eminus extra arcem exaudiri cœpit strepitus currentium equorum, tum vociferatio, mox excussorum telorum stridor, quorum nullû ad muros pertinebat. Indicio hæc fuere, pugnam iniri foris: cujus hæc erat occasio. Ignoti proceres, digressi à Mathilde, moniti fuerant ab Ultore duce, Canusium, quò intendebat, unam viam superesse, & eam ipsam præter Henrici castra. Quare in promptu haberent tela, tanquam non iter, sed prælium cum hostibus Henricianis inirent. Id deterreant tamen quoad possent, & per obstantes viam celeritate, & audaciâ potiùs, quàm ferro facerent. Non fortius imperavit dux, quàm Tiro alique socij paruere. Nunquam exercitum neque numero militû minorem, neque digniorem famâ, & admiratione hominum vidit Italia. Omnes

unius

unius nationis erant , plerique consanguinei , nobiles omnes vel genere , vel virtute, Mathildique addictissimi. A quâ digressus dux non abnuerat perfidi speciem, & cognomentum, ut sub hujus obtentu liberator Canusij animus aperiretur suo tempore, postquam Henrico, Gilbertoque intulisset cladem. Castra Cæsaris dum prætereunt, speciem præbuere rectâ tendentium cum Cæsarianis ad oppugnandam arcem. (a) Deinde observati per agmina silentio procurrere, ac denique agniti pro hostibus , clamore telisque laceffuntur. Verùm memores monitorum ducis, nec se, pugnâ implicari passi sunt nec transitu prohiberi. Pervecti ad portam arcis oravere admitti supplicas venientes à Mathilde per media hostium tela. Cùmque ejus rei fidem fecissent, introductus cum suis dux Ultor oppidanis non tantùm animos erexit , sed miræ audaciæ consilium dedit. Non esse post muros expectandam oppugnationem, sed in hostes prodeundum. Nebulæ caliginem egredientibus obsecundaturam.

L 2

(a) *Domniz.*

daturam. Inopinatâ eruptione & fiduciâ
 turbaturos hostem. Non diffidendum
 paucitati, sed Deo causæque fidendum.
 (a) Aderat anachoreta Ioannes, ille nuper
 dissuadendâ pace nobilitatus, nec læta
 magis varicinatus, quàm vera. Is hæsitantes
 vel hortatione præsentis, vel recordatione
 promissi nuper auxiliij stimulavit ad
 audendum. Ire fortes, ire felices iussit,
 & honores, ac præmia à Mathilde, Deoque
 sperare. Inde pleni animis ordinatâ
 acie cum Ultore duce muris erumpunt
 anachoretâ cum alijs viris religiosi sacra
 carmina modulante, & cælestem opem
 conciliante euntibus. Nec ille suos, nec
 cum fefellit fiducia Numinis. Nebula ad
 multum diei adeo densa fuit, ut lucis usuram
 eriperet non solùm prospectu extra urbem
 adempto, sed tantùm non propinquo
 congregientium inter se conspectu. Hac
 velut latebrâ tecti Canusini hostem effusè
 venientem, campisque inconditè obstrepentem
 adorti silente, confertoque agmine. Primùm
 densus sagittarum imber in Henricianos effunditur.
 Inde ad manus acriter ventum, directo

(a) *Idem.*

in

in eam partem impetu, quâ Cæsarea aquila præferebatur. Gestabat Oberti filius, illius, opinor, Marchionis, qui in castris ad Sorbaram nocte à Mathilde oppressus occiderat. Ibat hic magno animo ulturus patrem, approbaturusque factis, se dignum Aquiliferi Belgæ successorem. At Mathildanis proceribus illuc invec̃tis, calente pugnâ, ipse vexillo notabilis à bellatore incognito incurſatur aduerso equo, ferroque appetitur. Quod evitaturus, dum in latus se flectit, lorice pondere, & vi petitionis corruit cum aquilâ, graviter læsus. Ingentis facti gloria per tenebras pressa cum auctore tunc latuit. Concurrere ad opem prostrato ferendam Henriciani, at nullo potuere conatu efficere, quin Cæsarea aquila in manus hostis veniret. Et plerisque cum vexillifero cadente ceciderat animus. Ille aquilâ amisâ repositus in equum, iterum in collem ad Cæsarem Gibertumque se fugâ recepit, multis sequentium amissis. Penitus dispar Aquilifero Godefredo in Rudolphū pugnanti, cum hic aquilâ servatâ victoriâ adeptus sit, Obertus amisâ

perdiderit, Cæsar ac Gibertus cœdâ Marchionis clade turbati hærebant simul attoniti, simul irâ ac dolore perciti, quod Canusinam arcem non modò non potuissent capere, sed ne videre quidem propter nebulam, imò ab incognitis arcem ingressis acie victi fugatique essent, amisso vexillo primario, tótque victoriarum fructu, & gloriâ. Accesserat altera doloris, & consternationis causa. (a) Alatus eo ipso tempore Cæsari ingratiſſimus nuncius de filio Conrado ad Allobroges misso. Ferebatur hic è castris suis nuper abscessisse elanculùm, & ad Mathildem defecisse. Ergo mœstissimus Cæsar collectis extemplo vasis Baianum cū exercitu fugit. Baiani peractâ insomni nocte contendit ad Padum, & biduo transportavit exercitum. Præclaram de eo victoriam (b) adscribit Domnizo processibus à Mathilde digressis in arcem. In his, ac horum ducem fuisse illum, quem dixi. ignotum Ultorem didici ex (c) Orderico, qui prodat ab eo juvene sibi notissimo Cæsarem è campo conjectum esse in.

(a) Sabell. (b) Domniz. (c) Order.

in turpem fugam, quæ nusquam nisi ad Canusium contigit. Irarum causa additur atrox injuriâ, quâ juvenis ab Henrico fuerat affectus; inde induerat animum & nomen Ultoris. Jam Obertum Cæsaris vexilliferum non ab alio quàm ab hoc fuisse prostratum faciliè credet, qui animadvertet solitum ipsum in acie pignari fortissimum quemque. Qui Canusij supererant, depulsâ sole nebulâ vacua hostium castra conspexere, dum interim victores hostium vestigijs inhærent. Nec defuere, qui Mathildem de victoriâ certiorem facerent. Prædicabant inexpectatum procerum auxilium, prostratum ab ignoto bellatore Obertum, aquilam captam, Cæsarem cum Giberto fufum fugatûmque, unico è Mathildanis desiderato. Proregina tam subitâ, atque inopinâtâ, eâque tantâ rerum conversione stupens pariter ac læta, Deum veneratur. Grates ei primûm, deinde pugnatoribus, ut quisque accesserat, egit, omnibus agere ac referre cupida. Mox prædiit & ipsa in campum victores se-

quens, imminensque tergis hostium, & recipiendis, quæ ceperant, locis. Subiebat animum ingens cupido noscendi victores illos, & horum maximè ducem. Mente ambiguâ Belgam eum Godefredum esse & cupiebat, & adduci non poterat ut crederet, cum non caperet, quomodo is repentinè extitisset ex moribundo ac mortuo superstes, atque ex hoste defensor. Interim perlata illuc fama de Conradi defectione à patre, flexit animum Mathildis, ut putaret hunc verisimilius venisse sibi auxilio, quàm Godefredum. Cæterum tunc Mathildi adhuc fuisse incognitum illum, quicumque erat, ducem, collegi ex mox securis. Inter hæc (a) supervênit Veronâ destinatus ad eam nuncius. Ignota erat facies hominis. Exceptus à custodibus corporis perducitur in conspectum Proreginæ gemens, & veste squalente, digressisque arbitris ait se missum ab infelicissimâ Principum Augustâ Praxede. Hæc præfatio Mathildem multiplici expectatione comoverat, quid potissimum timeret, incer-

(a) *Florent.*

incertam. Jussus dicere Veronensis. Cæsar, inquit, in Italiam rediens adversum te, voluit Augustam conjugem adesse testem flagitiorum suorum, jussitque secum venire cum deformi comitatu, (a) nobilium pellicum grege. Praxedis dedecorum aulæ Cæsareæ pertæsa, valetudinem primùm excusavit. At suasu tamen bonorum quorundam, ne & virum & occasionem qualemcùmque ejus ad frugem revocandi neglexisse videretur, denique comitata est. Sed quid pietate consecuta sit audi, & miserare. Illa conjux formâ, nobilitate, morum honestate insignis, principiò tam cara suis fratribusque Godefredi meritis, displicere cœpit Henrico. Non defuere, qui innocentem accusarent. In eâ cum vitia non possent, virtutes sunt criminati. Ac primùm quòd pudica esset crimini datum est. Castimonia Augustæ scilicet visa est censura libidinum non solum Augusti; sed & Gilberti dudum (b) incestorum amorù comperti, damnatique à Pontifice. Inde offensi ambo excogitaverunt pœnæ genus o-

L 5 mnibus

(a) *Gerbohus*. (b) *Bernried*.

mnibus criminibus fœdus. Tanquam vulgaris flagitij puderet, palmarium invenêre. Decretum (a) ut Augusta, ne integritate gloriaretur, per noctem offerretur infamiæ. Præscijt illa tempus & locum, & dolore percita, clàm proborum quorundam imploravit opem. Plena erat res difficultatis & periculi, Cæsari Giber-tôque obistere. Et jam infelix Praxedis circumventa scelere, deprehensaque in thalamo noctu, implicita vinculis ad ludibrium & dedecoris patientiam erat. Cæterùm amici armatâ manu irrumpunt in tempore, & immunem intactâque eripiunt, nec non inobservati per tenebras evadunt. Inde aliud malum exortum, alia criminatio. Vocata est in suspicionem (b) clandestinorum amorum cum aliquo eorum, à quibus liberata fuerat. Henricus, quam modò improbitati prostituerat, nolebat vel probam, vel improbam esse suo arbitrato, sed mariti. Accusatorum principem dixerim Gibertum, cui Praxedis in eo maximè displice-

(a) Gerhohus. (b) Cranz.

splicebat, quod observarat (a) ipsam ad-
versari sectæ Gibertinæ ; tibi verò, Do-
mina, studere. His offensus sanctus Pon-
tifex , & majestatem suam violari non
ferens, gratiam apud Cæsarem, & poten-
tiam flagitijs quæsitam in caput innocen-
tis Augustæ exercere statuit. Tot enim
sceleribus meritus est, ut hujus quoque
auctor fuisse credatur. Ergo Cæsaris cre-
dulæ aures duobus falsis criminibus oc-
cupantur , Praxedis violati tori & defe-
ctionis ad Mathildem rea in secreto agi-
tur, periculi latentis ignara. Monetur ab
accusatoribus Cæsar , ut omnia uxoris
observe. Jam antè notarat eam sæpius ,
familiariúsque Conrado loqui. Ex his ta-
met si nihildum jure poterat de fide con-
jugis perperam suspicari, tamen non pla-
cuerat familiaritas , quam ex ingenio
suo æstimans , censebat proclivem ad
amorem. Accessit quòd Augustam, post-
quam turpi illo periculo nuper defuncta
esset, videret tristiores, & sibi non nisi
coactâ quâdam oris conformatione ri-
dentem. Non desuere, qui interpreta-
rentur

(a) *Pigna.*

rentur Cæsari causam tristitiæ esse, quòd vilesceret ipse uxori alienâ consuetudine captæ. Hinc intentior in ejus verba & gestus, seu ea cum Conrado, seu cum alio procerum ageret, ubique captans occasionem sinistras de eâ suspensiones confirmandi, unguem scilicet figebat in ulcere. Adverterat aliquando Conradum secretò loqui Praxedi, nutusque inter eos, tum intimæ necessitudinis testes, tum mœroris. Mox in mentem venit suspicioso Principi causam mœroris esse, quòd amantibus deesset facultas amandi apertius. Nempe Praxedi se jam vilem esse: Conradum toto ore sibi dissimilem, nec agnoscere se patrem, nec vereri. Datâ occasione Praxedem interrogat quidnam ei doleat? Augusta præfata veniam, si parendi studio exponeret ei sincerum, & diu tectum animi sensum, subjecit secum Cæsare non recusare vel in castris versari, vel partiri belli labores, ac pericula: sed eo bello delectari non posse, quo (a) Mathildis consanguinea, & compertæ probitatis Princeps vexaretur auctore

(a) *Pigna.*

& ore Giberto. Cæsar irâ percitus, quòd
 condemnari se sentiret, cùm tu, Domi-
 na, absolvebaris, in vectus multis in con-
 jugem, ita conclusit: cùm Mathildem in-
 nocentem, mecum Giberto nocentem
 facis; prodísque quod dudum notaram,
 me tibi viluisse, nempe alieno amore
 implicitæ. At, si vivo, senties quantum
 mihi debueris, & quid possim. Sub hæc
 repudiatam jubet in custodiam abripi.
 Mox Conradus evocatus à Cæsare non
 jam irato, sed furente. Vereor, Domina,
 castissimas aures tuas contaminare nar-
 randâ turpitudine consiliorum Principis
 furiosi. Cætera ex hoc uno collige. Cùm
 Conradus in conspectum prodijt, Hen-
 ricus, sive ut conjugem dedecore ulcisce-
 retur, sive ut juvenis animum in eam
 exploraret, certè hunc seriò sollicitavit
 ad vitium inferendum captivæ. Obstu-
 puit Conradus ad tantum nefas princi-
 piò. At leno Cæsar, ut id persuaderet, &
 verecundiam demeret paterni tori vio-
 landi, declaravit ei arcanum natalitium.
 Nihil est, inquit, quòd tantopere mea
 jussa refugias, neque enim illa tibi no-
 verca,

verca, ut putas, neque tu es filius meus, sed ejus Sueviæ Principis, cujus vultum refers apprimè. Hic Conradus obmutuit, cui scilicet non potuit non ingrata esse oratio, quâ se Cæsareâ simul claritate sanguinis, simul hereditate excidisse discebat. Sed suspicari timeo, & scire pudet, quid ausus sit deinde juvenis sollicitatus Cæsaris jam non patris imperio, Praxedisque non novercæ formâ. Id scio Conradum Henrico talia suadenti non oblocutum, deinde secretò adijisse Praxedem, postea jussu Cæsaris discessisse ad Allobroges cum copijs ipsum, Praxedem in castris videri desijisse. Quid nunc sentias, Domina, de juvene illo, quem vulgò castissimum, Godefredoque Duci amicissimum censebamus? Mathildis adhuc stupens sic interfata est: certè si talis fuit, qualis habebatur, cur Cæsari non exprobravit consilij infamiâ? Cur Praxedem, quando adijt, non liberavit carcere, aut saltem postea liberare contendit eorum militum operâ, cum quibus ad Allobroges discessit? Nempe
nec

nec de captivæ dedecore sollicitus, nec Godefredi memor est, nec retinens virtutis Cæsareæ, ex quo Cæsareo genere excidit, sed Cæsaris tantum metuens; cui, heu! nimisquam promptè paret. Interim, excepit Veronensis, æger in Belgicâ Augustæ frater, acerbissimo illo nuncio vel celandus visus est, ne eo mors acceleraretur, vel si de sorore rescijt, ad extrema deductus est. Mathildis tristissimâ narratione perculsa virtute totâ suâ eguit, ne dolori succumberet. Audiebat se defensam ab Augustâ, & ideo hanc in odium æumnâsque vocatam; ambigi de Conradi genere & continentîâ, atque adeo de Godefredi Præregis vitâ. Aliquamdiu vocem tenuit, ne abiret à majestate. Deinde interrogat paucis nuncium (nec pluribus patiebatur dolor) sciatne, quem ad locum è castris abducta sit Augusta; tum an adhuc illa, fraterque Godefredus vivant. Non possum, inquit Veronensis, vivam dicere eam; quæ calamitatem patitur omni morte acerbior. Jussu Cæsaris clam abducta Veronam, ibi plerisque ignorata in custodiam

stodiam data est arctissimam , malorum
tamen, quæ patitur, levissimum. Ejusmo-
di sunt, quibus mortem sæpius præopta-
rit. Verum id beneficij concessum non
est. Illud autem contigit, ut occasionem
diu quæsitam tandem invenerit aliquem
noscendi, cujus fidei credere raptim pos-
set partem saltem arcanorum. Eâ me di-
gnata est impertiri, atque ad te misit ora-
tum infimis precibus, ut sororis, fratris-
que infortunij tacta, & placata utrique,
coneris miserandam Principem eripere
gurgustio. Ne, quæso, patiaris, quam nu-
per ovantem Cæsareâ dignitate vidit or-
bis, jacere in infamiâ ultimâ , quod vix
Turcarum oculi spectaculum ferre pos-
sent. Si quidquam sceleris, quod conjux
in conjugem edere potest, prætermis-
sum est ab Henrico , non recusat Augusta ,
quin eam dedigneris. At non interest ,
utrum sub Henrico Praxedem esse sinas,
an iratis Turcis ad supplicium atque in-
famiam dedas. Hæc nuncius de Augustâ.
Jam de fratre Prorege quid respondere
potuit, nisi , quod tristis fama ferebat ,
obiisse ? Et Mathildis quid de eo existi-
mare

mare aliud poterat? Si enim viveret Godefredus, & in Italiâ esset ignotorum procerum unus, cur non ab eo soror auxiliû postularet, sed à Mathilde? Cur ab inimicâ potius, quàm à fratre? Et verò cur ille sorori opem ultrò non ferret, sed Mathildi? Ergo consequens erat alium ab Aquilifero Godefredo esse oportere ducem ignotum, qui ad Canusium pugnarat tam fortiter, tamque feliciter. Videbaturque verisimilius esse, Conradum Cæsari jam iratum præclara illa patrassè. Atque hæc argumenta meipsum adduxere, ut rem adhuc sic narrandam putarem. Mathildis multiplici dolore conflictata, id saltem, quod rogabatur, exequi studuit. Licet satis gnara, quàm difficile esset liberare Praxedem, tamen minimè distulit ad opem ferendam incumbere. Fido illo Veronensi ad eam solandam, & bonâ spe erigendam remisso, eodem usa est ad alios Veronæ clandestino commercio sollicitandos, & cum tempus esset, consilij participatione impertiendos. Rei efficiendæ ne quid deesset, (a) militum fi-

M

dissi-

(a) *Domuiz. Florent.*

diffimos alieno cultu submisit Veronam. Dum hæc res agitur, Mathildis simul intendebat in belli reliquias profligandas, nunquam non de nunciatâ Godefredi incertâ salute cogitans, simul memor ignoti procerum ducis avebat discere quis esset. Profecta ad exercitum à suis gaudio exultantibus excipitur. Audit à Lanfranco suo ignotos proceres, qui haud procul aberant, perrexisse operam navare juxtâ strenuam ac felicem. Cum Canusino agmine inhæsisse fugientium hostium tergis, & eo bello primas virtutis, gloriæque partes retulisse. Cæsaris extremum agmen carpsisse non semel. Campestem regionem cis Padum, antè occupatam ab Henricianis, recepisse. Trajecto flumine multa loca munita hostibus eripuisse, atque in ijs Gubernulam. Ibi repertis magnificis Henrici vestimentis, auro, purpurâque, & ijs ornamentis, quibus imperij dignitas eminet, potitos. Henricum modò formidabilem Italiæ, jam non tantum profligatum, sed & humeris ingestum vestimentorû specie, quæ tanquam opimum spoliū affe-

ran-

rantur. Ita Cæsarem vexillo principe, & cultu corporis exutum fugisse cum Gilberto in arcem Argentum, siquam istic novam fabam recudere possint. Conradum verò ab Henrico jam ante Canusinam victoriam defecisse. Proreginam Mathildem tantâ famâ & gloriâ esse, ut populi alius super alium ejus fidei se crediderint, atque (a) Italiæ Reginam pluribus locis conclamarint. Sub hanc Lanfranci narrationem gliscente lætitiâ ejus, & circumstantiam militum, ingenti vociferatione Mathildis Regina salutatur. His ad hunc modum gestis, longè maximâ Mathildanorum in præsens gloriâ, & in futurum spe, tamen Mathildem tanti successûs voluptate frui non sinebant tristitia Veronâ paulò antè nuntiata. Cæterùm gratiis & laudibus prosecuta est victores in commune, ac privatim ignotos proceres, ut quisque adfuit. Quorum omnium nomine, qui Mathildi gratularetur, præmissus Tiro, antequam dux ipse veniret in conspectum, ac notitiam. Colloquium cum Tirone miscuit illa

M 2

haud

(a) *Chron. Hirsaug. Pigna.*

haud dubiè insigne affectibus : quod
 cuiusmodi fuerit, vellem memoriæ pro-
 ditum; vero affine proferam. Postquam
 laudavit Mathildis fortissimos Canusij
 liberatores, victorésque Cæsaris ac Gi-
 berti, dixit sperare se ab ijs præterea
 id gratiæ, ut ne ultrà latere velint, neu
 se celent cujates, & qui sint. Respondit
 Tiro, Reginæ in cæteris omnibus palàm
 morem gesturos, at hâc in re secretò, si
 per eam liceat. Ipsius Mathildis inter-
 esse, ne ab alijs agnoscantur quàm ab
 ipsâ. Inde subductus à turbâ Mathildi ex-
 posuit se ac socios Belgas esse, mereri
 sub eâ iussos à Domino suo Lothariæ
 Prorege Godefredo. De cuius instituto
 vitæ, ex quo ab ipsâ postremùm digres-
 sus sit in Belgicâ, deque lethali ejusdem
 morbo, & ultimâ voluntate, se, si pate-
 retur Regina, pauca dicturum. Trepidâ
 ad hæc Mathilde annuente ut dice-
 ret : (a)

Te, Domina, inquit ille, revertente in
 Italiam, Godefredum mirabiles, & per-
 acerbi casus excepêre, sed quorum nul-
 lus

(a) RELIQUUM *primordiorum Godefredi.*

lus funestior, quàm, quo à te Gibërtinis fraudibus demum abstractus est. Protinus ei adolescenti, ut defuncti Proregis avunculi hereditatem adiret, varium certamen, & vitæ discrimen aditum est. Cæsar huic, ut avunculo paulò antè mortē, palàm adversabatur. Quâ offensione freti quidam procerum, quidquid testamento Gibber heredi reliquerat, eripere lite, vel armis statuerunt. (a) Bullionum Namurci Comes Albertus sibi vindicabat, Virodunum ejus loci Episcopus, Lothariensis regni Præfecturam ipse Cæsar; quam, nullâ adoptionis, aut testamenti habitâ ratione, agebat sui juris, atque arbitrij esse, quòd Gibber sine liberis diem obierat. Ita miserandus adolescens modò tam fortunatus, nunc caro avunculo orbatus, tuoque, Regina, tum conspectu, tum consilio, insuper totâ illâ ingenti hereditate evertebatur. Ab adversarijs nihil ei relinquebatur de tantis bonis, ne iter quidem ad sepulchrum avunculi. Nec in fortunarum modò, sed etiâ capitæ dimicationem se venisse mox co-

M 3 gnovit.

(a) *Vuasseb.*

gnovit. At tanto periculo major, statuit ei obviam ire, atque ad Cæsarem proficisci. Memor usque tui, tuorumque in ultimo colloquio monitorum, existimabat se non modò vituperationi obnoxium fore, sed perpetuo contemptu dignum, si se eâ hereditate, quâ dignum conjux tuus tûque judicassetis, privari pateretur. Cæterùm non nesciebat sibi soli, & adolescenti, & jam facultatibus nutantibus propè destituto contendendum esse cum (a) Alberto Namurci Comite aliisque adversarijs multis, ætate, usu rerum, potentiâque florentibus. At licet ipse summa habuisset cætera, eâ requidem certè se carere, quæ in aulis summi esset momenti, gratia. Uno judicio de honore, de fortunis, ac fortè de vita decernendum esse coram Cæsare iudice offenso eò periculosius, quòd offensionis causa nesciretur. Disceptantibus coram (b) eo sæpe à verbis ad arma veniendum esse, litésque finiri internecino certamine. Albertum sibi diem coram Cæsare dixisse, virum potentiæ, & roboris famâ cele-

(a) *Io. Leod. in MS.* (b) *Viterb.*

celebrem, quem vel si vicisset, non fore se in tuto; superesse alios hostes, atque omnium primum Cæsarem, ob æmulationem gloriæ fortibus viris malignum; qui cùm strenui famam ipse captaret, quos putaret hoc nomine suis laudibus officere, eos vel objectaret periculis, vel insidijs tolleret. Hæc reputabat inter viam Godefredus; quæ vulgò comperta erant. Cæsar bello Saxonico victor in Belgicam sub Paschales ferias triumphanti similis venerat. Adfuere Ultrajecti magnâ frequentîâ procures: alios aliæ causæ, spes non paucos allexerat. Amplissimum munus Lothariensis regni præfecturam, quæ Gibberi fuerat, prestatam à multis, uni Cæsar erat collaturus. Ergo suspensis expectatione animis calebant studia partium. Inter candidatos generis claritudine opibûsque pollentes, convertit in se omnium oculos præstanti specie adolescens pullatus Godefredus. Quantum ejus virtuti cum adversâ fortunâ certamen esset, latebat neminem. Nihil certius adolescenti de totâ avunculi

culi hæreditate restabat quàm Cæsaris odium. Cæterùm, ut in ejus veste luctus, sic in gestu oculisque magnitudo animi cernebatur. Venit in aulam intrepidus, non alio præsidio armatus contra tot pericula, quàm jure, & periculorum contemptu. Per medios adversarios processit in conspectum Cæsaris eo vultu, qui nec despectum majestatis, nec metum potentiæ præ se ferret. Hic primùm cum consanguineo Alberto verbis disceptatum est. Quibus cùm res non componeretur, provocante ad arma Alberto, pronuntiavit Cæsar controversiam, ex recepto in Imperio more Longobardico, (a) armis dirimendam. Provocator decretum pro suâ ferociâ gestiens excepit, at Godefredus animo quidem minimè impari, sed planè Christiano, ægrè tulit. Nempe oderat enses extra aciem cruentos, secùmque reputabat non cum barbaro hoste, sed cum consanguineo, nec aliâ de causâ quàm de possessionibus subeundum esse singulare certamen, minimè ludicrum illud, sed decretoriū,

câque

(a) Tyr.

câque conditione , ut victus uteruis & causâ cecidisse censeretur, & ignominiosâ morte occumberet. Id ergo omninò invitus accepit , nec nisi propterea quòd tali loco, ac tempore declinare salvâ dignitate non posset. Fuere procerum quidam, qui Henricum convenirent orantes etiam atque etiam, ne par insigne Principum tam periculosum sui spectaculum populo præberet: verùm stetit in sententiâ Cæsar. Ergo in arenam descriptam, repagulisque septam descendere pugnatōres armati. In adversis circi partibus suum utrique tabernaculum erat, in quo tantisper acquiescerent, donec congregandi signum daretur. Adstabant de more delecti procerum arbitri pugnæ. Spectatum venerat circumfusa vulgi innumerabilis corona, eminebâtque in suggestu iudex supremus Cæsar. Præcones tertium vociferato irent strenui pugnatōres, processere ex tabernaculis fulgentes armis. Mox districto ferro, priusquàm se, spectatorum animos percussêre. Alios spes, alios metus , prout alteri partium studebant, omnes horror invaserat. Con-

gressi mox ictus congeminant ictibus ,
nunc clypeum , nunc galeam pulsan ,
nunc loricae aditus mucrone pertentant.
Primum ex artis legibus manus conferruntur : mox ubi pugnantes produxit calor, viribus indulgent, & impetu rem gerunt. Emicabat Godefredi indomitus vigor, quem populo commendabat ætas tenerior juxta ac dexteritas, & comperta adversariorum potentia nimia. Sustinere sibi eo certamine videbatur non tantum jus, decusque suum, sed & avunculi, & ruium, Regina, quorum beneficio, ac favori hostis obstabat. Tanquam intueris manum pugnantis, plenus tua exhortatione nuperâ, nunc promovet gradum, nunc succedit in latus, in omnem occasionem imminet petendi Alberti. Armis, oculisque vibrat, & fortunæ irascitur, quod tam serò respiciat. Ecce autem adolescenti validiorem ictum intentanti Albertus clypeum objicit, quo exceptus Godefredi (a) gladius in partes penè capulo tenus dissilijt. Tantummodo fragmentum semipede longum in manu
super-

(e) Tyr.

superfuit. Ingemuere optimi spectato-
rum, animadverso adolescentis tanto
discrimine. Neque enim spes salutis af-
fulgebat vel ab ejus virtute, qui jam in-
ermis contra armatum, valentemque
consisteret, vel à gratiâ Cæsaris, qui scie-
batur infensus. Cæterùm abitri proceres
iniquitatem pugnæ miserati tantisper
cessationem imperant, Cæsaremque con-
veniunt. Dato respirandi spatio pugna-
tores galeæ tegmen sustulerant. Intue-
batur Henricus Godefredum, qui non
periculo expalluerat, non circumspexe-
rat fugam, sed perstiterat in gradu pari-
ter & ardore certaminis. Gestus acer,
atque athleticus, pectus intrepidum, &
cùm deesset consilium, audacia non de-
erat. Exporrecta frons, os vividum, at-
que ab æstu formosius. Genis primâ la-
nugine vix dum nitentibus, adhuc Ade-
laidam sororem referebat, cujus excel-
lentem pulchritudinem prædicari audie-
rat Cæsar, & in ejus amorem, ex aspectu
fratris, fortè jam animum inflexerat.
Interim magnâ contentione inter specta-
tores

tores renovata erat (a) celebris eâ tempestate quæstio , an non pugnatori ejusmodi, cujus fractum esset telum, deberet aliud reddi. Cui rei argumentum hoc dicebant, tela in pugnâ tali esse instrumenta quædam vicaria , nempe testium loco , ad probandam occultam, de quâ controversia esset, veritatem. Si autem vocati testes in judicio non adsint , posse alios substitui. Quare pari jure pugnatori loco teli, quod non adversarij virtute aut industriâ, sed casu amiserit, aliud esse reddendum. Inter hæc arbitri Cæsarem adierant, à quibus rogatus , ut morti eriperet strenuissimum adolescentem, fortunâ , non virtute cedentem , servaretque magno usui futurum adversus Saxones rebelles, concessit facultatem colloqui, quo pax inter pugnatore componeretur. Insperata gratia , ubi per arbitros renunciata est , maximâ affecit populum lætitiâ. At Godefredus novo, atque inaudito facinore omnes in stuporẽ repentẽ convertit. Auditâ pacis propositione vultuosus, ac turbidus pudore, tanquam

(a) *Honorat. Bonnet. in Arbor. Pugn.*

quam victus crederetur, exarsit animo, negavitque suam fortunam eo loco esse, quam Cæsar miserari deberet. Se satis armatum, dum dextera superesset. Tum abrupto sermone speculari tegmen galeæ deprimit, concussisque armis(a) in adversarium profilit, spectatoribus omnibus præ admiratione torpentibus. Quem irruentem, & capulo, qui supererat, minantem excepit Albertus fiduciâ victoriz tumidus, & velut eludens ferociam adolescentis desperabundi, & perire festinantis. Hunc ferro incessit, hunc repetitis alijs super alios ictibus obruere properat. Quos Godefredus, quâ potest arte, vel declinat, vel sustinet circumacto clypeo tectus. At spectatoribus quantò perspectior, tantò miserabilior erat fortitudo infelix, quàm necesse esset tandem succumbere. Jam velut in limine fati positus ab illacrymantibus spectabatur, cùm ipse speculatus irruentem in se incautiùs adversarium, prorupit subito, collectisque cum irâ viribus tam validè lævo ejus tempore(b) capulum suum impegit,

(a) Tyr. (b) Tyr.

pegit, ut ictu attonitum, animoque deficiente in arenâ porrexerit. Labentem super mox sequitur complexûque implicat, & ejecto dextrâ capulo extorquet semianimi gladium, & mox cassidem. Omnes admirabilis rerum conversio defixerat. Cùm elatus victoris manu fulsit integer gladius, expectabant, ut nudo jacentis jugulo defigeret. At Godefredus expectatione ut fortunâ superior, postquam adversarium, seipsum vicit. Ut Albertum ulcisceretur, moverat ejus in provocando ferocia, & in impugnando etiam inermi proterva feritas: verùm cùm & Christianum, & consanguineum cogitasset, prostratûque cerneret, obsequi animo indecorum censuit. Genus vindictæ pulchrius visum est misereri. Non modò parcere ipse statuit, sed etiam operam dare, ut à judice parceretur. Victum manebat ignominiosa mors, aut turpior morte vita. Quibus ut eriperet Albertum, conversus ad proceres arbitros etiam atque etiam oravit, ut pacificationem, quam ipse recusarat causâ suâ,

nunc

nunc adversarij gratiâ procurarent. Admirantibus illis adolescentis magnitudinem animi & lenitatem, non tenuit se populus, quin acclamaret victori referenti geminam de hoste gloriam. Cæsar utcumque violento, & alieno in eum animo, tamen hoc præcellentis indolis specimine tangi cœpit. In victorem concepit benevolentia aliquid. Ergo adolescenti nec quidquid petebat, nec nihil dandum censuit. (a) Acer ille, & impiger ad rem militarem tiro metuendus vilus est, siue nimiâ potentiâ augeretur, siue indonatus, & quasi spretus abiret. Præfecturam regni Lothariensis, quæ præstatur, contulit, non Godefredo, sed Conrado suo, (filium tunc appellabat) Godefredum verò Antuerpiæ Marchionem dixit. Novus Marchio prælato sibi innocenti, & amabilissimo tunc puero succensere non potuit, qualitercumque fuerit affectus in Cæsarem. Cæterum mox ab aulâ discedendum fuit, in quâ nihil admodum erat, quod ei placeret præter Conradum; cum quo ei diu summa

(a) *Lamb. Sch.*

ma amicitia fuit, quoad ille nempe fidem præstitit Cæsar (a) seu benevolentia diffimulatione, seu odij specie Godefredi adversarijs animum facere pergebat ad ditionem ejus invadendam. Pro Bulliono, & Viroduni Comitatu grave, diuturnumque bellum ei gerendum fuit in propinquos. Ferocissimus adversariorum hîc ut antè, consanguineus Namurci Comes Albertus. Is ad Bullionum, quod jure materno deberi sibi pugnabat, interceptum cum copijs movet. At prævertit Godefredus, arcemque ingressus, tantâ virtute repressit hostem, ut ab obfidione repulerit. Atque hac imprimis victoriâ sibi Bullioni possessionem asseruit, fecitque celebre apud populares Godefredi Bullionij nomen. Hinc infestior Albertus post paulò bellum instauravit ad (b) Virodunum. At Godefredus priusquam pro hoc vindicando pugnaret, Cæsaris signa secutus est, (c) Idâ matre hortante, & ne spem adipiscendâ Lothariensis Regni Præfecturâ deponeret, animos faciente. Paruit ille, cæterum

nec

(a) *Vuasseb.* (b) *Io. Leod* (c) *Malmesb.*

nēcopum cupiditate tractus, nec licentiæ militaris studio ; tibi que, Regina, tunc addictior, quàm Henrico. Antequam ad castra Henriciana transfiret, nosti quanti ille cùm alias tuas virtutes, tum excellentem pudicitiam fecerit, quantisque laudibus prædicare sit solitus. Neque tunc ignorasti pro tuâ de eo existimatione, quàm pudoris amans, & alienus à voluptatibus vixerit. Quo nomine tibi etiam carior erat. Tuarum veneratio, atque admiratio virtutum animum ejus sic afficiebat, ut earum pulchritudine perstrictus ad alias formas non adverteret. Nec deerant causæ variæ, quæ juvenem averterent à sequendis Henricianis castris. Usus erat Cæsare adhuc minimè favente, aut æquo, plûsque timendum ab eo videbatur, quàm sperandum. Neutiquam tutum erat, præsertim initio, venire in conspectum Cæsaris, & agnosci priùs, quàm operâ aliquâ militari conciliasset ejus animum. Quin Henrici benevolentiam timebat, defugiebátque familiaritatem ; ne vitij ejus cogeretur, non dicam adulari, sed connivere saltè.

N

Cæte-

Cæterum ad castra ejus tunc de imperio dimicantis tractus specie officij, & caritate in miserum Principem, ejusque heredem (ut id temporis habebatur) infontem Conradum, eisdem illic mores, idem castimonix studium tuo exemplo natum & confirmatum obtinuit inter armorum licentiam, & exempla Cæsaris voluptatibus dediti. Idem quoque judicium illi perpetuum de tuâ eximiâ probitate fuit, quoad id gravissima fama commovit; quamquam nulla comovero debuit. Spargitur primùm sermo te cum Hildebrando consuescere plusquam necesse esset probæ. Indignari Godofredus principiò, Gregorij non dubiâ, tuâ virtute compertâ. At rumor increbrescere, argumenta afferri, affectatio in itineribus, domi familiaritas, litterarum inter absentes commercium, possessionum donatio, mutua in omnibus vestra consensio notari. Nondum hæc movebant juvenis animum tibi addictum satisque gnarum cuncta hæc officia posse constare inter pudicos & sanctos, quos livor, & maledicentia primos incessat, & dignissima laudibus

dibus carpat. At miserum juvenem trans-
 versum egit auctoritas, non jam vulgi,
 sed tot Principum, non profani solum,
 sed & sacri ordinis, Gregorio tibi que ad-
 versantium. Obruit eum sententia Bri-
 xinx habitū conventus, in quo damnatus,
 abdicatusque gradu Gregorius. Quis
 deinde hominum de te sensus, quod pri-
 vatim Godefredi judicium, quando in-
 auditā per totum Romanum Imperium
 novitate Episcopi, & Principes alij Gre-
 gorio rebellarent, tu obedires sola? Nem-
 pe apud longè plurimos id tibi summo
 dedecori fuit, quod apud omnes summæ
 gloriæ esse debuerat. Singularis vel im-
 probitatis, vel amentix damnata es, cum
 sola saperes. Publicā deceptione involu-
 tus Aquilifer privato dolore torqueri
 cœpit eò acrius, quò major ejus fuerat
 de te existimatio, atque in te amor. Quos
 gemitus dederit, quo doloris, atque ira-
 cundiæ æstu famam illam tuam excepe-
 rit, æstimare ac metiri potes ex animi tui
 affectu illo, quo accepisti eum tibi ad-
 versari. Uterque vestrum judicabat alte-
 rum pravè, se rectè sentire. Tu eum de-

cipi cogitabas , ille non modò falli te , sed etiam turpitudine maculari audiebat. Quæ fama, ut iniquior, ita pudico juveni, tuique amanti erat ad sensum doloris acerbior. Quid multa ? Genus pietatis visum est movere in Rudolphum primum, deinde in te, & Gregorium , ultricibusque armis vobis , atque ignominie Romam eripere. Eâ captâ victor infelix victoriæ pœnas dedit, sed salubres. Virulentâ febre affixus lecto, subductusque à tumultu, & bello vacuus , belli causam expendit attentius. Pars sanitatis fuit ægrotare. Opportunè tunc tractabatur de pace Gregorium inter & Henricum , habitis ultrò citròque delectorum congressibus. Romani interrogati de Gregorij moribus , non solùm probos testati, sed etiam sanctos, & Apostolicos. Idem comprobabāt ejus ad te litteræ, & ab Anselmo Lucensi Episcopo vulgatum opus. His, atque hujusmodi quâ audiendis, quâ legendis Belga lucem in tantis tenebris sensim vidit , & quantumvis Gibertinis nebulas offundere conatis veritatem (a) quam

(a) *Fisen.*

quàm citissimè potuit, Numine favente, haussit animo. Dolebat ei sua de Rudolpho Rege victoria, qui tam pulchris vulneribus occubuerat, quàm pulchrâ causâ dimicaverat, dignus vincere, licèt fortiùs pugnasset Godefredus. Sed longè plurimùm afficiebatur animo, cùm reputaret se par castissimorum Principum, Gregorium & Mathildem, armis persecutum esse. Jam intelligebat te, Domina, non modò innocentem, sed majori quàm priùs veneratione, atque omnium amore dignissimam; se verò omnium odio. Sed quo pœnitentiæ sensu ! quo pudore ! Quis animi dolor aggravavit languorem corporis ! Hæc in patriam relatum ad extrema deduxere, sed sensim. Interdum meliusculè habere videbatur, sed eâdem occultâ febre macilentos artus exedente, novisque identidem exorientibus doloris causis. Illud animo infederat decretum, ut, si unquam satis convalesceret ad operam bello navandam, partes impias Henrici Giberti que desereret. Quos (a), ut honestiùs, probabiliùsque declinaret,

N 3

pro-

(a) *Baron.*

professionem Hierosolymitanam meditari cepit, sed minimè vulgari, consuetudine obeundam modo. Res maximè ardua quâ occasione, ac ratione juveni ægro, sed semper magnanimo in mentem venerit, si pro tuâ clementiâ audire perges, aperiam. Consanguineus Lucemburgi Comes Conradus & ipse prius Henricianarum partium, profectus erat in Palæstinam, venerationis & pœnitentiæ ergo loca sacra visurus. Exemplum movit Godefredum ad Hierosolymam quoque petendam, si per valetudinem aliquando fas esset. At illud veniebat in mentem egregiè pio, fortissimoque juveni, quanto satius, & Principe Christiano dignius foret eò proficisci non inermem, ut vulgò, sed cum exercitu ad exterminandos barbaros Terræ sanctæ usurpatores; & loca illa Dei Sanguine consecrata non solum lustrare oculis, & obire pedibus, sed armatis dexteris vindicare ab impiorum iugo. Incaluit magnanimus juvenis eâ cogitatione, & quantumcûmque ardua expeditio foret, aggredi eam decrevit

vit vel ideo, ut ab impijs Henrici castris absteret. Hæc cogitanti, & cum Idâ matre compertæ tibi sanctimonix fæminâ conferenti tristis casus ægritudinis cumulum addidit, mors Eustachij patris viri eximij. Et illud permolestum accidit, atque intempestivum: Albertus Namurci Comes (a) Bulliono pulsus nuper, instauravit bellum in Viroduni finibus, quam urbem pro Episcopo regebat. Idem armis obstiterat ne Godefredus possessionem adiret Comitatus Virodunensis, quem occuparat Episcopus. Bullionius munitionem excitandam curarat Sathanaci, unde infestaretur Virodunensis ager. Albertus occasionem speculatus præsidij hostilis exscindendi, copias contrahit, & cum Episcopo Sathanacum obsidet. Sciebat enim Godefredum assiduâ feбри laborare, Eustachium parentē nuper obiisse, Godefredi fratres Balduinum & Eustachium peregrè profectos. Cæterum Sathanacensibus suis non defuit Bullionus. Licet feбри, ut semper, vexatus, improvise advehitur ad hostes.

N 4

cum

(a) Io. Leod. Vnaſſeb.

cum parvâ, sed strenuâ manu. Coortâ pugnâ ingressu (a) arcis prohiberi non potuit. At hostes in obsidione perseverarunt, animis, robore, ac præsertim numero valentes. Arctâ obsidione clausus Godefredus desertus & æger periclitabatur de rerum summâ, ac salute. Ecce autem agmen egregiæ juventutis in propinquo conspicitur, cui præibant ductores duo, corporum & armorum specie, & in Godefredum caritate præstantes. Quinam hi, & quantis viribus essent, cum explorasset Albertus, atque Episcopo retulisset, territus hic Alberto fremente solvit obsidionem. Eximios duos auxiliores, qui ita in tempore advenerant, excepit in urbem hilaris Godefredus, & ambos fratres agnovit. Balduinus & Eustachius cognito fratris periculo contritis copijs, & amicorum auxilijs advocarant, ille ex Franciâ, hic ex Germaniâ. Suavissimè inter se complexi mutuis fruantur colloquijs, & narratione rerum præclare à se gestarum. Itum subinde ad proximas arces, primùm Bullionum, tum Mon-

(a) An. 1088.

Montem Acutum ad Idam matrem carissimam, ac sorores Adelaidam, & Idam, quarum illa tunc innupta, hæc Montacuto Comiti Cunoni nupserat. Ibi Godefredus fratribus consilium suum de sacrâ expeditione aperuit. Quibus stupentibus primùm rei ipsius visa est sibi ob stare magnitudo. Deinde facultatum non satis esse dicebant, & eas ipsas, quas nunc possideant, nondum satis tutas, nempe quibus inhient inimici è propinquo, jam quidem armis pulsî, nondum animis domiti. Denique expeditionem non modò arduam, & suo ipsam molimine gravem, sed omnino supra Godefredi vires ac valitudinem esse. Jam inde ab obsidione urbis Romæ continente febris debilitatum ipsum. Non ut in tertianâ quartanâque, quarum certus circuitus est, interjectâ quiete recreatum corpus, sed perpetuâ vi morbi magis magisque defecisse. Priùs febrim depellendam, reparandâque vires, quàm tanta res tentetur, vix à valentibus, iisque potentissimis unquam perpetranda. Digressi sub hæc fratres, Balduinus in Normanniam,

Eustachius cum matre in Angliam tendit ad cernendam ibi paternæ hereditatis partem. Juvenes moribus, atque indole præstantes ibi in aulis apud Reges proceresque & feminas principes gratiosis rebus scitè fortitèrque gerendis claruere. Godefredus quantumvis adversâ valitudine non desperabat se bellum sacrum cum eis esse gesturum. Sed profanum, & importunum rursus exortum est. Namurcensis Albertus castrum Mireuartū munire parat, futuram belli arcem. Majori priori incendium veritus Leodiensium Pontifex Henricus Godefredi propinquus suscepit restinguendum. Primum antevertit Namurcensi, castrumque Mireuartum, quod ille operibus communire instituerat, pretio comparat, atque evertit. Pacis deinde consilia, quæ agitabat, exequi cœpit, & colloquijs novam odiorum sementem opprimere. Sed parum processit res, quoad (a) sub id tempus aucta improvisè Godefredi potentia ac dignitas hostes deterruit. Cæsar (b) ejus sororem Adelaidam duxit, fratremque jussit.

(a) 1089. (b) *Dodechin. Order.*

jussit Lothariensis regni Præfectum. Pax inde facta. Cessit item Godefredo Proregi Virodunensis tandem Comitatus. Gavissus æger suâ sororisque fortunâ , non ex avaritiâ opum aut gloriæ, sed pietate. Accessione facultatum videbat se paratiorem expeditioni sacræ, & sorore ad Cæsaris torum & summum honoris evectâ spem nactus erat per eam blanditijs uxoris quolibet impelli posse, & ad meliora traduci Cæsarem amantem, deducique à te, Regina, persequendâ bello. Neque Adelaïda, jam dicta Praxedis, aut fraterno aut suo in te studio defuit. Res (a) memorabilis eodem anno (hoc est sæculi undenonagesimo) juvenis ægri animum ad expeditionem sacram erexit magis, atque inflammavit. Fortè recreaturus vires venatum iverat in silvam Querenam, comitabatur eum miles probus Hezelo; qui deinde labore fatigatus, & solutus in somnum visus est sibi procul transferri in Orientem, montemque Sinam, Ducis Hebræorum Moysis jejunio, prodigiisque celebratum. Ubi vidisse se
refe-

(a) *Alb. Aquen.*

referebat Godefredum Ducem placido vultu, & religiosâ corporis compositione spectabilem facili vestigio in cacumen montis evadere : huic duos albatos Pontificali habitu ire obviam, ac bene precari in hæc verba : Quibus Moysen Hebræi populi ductorem cælestibus beneficijs auxit Deus , iisdem ab eo cumuleris, (a) DUX , ET PRÆCEPTOR FUTURUS POPULI CHRISTIANI. Quæ ubi ex Hezelone cognovit Prorex, seque ad munus Ducis , ac præceptoris Christiani agminis destinatum interpretatus est , inflammatiores animo suspiria ducere , desiderium suum & consilium denuo aperire familiaribus, singulos appellare, hortari alios, alios tentare. Omnibus res admirabilis, & nimium quàm ardua videri. At ille magna præmia expeditionis dicere , Christianæ rei decus, salutem Christianorum in Oriente gementium , Barbarorum excidium. Spem suam non destitutos superos , qui eam fecissent. Interim Augusta soror, suo, fratrisque voto, Cæsarem ad meliorem mentem frugemque revocare stude-

(a) *Aqnen.*

studebat. Primùm occultè ejus animum tentare, ac disponere. Dein satis explorato tempore & affectu dehortari nunc ab alienis, quibus implicabatur, amoribus, nunc ab odio in te. Sed spem successûs disturbavit Gibertus, quando nefariâ illâ, quâ præpollet, auctoritate, Cæsarem in Italiam revocavit. Recruduere Godefredi dolores, cùm vidit adversus te, atque Ecclesiam rursus Henricum movere, nec posse deduci ab impiâ mente. Quando verò se quoque ad sequendum cum copijs à Cæsare vocari audiit, nec fremitum nec gemitus tenuit. Vel ideo sibi in Oriente suscipiendum, festinandumque pium bellum censuit, ut ne implicaretur impio. Quas opes cum Lothariensi Præfecturâ à Cæsare accepisset, optimè in Palestinâ, pessimè in Italiâ impensum iri. Ergo immemor valetudinis summo studio copias, per speciem belli Italici, re ipsâ ad sacram expeditionem contrahere cœpit. Verùm anxium & connitentem ad hæc præcelsa animum corpus denique destituit, & ad extrema deduxit. Te quoque, Domina, tunc
Guel-

Guelfoni nupsisse, nec sine admiratione, nec sine gemitu cognovit: nempe intellexit non visum tibi cum Godefredo convenire in manum, quâ te, & Romam oppugnasset. Hîc suspirium ducens Tiro paulisper moratus; deinde, hostis ille tuus, inquit, tandem esse desijt, ô Regina, nunquam amplius nociturus. Ægritudine præsentis non magis quàm pœnitentiâ prius gesti in te belli oppressus, sensim ad fatalem horam devênit. Jacebat circumfusus carorum turbâ lacrymante, desperatus à medicis, defectusque viribus omnibus, nisi judicij & amoris. Mathildem cum suspirijs & Ecclesiam appellabat, junctis earum nominibus, quas & sciebat conjunctissimas, & unâ à se dolebat offensas. Miseram, inquebat, mortem meam, quam non citiùs obierim, ne sic militarem. Heu malè impensæ juvenus, vires, victoriæ, quibus mihi laudes, sed apud malos peperit, & magnum nomen, sed malum. Funesta Aquiliferi fortitudo, quâ Mathildis iram merui, & Ecclesiæ fulmen. Non mortem, ô Deus, à me deprecor, quâ dignus sum: sed
utinam

utinam oppetere licuisset pugnanti in
hostes Ecclesiæ, illatæque ei ac Mathildi
damna refarcire impendio facultatum,
& vitæ. Verùm quando id non licet, sit
saltem aliquis è vobis, amici, qui Mathil-
di militatum eat, nunciétque me eo a-
nimo mori, quo vixisse debueram. Inter
ejusmodi affectus, violentósque conscij
pectoris stimulos & pœnitentiæ impetus,
magis magisque defecit, nec ullâ medi-
corum arte, aut naturæ vi mortem eva-
dere potuit. Ita desijt esse, quem odisses,
ô Domina, nunquam ampliùs nociturus.
Abrupit Tironis sermonem Mathildis
gemitibus, & ejusmodi verbis; Ergone il-
le mortuus! & ita mortuus factorum pœ-
nitens cùm vivere decebat! Care, atque
infortunate Princeps! Hic conticuit
querelis abstinens. At in animo versabat
cogitationes ejusmodi: hæcne erant, quæ
non solùm somniarat Hezelo, sed de eo
vaticinata erat mater, cum futurum Du-
cem, & inter Reges inclytum prædixerat
Et verò Ducis titulum consecutus est:
sed illens Dux inter Reges inclytus, qui
post

ritaque omnia longè superantis operis ,
 nempe belli sacri, si Deus restitueret va-
 letudinem. Quo religiosè promisso sta-
 tim convaluit, nullâ, ut suprà narrabam,
 medicorum arte aut naturæ vi, sed mi-
 randâ Dei virtute servatus. Sic, Regina,
 quemadmodum etiam dicebam, ille ho-
 stis tuus esse desijt, sed vivere pergit, a-
 micus jam, & defensor. Mathildem inter
 hæc vix se præ stupore, & gaudio capi-
 entem ut omni dubitatione exolueret ,
 bonâ ejus veniâ illum ignotum ducem
 nuperrimè ad Canusium victorem evo-
 catum ivit. Qui clàm adductus eleganter
 & cum veneratione se inferens, en ipse
 adsum, inquit, testis illius divini benefi-
 cij, quo vivo, ut Deo, tibi que, Domina ,
 imposterum obsequar. Quo dicto galeâ
 penitùs apertâ & toto ore exporrecto Go-
 defredus Prorex apparuit , Mathildem-
 que cumulo lætitiæ & stuporis implevit.
 Quæ licet vultu immutatum per spatium
 annorum plurium, quibus eum non vi-
 derat nisi nuper in luce sublustri, agnovit
 planè ex lineamentis oris, quæ altè im-
 presserat menti. Hæc primum paulif-

O

per

per alter alterius contemplatione defixi.
Diffidij, & errorum discussâ nube, nova
lux oborta animis mutua utrique deco-
ra objecerat. Intuebatur Mathildis ju-
venem per omnia prodigiosum, à pueri-
tiâ vaticiniò destinatum ad summa, de-
inde factis mirandum; modò divinitus
à morte servatum & quasi redivivum,
ut Praxedem ulcisceretur, & Mathildē;
nunc animo complexum opus super om-
nia priora maximè arduum, ac stupen-
dum. Vicissim Prorex in Mathilde fixus
admirabatur sexu delicatam, sed animi
robore infractam Principem tot viris
bellatoribus, totique Cæsaris potentia,
tot annis, per tot pericula, proditiones,
& adversos casus restitisse. Ad extrema
nuper redactam, tamen pro aris & sanctâ
Sede bellum paci, mortem vitæ prætu-
lisse, incomparabili virtute præstantem
priscis heroïnīs, atque adeo heroïbus. Ubi
se paulùm collegere, Godefredus mæro-
rem ore præferens, ignosce, inquit, Do-
mina, si non eo vultu adsum, quem par-
ta de tuis hostibus victoria, jucundissi-
mûsque tuus conspectus exigent. Fo-

licitate

Vicitate tantâ me frui luctus expertem
 non finit Cæsar immanitate injuriæ, quâ
 sororem meam, méque affecit. Praxedé,
 quam amavit, quam tori atque imperij
 consortem esse voluit, eò celsius vide-
 tur extulisse, ut infamiâ graviore depri-
 meret. Tum subjecit repudiatam Pra-
 xedem & carceri inclusam ab Henrico;
 sed hanc esse partem injuriæ tantùm,
 eamque levissimam. Addidit Henrici fu-
 rias, Conradi dubium & genus & animû,
 sororisque Praxedis infame ludibrium.
 Deinde ego, inquit, ubi sororis sortem
 comperi, pro eo ac debui, comotus, totus
 in dolorem & in justam iram exarsi. Cum
 primùm cælesti ope consanui, miseram
 ulturus, & si fieri queat, liberaturus ac-
 curri. At ubi locorum illa detineatur,
 atque etiam an vivat, nullâdum explo-
 ratorum diligentiam cognoscere potui.
 Interim latitandum mihi duxi, ne à Cæsa-
 rianis cognito adventu meo soror, si in
 carcere superest, custodiatur arctius, &
 contumeliosius habeatur. Ego te quo-
 que, Domina, ac tuos adhuc latere vo-
 lui:

lui: Hos quidem, ne per eorum aliquem (inter quos audio proditores non semel inventos) innotescerem Cæsari; te vero, ut poenitentiam meam, ac fidem prius factis probarem, quàm verbis, & antequam agnoscerer, operâ aliquâ non poenitendâ partem commissorum abstergerem. Mathildis iterum gratijs actis, ego verò, inquit, tibi pro collatis tantis in me officijs illum saltem non injucundum repono nuncium: vivit Augusta soror, & Veronæ degit. Inde ut nobis libera restituatur, per fidissimos meorum satago, speroque Dei benignitate rem successuram. Ex Augustâ verò intelligemus quid sit de Conradi fide & genere sentiendum. Nec vanâ se lactabat Mathildis Godefredum. Sed de eo Heroë quæ modò narravimus, quæque subdemus hujusmodi, sicut novitatis gratiâ non carent, ita plus admirationis habitura sunt, quàm fidei, nisi prolatâ identidem à nobis auctoritate firmentur. Testatur Malmesberiensis Godefredum, Româ expugnatâ, prostratum seu æstu pestifero, seu hausto veneno: verum

utro,

utro, relinquit ambiguum. Quòd relatus in patriam æger non solum statuerit Orientem barbarosque bello petere, sed etiam hoc consilium suum heroicum Idæ matri aperuerit diu priusquam Bellum sacrum in concilio Claromontano ediceretur, solitamque postea id narrare Idam, locuples auctor est æqualis eorum temporum Novigentinus præsul Guibertus. Jam Malmesberienfis addit Godefredum ab contractâ Romæ valetudine semper laborasse febri, eaque assiduâ, donec incensus studio & famâ expeditionis Hierosolymitanæ (quam scilicet exciti ab eo populares parabant) obstrinxit se admirabili voto belli sacri, si convalesceret. Id autem, divo Antonino teste, vovit morbi vi adductus ad extremum vitæ discrimen. Cælum religioso promisso manifestè favisse, ejusque nuncupati reo Heroi restitutam extemplò valetudinem, & refluuisse vires, iidem affirmant. A Godefredo autem sororis ulciscendæ causâ Cæsarem armis peti-
tum, fuscumque ac fugatum, constat ex Orderico. Quam victoriam ad Canusium

esse relatum oportet, propterea quòd ea nec potuerit contingere citiùs quàm post annum sæculi undenonagesimum; quo nupsit Henrico soror Bullionij; nec seriùs quàm ad Canusium anno nonagesimo secundo, quia à nuptijs sororis usque ad fratris profectiorem in Syriam, Cæsarem nec aliàs, nec alibi fufum fugatumque legimus, quàm ad Canusium. Igitur Mathildis lætissima cum eo victore sociisque proceribus è campo regressa (a) Canusium non sine triumphali quâdam supplicationis pompâ captam aquilam Cæsaream ad Divi Apollonij fanum deferendam curavit; quo loco fixa victoriæ monumentum permanfit ad posteros. Anachoreta Ioannes Mathildi, & proceribus victoribus applausit, & plausum ipse ob prædictionis fidem tulit. Haud multò post adfuit Veronâ redux militū Mathildanorū unus, qui nuncium opatissimum attulit (b) conjuratos secum furtim urbē ingressos tantâ dexteritate cum Veronensibus consilij participibus rem gessisse, ut Praxedis, delusis custodi-

bus

(a) *Domniz.* (b) *Domniz. Florent.*

bus, carcere educta sit, paratôque vehiculo imposita, & nullo obfistente adducta Canusium versus, cui jam appropinquet. Mathildis exhilarata promptiore, quàm expectarat, rei successu, jussit suos illico in equis, & splendido apparatu adesse, ut, quantâ maximâ posset, magnificentiâ, & amoris testificatione Augustam sibi quondam in Belgicâ familiarem exciperet. Deinde in occursum cum egregio procerum, militum, oppidanorum agmine effunditur, fratre quoque Godofredo comitante, sed adhuc latente in habitu alieno. Augusta (ut canit, qui interfuit pompæ, (a) Domnizo) reverenter, ac splendidè excepta Canusium perducitur. Quæ ubi cum Mathilde venit in locum arbitris vacantem, ambæ liberiùs indulgere affectibus. Praxedi agentî grates de acceptâ libertate, respondit Mathildis debuïsse se id officij patronæ suæ Augustæ, quæ ob ipsam defensionem fuisset ab iniquo jndice in custodiam data. Dein, tibi, inquit, ejus patrociniij præmiû illud non ingratum offero, fratrem Pro-

O 4 regem

(a) *Idem Dom.*

regem vivum ac valentem, nec non Henrici Giberti que victorem. Tum flexo ad accedentem Godefredum vultu, tibi verò, Godefrede, pro acceptâ per te victoriâ sororem Augustam ergastulo liberatam restituo. Hic stupere ad conspectum fratris soror, ruere in amplexum, & ex recordatione recentium malorum sensûque præsentis felicitatis in lacrymas solvi. Godefredus & ipse nullam mutui vel gaudij, vel amoris testificationem omisit. Deinde cum breviter rationem recuperata à se valetudinis, ac vitæ aperuisset sorori, vicissimque illa sermonem intulisset de Henrico & Conrado, Prorex ad Conradi nomen fremitum non tenuit, nec vocem suspicionum indicem. Id animadvertit Augusta, & cave, inquit, de castissimo juvenum perperam cogites. Nemo Henrico Patre, (nisi Gibertus) improbius; nemo probius filio. Haud dubiè enim Conradus Henrici filius est, dignus omnino qui sit Cæsare, sed alio, genitus. Quamquam ex patre nihil præter sanguinis nobilitatem contraxit. Tum narrare aggressa, quàm sæpe Conradus cum

cum ipsa clàm questus esset de Giberto impostore, de Cæsaris decepti infelicitate, de virtute in Mathilde oppugnatâ , quàmque is eximiâ indole juvenis doluisset de se in custodiam datâ, subjecit eum fuisse sollicitatum à patre, negante se patrem ut filio persuaderet flagitium. Exhorruit, inquit , pudicissimus juvenis ad tantum nefas, atque ad atrocem contumeliam sibi , ac memoriæ dulcissimæ matris illatam, quando hæc adultera, ipse spurius notabatur. At gravissimè licet commotus, tamen potens sui, ita passus est à patre tantam injuriam, ut videretur non sensisse. Vel eo virtutis specimine probavit se Cæsareo genere, quod negabatur, natum. Non majorem contumeliæ, quàm naturæ intus admonentis rationē habuit, & virtute prorsus augustâ non tam injuriam, quàm injuriæ auctore cogitans, animum celavit in præsens, & dolore, patrisque, licet indigni, reverentiâ tacitus hæsit. At non destitit Henricus à mente furiosâ. Conradus veritus , ne incensus repulsâ pater graviora in me
de.

designaret, venit ad me in carcerem. Ego ubi primùm patefactâ portâ vidi aliquem ingredientem virili habitu, nihil morata quis esset, vitam pudori posthabui. Exclamo ad accedentem, Godefredi me sororem esse: si fratris amicus sit, calamitatem meam ne augeat, sed vindicet; sin hostis ejus, ferro in me utatur. Magis me pudere sententiæ Henrici, quàm timere vitæ meæ Honestæ feminæ in periculo pudicitiae nihil spiritu vilius esse, quem utcumque expellere festinaret, ferò me morituram ludibrio verecundiæ superstitem. Inter hæc accesserat ad me Conradus, sed perfusus lacrymis, quales, frater, ipse fudisses. Afferit se immortali amicitia tibi conjunctum venire eâ mente, ut mihi quocumque modo possit, consulat. At quâ ratione rem aggredieremur, minimè expeditum erat. Iuxta mecum videbat se unum non sufficere mihi liberandæ. Aiebat autem sibi non esse homines, quibus fidere posset. Patrem armatâ manu aggredi, tam impium, quàm ad libertatem meam supervacaneum fore. Iam Godefredum fratrem
procul

procul in Belgicâ incertæ non modò va-
 letudinis esse, sed etiam vitæ, Propinquos
 reliquos itidem procul abesse. Convertit
 denique simul mentem, simul spem ad
 te, inclyta Mathildis, licet hostem; au-
 ctorque mihi fuit (a) ut tuum pessimæ
 Principis auxilium implorarem : quod
 non nisi serò exequi licuit. Sub hoc collo-
 quium longè (b) divellimur. Ego Vero-
 nam deportor, ille jam patri suspectus ad
 Allobroges abire cum copijs jubetur, ibi-
 que consanguineum tibi Principem Lu-
 dovicum armis invadere. Verùm Con-
 radus, si re verâ militum illorum dux est,
 non captivus, nec tibi, nec tuis quidquam
 noxæ patietur inferri. Potiùs, quod fer-
 tur jam fecisse, deseruerit impias partes
 patris, eximiâ atque incorruptâ probita-
 te Princeps. Utinam verecundiæ suæ
 imitatores apud me reliquisset. Sub hæc
 Augusta ex infamiæ recordatione la-
 crymis perfusa conticuit. Mathildis in-
 stitit consolari mœrentem ; obtigisse ei
 casum Divarum non paucarum Virgi-
 num, quibus corpus violatum sit in fonte
 animo :

(a) *Florent.* (b) *Idem.*

animo: sed unde consilium abfuerit, culpam abesse. Godefredo pergratum erat quòd soror non modò liberata esset, sed etiam liberasset suspicione Conradum. Et verò Conradus opinionem, spemque Praxedis non dicam æquavit, sed longè vicit. Mirâ quidem erat in Patrem observantiâ. (a) De vitijs ejus nec libens audiebat, nec loquebatur unquam, nedum moliri aliquid adversus eum sustinebat, legis divinæ memor pariter & observans, quâ liberis parentû veneratio præscribitur. At Patri tamen moribus dissimillimus, Gibertoque infensus, jam ab aliquo tempore optarat orbi patefacere, quo animo esset in Ecclesiam ac Mathildem. Doluerat se in ijs castris detineri, unde videbat pudicitiam, & omnia juventutis decora cum Godefredo recessisse. Deinde comotior suis atque Augustæ contumelijs profectus ex paternis castris per speciem expeditionis Sabaudix statuit eâ occasione, cum primum posset, deferere exercitum partésque patris, ut Praxedi animique sui religioni consuleret. Denique

(a) *Vrsperg.*

hique (a) gregali cultu cum uno famulo-
rum, cui soli fidebat, per tenebras sese
subduxit. Neque parum eo facto contulit
ad Canusinam Godefredi victoriam :
secessio ejus cum (b) nunciata esset in
castris ad Canusium Henrico sub tempus,
quo Godefredus ex urbe in Henricianos
eruptionem fecit, patri mœrorem attul-
lit, turbationem militi. Ipse Conradus
post paulò (c) superatis viæ periculis eo,
quo dixi, habitu Canusium venit. Unde
vicennis erat, animi ornamentis, & cor-
poris apprimè decorus. Significatur Ma-
thildi juvenem in vili veste, sed formâ e-
gregiâ adesse cum socio. Ambos esse ferro
accinctos. Petere illum loqui Mathil-
di remotis arbitris, asserentem afferre se,
quod illius magnopere interesset. Ma-
thildi inter tot suborientes domi foris-
que motus, non videbatur tutum rece-
dere à suis. Mota tamen simul specie ju-
venis externi, simul magnitudine rei,
quam promittebat, recessit paululùm ad
eos Amazon, nullâ aliâ re magis armata,
quàm

(a) *Dodech. Bert. Domnix.* (b) *Sabell.*

(c) *An. 1098.*

quàm seipsâ. Conradus elegantem in modum veneratus est Amazonem. Quæ ubi ex ejus verbis atque ex vultu Principem Sueviæ referente agnovit quis esset, obstupuit, causâque adventûs auditâ, non dubitans, quin vera diceret, ingenti lætitiâ exultans, latentem in eo schemate filium Cæsaris, & heredem imperij vicissim veneratur, mirantibus qui eminus spectabant, quid juvenem plebeium Regina sic coleret. Impatiens moræ Canusina officiosè prehensum manu Conradû introducit ad Augustam & fratrem, certa pariter hos, pariter novum hospitē stupore, & insperato gaudio impletum iri. Protinus agnoscentes inter se principes illi tres restitere velut attoniti. Praxedis & Godefredus videbant in gregali veste juvenem Cæsareæ purpuræ natum; hic Augustam in libertatem assertam, ejusque fratrem, opinione mortuum, jam vitæ restitutum. Postquam mutuâ admiratione mutuîsque officijs inter se certarunt, Conradus ita orsus dicere: Quæ te, Augusta, causa impulit, ut à viro abesse velles, eadem fecit, ut à patre abscederē.

Qui-

Quibus sit ille moribus, quid attinet dicere? Tacere me eos decet, & quoad licet, pium esse. Diu arbitratus sum officij mei esse mores ejus tam æquo animo pati, quàm patiebar imperiũ. Verũ ubi à me non tantũ sui venerationem, sed etiam imitationem exegit, necesse habui Deo potiùs morem gerere, quam patri, & ad vos non tam piã quàm necessariã secessione transivi. Laudatum Conradi consilium: inde, post officiosos alios sermones, illata mentio est de belli statu. Secundis jam rebus, quando & Augusta, & Conradus in tuto essent, visum est Mathildi, & Godefredo, non latendum diutius, sed prodeundum ad hostium terrorem. Ergo Augusta, Conradus, Mathildis, Godefredus, Guelfo, cum proceribus aliis celeberrimã pompã per urbem & vicinas arces vecti omnium oculis gratissimum spectaculũ præbuere. Augustiores solito visi Principe, splendido cultu, florente ætate, novã fortunæ luce conspicui. Nullus dudum dies civibus illustrior, atque adeo uni-

versæ

versæ Italiæ auspiciatior illuxerat. Nequē
verò lætitia, quæ Canusinos ceperat ad-
iuncto partibus Conrado, se Canusij con-
tinnit, sed pervagata, latèque diffusa mi-
rabiles excitavit animorum motus per
Italiam. Conradi ducis exemplo tracti
milites, atque adeo (a) agmina ipsa, & to-
tæ urbes deficiebant ab Henrico. Me-
diolanum, Cremona, Lauda, Placentia
contra hunc in viginti annos conjura-
runt, & Conrado paruerunt fide constan-
ti. Transitus quoque Alpium interclu-
sus, ne sectatores Henrici ad eum exGer-
maniâ possent pervenire. Interim Hen-
ricus nunc Veronæ, nunc Argenti cum
Giberto degens multiplici dolore affli-
ctus non capiebat sese. Fugatus ipse
Canusio erat, conjux liberata, filius ad
hostem defecerat, Mathildis victrix &
Regina volitabat, desertor Godefredus
pro hac vincebat cum Belgis, Itali rebel-
labant passim: si qui favebant adhuc
Germani, procul arcebantur. Ægrum
animo & consternatum Imperatorem
Gibertus solari, sed frustra, conabatur.

Cùm

(a) *Sigeb. Bertol.*

Cùm æstualet maximè Henricus in filium, spem fecit Gibertus, transfugam illum circumveniri, & dolo intercipi posse; quam in rem omnem astutiæ vim, omnes artes intendit. Parte aliâ Conradus, Canusinique proceres, quid porro facto opus esset rei Christianæ gratiâ, in commune consulebant. Prorex Godefredus ijs exposuerat, quod votum recuperandæ valetudinis causâ nuncupasset, immensumque, quod moliebatur, opus. Quo audito Praxedis, Conradus, amicique Itali proceres, ut antè Mathildis, obstupuerant, & imensis, ut dignum erat, extulerant laudibus. Verùm priusquam id aggrederetur, necesse visum est Italiam liberare supremis Henrici, Giberti que conatibus. Eam in rem confluebant in dies sub Mathildis signa milites gentium etiam remotarum. Aderant præter Italos Godefredum secuti Lotharienses, item Frisij, Franci, Aruerni, Saxones, Britanni, utque canit Domnizo,

OMNIBUS EX ISTIS EQUITES HABET
ALTA MATHILDIS

P

Quippe

Quippe illa pro Reginâ colebatur. Verum regius is honor præbuit Amazoni materiam adjiciendi eximium laudibus suis cumulum, edendique specimen ingens modestissimi & vacui omni ambitione animi. Convocatis proceribus talem orationem habuit : Reginæ appellationem ab Italis mihi delatam magis non prohibui, quàm approbavi ; permisique veriùs, quàm admisi. E re Christianâ esse tunc duxi non rejicere id nominis, dum non erat alius, qui sustineret. Nunc, quando adest Conradus , qui imperium jure suum capeßat, hunc censeo ad majus religionis firmamentum , quàm citissimè fieri poterit, (a) coronandum Regem Italix. Tum ad eum Principem conversa, tibi, inquit, Conrade, cedo ac restituo regnum, precórque superos, ut & vita diuturna sit, & æterna majestas. Expressit modestia Marhildis meritam ab omnibus laudem, mirantibus ultrò relinquentem, quod ab alijs per gladios flammasque petatur. Respondit Conradus vel ideo dignâ coronâ, quâ cederet sponte. Godefredus
lau-

(a) *Bertold.*

laudavit Mathildis non solum modestiâ,
 sed & consilium. Tum addidit, Conra-
 dum instructum omnibus naturæ bonis,
 insignem genere, corporisque formâ &
 robore, ad munera à Deo accepta adje-
 cisse multa belli morumque decora. In
 Imperio Romano nunquam in eâ ætate
 tantam indolem tam maturæ virtutis
 fuisse. Eum esse jam nunc, cujus operâ
 Mathildanæ conjunctâ restitui possit re-
 ligionis imperium. Dum Canusij agitur
 de Conrado propediem Mediolani co-
 ronando, Gibertus incumbibat in decre-
 tam fraudem, nec apud Mathildem de-
 erant proditores. Res gratissima Giberti-
 nis, Mathildanis longè acerbissima con-
 tigit. Quo casu, quibus insidijs, non pro-
 ditor. Certe Gibertinis dolis appetitus
 (a) Conradus capitur, & ad Henricum
 vinctus trahitur. Pater in Principem ad-
 se adductum sic coram suis invehitur
 Si de gregario transfugâ supplicium su-
 mendum est, iste præfectus copijs meis
 in Sabaudiam missis quid comeritus, etsi
 non esset ex me genitus? Jam si etiam si-

P a

lius

(a) Bertold.

lius est, si paternâ curâ, sollicitudine, caritate educatus à teneris, si honoribus, atque omni beneficiorum genere cumulatus, & imperij in spem non tantùm natus, sed propè jam consors, quod supplicij genus satis erit ingrato capiti? Semel fateor, dicto non audientem, ut officij commonerem, verbulo negavi filium esse. Ille factò mox esse filius desijt. Defecit ad hostes, imperium invadere, quàm sperare maluit, arma vertit in patrem, jam, nisi captivus esset, futurus parricida. Beneficium quoque hoc meum est, quòd vinctæ manus à summo illo scelerum arceantur. Denique vel est, vel non est ex me natus. Si etiam; in ingratum, tantisque criminibus obstrictum filium, eò severiùs consulendum est: si non; nihil paternum expectare transfuga debet à iudice, in cujus caput dextram armavit. Conradus ita postulatus majestatis, quòd patri flagitiorum particeps esse noluerat; habebat in promptu multa, quibus depelleret accusationem. Verùm quia proferri non poterant, nisi notaret coràm in os mores patris, in ipso vitæ discrimine

pro-

propositum observantiæ tenuit. Ostacitum, dejecti in terram oculi, in vultu plurimum verecundiæ, sed nihil pœnitentiæ, neque timoris. Henricus id silentium exclamavit esse contumaciam parricidæ, furēnsque jussit eum in carcerem abripi. Mox de pœnâ capitali agitur. Cæterum procerum non paucos moverat nota indoles Conradi, dextrâque spectata bello, & vinculis indigna. Adhæc tacentis in tanto periculo modestia, quam damna-
bat pater, apud alios ipsius silentij patrocínio veniam obtinuit. Orabant Cæsarem, ut culpam ætati, & temporibus, pœnam Imperij heredi, atque imperio condonaret. Consilium in dies cum ætate crescere: senescente audaciâ aliis-
que vitij maturescere virtutes. Ad extremum si filium innocentem absolvere non posset, nocentem insigni paternæ pietatis exemplo servaret, & ad meliora traduceret. Verum frustra orabatur: nullus miserandum Principem à crudelitate patris vindicare posse videbatur. At, ne ultra verba fureret, Mathildana fecit industria. Nunciatur Henrico, Conradum,

quàm felici arte captus fuerat, tam solerti
 (a) liberatum. Non potuisse agnosci li-
 beratores, sed horum principem ac du-
 cem haud dubiè Belgam Godefredum
 esse. Cæsar ad hæc, quò lætior modò fue-
 rat, cò impotentior mentis æstuarè, fure-
 re, & in omnem partem se versare. In-
 census & ipse Gibertus non dolore solum
 tantæ ad irritum cadentis rei, sed etiam
 odio, atque irâ in liberatores. Attamen
 modis omnibus conatur Cæsaris æstum
 sedare. Dum multa pollicetur atque i-
 stud inter cætera, se denuo interceptu-
 rum non secus ac antè Conradum, tristi-
 ores afferunt nuncij, Conradum per-
 ductum à liberatoribus Mediolanum :
 ibi non modò ab Ottone Vicecomite ur-
 bis principe, atque ab oppidanis magni-
 ficè exceptum, sed urgente Mathilde,
 Godefredo, Guelfone, totâque eorum
 factione Regem Italix conclamatum,
 mox ab urbis Archiepiscopo insigni
 pompâ coronatum esse. Cedenti ultrò
 regno Mathildi suum decus suâque
 servatam majestatem. Quin patrem Guel-
 fonis,

(a) *Idem Bert.*

fonis, nuper principatu Boiorum ab Henrico abdicatum, ex Germaniâ venisse eo ipso tempore, novoque Regi fidum adherere. Ita Conradum & decus potestatis & robur omne paterni exercitus obtinere in Longobardiâ. Hic in ultimam desperationem agitur Henricus. Veronæ agebat, ubi torquente memoriâ liberatæ uxoris, liberati filij, plenusque specie decorum ejus, & dedecorum suorum omnium furebat. Os horridum, color exsanguis, exagitata mens conscientiam probrorum, & scelerum. Nullus, ne Gibertus quidem, mulcere furiosum vel poterat, vel audebat. Silentio defixus aliquantisper in solio hæsit: tum repente exiliit. Nunc grandibus ferri vestigijs, nunc interstitere; manumque capulo admove, denique ferrum dstringere. Territi spectatores abstiterant, & quid acturus esset, expectabant. Ardentes oculos in Gibertum cum torisset, percussurus videbatur; nec dolebant quidam iram Cæsaris redire in scelerum ministrum. Henricus mente volvens destitutum se à militibus, & majestate exutum à filio, quid, inquit, vivo,

cui ex tantâ potentiâ, tantóque splendore fortuna nihil reliquum fecit, præter miseram animam? Inde (a) instinctus furis ferrum convertit in pectus. At Gibertus, & ministri advolant, brachiumprehendunt, & nequidquam reluctanti gladium extorquent. Ille vociferari, & fortunæ remedium ferrum repositum: sinerent se suâ manu finire vitam, & ministerium filij insidiantis occupare. Gibertus obstare: fatius esse alieno scelere, quàm suo perire: sed sibi curæ fore vitam ejus, nec nisi per sua, procerúmque latera petutum iri. Ita sensim dato spatio furori ejus, facultatem omnem atque industriâ adhibuit ad animum à desperatione revocandum. Addebat, Henrico superesse heredem filium, minorem Henricum, qui pro Conrado desertore regnaret; sibi aut empecuniam, quâ conduceret militem novum. Et quamquam Gibertus ipsemet percussus casibus adversissimis tum in Longobardiâ, tum Romæ, ubi Urbanus Pontifex præpollebat, tamen nec adeò dejectas res simulat, & restitui possedocet,

(a) *Bertold.*

doctet, vir malarum regnandi artium peritissimus. Id consilij cum Henrico iniit, simulaturum se deserere jus Pontificatus, cæterum Romæ arcem præsidio retenturum adversus Urbanum. Ad perturbandas autem Conradi, & Mathildis res daturum se operam, ut ab ijs duorum Guelfonum disiungantur animi. Dum in eam alienationē clam incumbit Gibertus, stupendum exitū habituram, interim Conradus incolumis Canusij grates agebat liberatoribus suis, Mathildi, Godefredo, amicisque proceribus. Eos præstantes viros, quos ad hoc bellū Italicū adduxerat socios Bullionius, appellare nominibus pro certo non possim. Velut quæ magno ex intervallo loci cernuntur, sic illa vetustate, & scriptorum incuriā quādam in obscuro sunt. Domnizo rerum spectator ita in Mathildem intentus fuit, ut ne Guelfonis quidem, tametsi tunc mariti Amazonis, nedum externorū illorum procerum nominatim meminerit, contentus dixisse, procures, atque in his Lotharienses adfuisse, & exitisse victores.

Ipse Bullionius cū adversus Cæsarem ex Belgicā moverat, id ipsum vulgò latere voluerat : unde factum videri potest, quòd & nullus scriptorum bellum hoc ab eo gestum esse, nisi familiaris ipsi fratribusque Ordericus prodiderit, & famā sparsum sit, Bullioniū, cū Italiam petijt, jam tum ad sacram expeditionem in Syriam esse profectum. Quòd utique in vulgus faciliè persuaferunt tum ejus nuperus belli sacri conatus, atque apparatus, tum institutum iter in Italiā, quod Syriæ petendæ erat accommodum. Hinc etiam videtur data occasio, ut quidam (a) scriberent Godefredum cum exercitu bis in viam Palæstinæ se dedisse, sed eò primā profectioe non pertendisse ; alij autem ponerent unam quidē illius profectioem, sed (b) acceleratam, & quasi ante Concilium Claromontanū jam coeptam ; traderentque in hujus expeditionis Syriacæ initio quædam evenisse, quæ ad bellum Italicum spectant. Quale illud est, quod non unus refert, Bullionio tunc fuisse

(a) *MS. Chron. Leod. Geneal. Lothar.*

(b) *Molan.*

fuisse Syriacæ expeditionis (a) sociū Cæsaris Henrici filium, eūque bello captū, quod non nisi Conradi nuperæ in Italiā captivitati congruit. Præter eum socios Bullionio addunt, qui re verâ potuerunt esse illi ignoti proceres ad Canusium viatores; nempe (b) fratrem Henrici Lovaniensium Comitis Godefredum, qui cum Cæsaris filio captus ab hostibus fuerit; Robertum Flandriæ Comitem (c) qui cum Bullionio Pontificem Urbanum de bello sacro indicendo convenerit; Tironem nobilem, (d) qui pluribus annis Bullionium ante Bellum Syriacum comitatus sit. Nunc, ut ad seriem narrationis redeam, Conrado Rege potiente rerum in Italiâ, Prorex Godefredus nihil antiquius, aut prius jam habebat, quàm petere Orientem, seque sacri belli voto liberare. Quâ de re cū ei colloquiū esset in conclavi cum Conrado, Praxede, ac Mathilde (Guelfones eis rariùs aderant) exposuit se ducere sibi religioni, diutiùs differre, quod voverat. Illi, ut jam aliàs,

mirati

{a) *Molan.* (b) *Idem.* (c) *Ripam.*

{d) *Helm.*

mirati arduum consilium inauditâ voti
religione, & recuperatâ divinitus valetu-
dine firmatum. Laudibus deinde extu-
lere animum fortissimi juvenis, qui fa-
crum Bellum primus, privatîsque susce-
pisset viribus tunc, cùm Principum aliorû
carebat auxilio, sicut carebat exemplo.
Hoc esse nîsu Herculeo velle Occidenti
Orientem armis jungere, & Christiano
orbi orbem adjicere. Qui tantam rerum
molem suscepisset, dignum esse nomine
Herculis Christiani. Ad extremum opem
polliciti spem fecerunt alios quoque
proceres in locietatem præclaræ atque
Argonauticâ majoris expeditionis ven-
turos. Dum hæc agitant in conclavi Prin-
cipes, Tiro ille Godefredo intimus de
eodem heroico ducis sui consilio agebat
cum Mathildanis, Anachoretâ Ioanne,
Lanfranco, Domnizone. Mirabantur &
hi fortissimum Bullionium, qui se finibus
Occidentis neutiquam concludi passus,
quærendum in Oriente putaret, circa
quod periculum sui faceret. At sciscita-
batur Ioannes, quas ad tantam expedi-
tionem facultates, quos socios paratos
Dux

Dux haberet. Respondit Tiro, licet impares essent tanto bello privatae vires & opes quantacumque, tamen Godefredi parem animum esse. Cæterum quos, inquit, immensi operis socios, atque adjuutores sibi ab ineunte ætate, ac deinceps conciliârit, quorum hîc aliquos eum comitatos vides, aliius, atque ex ordine reperam. (a)

Primo loco (subjecit Tiro Ioanni subridens) à me nominandus anachoreta. Est enim, quemadmodum suus Mathildi Ioannes, ita Godefredo suus eremicola Petrus, datus jam olim puero magister morum, litterarum, artisque militaris. Patrem habuit Godefredus (ut scire vos arbitror) præstantem domi bellique virum Eustachium, Bononiæ Belgicæ Comitum, patrum autem cognominē habet Godefredum, Francici regni præfectum juris, seu Cancellarium, Parisiorumque Pontificem. Ad hunc fortè venerat peregre ille, quem dixi, vir egregiâ virtute Petrus, gentilitio autem nomine ;

Ana-

(a) PRIMORDIA Petri Anachoreta, Hugonis Franci, Roberti Flandri, &c.

Anachoreta. Qui natus in Morinis nobili Anachoretarum domo, puérque literis imbutus in patriâ, ut superioribus disciplinis, & peregrinis linguis excoleretur, in Italiam, Græciâque concesserat. Ubi ætas patiens laborum fuit, ad rem quoque militarem appulerat animum. Cùm Parisijs ingenium, probitatem, & belli pacisque artes abunde probasset Cancellario Godefredo, mittitur ab hoc ad Comitem fratrem. Eustachius perspectâ Petri insigni facultate censuit non posse aptiorem eligi, qui filiorum suorum pueritiam regeret, informaretque principalium artium præceptis. Ergo ducit Petrum ad conjugem Idam; cui commemoratio erat plerumque apud fratrem Lothariæ Proregem Gothilonem Gibberum. In eâ Belgicæ regione, quæ Brabantiam complexa, (a) Lotharia & Lotharingia propriè nunc dicitur, (b) quæque Scaldis determinatur à Flandriâ, non longè ab amnis Diliæ fontibus castella duo inter se propinqua Gennapia, & Baseium clarent.

(a) *Lothier.* (b) *Chron. Fland. apud Chesn.*

sent. Gennapia prætorium Proregum Lothariæ (a) patrimonium Proregis Gibberi fuit, qui & eo loco plurimum versatus. Abest inde Baseium paucis millibus passuum, qui locus imprimis nobilitatus domicilio fatidicæ Principis Idæ, & heroicis incunabulis filiorum. Hic illa prope fraternam arcem degere amabat, & fratris usu frui. (b) Ibidem nati & educati filij tres, Godefredus, Balduinus, & Eustachius. Pueri summæ spei in oculis avunculi Proregis, atque in complexu matris educabantur Baseij, cum Petro traduntur optimis erudiendi disciplinis. Qui summâ caritate complexus discipulos Principes toto animo incubuit in commissum munus. Ingentem expectationem concitabat tum puerorum excellens indoles, tum matris Idæ prædictio, quam minimè vanam fore, Petro persuadebat indubitata virtus auctoris inter Occidentis matronas sanctimoniâ morû insignis. Prædictionem maternam quædam ostenta præcesserant non ignorata Petro.

Idam,

(a) *Butkens.* (b) *Chron. Nivell. & Rubec Vall.*

Idam, cùm primùm Eustachio nupta est, fortè sub noctem de cælestibus comentantem somnus oppressit. (a) Vidit in quieto speciem solis è cælo delabentis in gremium suum, atque id ingenti fulgore complentis. Quo viso præsignificatus splendor Heroicus filiorum ejus, atque imprimis Godefredi stirpis maximi, qui altero postmodum (b) ostento visus est in sole sublimis tanquam in solio consistere. Nasci decebat inter prodigia eum, cujus vita perpetuum erat futura miraculum. Neque præterijt illud Petrum, sub tempus, quo in lucem editus est Godefredus, commissam in Belgicâ prodigiosam juxta ominosamque inter feras animantes pugnam. Ad Nerviorum oppidum (c) allapsæ ingentes colubrorum copię, atque in unum locum collectæ, mox bipertitò disiunctæ, velut geminæ acie incurfarunt in sese. Strepere, sibilis iras acuere, infestis linguis, moribus, venenis in se sævire. Multi utrimque convulnerati, ac perempti. Pars una sensim

(a) *M.S. Vita Ida.* (b) *Alb. Aquen.* (c) *Sig. An.* 1059.

sim cedens, tum profligata in cavam arborem se recepit. Altera infecuta circumstrepere, & quasi obsidione cingere. Tenuitque oppugnatio, & spectatorum Belgarum admiratio; donec ab his circumjecto igne pars utraque pervicacium ferarum absumpta est. Quid illæ portenderint, tunc nescitum, nec memoriæ proditum. At certè non obscurâ similitudine videntur exprimere duas illas barbaras gentes eodem veneno Mahometanæ superstitionis imbutas, Turcas, ac Saracenos, qui inter se in Oriente, non solum in alios, armis grassantur. Utinam ambos superveniens Belga Godefredus cum fratribus ac socijs, ferro ignique, velut Hercules multicipitem Hydram, domet. Eosdem tres fratres, (a) trium siderum specie substratis anguibus insistentium à se visos nonnemo narravit. Nunc Idæ vaticinatio memorabilis de tribus filijs hæc exstitit. Fuit (b) cum in conspectu matris luderent pueri fratres, laceffentes se teneris manibus, & ad ejus gremium recurrentes identidem. Fortè

Q sub

(a) *Geneal. Bonon.* (b) *G. Tyr. Hist. Morin.*

sub maternam chlamydem sese considerant, ibique latitantes innocenti manuum ac pedum agitatione strepebant, cum Eustachius pater supervenit. Blandè sciscitatur à conjugē, quid sub ejus veste motitetur. Illa seriò, plenàque numine respondit tres magnos Principes esse, quorum primus Dux, secundus Rex, tertius Comes esset futurus. Addidit illi responso indicationem, quā Godefredum Ducem, Balduinum Regem, Eustachium Comitem fore significavit. Ita soli Balduino regiam dignitatem pollicita, effecit tamen deinde, ut intelligerent puorum pater, avunculus, & moderator Petrus, majus aliquid latere sub (a) cæteris verbis suis, innuitque Godefredum fore DUCEM, sed INTER REGES INCLYTUM. Cùm hoc vaticinium narret Tiro, lætati quidem, qui audiebant, Mathildani, sed ancipitem videbant quasi fatorum viam. Capere id non poterant, quomodo Godefredus futurus dux esset, & tamen INTER REGES. Obiter addo quod rei admirabilitatem auxit, quòdque Tironi tunc nondum

(a) *Monum. Bonon.*

dum erat notum. Etiam Godefredo, & cuique trium fratrum, quos fore MAGNOS prædixerat mater, (a) regium decus obventurum auguratus est postea Petrus. At quia ista adversantur priori matris prædictioni, sic eam cum appendice Petri complecti brevi carmine placuit.

V A T I C I N I U M.

TRES MAGNI PROCERES, DUX,
 REX, COMES : ATTAMEN HORUM
 QUEMQUE MANET REGNUM, REGIA
 VIRGO MANET.

SED VERSABIT AMOR SORTES : HOS REGIA QUAMVIS

IURA MANENT, HI DUX, REXQUE,
 COMESQUE MANENT.

Ambigua hæc, & in speciem pugnantia expediet & conciliabit eventus. Porro narrationē institutam sic persecutus est Tiro : Petrus, inquit, ut pueris discipulis animos faceret, varia pro eorum ætate captūque inculcabat, modò patriæ decora, modò nobilitatem & facta majorum. Natale illis solum esse Galliam Belgicam, terrarum plagam minorem magnis,

Q 2

sed

(a) *M. S. Nic. Campis.*

sed comparandam optimis. Gallorum fortissimos Belgas Iulium Cæsarem & prædicasse, & expertum esse. Ex eâ regione excellentes pace belloque viros prodijisse, sed neminem, quem non deberent nobilissimi pueri olim vel æquare, vel vincere. Spectarent maiores suos, non genere magis, quàm virtutibus inclytos, & quidquid illi fuissent, à se nepotes exigerent. Addebat tenere famam, fuisse ipsis auctorem gentis Eliam mirificum equitum (a) cognomen sortitum à Gygno, à quo etiam cymbâ esset adductus. Inde cum pueros interjectâ fabellæ illecebrâ fecisset attentiores, subdebat famæ illi commentum aspergi. Fortè equitis illius (si quis fuerat) (b) plumario cassidis apici additam Cygni figuram, locum miraculo nominique fecisse. Tum majora orsus memorabat originem longè clariorem, nec à fabuloso, sed vero justoque Heroë accersendam. Genus paternum juxta maternumque eos ducere ab Augusto illo Imperatore Carolo Magno, cuius tanta magnitudo virtutis, & amplitudo Imperij,

(a) *G. Tyr.* (b) *Pighius.*

perij, tantæque in Ecclesiam merita fuerint, ut maximi quique Principum summa sibi gloriæ ducant posse ad eum referre originem. Jam ortos ipsos à tanto Heroë per Franciæ Reges, Proregesque Lothariæ. Nam postremos ex Caroli Magni stirpe sincerâ ac masculâ fuisse Ludovicum Quintum Francorum Regem, patruumque ejus Carolum Lothariensem Proregem, & filium Caroli hujus Ottonem. Tres eos fato concessisse, non aliâ prole superstite, quàm filiabus Caroli Proregis duabus, Gerbergâ, & Ermengarde. Gerbergam natu majorem Francisci regni hereditatem avito paternoque jure repetisse, sed nihil evaluisse contra potentiam id occupantis Hugonis Capetij, genus ad Carolum Magnum aliàs referentis. Lothariensis quoque regni præfecturam puellæ negatam à Cæsare, quòd Cæsar id esse virile beneficium imperij diceret; præfectumque ei regno esse Godefredum, & post hunc, fratrem Gothilonem Magnum Arduennæ Comitem. Jam Arduennatem hunc Lo-

thariæ Proregem oriundum quoque à Carolo Magno, abavum esse matris ipsorum Idæ, Gerbergam autem illam abaviam Eustachij, quo patre geniti sint, illustres utrimque regio Caroli Magni sanguine. Temporis spatia ita dispunxerat Petrus, ut discipuli Principes dici partem religionis officijs, partem disciplinæ militari, partem studijs pacatioribus infunderent. Nec eos dumtaxat præceptis, sed exemplis præsertim erudiebat, vir egregiè pius, litteratus, ac strenuus. Quàm docendo excelluerit, discipulorum peritia, virtutésque mox, prout tulit cuiusque ætas, ostendêre. Godofridus, ut natus maximus, ita eximio virium robore, ac dexteritate anteijt, sive in palæstrâ, sive in equestribus ludicris, sive serio certamine conferendæ manus essent. Excito' sub id tempus Flandrico bello, notitia illi, atque amicitia est inita cum Hugone Francorum Regis Philippi fratre, alijsque adolescentibus egregijs, & pariter illis posita militiæ rudimenta. Belliorigo hæc fuerat.

Co-

Conjugibus Balduino Insulano Flandriæ Comite, & Adelâ (quorum hæc Philippi Regis, Hugonisque fratris amita erat, ille eorundem pueritiam, ac Franciæ regnum summâ fide rexerat.) natus est Balduinus Flandriæ heres. Duxit is Richildem heredem Hannoniæ, ex quâ suscepit filios duos, Arnulphum, & Balduinum, quorum priori Flandriam, posteriori Hannoniam attribuit. Pòst paulò fato concessit, jacto funesti belli semine. Tutelam enim filiorum, quam pater commiserat Roberto Frisio fratri suo, Richildis mater arripuit. Ferocis animi femina, & cupida imperij verebatur, ne teneros liberos, per occasionem tutelæ, ditione exueret patruus Robertus homo bellicosi atque immodici ingenij, potentiâque metuendus: quippe qui ductâ Florentij Hollandiæ Comitissæ viduâ, subactisque Frisijs, ejus gentis principatum adeptus erat, & Frisij cognomentum. Offensus repulsâ Frisius Richildem bello petit. Quæ Lutetiam Parisiorum profecta in societatem

Q 4

armq-

(a) Meyer. Oudeg. an. 1070.

armorum Regem allicit , tum duos clarissimos bello duces Eustachium Bononiæ Comitem , & sororium ejus Gibberum Lothariæ Proregem. Gibber protinus in ipsâ Hollandiâ Robertum invadit , collatisque ad Lugdunum signis , editâ magnâ strage vincit , & Hollandiæ Frisiæque ditione potitur. Fugatus Frisius , at indomitus , primùm ad Saxonium Ducem , cujus duxerat filiam , perfugit , deinde vocatus à Flandris Gandam venit , Richildis Gibberique iulciscendorum cupidus. Ibi ad eum Flandriæ Teutonicæ nobilitas confluit , quæ viro , non feminæ , parere in animum induxerat. Contrà populi Flandriæ Gallicæ secuti Richildem. Ad quam Rex quoque Philippus , & Hugo frater cum magnis auxilijs venêre. Vires junxit his Bononiensium Gomes Eustachius. Comitati patrem liberi , Godefredus , Balduinus , Eustachius , ut à teneris militiæ assuescerent. Eorum latus semper stipavit Petrus moderator. Hîc regius adolescens Hugo consuescere cum Godefredo

do cœpit , seménque jacere illius insignis necessitudinis , quæ bello sacro floreret. Sub radicibus editi montis , cui Casserum oppidum impositum est , concurrere acies. Locus Frisio opportunus , varia fortuna , dubiæque victoria fuit. Richildis , quæ masculo mulier animo sese pugnantibus miscuerat , viva in Frisij manus venit. At Frisius ipse , dum successu calens hostibus instat , ab Eustachio Bononiensi captus abducitur. Liberati utrimque captivi , mox ad pugnam redierunt alio eventu. Adolescens Arnulphus Flandriæ Comes cæsus in acie , captusque Bononiensis Eustachius à Frisio , & unà Petrus , (a) qui eo prælio insignem in discipulos pietatem non minùs , quàm fortitudinem probavit , eum interpositu corporis sui fecit , ne filij cum Eustachio patre caperentur. Ita Frisius victor Flandriâ potius est. Richildem altero filiorum amisso , altero paternâ hereditate pulso geminus dolor magis accendit in Frisium. Ad instaurandum bellum hæc Regem Philippum

Q 5 ext.

(a) *Hist. Morin.*

extimulat. Nec abnuitt ille, & Balduinum adolescentem balteo cinctum Flandriæ Comitem salutat. Cum eo jam moventem dehortatus est ab armis Cancellarius Godefredus. Magna hunc incesserat cura, & cupido liberandi Eustachij fratris, quem Frisius in custodiâ detinebat. Cum hoc in eas leges conventum, ut Cancellarius Regem cum copijs reduceret in Franciam, Eustachium dimitteret Frisius. Stetit uterque pactis. Auctore quoque Cancellario Rex tunc, aut (ut quidam) priùs petijt conjugem, & obtinuit à vitrico ac tutore Frisio Bertam Florentij Hollandiæ Comitissæ filiam, ex quâ par insignis liberorum Ludovicum, Constantiamque suscepit. Liberatus Eustachius, & cum eo Petrus, omnium periculorum & gloriæ particeps. Qui cum ex data fide bello imposterum abstinere, tiro Godefredus avunculi Proregis exinde signa secutus est, magnorum operum non spectator modò, sed etiam adiutor. Richildis submissâ Leodiensium Pontifici Hannoniâ, acceptâque ab eo magnâ vi pecuniæ & militum,

litum, bellum instaurat. Tertio prælio decernitur. Adstitit Richildi in acie filius Balduinus, & avunculo Proregi Godefredus, magni animi adolescentes. Pugnatum ad Hannoniæ vicum Brochoriam, debellatumque tantâ cæde, ut ab occisorum multitudine Dumerum Mortis nomen loco manserit. Godefredus ita virtutem utrique parti probavit, ut (4) sibi laudem egregij, & ad rem militarem impigri adolescentis jam tum pepererit. Vicit tamen Frisius, & partim eâ victoriâ, partim pacto, hereditarium Flandriæ imperium asseruit filio suo Roberto, Hannoniâ Balduino relicta. Godefredus præter laudem id fortis operæ pretium fecit, ut notissimus esset non solum æqualibus suis Hugoni Franco, & Hannoni Balduino, sed præstantis, ut illi, indolis puero Roberto Flandro, cum quibus postea bello sacro arctissima ei necessitudo foret, Verùm hæc ne tam citò cum Flandro coalesceret, patris Frisij facinus, certè facinoris opinio, fecit. Proregis Gibberi avunculi percussor,

(2) *Lamb. Sch.*

for, ut constantior fama tulit, immissus erat à Frisio. At didicit Godefredus ignoscere, tum inductus lenitate animi, tum ratione permotus, quando sibi ipsi veniâ opus esse agnovit, partes Henricianas secuto. Frisio venerationis & pœnitentiæ ergò Hierosolymam profecto filius Robertus, qui ab eo erat in partem Flandrici imperij cooptatus & appellatus Comes, Romam (b) venit ad Cæsarem. Romæ cognovit de Aquiliferi Cæsarei mirandis Saxonico, Italicoque bello gestis, deque ejus valetudine tunc adversâ. Invisitægrum tantâ comitate, tantâ exceptus fuit, ut vel maxima inter eos juvenes exinde necessitudo contracta sit. Relatus in patriam æger Godefredus, Hierosolymam & ipse proficisci statuit, sed armatus. Hæc agitantem alia interrubarunt cælesti numine ita providente. Injectæ enim expeditioni moræ (quis credat?) expeditionem promovêre, non processuram, nisi retardassent. Quin ea rerum inopia, quam fortuna molita esse videbatur

ad

(b) *Oudeg.*

ad disturbandum bellum sacrum, contulit ad parandum. Godefredo enim deerant adjuutores, opes, valetudo: at inter belli sumptus & detrimenta nactus est opes, ex hostibus belli socios, valetudinem denique ex ipso mortis discrimine. Quemadmodum bello Flandrico Robertum, ita Virodunensi duos consanguineos suos Tulli Leucorum Comitris filios, quos habuerat hostes, conciliavit sibi virtutis operibus, secum in Orientem tracturus. Sed non alios bello illi sacro opportuniore socios habuit, quàm egregiè sibi auxiliatos ad Sathanacum fratres Balduinum, & Eustachiũ, fororiũque Montis Acuti Comitem Cunonem. Quod ad me attinet, quantuluscumque sum, à Ducis mei latere, cujus est in me singularis benevolentia, nusquam abstitero. Petrus ille quondam trium fratrum moderator bello Virodunensi in armis non adfuit. Quippe quem ceperat tædium rerum profanarum, & religiosioris vitæ desiderium. Postquam bello Flandrico captus, liberatusque fuerat, ac deinde uxorem

for, ut constantior fama tulit, immissus erat à Frisio. At didicit Godefredus ignoscere, tum inductus lenitate animi, tum ratione permotus, quando sibi ipsi veniâ opus esse agnovit, partes Henricianas secuto. Frisio venerationis & pœnitentiæ ergò Hierosolymam profecto filius Robertus, qui ab eo erat in partem Flandrici imperij cooptatus & appellatus Comes, Romam (b) venit ad Cæsarem. Romæ cognovit de Aquiliferi Cæsarei mirandis Saxonico, Italicoque bello gestis, deque ejus valitudine tunc adversâ. Invisit ægrum tantâ comitate, tantâ exceptus fuit, ut vel maxima inter eos juvenes exinde necessitudo contracta sit. Relatus in patriam æger Godefredus, Hierosolymam & ipse proficisci statuit, sed armatus. Hæc agitantem alia interturbavit cœlesti numine ita providente. Injectæ enim expeditioni moræ (quis credat?) expeditionem promovêre, non processuram, nisi retardassent. Quin ea rerum inopia, quam fortuna molita esse videbatur

ad

(b) *Oudeg.*

ad disturbandum bellum sacrum, contulit ad parandum. Godefredo enim deerant adjutores, opes, valetudo: at inter belli sumptus & detrimenta nactus est opes, ex hostibus belli socios, valetudinem denique ex ipso mortis discrimine. Quemadmodum bello Flandrico Robertum, ita Virodunensi duos consanguineos suos Tulli Leucorum Comitis filios, quos habuerat hostes, conciliavit sibi virtutis operibus, secum in Orientem tracturus. Sed non alios bello illi sacro opportuniore socios habuit, quàm egregiè sibi auxiliatos ad Sathnacum fratres Balduinum, & Eustachiũ, sororiũque Montis Acuti Comitem Cunonem. Quod ad me attinet, quantumcumque sum, à Ducis mei latere, cujus est in me singularis benevolentia, nusquam abstitero. Petrus ille quondam trium fratrum moderator bello Virodunensi in armis non adfuit. Quippe quem ceperat tædium rerum profanarum, & religiosioris vitæ desiderium. Postquam bello Flandrico captus, liberatusque fuerat, ac deinde uxorem è

nobili gente Russiacâ ductam extulerat brevi, castitatis voto se obstrinxit. Initiatusque sacerdotio curâ liberorum (duos susceperat, Petrum, & Aleidem) propinquis demandatâ solitariam vitam ducere instituit loco (a) saltuoso Eburo-nibus finitimo. Godefredus Petrum rejam, ut nomine, Anachoretam non rarò conveniebat, & omnis arbitrum vitæ nihil suarum rerum sinebat latere. Cum eo sæpè de consilio sacri belli contulerat, præferrim postquam ex Hezelonis miro somnio, quod anno (b) hujus sæculi undenonagesimo contigit (quòdque nuper à me Malthildi narratum, vobisque jam perspectum, non arbitror esse repetendum verbis pluribus) cognovit se Ducem & Præceptorem Christianni agminis à Deo destinari. Quo anno etiam præfectura regni Lothariensis ei collata à Cæsare, & redditus Virodunî Comitatus, ut ad bellum sacrum opes ne deessent. Exinde itare frequentius ad Anachoretæ latibulum, gemere cum eo de Ecclesiâ in Oriente per Turcas ac Sara-

(a) *Doutrem.* (b) *An. 1089.*

Saracenos, in Occidente per Henricum, Gibertúmque vexatâ: decretum sibi esse, ut horum societatem declinet, illos bello petere, ad quos vocetur divinitus: orare ut ipse pulcherrimæ rei socius, & adjuutor esse velit. Sacrum hominem sacra arma non dedecere. Petrus animum fortissimi juvenis meritis laudibus tulit, & verò se tanto operi non defuturum spondit. Id in præsens agendum, ut quàm plurimi, potentissimique alij commitentur, ac primùm omnium ut convalescat ipse. Spem collocandam secundum Deum in cælesti auxiliatrice Virgine Matre, quæ se esse non modò salutis corporum, sed & bellicæ opis, & victoriæ mirandam effectricem probavit nuperrimè in Principe Godefredi consanguineo (a) Tungrensi Hectore. Res post homines natos inaudita inciderrat, quam vos ex me audijisse non poenitebit. Tungri Hannonum vicus est amœnior situ, quàm ædificijs splendidior. Salubris temperies cæli, ager frumenti fertilis, aquæ scaturigines prata

in.

(a) *Ex Tabul. Tung. Servius.*

interluunt. Locus Hectori domino, viro illustri, Alberti Namurcensium Comitis fratri sic arrisit, ut in eo, licet nobiliora suppetarent, domicilium fixerit. Sed tenuit eum imprimis quod loco accesserat ornamentum è cælo. Anno sæculi hujus altero, & octogesimo intempestæ noctis silentio geniorum manibus cælesti quâdam pompâ in hortum Hectoris alata erat perelegans Virginis Matris signum bipedali haud majus, è ligno gypso, venustèque coloribus picto. Faciei color ad castaneum vergens, oculi suavitatem intuentibus aspirantes, tota corporis species dignitatis plena. Genij quâ bajuli, quâ comites locum admirabili lumine, concentu, odorûmque fragrantîâ implevere, tenuitque ea pompa sesquihoram. Exciti incolæ frequentes advolant, Virginémque hospitem supplices venerantur. Omnes mista religioso stupori lætitia incesserat. In primis adfuit Toparcha Hector, ut indole & genere, ita religione princeps. Sed vir cætera illustris, cassus erat oculorum lumine, quod ab annis tribus morbi vis

extinxerat. Quomodo medicam Virginis hospitis manum sit meritus, accipite. Primum jussit transferri iconem in locum celebriorem, ratus id magis ex Virginis honore futurum. Verum prodigio addita prodigia. Quam in hortum elegerat stationem icon, eandem nocte sequenti repetit, cælesti pompâ haud dispari. Iterum, tertio, quarto exportata, toties redijt, miraculo stupentibus testibus, qui partim ex vicinis locis coierant, partim Cameraco ad rei fidem ab Episcopo missi erant. Lætitia exultans Hector, & gratulabundus, quod hortum suum potissimum elegisset Diva, præcatur ut volens ac propitia initam sedem teneat; hortum ei, & quidquid castelli septis continebatur, dicat; se ac suos, suâque omnia fidei ejusdem, ac tutelæ committit. Mox ibi ædes condita, & sacrata Virgini. Quâ hospite gaudebant omnes, protinus multi sospitam experti sunt. Hectori uni, qui Divam tanto studio exceperat, clausa videbatur salutifera manus. Annis duodecim & amplius longa molestæ cæcitatibus

R

ta-

tædia tulit, cæterum constanti semper
 in Virginem fiduciâ. Sed dilatum est
 nobile curationis prodigium, ut coram
 nobilioribus, & plurimis testibus edere-
 tur. Exorto bello abhinc tribus annis
 (a) inter Philippum Francorum Regem,
 & Robertum Frisium Flandriæ Comi-
 tem, ecce nocte concubiâ Tungris He-
 ctor divinitus monetur, ut arma induat,
 & Regi Philippo suppetias ducat. Hæsit
 Hector nuncio perculsus, quod oculis
 captus jubereetur arma capere, & ducere
 copias ab alio ipse ducendus. Iterum,
 ac tertio commonitus, paret denique,
 contrahit numerosum militem, & ad
 castra ducit, quæ Rex inter Tornacum
 & Insulas metatus erat. A Philippo,
 Hugone fratre, & toto exercitu, ingen-
 ti honore pariter ac stupore accipitur
 cæcus dux, quem à Dei parente subsi-
 dio sibi mitti audiebant. Postridie illi-
 us diei, cum exercitus uterque jam jam
 conflicturus esset, petijt Hector conver-
 ti se Tungros versus, ut Tungrensi Vir-
 gini supplex accideret, victoriâ inque,
 & si ita expediret, exoraret lucis usu-
 (a) *An. 1090. Tab. Tung.* ram.

ram. Oranti coram Rege, regiôque exercitu, oculorum lumen restituitur. Hic universi clamorem, & manus ad cœlum sustulere: universi viso tanto, tamque manifesto prodigio de victoriâ bene ominati. Hector gratijs Divæ actis ad pugnam cum cæteris se comparat, copias non jam alienis, sed suis oculis lustrat: hortatur omnes, ut meminerint se Virgine auspice prælium ini-
re, quæ quàm faveat, videre ipsos, atque se omnium maximè. Rex licet impar numero militum, victoriâ potitur. Inde studio accensus visendæ, colendæque prodigiôsæ iconis Tungros pervenire festinat comitante fratre Hugone, & magnâ parte exercitûs. Ibi Virgini victoriam acceptam gratulabundi retulere. Rex castrense paludamentum, quo vestitus in acie steterat, Virgini sacrum appendit, aliâque donavit digna Rege victore. Recentissimum hoc, & non unum prodigium cùm Belgas omnes in admirationem, & cultum Virginis Tungrensis rapuit, tum Godefredum Proregem jam antè Virgini addi-

tiffimum in spem summam cœlestis
 pis erexit. Nuncupato belli sacri vot
 recreatúsque mox ex morbo divinitus,
 damnatus voti, nil jam nisi sacra loca, f
 cra arma cogitabat: cùm ab incepto r
 tardatus est tristissimo illo nuncio, qu
 sororem Augustam turpiter ab Henric
 repudiatam cognovit. Mox, arma
 Turcas parata vertit in Cæsarem, adve
 sus quem operâ Mathildinon inutili vo
 biscum hîc pugnavit ad Canusium.
 Nec opinor sine Numine, ut nempe or
 Italiæ parto expeditiùs Terræ sanctæ l
 bertatem pariat. Dum hæc Tiro na
 raret stupentibus Mathildanis, Godefr
 dus in conclavi Regem Conradum
 Mathildémque ad bellum sacrum m
 turandum urgebat. Et Mathildi dudu
 ejusmodi expeditio fuerat in votis. S
 pe eam à Pontifice Gregorio sanctissim
 magistro suo proponi audierat, & C
 sari Henrico, aliisque suaderi. Sæ
 Alexium Græcorum Augustum ope
 adversus Turcas efflagitasse ab Hen
 co, & à seipsâ meminerat. Sed G
 gorijs mors, & exorta alia ex alijs in I
 liâ

liâ bella, disturbarant consilium. Nunc rebus secundioribus Urbanum ad idem statuerunt impellere. Reputabant tamen rem Christianam in libertatem quidem erectam, sed ab hostibus nondum omnino tutam, Giberto machinas novas moliente, novâque Cæsari conjugem procurante, ut famâ celebritatis nuptialis niteretur allicere proceres, & reparare vires. Cæterum Bullionius quando in Italiâ otium quoddam ab armis esse jam videt, bonâ Conradi, Praxedis, ac Mathildis veniâ, obiter recurrit in Belgicam, ac Franciam, bellum sacrum paraturus. Primùm Bullionum venit, locum naturâ operibûsque munitum, ab heroë domino consecuturum immortalitatem nominis. Arx imposita rupeculæ omni ex parte circumcisæ. Cingunt eam in orbem perpetua juga editorum montium, nisi quâ annis præterfluit. Qui ad averfam arcem bipertitò divisus, postquam eam, & modicam planitiem portæ prætentam circumluit, coeans rursus evoluitur. Celebratus est Godefredi adventus frequentîâ civium, & splendore

dore procerum, etiam externorum. Apparet ex ejus (a) diplomate, quod tunc subscriptis nominibus confirmarunt Hugo, Amalricus Montefortius cum fratre, Arnulphus Chiniaci Comes cum Ottone filio, aliique viri nobiles, quorum multi Godefredum sacro bello secuti. Legitur & in eis tabulis chirographum Gerardi ut opinor, Avesnatis, egregij Tironis, nullique secundi inter familiares Godefredi. Hic subinde digreditur ad silvam Anachoretæ sui Petri: quem complexus hortatur ad belli sacri studium confirmandum, non sine querelâ de morâ suis conatibus ab Henrico injectâ. Petrus miratus Ducis cælestem inter perpetua impedimenta vel constantiam, vel fiduciam, precatúsque ut res feliciter denique cederet, aliquid in rem præter admirationem & preces conferre aggressus est. Subierat animum cogitatio præcurrendi in Palæstinam, & expeditioni sacræ viam explorandi pariter, æsternendi. Quo consilio suo cum Duce communicato, & ab hoc magnopere approbato

(a) *Chart. Gorzien. An. 1093.*

probato impigrè profectus est. Godefredus Bullioni rursus coëgit procerum cœrum, & ibidem (a) (ut priùs) obfignatis tabulis in religiosos viros beneficia contulit, atque ita expeditioni suæ conciliavit superos. Inde excurrit in Franciam acturus imprimis cum suo fodale fratre Regis Hugone, & cum regni Cancellario patruo suo, qui non in re modò sacrâ, sed & in profanâ, plurimum apud Regem auctoritate pollebat. Pergratus advenit in aulam Godefredus, commendatus omnibus elegantiam morum, formæ dignitate, & ingentropinione virtutis. Non abibat dies, quin diceret, aut faceret aliquid, quo probaret magis eximias animi corporisque doctes. Ita non solum sibi Hugonem arctiore necessitudine devinxit, & alios amicos, atque imprimis Montefortios fratres, sed & mirè arrisit regiæ virginis Constantiæ, regiôque gynæceo. Erat in omnium ore, nec in paucarum amoribus, actumque est de despondendâ ei aliquâ puellarum Principum.

R 4

Quin

(a) *Ex Chart. An. 1094. V. Miraum.*

Quin vulgatum (a) nupturam aut etiam jam nupſiſſe illi Sibyllam, filiam Fulconis Rechini Andium Comitſ illius, à quo ſejunctam (b) toro Bertradam Montefortiam Rex Philippus tunc in delicijs, & pro Reginâ habebat, conjuge Bertâ per cauſam conſanguinitatis dimiſſâ. Verùm Sibyllam ſub id tempus mortuam legimus. Cum Hugone neceſſitudo tanta erat Godefredo, ut & intimum amicorum profiteretur, nec alij mallet deſponderi Conſtantiam Regis filiam ex Reginâ Bertâ ſuſceptam. At Godefredi animum tunc ita occupabat belli ſacri apparatus, ut aliud nihil in præſens moliri videretur. Nec doluit Hugoni amicum differre tantisper conjugij voluntatem, donec & pacatior eſſet aula, & Conſtantia, tunc undecennis, adoleviſſet, quam apparebat formâ, ut genere, præſtantiſſimam fore; quàmque obtinere à Rege conjugem iſ poſſet, ſubnixus amici Hugonis gratiâ, & patruſ Cancellarij auctoritate, factorumque imprimis ſuorum gloriâ, quâ maximè Conſtantie animus

(a) *Stemma. Loth.* (b) *An. 1093.*

animus movendus videbatur. Nec prætereundi fratres Montefortij Godefredo amicissimi, qui plurimum ejus causâ possent apud sororem Bertradam, & hæc omnia apud amantem Regem. Sub hæc Godefredus redire festinat in Italiam ad Mathildem, eandem sacram expeditionem hujus maximè operâ promotorus. Interim Gibertus nullam partem quietis capiebat, sollicitus de dignitate non Cæsaris, sed suâ, ad quam stimulante ambitione referebat omnia. Eo auctore Henricus ex Italiâ Moguntiacum (a) excurrebat pro repudiatâ Praxede ducturus aliam conjugem, famâque celebritatis nuptiarum allecturus ad se procures Germanos, ut per eos repararet bellicas vires. Qui mox reversus ad Gibertum reduxit quidem novam nuptam filiam Regis Russorum (quæ Moscuz gens est) sed copias nullas ad bellum. Hâc spe deturbatus Gibertus aliò artes intendit impensius. Quem admodum ante Cæsari pollicitus erat, omnem dedit operam, ut à Mathilde abalienaret

(a) Chron. Turing.

lienaret Guelfonum animos. Atque ut Cæsari animos faceret, asseruit fortunam jam se dare, & favere consilio. Esse Canusij milites mercede conductos, quibus omnia venalia sint, etiam animus. Scire se ex proditoribus Canusinis, Guelfonem Mathildis virum plerumque, quidquid dissimulet, præferre tristitiæ notas, solum identidem agere, ac suspiria ducere. Cum Mathilde versari reverenter magis, quàm licentiâ, & familiaritate conjugali. Nempe ex quo Godefredus adsit, videri se minùs amari, quàm illum, nec æquo animo ferre; certè aliquid ei negotij minùs læti esse cum Mathilde. Nutantem minimo momento percelli posse ad defectionem. Si Cæsar Guelfoni patri spem faciat recuperandi Boici principatûs, eum cum filio à Mathilde facilè desciturum. Ita horum copijs reparatum iri vires Cæsaris, & turbatum iri res Mathildis. Dum nefaria hæc à Giberto agitantur, ignara eorum Mathildis consilia belli sacri cum Godefredo agitabat. Urbanum Pontificem Romam jam reversum statuit orare, ut

re , ut Canusium ad se , atque in Longobardiam veniret , ad ultimum incutendum Henrico Gibertóque terrorem , ne sacrum Bellum morarentur. Cùm Pontifice præsentē acturam se de eo conflando pollicita est Godefredo. Atque (a) id reverà præstitit postea. Nunc , quem ad Pontificem suo nomine orandum mitteret , neminem invenire potuit aptiorem ipso Godefredo. Auctorem habeo , (b) qui prodat Bullonium tunc adjisse , & ad sacrum bellum indicendum hortatum esse Pontificem. Sub tempus , quo Urbanus Româ retendit Pisas , venire ad eum ejusdem belli suadendi causâ tum Alexij Græcorum Augusti Legatus , tum Patriarchæ Hierosolymitani auspiciatus orator. Læto Godefredo , sciscitantique de hoc oratore imprimis , quid hominis esset , & cujus facultatis ad conficiendam rem tantam , responsum est à Pontificis ministris , senem esse , vili quidem habitu , sed longè alium pectore , atque ingenio , quàm cujus simulationem induerit,

(a) *Pigna.* (b) *Ripamont.*

duerit, virum eximiâ religione, acri insignique facundiâ, non veriùs à Patriarchâ, quàm à Deo missum; verbo, cæli legatum. Studio ejus alloquendi cùm flagraret Bullionius, invênit hominem, agnovitque non alium esse, quàm carissimum educatorem olim suum, Anachoretam Petrum, ex Oriente reducem. Ad quem ut procurrit, complexus eum Petrus lachrymas non tenuit, & aliquantò post suspiciens in cælum, grates egit rerum conditori, quòd huic Principi cæleste consilium sacræ expeditionis injecisset. Gratulanti vicissim reditum felicem Bullionio, percunctantique, quo loco res in Oriente, & apud Pontificem esset, post alia quædam ita locutus Anachoreta: Hoc vili cultu profectus in Orientem speravi me contemptu tutum fore. Et verò cùm Barbaris ubique essem despectui magis, quàm metui, inobservatus omnia potui observare. Regionum itinera, gentium mores, munimenta urbium exploravi, notitiâque collegi non pœnitendam, nec ad expeditionem tuam nulli usui futu-

ram. Illud (prò dolor) passim adverti, loca sancta impiorum jugo premi, sceleribúsque pollui, & atrocia ubique edi in Christianos exempla. Cùm Hierosolymam pervenissem, referrémq̃ Patriarchæ Simeoni, quæ videram, auctivi ex eo homine, dierum, hoc est luctuum pleno, quæ in transcurso & paucis diebus spectata mihi advenæ non toleranda visa essent, pijs incolis etiam in urbe Hierosolymâ quotidie perpetienda esse, quasi urbs quotidie caperetur. Foréque perpetuas eas ærumnas, nisi procurarem miseris opem. Ego ex animo misertus, operámque meam omnem, tuámque pollicitus, accepi à Patriarchâ litteras Urbano Pontifici reddendas, quibus tum Pontifex, tum Reges, ac Principes Europæi, túque (a) nominatim, rogamini, ut Christianæ rei, tam miserandum in modum in Palestinâ pessundatæ, subveniatis. Mihi magis extimulando cæleste visum (neque enim te celaverim) accessit. Cùm in æde Christo Resurgenti sacrâ sub precationem in-

dor-

(a) *Fulco apud Sirm.*

dormiissem, ab ipso Servatore aspectabili jussus sum in Europam reverti, & Christianis omnibus animos accendere ad Terram sanctam, sanguine Divino sacratam, à barbarorum vindicandum jugo. Inde ferentibus ventis usus, & appulsus in Apuliam, commodum Romam atque huc veni sub tempus, quo Græcus Augustus legatum ad Pontificem eâdem de re orandum miserat. Urbanus visis Patriarchæ litteris, collaudato mihi prolixè annuens potestatem fecit Christianos omnes ubique gentium ad bellum sacrum cohortandi, pollicitus se ipsum mox indicto Placentiæ, & Claromonte Concilio hortatorem ejusdem sanctissimi operis fore. Anachoretâ sub hæc tradente Hierosolymitani Patriarchæ epistolam Godefredo de nomine scriptam, (a) non tenuit hic lacrymas, superûm manifesto favore attonitus simul ac lætitiâ diffluens. Precatûsque Deum, ac Dei Matrem, ut tam feliciter cœpta evenire felicissimè juberent, dimittit belli sacri præconem. Qui inde

(a) *Fulco.*

de faustissimis excitatus auspicijs digreditur in Italiæ vicos & oppida. Circuire plebem, inferre se circulis ac templis, sermones temporis aptos ferere, quin Principum (a) omnium Occidentis singillatim aulas obire, & dicendi vehementiâ mirabiles ubique ciere motus animorum. Bullionium ad se venientem Pontifex jam famâ virtutis notum, noxarum veniâ, consilij laudatione, hortatu, ac faustâ precatione profecutus remisit ad Mathildem, mox se pollicitus secuturum. Godefredus recurrens Canusium Conradum ac Mathildem lætissimâ rerum narratione implet, & ad opem sibi ferendam, quàm maximam, poterunt, jam sponte currentes stimulat. Ipse plenus immensæ expeditionis imagine mox reditum parat in Belgicam, ut operam det copijs contrahendis. Sub discessum, in conclavi Augustæ Praxedis congressi Godefredus, Conradus, ac Mathildis, colloquium miscere teneritudine affectuum, & omnibus mutuorum studiorum argumentis spectabile.

(a) *Guib. Abb.*

stabile. Guelfo, ut plerumque alias, non adfuit. Primum Augustæ forori valedicit Bullionius, eamque Conrado, ac Mathildi, pignus amoris sui relinquit, & quantâ maximâ potest animi testificatione commendat. Deinde de Conradi Principatu, ac matrimonio actum. Ad rei Christianæ firmamentum fore dicebat Mathildis, si duceret potentis & opulenti alicujus Principis filiam. Talem videri Jolantam, egregiam virginem, natam Rogerio Siciliæ celebratissimo Principe, patruo Buamundi. Idem Godefredus suadebat. Conradus Rex modestiâ & pudicitiz studio singulari juvenis, respondit Godefredum sibi suadere, quod ipse non faciat. Se verò minùs verbis, quàm exemplo moveri. Subridens Bullionius subjecit præjisse exemplo Mathildem, cui simili de causâ Pontifex Urbanus nuptiarum cum Guelfone fuerit auctor. Possè Conradum ejusmodi matrimonio magnas opes parare ad imperij tutelam, bellique apparatus. Et tibi, inquit Conradus, quantumvis opulento, non obfuerit amplificare

ficare opes, tantam expeditionem molienti. Quin ergo animum adjicis adjungendam tibi Regiam aliquam virginem, cujus dote augearis? Quænam non amabit tantum bellatorem? Est imprimis in aulâ Francorum Regis (ut audio) Constantia jam ætate nubilis, apud quam & Hugonis amici gratiâ, & Cancellarij patruï auctoritate, & tuis meritis plurimum vales. Ad hæc Godefredus subridens Mathildem intuitus, respondit se apparatu bellico implicitum carere otio ad Regem conciliandum necessario, & debere nunc arma præhabere amoribus. Cùm non conveniret res inter eos Principes, id denique decretum, ut in bellum exitum eam de matrimonio tractationem uterque differret. Ante discessum Bullionio arcanum fuit cum Mathilde colloquium de Guelfone, quem ille perspicaci oculo deprehenderat minùs cum Mathilde convenire, & nescio quid occultum agitare in animo. Alia quoque inter eos clàm de suis ipsorum rebus tractata, quæ nonnisi pòst rescita sunt. Palàm deinde valedicens Conrado, forori,

S

ri,

ri, ac Mathildi, se ab eis magnæ Dei Matri commendari postulavit, testatus ejus auspicijs ac manifesto numine bellum se suscipere, & cælestis hujus Imperatrici ductum sequi. Mathilde pro suo in magnam Virginem studio gratulante, & optima quæque ab eâ sperare jubente, pollicentéque se vires Godefredo mox juncturam, sic erectior ille discessit. Dum repetitâ Belgicâ fatagit rerum, præco belli Anachoreta percur-sâ Italiâ transgressus Alpes in Franciam se pari ardore infert, multósque, & imprimis Hugonem permovet ad sacrum bellum cum amico Bullionio capeffendum. Inde pergit in Angliam. Eum frequentibus ubique concionibus robusto quodam ac suavi eloquentiæ genere nobilem miratæ exteræ regiones ingenti semper secuto animorum motu: sed nusquam ille aut contentione majore dixit, aut promptioribus animis auditus est, quàm in patriâ Belgicâ, ubi plurimos traxit. Bullionius incensus desiderio, Terræ Sanctæ vindicandæ, se, & fratres, & sua lætus impendit. Quò belli sum-
ptus

ptus sustineret, possessiones distrahere pretio statuit. Bullionum castrum Ober-to Leodiensium Episcopo (a) vendidit auri selebristibus, argentique purissimi mille & trecentis. Venditioni adjuncta conditio, ut Bullionum, in perpetuum Episcopi Leodiensis esset, nisi anto præstitutum tempus vel Godefredus ipse pretium repræsentaret, vel trium, quos designabat, successorum unus. Qui illi tres, infra dicetur. Balduino fratri Comitatum Virodunensem addixit. Quem lætus ille Virodunensi Episcopo vendidit, deinceps jure post veteres controversias possidendum, & acceptâ pecuniâ protectionem adornavit. Godefredum fratrem comitari statuit per Germaniam, Eustachius verò per Italiam tendere, de rebus Guelfonis & Mathildis relaturus ad fratres. His & alijs ad bellum sacrum properantibus non est prætermittendum, quod (b) vetus scriptor de cælesti Imperatrice testatur. Ista, inquit, expeditio fuit Virginis Dei parentis, quæ pugnatorez suos miran-

S 2

dum

(a) *Æg. Aurea Vall.* (b) *In Fascis. Tem.*

LABORUM HERCULIS
 dum in modum duxit ac reduxit, quem-
 admodum objectâ divinitus specie o-
 stensum est. Cæleste illud visum quod-
 nam fuerit, non proditur ab eo auctore:
 nos id infra, certè non unum eiusmodi
 proferemus,

LABORUM
 HERCULIS
 CHRISTIANI

LIBER TERTIUS.



ODEFREDUM heroëm ad
 majora rerum initia du-
 cente Virgine, commo-
 dissimè acciderat, ut per
 id tempus Alexius Græ-
 corum Augustus oratores ad opem ab
 Urbano & Mathilde adversus Turcas fla-
 gitandam mitteret. Nempe ab his bar-
 baris non jam è loco longinquo, sed
 proximo, ac velut cominus armis pete-
 batur. Impia gens non solùm Hiero-
 solymam, ac Terram sanctam, sed quid-
 quid in Asia Græcorum ditionis fuerat
 ad

ad usque Bosphorum Thracium, hoc est ad Constantinopolis usque muros, in potestatem redegerant. Hinc sollicitus Græcorum Augustus timebat, ut imploratum sæpius à Latinis auxilium nunc saltem obtineret. Quare avidè cum totâ aulâ, quid renunciaretur ex Italiâ, expectabat. Et primùm periucunda Constantinopolim ad eum allata sunt, prosperè accidisse, ut Pontifex Urbanus eodem tempore sollicitaretur ad bellum sacrum indicendum tum legatione ipsius, tum litteris Hierosolymitani Patriarchæ, tum precibus Mathildis. Urbanum ab hâc evocatum, cum eâdem Canusio tetendisse Placentiam. Ibi celebratum maximo concursu conventum, atque in eo legationem Græcam imprimis auditam, Pontificémque ad opem Græcis ferendam ita hortatum multitudinem, ut multi etiam jurejurando militiam sacram professi sint. Placentiâ digressum Urbanum in Galliam ad concilium Claromonte indictum, ibi haud impari successu remacturum. Ita ad validissimam opem Orienti ferendam.

Occidentem comparari. Nec Conradi Regis, Mathildis Reginae, aliorumque fortissimorum Principum animos, nec pecuniae vim, nec equos terrestri bello defuturos, nec navali classes, quando è ditione Mathildis, quæ Tusciæ Liguriæque domina sit, Pisani ac Genuenses multum terrâ, plurimum mari polleant. His primis nuncijs exhilaratus Alexius, secundis deinde vehementer indoluit. Rursus turbatam audiebat Italiam à Guelfone Mathildis conjuge, si conjux erat appellandus. Hunc, Mathilde palam defertâ, ad Henricum cum patre Duce & exercitu defecisse, & Giberti restituisse partes. Iam Italiam bello rursus arsuram, remoramque expeditioni in Turcas injectam. Nihilominus Novembri mense anni supra millesimum nonagesimi quinti fama repente vulgata est, copias innumerabiles toto Occidente confluere, & profectiōni in Orientem accingi. Nec longæ auxiliij moræ fuere, primum agmen ex Italiâ maximam partem Longobardi ac Ligures haud dubio missu Conradi & Mathildis Constanti-
nopolim

nopolim advenere. Lætus Alexius his jussit distrahi annonam, eo pretio, quo in urbe vendebatur. Interrogati de secuturis, narrabant se nunc paucos ex Italiâ nondum pacatâ profectos; non procul abesse aliud agmen ex Gallis & Germanis: sed nihil id esse ad innumerabilem multitudinem virorum, & mulierum armatarum, quæ divisa in majora agmina sub clarissimis ducibus terrâ marique sequeretur. Quæsit Alexius an cum cæteris belli proceribus affuturus esset Buamundus notissimæ virtutis, & militaris scientiæ dux. Cùmque respondissent non videri, testatus est id sibi valde dolere vaser Græcus, cùm maximè gauderet. Quippe qui Buamundum illum veterem hostem vel maximè timeret. Sciscitatus est deinde cuinam Principum Latinorum summa imperij ac belli tanti delata esset; sed non erat qui doceret. Singulorum majorum agminum ductores famâ noti erant. Verùm quis præflet universis, latebat. Inter hæc de incognito illo summo Duce miraquadam fama vulgavit. Insolens illud

atque inauditum percrebuit, (a) Augustum Carolum Magnum ab annis ferè trecentis vitâ functum revixisse, armatum procedere, datûmque divinitus exercitui Latino ducem in barbaros ire. Quod cum alij verum, alij vanum haberent, certè noscendi ejus, quisquis erat, vulgo cupidinem auxit. Neque id sine arcanâ viri specio emanasse eventus ostendit, ut vaticinij obscuri quiddam habuisse videatur. Imprimis Græcus Augustus perstudiosus erat sciendi, quis præesset Latinis universis, haud ignarus quantum sibi Græcôque Imperio vir tantus cum tantis copijs prodesse, quantum, si vellet, nocere posset. Ergo statuit cum cæteros agminum ductores, tum maximè belli imperatorem sibi modis omnibus devincire, atque obnoxium facere. Hinc nomina eorum sciscitari: lætari quòd inter procures venturos non nominaretur Buamundus: singulis pretiosa parare dona: summo Duci, quisquis futurus erat, ornando amplissimum quoddam excogitare dignitatis genus, in

prom-

(a) *Ursperg.*

promptu habere voluptates, quibus oblectari & capi posse videretur, circumspicere in Augustæ gynæceo, quam ei, si in rem foret, sponsam offerret. Ecce autem Calendis Augusti ad Constantinopolim adsunt Germanorum peditum quinquaginta quatuor millia. Tantum agmen ducebat Anachoreta, de quo magna in aulam Alexij fama præcesserat. Iussus exercitus castra procul à muris ponere: ductor evocatus ad Alexium cupientem alloqui hominem, atque æstimare, an famæ responderet. Anachoreta intrepidè coram Augusto stetit. Cultus corporis propior horrido, quàm nitenti munditijs. Promissam impexamque canitiem premebat galea, plumarij apicis expers. Cervicem cucullata cinxerat chlamys, quæ à collo circumfusa lorica, defluebat genuum tenus. Solitus agmini præire non pedester modò, sed & pedibus nudis; nisi cùm aliud à ductore res posceret. Habitus ac vitæ ratio severitatis antiquæ studium præferebat. Pane nonnisi rarò, carnibus nunquam vescébatur: pisce tantùm & modico

vino utens abſtinentiam habebat in delicijs. Siqua dona coactus acceperat, in militem egenum erogabat. Brevis homini ſtatura, nec venuſta facies, ſed acre & perelegans ingenium, ac moliffima eloquentiæ vis. Sermonem à Chriſti nomine auſpicatus ſalutavit Auguſtum Alexium, dixitque ſcire ſe huic facræ in barbaros expeditioni & adeſſe Deum, & procerum Latinorum non defuturam virtutem. Urbanum Romanum Pontificem magno ſucceſſu comitijs Placentiæ actis proſectum in Galliam cum Piſano Archiepiſcopo Theoberto Claromontem veniſſe. Eam urbem in Arvernſis eſſe, locum accommodum tali concilio, nempe velut in conſinio Italiæ, Hiſpaniæ, Galliæ, Germaniæque poſitum. Inde, inquit, bellicum Pontifex gentibus univerſis cecinit, quàm latè imperij Chriſtiani extenduntur fines. Longè celeberrimus conventus fuit, ad quem innumeri mortales omnis ordinis confluxere ex omnibus terris Occidentis. Præſules (a) ad
qua-

(a) *Robert. Monach.*

quadringentos adfuere. Multitudinem cum nullum ædificium capere posset, prodijt Pontifex in spatiosum sub dio locum. Ibi ex suggestu primùm recitari jussis Hierosolymitani Patriarchæ litteris, tum me, quantum potui, disertissimis verbis executo, quàm pudendam nomini Christiano calamitatem meis oculis vidissem in Palæstinâ, Urbanus subjecit pro eâ, quâ valet, dicendi vi, orationem ad incendendos animos aptissimam. Sub hanc omnibus, qui sacrum bellum susciperent bene precatus noxarum in Deum veniam plenam condonavit, dignum eâ militiâ stipendium. Eo hortatu, & sanctitate causæ permota tot auditorum millia soluta in lacrymas. Inde vocem omnes uno ore sustulisse crederes: ita pariter totâ concione conclamarum est, Deum hoc velle. Visa Pontifici vox felicitis ominis, & non sine numine edita. Qui erectis in cælum oculis, gratiisque Deo actis, silentio indicto, macti animis, inquit, viri Christiani. Quæ vox non temerè vobis exiit, esto in gerendo bello tessera, solemn-

lemnisque pugnantibus clamor, DEUS
HOC VULT. Decrevit deinde, ut, qui
sacræ expeditioni nomina darent, rub-
ram crucem gestarent humero dextro
assutam, unde fluxit in eos cruce, signa-
torum appellatio. Inclyta ibi virtus Ani-
ciensis Episcopi Ademari fuit, qui pri-
mus spectantibus universis ad pedes Ur-
bani advolvitur, rogátque, ut sibi cru-
cem, atque arma induere pro religione
liceat. Imitati mox incredibili ardore
alii plurimi idem efflagitare. Ponti-
fex amplissimis verbis collaudatos voti
compotes fecit. Percontanti deinde
Alexio de summo belli illius Duce, at-
que de origine famæ illius, quâ fereba-
tur Carolus Magnus Imperator redivi-
vus præire copijs Occidentis, in hunc
maximè modum, respondit Anachore-
ta: certè quidem, Auguste, inquit, ve-
rum est illud, inter tot Occidentis pro-
ceres affuturum Carolum Magnum al-
terum, juvenem stirpis regiæ, ex utro-
que parente nobilissimum Caroli Magni
sanguinem. Atque is vulgari opinione
mortuus, & subdito insperatóque prodigio

gio velut ab inferis revocatus ad vitam tantus advenit, ut in eo videatur spirare redivivus magnus ille progenitor. Adhæc Caroli Magni vestigijs ipsis insistens, cum alij procerum aliam, ipse viam capessit expeditioni Hierosolymitanæ olim à Carolo Magno designatam. Profectus enim ex Galliâ Belgicâ ipse Belga, quemadmodum Carolus, per Austriam atque Hungariam, cum ingentibus copijs movet Constantinopolim. Cujus ego quondam moderâtor pueri, nunc præstantissimi ducis miles, atque antesignanus adsum. Tantæ indolis juvenem, Auguste, facilius, opinor, ex magnitudine rerum gestarum, quàm ex nomine agnoveris. Ille inclytus quondam Henrici Cæsaris Aquilifer. Interpellans Alexius, quid? inquit: illéne eques invictus, qui Rudolphum Regem aquilæ hastili confecit? ille urbis Romæ expugnator, qui veneno istîc sublatuſ ferebatur? Affirmavit Anachoreta Petrus illum ipsum esse Godefredum Bullionium, tunc Marchionem Antuerpiæ, nunc Lothariæ Præregem,

ſeu

seu Ducem. Ejus deinde moribundi vortum mirabile, & sacrae expeditionis originem retulit. Tum sociorum primores recensuit, atque in his plures Regum fratres, Regiasque Heroïdes. De belli imperatore quid responderit, antequam dicam, pauca mihi sunt in eam rem exponenda. (a) Altero Concilij Claramontani die deliberavi Pontifex, quem cum summo imperio multitudini sacrorum militum præficeret. Nondum ullus majorum Principum aderat, ut testis oculatus scribit Robertus Monachus. Cæterum Urbano noti illi erant, imprimis celebratissimus bello Dux Godfredus. (b) Auctorem quidem habeo, qui scribat, Pontificem hortatum circumfusus, ut belli sacri imperium deferrent illi virtute & scientiâ militari laudatissimo duci; eumque ibi electum, & habitum deinde imperatorem. Assentiuntur scriptores recentiores plerique. Verum alij negant id niti ullo veterum testimonio: ex quibus colligere se aiunt nullum fuisse sacri belli imperato-

(a) *Rob. Mon.* (b) *Vuasseb.*

ratorem, sed singulorum agminum du-
ctores. Certè quidem (a) Viterbiensis
scribit Urbanum Claromonte collectis
centum millibus armatorum præfecisse
Ducem Lothariæ Godefredum Bullio-
nium, Comitem Sancti Ægidij Raymun-
dum, Robertum Comitem Flandriæ, &
Hugonem Philippi Francorum Regis
fratrem; omnium autem curam Epi-
scopo Aniciensi Ademaro commisisse.
Atque hunc antistitem exercitui toti præ-
fuisse in rebus sacris constat; verum,
quis in militaribus præfuerit, celebri
controversia est, alijs docentibus Gode-
fredum toto expeditionis tempore du-
xisse, alijs nullum. Utroque auctores
trahunt. Verum censuerim mediam
inter eas duas ineundam opinionem,
cujus explicatio probatioque tempori
reservetur. Cæterum respondit Ana-
choreta Petrus Alexio, nondum toti
exercitui præesse quemquam. Ipsimet
Alexio summum belli imperium dela-
tum iri, si ducere in Barbaros non gra-
vetur. Addidit, soluto concilio Claro-
montano

(a) *Godef. Viterb.*

millibus præeuntem. Finem fecit dicendi Petrus, antequam Augustus Græcus faceret attendendi. Proregis Lothariæ præclaram indolem dotésque miratus est, sed potentiam non minus veritus tanti viri, taliúmque sociorum. Illud ei maximè placuit, neque ab Anachoreta nominatum inter venturos proceres Buamundum, nomen longè supra alia omnia celebre in Græciâ, & formidatum. (a) Anachoretam benignè habitum, & donis ornatum remisit ad castra. Postquam ibi quiete corpora recreata, jussit Petrum cum Germanis suis & Italis deportari trans Bosphorum in vicinum Bithiniæ littus; monitum ut ad portum Citivensem metarentur castra, nec ultrà progredierentur ante adventum reliquorum agminum, ne in Turcas inciderent. Legatos deinde misit cum magnis donis ad Proregem Godefredum, qui prætergressus Hungariam, saltus Bulgarie subjerat. Cæterum Alexius in tantâ spe auxilij timebat auxilium ipsum. Hinc & Anachoretam cum milite

(a) *Scriptores belli Sacri.*

lite amoverat ab urbe transfretum, & negotium dederat præfectis copiarum suarum, ut militem sub signis haberent, atque in urbe principe, ac finibus imperij excubarent. Adjecitque alia occulta monita, ne quid detrimenti res publica caperet. Haud multò post Constantinopolim totam murmur primùm implevit, deinde concursatio ex studio spectandæ novæ rei, & id temporis neutiquam expectatæ. Captivi adducebantur iuvenes exteri, armorum splendore, & specie corporum insignes, nec relinquebant dubium, quin generis & gradus essent non vulgaris. Ubique plateas, quæ transibant, ædium fores, & fenestras occuparat populus; ex palatio quoque Cæsareo tum alij prospectabant, tum ipsæ feminæ principes Augusti conjux Irene, filia Anna Comnena, nurus Pyrisca Hungara. Aderat item Normannici generis Helena nuper Cæsarcis nuptijs destinata, dein vario fortunæ ludo jactata. Quæ intenta in captivos non solum admirationis signa, ut aliarum, sed & magnæ commiserationis edebat.

Ora

Ora singulorum inspicere attentius, non sine lachrymis contemplari, & aliquem in ijs vel noscitare vel quærere. Erat hæc soror clari illius bellatoris Buamundi, & in captivis fratrem, quem requirebat oculis, timebat invenire. Procedebant juvenes vultu habituque spectabiles. Galeis, loricis, & reliquis armis instructi erant, nisi quòd erepta eis tela gestabant circumfusi satellites. Præibat captivis, qui inter eos eminebat, juvenis claritate natalium, & eximiâ corporis magnitudine adeptus Magni cognomen, Cassidem auratam & humeros inumbrabat eleganter plumarius apex: scutum præferebatur auro cyanoque tessellatum, (a) vetus Principum Viromanduorum insigne. Armatus reliquus item auro splendebat, nisi quâ obsecurabatur superiectis vinculis. Stipabat latus adolescens, corpore, ut ætate inferior Magno, sed non dissimilis aut venustate oris aut magnificentiâ cultûs. Ibant omnes intrepidi, & in vinculis velut liberi. Diceres non adduci, sed ad-

T 2 ducere :

(a) *Dipl. apud Carpent.*

ducere captivos; nisi vultus indignationem animi proderet. Perducti in aulam Cæsaream venêre in conspectum Alexij, cui adstabant hinc filius Calo-Ioannes, inde gener Cæsar Briennius, quorum hic Annam Comnenam ille, Mathilde Proreginâ non obtentâ, Pyriscam Hungariæ Regis filiam duxerat. Magnus, simul dignitate corporis, simul sermonis constantiâ regium, quo natus erat, genus præ se tulit. Nudâ rei gestæ narratione se sociosque purgabat. Erat is Godefredi Proregis familiaris intimus Hugo Magnus, Regis Francorum Philippi frater, Viromanduorum & Valsiorum Comes. Qui in primis sacrum bellum professis ingressus iter, superatis Alpibus transcurrerat Italiam. Ei se in Apuliâ comitem junxerat adolescens ille, quem dixi, egregius, Odonis Boni Marchionis Itali filius, Guilielmus nomine, Buamundi bellatoris sorore natus. Cum hoc adolescente & exiguo comitatu Hugo mare transmiserat. Dyrrhachium appulsus inter lætos clamores ad intolens spectaculum exciverat oppidanos.

nos. Nautæ vectoribus suis & Dyrrhachiensibus blandientes, operamque suam commendantes, magnis identidem vocibus ingeminabant advectos à se Græciz vindices; idque ita esse persuaserant. Eaurbs nuper capta à Normannis, tunc in jus potestatemque redierat Augusti Græci. Exscensionem fecerat Hugo substiturus tantisper Dyrrhachij, præstolaturusque sequentes copias, nihil hostile aut sinistrum ratus verendum à Græcis, qui & Christianam profitebantur religionem, & Latinos ad ferendam sibi opem evocarant. Urbis præfectus homo Græcus, præmonitus à navarcho de vectoribus exteris, mox decurrit ad portum cum præsidiarijs, populumque submovit in mediam cohortem excepturus hospites. Ad quem eleganti vestigio progressus Hugo cum socijs, quanto studio ducar, inquit, navandæ Augusto vestro militaris operæ, argumento erit hæc festinatio mea, qui ad navigandum nec clementiorem anni tempestatem, nec alios expeditionis socios expectaverim, nequis mihi antejret vel testificatione a-

ducere captivos; nisi vultus indignationem animi proderet. Perducti in aulam Cæsaream venêre in conspectum Alexij, cui adstabant hinc filius Calo-Ioannes, inde gener Cæsar Briennius, quorum hic Annam Comnenam ille, Mathilde Proreginâ non obtentâ, Pyriscam Hungariæ Regis filiam duxerat. Magnus, simul dignitate corporis, simul sermonis constantiâ regium, quo natus erat, genus præ se tulit. Nudâ rei gestæ narratione se sociosque purgabat. Erat is Godefredi Proregis familiaris intimus Hugo Magnus, Regis Francorum Philippi frater, Viromanduorum & Valsiorum Comes. Qui in primis sacrum bellum professis ingressus iter, superatis Alpibus transcurrerat Italiam. Ei se in Apuliâ comitem junxerat adolescens ille, quem dixi, egregius, Odonis Boni Marchionis Itali filius, Guilielmus nomine, Buamundi bellatoris sorore natus. Cum hoc adolescente & exiguo comitatu Hugo mare transmiserat. Dyrrhachium appulsus inter lætos clamores ad intolens spectaculum exciverat oppidanos.

nos. Nautæ vectoribus suis & Dyrrhachienſibus blandientes, operamque ſuam commendantes, magnis identidem vocibus ingeminabant adveſtos à ſe Græciæ vindices; idque ita eſſe perſuaſerant. Ea urbs nuper capta à Normannis, tunc in jus poteſtatēque redierat Auguſti Græci. Exſcenſionem fecerat Hugo ſubſtiturus tantisper Dyrrhachij, præſtolaturuſque ſequentes copias, nihil hoſtile aut ſiniſtrum ratus verendum à Græcis, qui & Chriſtianam profitebantur religionem, & Latinos ad ferendam ſibi opem evocarant. Urbis præfectus homo Græcus, præmonitus à navarcho de vectoribus exteris, mox decurrit ad portum cum præſidiarijs, populūque ſubmovit in mediam cohortem excepturus hoſpites. Ad quem eleganti veſtigio progreſſus Hugo cum ſocijs, quanto ſtudio ducar, inquit, navandæ Auguſto veſtro militaris operæ, argumento erit hæc feſtinatio mea, qui ad navigandum nec clementiorem anni tempeſtatem, nec alios expeditionis ſocios expectaverim, nequid mihi antejret vel teſtificatione a-

nimi, vel belli auspicio. Cui præfectus renidens, non commissurum se respondit, ut tantæ indolis specimen Augustum diu lateret. Præmissurum se Constantinopolim nuncium, curaturumque ut secuturis ipsis periti viæ duces, fidique corporum custodes ne decessent. Quibus auditis Magnus suo & comitum nomine grates agere, populus hilariùs circumstrepere, exultare nautæ, cumulùmque sperare mercedis. At Græci præfidiarij mutavere subitò rerum faciem. Simul ac vafer præfectus signum, quod convenerat, dedit, infesti telis propiùs circumfunduntur hospitibus: quos præfectus jam vultuosus cùm jussisset arma ponere, Hugo stupore & indignatione flagrans, quid inquit, arma ponemus allata Augusti vestri auxilio? immò stringemus in ejus perfidos cives. Simul manum capulo admoveat socijs exemplum imitatis. Micante gladio & edito clamore terribilis ferocissimum Græcorum à fronte invadentem immedicabili vulnere prostraverat, nisi alius à tergo involans correptum furentis gladium

dium tenuisset. Pariter tota cohors undique affusa Magnum ac socios obruit numero. Comprehensis pars arma intentare ; pars vincula, quæ condita sub veste attulerant, frustra reluctantibus injicere ; denique omnibustela jam inutilia extorquere. Vulgus subitâ rerum conversione attonitum obmutuerat. Trepidî nautæ fugâ lembum repetiere, veriti, ne pro sperato mercedis cumulo multarentur pœnis, qui pro Græciæ auxiliatoribus hostes advexisse se jam crederent. At Magnus conscius sibi sinceræ fidei, atque interritus præfectum interrogavit, quæ signa hostilis animi notasset in ijs, quos tractaret pro hostibus? An se Francorum Regis fratrem, ac socios proceres nosset? Novi, inquit præfectus, quem alloquar Principem, nec non quâ de causâ cum socijs adsit. At novi itidem officium meum, quo benè, an secùs fungar, Augusti Alexij judicium esto. Responsi perplexitas auxerat juvenum & stuporem & iram. Provocavit ad Alexium Magnus, seque confestim Constantinopolim cum socijs mitti postulavit.

vit. Nec diu moratus præfectus misit, sed vinctos omnes, cinctosque catervâ satellitum. Hos intuens Guilielmus cum acerbo risu dixit esse, quos modò perfidus Græcus promiserat, fidos viæ duces, corporumque custodes. De his omnibus iniurijs Hugo rerulit Alexio, & viriliter questus est. Alexius Principem blandè solatus, culpam, quæcumque erat, coniecit in præfectum inurbanum, Cùmque Hugonem bono animo esse, & optima quæque à se sperare jussisset, tamen detineri cum socijs in speciosâ custodiâ jussit, mente occultatâ atque ambiguâ. Erat Alexius vafri & versatilis in omnem partem ingenij, solitus temporibus & cuivis occasione scenæque servire. In eo politicæ disciplinæ summam ponebat, ut consilia modis omnibus occultaret. Hinc quasi se ipse suis artibus involutum expedire non posset, cunctator, ne falleretur, etiam quod valde volebat, agitabat tam circumspectè, ut existimaretur nolle. Optabat omnino sibi opem in Turcas à Latinis ferri, sed nullo suo periculo, minimoque incommodo. Sancti, honestique

nestique non tanta cura , quantum studium imperij utilitatibus consulendi. Palàm humanitatem profitebatur verbis , an tamen rem ex ejus normâ , an secus gereret, nihil admodum pensi habebat, dum imperio caveret, quod astu atque armis usurparat. Hugonem Magnum vinciendi attinendique hæc ex abdito causa fuerat. Cognoverat cum in Apuliâ familiariter versatum cum hoste Græciæ Buamundo, atque etiam fovendæ invicem necessitudinis ergo in comitatu Hugonis, adesse sororis Buamundi filium Guilielmum. Quin Buamundum ipsum , qui antè negabatur venturus , nunc accingere se itineri in Græciam , præ Turcis ipsis formidandum. Hinc magnis anxius curis excepit quidem cum blanditijs Hugonem , atque etiam Guilielmum , at prospiciendum sibi eorum captivitate censuit, donec Godefredus Prorex aliique Latini proceres adessent , ut si pro amicis hi se gererent, clientelamque sibi, & opem adversus hostes quoscumque jurarent, Hugonem eorum gratiâ solvisse videre.

tur ; sin minùs, in perpetuo carcere teneret. Nocte inter ejusmodi cogitationes magnam partem vigilantâ manè induebatur, cùm ingressâ est cubiculum virgo formâ insigni, vultu inter letum & tristem medio. Captiva erat Helena Buamundi soror, sed quæ cum quâdam libertatis specie habebatur. Id (a) ei muneris erat impositum, ut matutinis horis adesset, Augustique manibus aquam affunderet, & barbam pectine comeret. Virginis conspectu & alloquio delectabatur Alexius, ut erat deliciarum studiosior. Quam ubi venientem vidit, exporrecto ipse vultu, non dubito, inquit, quin gaudeas unâ mecum de adventante Occidentis exercitu. In hoc videbis populares tuos ac propinquos. Jam sororis tuæ filius adest Guilielmus cum Hugone Franco, adventâtque Belga Dux Godefredus. Quanta nomina! An aderit quoque ille summus bello frater tuus Buamundus? Cùm ea se nescire respondisset, omnino aderit, excepit Alexius. Id mihi juxtâ tecum latandum

(a) *Order.*

dum est, cùm eo nullus sit famâ fortitudinis clarior, aut opportunior Turcis profligandis. Videbis & alios qui placeant, nec deerit in his fortè aliquis, quem conciliante me sponsum accipias. Godefredum imprimis extolli laudibus audio, perinde ut fratrem tuum. Ibis nunc ad hospites, & Hugonem Magnum ac Guilielmum à me salutabis. Non injucunda Helenæ fuit oratio de adventantibus proceribus, nec de sponso, quæ meminerat Godefredi aliquando sibi in maritum destinati. Eas quoque nuptias probaturus erat Alexius, si modò sibi per eas conciliare Godefredum posset & Buamundum. Interim timorem suum, & detenti Hugonis culpam benevolentix simulationibus pergebat occulere. Non latuit facinus infidi Græci Proregem Godefredum, qui Philippopolim pervenerat. Ab eo mox oratores Constantinopolim missi. Primum gratias Proregis verbis egere Augusto de missis ad ipsum egregijs donis. Deinde questi Hugonem Regij generis juvenem, & Proregis amicum singularem,

rem , vinctum à Dirrhachienſi præfecto ,
nunc ab Alexio ipſo captivum teneri ,
tanquam homicidij , aut latrocinij reum .
Ad extremum orarunt ut eum ſocios-
que libertati reſtitueret , alioquin ami-
citiam cum Græcis non poſſe ſervari .
Hugonem , ſi jure fœderis recipi non
poſſet , armis repetitum iri . Ad quæ
Alexius cùm multa blandè , ſed perple-
xè pollicitus eſſet , nec tamen dimiſſiſſet
captivos , Godefredus juſtâ irâ motus ,
bellum , inquit , Alexius , quando pacem
pati non poteſt , inveniet ; nec impunè
injuriâ nomini Latino , & amico Prin-
cipi fecerit . Mox agrum circâ evaſtan-
dum militi permittit , magniſque itine-
ribus infeſtus cum copijs Conſtantino-
polim contendit . Nec diu hi motus
ignorati Buamundo . Qui ubi compe-
rit Hugonis captivitatem , & Godefredi
feſtinationem ad eum liberandum , utra-
que res ei doluit . Non quin maximè
cuperet confetiſſim liberari Hugonem ,
ſed optaſſet id per ſeipſum fieri , mini-
mè autem per Belgam Proregem , cui
ſe ferebat rivalem gloriæ & amorum .

Locus

Locus admonuit, ut Buamundi genus, & indolem memorabilem exponam, causâsque certaminum, quæ ei cum Alexio primum fuere, deinde cum Godefredo. (a)

Marcus Buamundus in Normannis loco nobili, sed fortunâ humili natus, excelsis planè spiritibus sortem natalium vicit. Patrem habuit & eundem ad magna ducem Robertum Guiscardum, ab re familiari minimè instructum, nempe (b) secundarium in Normanniâ clientem, sed vasti animi virum. Normannorum nomen jam dudum Europæ cladibus nobile tantò nobilius per id tempus à Guiscardo, filiôque Buamundo redditum est. Ea gens in plagis Septentrionalibus (quod nomen ipsum declarat) origines habuit. Inde profecta Rhollone duce varijs tentatis littoribus, demum in Neustriâ littorali Galliæ regione constitit, quam de suo nomine Normanniam dixit. In hâc (c) oppidum Constantia Castra quondam appellatum, in cujus agro municipium Altavillam

(a) PRIMORDIA *Buamundi & constantiæ.*

(b) *Frising.* (c) *Gauf. Malater.*

villam tenuit Tancredus duodecim filiorum parens. Quorum unus Robertus Guiscardus reliquos, tametsi bellis Italicis claros, rerum gestarum famâ longè superavit. Is molestè ferens rem domi angustam, & nihil admodum expectans ex hereditate dividendâ in capita duodecim, majus quoddam ausus est atque aggressus, quàm majores ac Normanni omnes præstitissent. Natali solo, incertum an pulsus, an grassante fame exactus, in exterarum regiones evagatur, unde Guiscardus cognomen dictus, quod erronem, aut (ut alij volunt) callidum sonat. Socij omnino undecim, quorum princeps filius Buamundus. Post paulò secutus Rogerius Guiscardi junior frater, & ipse audaciâ, consilio, manûque promptus. At Buamundus, licet pueritiâ vix dum egressus, longè supra ætatem & fortunam animum gessit, gloriæ & potentiæ cupiditate, nec patri, nec patruo Rogerio, hoc est nulli secundus, calliditate autem faciliè præcessurus omnes mortales. Stimulos subdidit ipsa Buamundi appellatio

tio

tio. (a) Marcus, dum baptismo initiaretur, dictus fuerat : verum pater, forte auditâ super mensam heroicâ fabulâ de gigante Buamundo, idem puero nomen imposuit, ut ad heroica, & maxima quæque accenderet. Quibus patrandis dum Buamundus inclarescit, id nominis ante in Occidente incognitum alijs quoque indi, & toto orbe celebrari cœpit. Normanniâ egressi pedites, mox sibi equos, & pecuniam, & magnas opes comparavere. In Italiâ ultimâ consedere, naçti occasionem turbidarum tractu rerum. Indigenarum procerum dissidia suam occasionem rati, alijs contra alios juvandis promovere ipsi rem suam. Prædones undique contrahere, horum, & popularium suorum agmen ducere, agros & castella crebris fatigare excursionibus, virtute doloque vincere. Inde auctis viribus urbes opulentas obsidere, atque ad deditionem compellere. Campaniam, Apuliam, Calabriam cum victorijs prædationibusque lustrassent, progressi in Siciliam, inde

(a) *Order.*

inde Saracenos domitos expulere. Haud alijs magis obsecundavit fortuna, quæ non pugnantes modò, sed & cessantes ditavit. Mirificus casus intervenit, felicitatis juxtà testis & sponsor. In Apuliæ agro (a) statua erat marmorea, cujus caput cingebat circulus æreus his verbis circumscriptus, CALENDIS MAII HABEBO CAPUT AUREUM. Erat Guiscardo inter captivos Saracenus solertis ingenij, & magicæ artis peritus. Intelligere se arbitratus homo quid arcanum programma significaret, lætus, & in spem libertatis adductus, calendis Maij sole oriente ac statuam collustrante, terminum umbræ notat. Inde obtentâ à Guiscardo potestate illic fodiendi, immensum reperit thesaurum, quem pretium libertatis pependit. Sed auspicato illo circulo adumbrari, & portendi visa est Normannis fors amplior, quæ auro non solùm impleret manus, sed & cingeret caput, thesaurisque coronas adjiceret. Jam Guiscardus Dux Calabriae & Apuliæ renuntiatus, secundâ uxore ductâ

Si-

(a) *Mart. Poton. Pandulph.*

Sichelquadrâ Salernitani Principis Guaimarij filiâ , potiebatur etiam Salerni Principatu ; Siciliâ , quam communibus armis subegerant , Rogerio fratri reli-
ctâ. At Buamundus filius ex Alberadâ Normannâ natus , altiùs spes & conjugij & dominationis extulerat. Ardebat gloriæ potentiâque avaritiâ incredibili , & tanquam patri & patruo vel cessisse , vel parem esse dignitate probum duceret , admiranda atque immoderata prensabat. Circumspiciens , quam peteret conjugem formâ , genere , & opibus florentem , non inferiorem Cæsareâ aut Regiâ virgine destinavit animo. Hæsit primùm in eâ , quâ nulla tunc clarior erat , Proreginâ Mathilde. Ea se non solum eminus præclarorum operum famâ mirandam Buamundo præbuerat , sed & coràm eximiâ indole , formâque spectandam. Cùm Capua Romani juris urbs Normannicis armis occupata esset , adfuit contrâ validus ab Româ exercitus (a) duce Mathilde. Quam Capuæ expectare non ausus victor Richardus,

V

dus,

(a) *Ostien. Pandulph.*

duſ, ad tutiora ſe non procul Aquino recepit. Eò ſecura eſt Mathildis. Richardo venire auxilio gentiles Guiſcardus & Buamundus. Pugnatum non ſemel, nec non fortiter ab Amazone, viſumque eſt Normannis cum eâ de pace conſultandum. In colloquio ſpectata atque audita virgo miraculo fuit, tanquam virilis animus in corpore non ſuo habitans cerneretur. Concluſa pax, ſed quâ ſe excluſum ſenſit Buamundus hauſto Mathildis amore inquietus, ac ſecum ipſe pugnans. Per exigua fuit juveni ſpes obtinendæ virginis, cùm Gibbero Proregi jam deſponſam audiit: nulla deinde, cùm ei nuptam: at Gibbero paulò poſt mortuo ſpes revixit. Proregi nam ut ſibi rerum geſtarum magnitudine, & partâ opulentiâ demereretur, nihil inferius Conſtantinopolitano imperio ambire, atque agitare animo cœpit. Hæc, quam ſubijciam, vaſti illius conſilij fuit occaſio. Fama Guiſcardi & Normanni nominis non ſine creſcentis potentix metu pervaſerat Conſtantinopolim. Græcis tunc Auguſtus erat Michael Du-

el Ducas, litterarum amantior, quàm
 armorum. Is cum Guiscardo non solum
 fœdere jungi expetijt, sed etiam filio suo
 Constantino puero desponderi Guiscar-
 di filiam. Migrat Constantinopolim
 puella, Helenæque nomen accipit. At
 novam sponsam hîc excepit subita, nec
 una rerum conversio. Ducam imperio
 exuit Nicephorus Bottoniates, includit-
 que cœnobio. Helena custodiæ tradi-
 ta, sponsaliæque ejus cum Cæsareo pue-
 ro dissoluta. Pater Guiscardus missio ad
 Nicephorum oratore conqueritur de u-
 trâque irrogatâ filiaë injuriâ: Alexium
 verò (a) tunc privatum prætorémque
 Cæsarei exercitûs conciliare sibi missis
 muneribus conatur, atque allicere ad ar-
 ma unâ secum inferenda Nicephoro.
 Verùm Alexius domo Comnenus, vir
 genere, vafricie, manu, & copijs potens,
 rerûmque antè bello gestarum successu
 ferox, sibi ipsi studuit, & Nicephoro
 capto usurpavit Imperium. Consci-
 us tamen malè quærendi principatûs exem-
 plum à se contra seipsum capi posse, ut

V 2 homi.

(a) *Anna Comnen.*

hominum animos adjungeret sibi, lenitatem, clementiamque præ se tulit. Helenam eduxit custodiâ, specieque liberatis donavit, retentam tamen in Augustæ gynæceo. Inter hæc venit in Italiam ad Guiscardum senex ignotâ facie. Asseverat (a) se Michaëlem Ducem Græciæ Augustum esse, cœnobio, quo inclusus fuerat, elapsus: Guiscardi & Buamundi opem implorat in tyrannum Alexium, à quo sit solio pulsus hoc solo crimine objecto, quòd filiam Normanni nuptui accepisset filio suo, parituram ex genere externo dominaturos Græcis. Increvit utrique Normanno animus datâ occasione aggrediendi majora, injectaque spes est imperij, quod alij per ignaviam amiserant, sibi per industriam ac virtutem parandi. Instructâ classe in Græciam trajciunt, & Dyrrhachium maritimam & munitissimam urbem obsident. Ibi bellum auspicator Buamundus insigni virtutis opere. Fortè (b) cum quinquaginta militibus pabulatum jerat. Occurrit quingentis Græcis armatis, qui
 præ-

(a) *Gaufr. Malat.* (b) *Order.*

præibant exercitui Alexij ad Dyrrachien-
 ensium opeⁿ adventantis. Simul in-
 vicem aspexere , arma corripunt. Bu-
 mundi, tantò licet imparis numero, non
 sustinere impetum Græci , tergaque
 vertentes multas amisere manubias.
 Quarum caput crux ærea fuit, (a) quam
 olim Constantinus Imperator contra Ma-
 xentium pugnaturus, ad exemplum visi
 in cœlo signi fabricandam curarat. Id
 victoriarum omen tantâ filij virtute par-
 tum, Guiscardo quàm lætum fuit, tam
 triste Græcis, qui crucem amissam quan-
 tavis redimere, sed frustrâ, laborarunt.
 Inde feroces auspicijs Normanni con-
 gressum acie Alexium fundunt fugant-
 que. Potitus castris Guiscardus, vir
 tum factis magnificus, tum factorum o-
 stentator non minor, victi Alexij taber-
 naculum cum filio subit omni opulentiâ
 luxûque instructum. Ibi Cæsaris victo-
 res Cæsareis propemodum honoribus
 coluntur. Tunc, (b) & sæpe aliàs, pa-
 ter Buamundo Græciæ imperium, quod
 mox subacturi essent, concessurum pol-

V 3 licetur,

(a) *Idem Order.* (b) *Gausf. Mal. Ptol. Luc.*

liceretur, sibi verò Persidis regnum destinatur. Avaritia gloriæ, & insatiabilis cupiditas famæ, nihil invium, nihil remotum videri sinebat. Cæterum impelli se religionis studio ad occupandam Persidem addebat, ut Turcis inde expulsis aperiret viam Hierosolymæ liberandæ. Sed alibi nobili illâ voluntate usum est Numen. Incidit (a) occasio facinoris longè precedentibus clarioris, & ab ipsis barbaris prædicati. Cùm Dyrrhachium, urbem tanti momenti ad reliquum bellum, ita premeret, ut nullis Græciæ viribus liberari posset, repentinis legationibus in Italiam revocatur. Tempore magis alieno non poterat. Nunciabatur obsideri Romæ Gregorium Pontificem à Cæsare Henrico. Quorum uterque missis oratoribus Guiscardum sollicitabat, & ad partes suas conabatur alligere. Henricus Normannum invitabat ad feriendum secum fœdus oblatâ affinitate Cæsareâ, petebatque ut alteram filiarum collocaret filio suo heredique Conrado, alteram Aquilifero Belgæ Godfre-

(a) *Suger.*

defredo, juveni laudum omni genere cumulado: offerebat quoque amplam in Italiâ futuro focero Marchionis ditio- nem. Contrà Pontifex Guiscardo ob oculos ponebat Christiani Principis of- ficium, nomen, quod nuper professus esset, Clientis Ecclesiæ; decus ob ejus tutelam obventurum; notam denique incurrendam, si Mathildi propugnanti Ecclesiam jungi & participes gloriæ vir tantus esse abnueret. Hæserunt Norman- ni duo Principes ambigui, non utri parti faverent (protinus enim studuere Ponti- fici) sed an interim expugnationem Dyrrhachij, quæ nullam habebat dubi- tationem; simulque bellum Græcum, tantum illud, tantique sumptûs & spei, damno irreparabili omitterent, ut Eccle- siæ succurrerent. Ad extremum decre- vere rem maximè arduam, simul Romæ pro Pontifice arma capere, simul Dyrr- hachij obsidionem non solvere, hoc est eodem tempore adversus duos Cæsares, Latinum, & Græcum gerere bellum. Agitatum deinde uter, pater, an filius duceret in Henricum. Peroptabat Bua-

mundus eam provinciam vel ideo, ut præsentiori operâ Mathildem demeretur, & in oculis ejus vires componeret cum hoste Godefredo, celebrato illo famâ virtutis Aquilifero. Verùm obstitit votis noverca Sichelguada, vafra, ferox, & militaris ingenij femina, quæ virum bello comitabatur. De cujus artibus clandestinisque cum Alexio consilijs pòst videbitur. Susceperat ex hâc Guiscardus filium Rogerium, cognominarâque Crumenam, quòd delectari nummulis puerum adverterat. Suasit viro noverca, ut cum Rogerio filio Romam peteret ipse, relicto in castris ad Dyrrhachium Buamundo. Nempe siquid Romæ decoris aut commodi sperabatur, id cupiebat Sichelguada obvenire filio; privigno autem, quidquid timendum erat ad Dyrrhachium à Græcis, absente Guiscardo. Qui commissâ fortissimo juveni obsidionis Græcique belli curâ, mare remensus cum uxore & Rogerio movit in Henricum. Senex magnanimus prætermittere noluit occasionem in duos Augustos, Latinum, & Græcum, eodem tem-

tempore bellandi, ab ejus maximè facti insolentiâ appellandus in epitaphio Terror orbis. Ibat Romam lætus obtigisse parem animo suo hostem Aquiliferum Godefredum. Properabat experimentum sumere, annis, de quo tam præclara prædicabantur, Marchio Belga, famæ similis esset, & se socero dignus aliquando futurus gener. Cùm appropinquaret Romæ, expectabat ut Aquilifer specimine aliquo bellicam vel scientiam, vel virtutem probaret venienti. Verùm præmissis exploratoribus rescijt Normanus Henricum Cæsarem cognito adventu suo, omisâ castri Romani obsidione subito recessisse. Gavissus quidem Guiscardus, & gloriatus à se Latinum Cæsarem aversum in fugam. Miratus est tamen undenam tam parum animi fuisset inclyto ejus Aquilifero, ut & ipse fugeret hoste nondum viso. At cognovit deinde juvenem, sine quo Henricus nihil rei magnæ gerere poterat, periculosè tunc ex veneno hausto laborare. Ipse junctus auxilijs Mathildanis progreditur Romam. Ibi Romanorum quidam Giber.

bertinarum partium obsidione Gregorium in arce clausum premebant. Portâ perruptâ Guiscardus intrat, Pontificémque liberat. At Gibertini resumptis animis subito liberatorem invadunt, Crumenâ filio, quòd nihil jam metuendum putarat, rus cum equitibus digresso. Audito patris periculo, revolat magnanimus adolescens, & patri fortiter arma jungit. Sed nullo virtutis opere fatis expediebant sese, donec Guiscardus ferro ignem junxit, injecto vicinis rectis incendio, quo fugati hostes, & urbis magna pars hausta est. Pontifex magnis honoribus à Guiscardo cultus, & nequid Romæ in posterum pateretur, ductus Salernum, ubi pòst paulò Buamundum Græcorum victorem, sed moribundum vidit. Perquam variâ fortunâ usus erat Buamundus à discessu patris. Primùm minimè jucundum juveni acciderat, quòd ad Dyrrhachium relictus navare operam Romæ Pontifici Mathildique coràm non posset. Mox cum Græcus Augustus, ubi relictum in castris cum paucis cognovit, fidu.

fiduciâ victoriæ improvisò aggressus est. Buamundus dum inter primos fortissimè dimicat, grave vulnus accepit. Milites & ducis vulnere, & hostium multitudine territi, fugam spectabant. Ille in re trepidâ imperterritus, invocato Numine vultum exporrigit, inclamatque militibus, macti animis essent, vocem à se divinitus auditam, quâ & fortiter pugnare, & bene sperare juberentur. Ita sive cælesti hortatu, sive astu ducis confirmati fudere Alexium. Interim Guiscardus & ipse victor cum Rogerio filio & uxore Sichelguadâ repe-tebat classem Dyrrhachium. Veneti (a) Dominico Sylvio Duce, multis navibus advecti obstare conantur. At Guiscardus partim suâ virtute, partim filij Buamundi, qui instructâ acie patri pugnantem ad littus assiste-bat, superior fuit. Magnam cepit animo voluptatem, cum intellexit Buamundum rursus collatis cum Alexio signis vicisse : sed magnopere doluit vulneratum esse. Contrà novercæ attulit Buamundi glôria dolorem, vul-

(a) *Pandulph.*

vulnus lætitiā , licet vultu alia omnia simularet. Pater mox juvenem Salernum misit , peritissimorum medicorum operā curandum ; Pontificis quoque Gregorij , qui istūc substiterat , pijs solatijs recreandum. Ipse Dyrrhachium oppugnare pergit. Cumque (a) oppidani fiduciā murorum jactarent urbem suam Durassum vulgò vocari , quòd contra obsidiones omnes invicta duraret , & ego , inquit Guiscardus , Durandus vocor , & tamdiu in hac obsidione durabo , quoad urbi nomen ademerò. Normanni responso & constantiā territi Dyrrhachienſes deditionem fecere. Guiscardus jam tutus à tergo cæteras urbes Græciæ Theſſalonicam usque leviori negotio subegit. Ita victoribus armis Buamundo filio Græciæ diadema quærebat , dum utrique eorum parabatur veneno pernicies. Oderat Sichelguada privignum Buamundum Rogerij filij causâ. Nempe metuebat ne per illum ætate ac robore valentior rem privaretur Apuliæ & Calabriæ Principi-

ci-

(a) *Malmesb.*

cipatu Rogerius, cui debebatur jure materno. Mulier audax, vafra, quæque non tantum arma tractare, sed & venena miscere noffet, nondum erat ab hac arte nota Guiscardo. Odio privigni Buamundi flagrans, ut ars casum simularet, potionem lethiferam conficit, & Buamundo propinandam mittit Salernum ad archiatrum suum. Quid dicto audiens, ægro juveni, quem curandum susceperat, mortiferum poculum præbet. Ita (a) plerique scriptorum tradunt; at nemo Rogerium filium matri participem, aut concium facinoris facit. Buamundus certam pestem licet lentam sentiens, quo in discrimine versetur, patri mox nunciat. Calidus Normannus uxoris ingenium, licet nondum pernoisset, suspectum habebat. Quam ad se vocatam, vivatne Buamundus, interrogat. Hâc respondente, id clam se esse, jussit pater asferri sacrum Evangeliorum codicem, & gladium. Quem districtum tenens voce efferatâ, audis, inquit, Sichelguada: per

(a) *Order. Malmesb.*

per hæc sacra monumenta juro, si Buamundus veneno, quo potus est, occiderit, te hoc ferro casuram. Conterrita conjux detestari, & abominari tantum nefas, pernegare se ullius culpæ affinem aut consciam. Cæterum apud se deinde multa volvens animo, licet viro privignoque infesta, tamen è vestigio Salernum clanculum misit antidotum medico facinoris participi, admonitumque periculi sui jussit mederi Buamundo. Ille novam potionem ægro præbendam diluit, sed danda imprimis opera erat, ut ejus levaret animum; cujus plerumque ægritudines difficilius curantur quàm corporis. Peracerbum id juveni acciderat; quòd Pontificis ministris interrogatis de Mathildis rebus, audierat Amazonem animum ad cælibem vitam obfirmasse, nunquam emolliendum. Nec verò, si fortè emolliretur, ullius unquam amore tangendum videri, nisi Godefredi, licet hostis. Ita desperandum sibi denique senserat de Mathildis nuptijs, & gravius id vulnus fuerat, quàm quod in acie

nū.

nuper acceperat. At commodum per id tempus advenere è Galliâ milites, qui ejus patrisque signa sequerentur. Cognoverat ex his Philippo Franciæ Regi filiam esse Constantiam, quæ licet ætate tenerrima, præstantem indolem & miraculum formæ promitteret, ac jam præ se ferret. Quibus auditis mox Regiæ puellæ species Buamundi mentem impleverat, à quâ licet tanto locorum, ætatis, ac generis intervallo distaret, sponsam sperare ausus est, juvenis animo maximus, qui ipsâ rerum altitudine ac difficultate, quâ deterrentur alij, traheretur. Medicus his intellectis bene sperare de ægro cœpit, & unâ cum medicamentis gratos sermones adhibere. Dum fomentis corpus, animum recreat victorijs paternis, & spe potiundi non solum Græciæ imperio, sed & sponsalibus Regiæ virginis Constantiæ. Adhibebat & sua solatia caro juveni Gregorius. Nec deest (a) qui scribat hunc Pontificem pollicitum, se oratorem in Galliam, qui ei sponsam Constantiam

pe-

(a) Jo. Bouch.

peteret, missurum, & verò misisse Buamundo comitante : sed hic non nisi post, ubi per valetudinem novæque fortunæ ludibria fas fuit, profectus. Diffuso in venas medicamento brevi salubritatis indicia percipi potuere. Convalescens sensim jam cogitabat reditum ad castra patris, ut non solum paternis armis, sed & suis partum Græcorum imperium gloriari posset in ambiendâ Constantiâ. At peregrina regna moliens subitò domesticâ fortunâ dejicitur. (a) Accurrit Salernum-trepidus miles noctu, placidèque dormientem Buamundum, sæpius nominatum, cum voce non posset, tactu excitat. Miranti, adhibe, inquit, fidem perfido mihi, qui dominæ arcana prodo, ut te servem. (b) Noverca insidiatur tibi : in ultimo fortunæ tuæ & vitæ versaris : Sichelguadæ scelere periit jam pater tuus : periisti tu quoque, nisi jam jam te hinc ejicis. Raptim deinde narravit, novercam postquam Buamundo remedium adversus propinatum à se toxicum miserat,

(a) *Orderic.* (b) *Idem.*

ferat, metu stimulante perpendisse, si ipse ante adventum nuncij sui & haustum antidotum moreretur, se juratum à Guiscardo fatum non evasuram. Ergo de antevertendo, perdendoque marito deliberasse. Ad id partim metu ejus impulsam, partim (a) donis promissisque Alexij, qui ei etiam conjugium Cæsareum pactus esset, si virum sustulisset de medio. Denique truculentam feminam toxico Guiscardum interfecisse, virum eximium, Pontificiæ ditioris ac majestatis defensorem, domitorumque Cæsarem. Tanto scelere perpetrato in castris Normannorum de suâ salute anxiam noctu cum fidissimis suorum fugisse ad portum, naviumque optimam subjisse, incensis reliquis, ut ne ipsam persequi Normanni ultores possent. Cùm illa littus Apuliæ attigisset Buamundo tollendo imminens, miserum se (addebat miles) fortissimi juvenis præcucurrisse Salernum, nuncium funestum, sed ipsi salutarem, si novercam non expectet. Buamundus narra-

X

tio

(a) *Order. Malm. Guib. Abb. Gaufr. Vofien.*

tionē attonitus, ingentem edidit gemitum, & quamquam in rebus trepidis ac subitis, præsertim in quibus perfidia timetur, consilia sæpe defunt, tamen, ut erat animo excelso ac solerti, nihil cunctandum censuit. Licet ex veneni haustu pallidus, & nondum persanatus, morâ nullâ interpositâ clam urbe aufugit, inops rerum omnium & asino vehens. Huc alti illi spiritus, spēsque imminētis Cæsareæ coronæ & conjugij regij, subito fortunæ ludo, reciderant. Hinc frendens fremēnsque inter viam cogitabat, revolutum se retro ad stirpem, & Normanniæ domesticam inopiam. Sibi, qui modò propè à Constantinopolitano folio abfuerit, nihil nunc restare, quo emineat, præter vilissimum pecus. Jam de Constantiæ sponsalibus desperandum nisi ex tanto lapsu confestim resurgat. Adhæc pudebat Normannum, quòd mulieris astu pater oppressus, ipse fugatus esset. Quin & veneficam obtigisse hostem, quam ulcisci armis pudeat. At esse illi filium Crumenam, esse amasium Alexium, quos perdat, & cum illis

lis

lis Sichelguadam. Vicit ergo nos, in-
 quiebat, Græcus toties victus? Sed vi-
 cit, quibus decebat armis, feminæ ve-
 neficio. Illud quoque solatio erit, quòd
 Græcus Tyrannus, qui domum nostram,
 quando aliter non poterat, femineo sce-
 lere obruit, pestem illam ac furiam do-
 mo toróque recipiet. Neq̃ diu hac de-
 formitate fugæ meæ exultabunt, seque
 effarent. Ut mihi alia omnia jam de-
 sint, non deest animus, quo fortunam
 fingam ac restituam, in nullam sortem
 bonorum natus, nisi quam virtute fece-
 ro. Hæc animo agitans confugit Ca-
 puam exulis modo, & gentilium auxilio
 flagitat. Lentæ res erant, plerisque, e-
 tiam popularium, spernentibus eum in-
 opem, & destitutum jam auctoritate
 Gregorij Pontificis, qui nuper rebus hu-
 manis excesserat. Noverca interim in-
 gressa Salernum Buamundo clapso vehe-
 menter indoluit. Cæterum Rogerius
 filius Apuliam, ac reliquam avitam di-
 tionem recepit, ope patris Rogerij Sici-
 liæ Comitis. Qui licet sollicitatus à
 Buamundo crimina novercæ exaggeran-

te, primum non facile sibi persuaderi passus est, deinde vel nulla putavit, vel condonavit matri; ut dissimulatione culpæ, quæcumque erat, domesticam tranquillitatem famamque redimeret. Indignatus Buamundus sibi nec fidem haberi, nec quidquam relinqui paterni imperij, collecto, quanto potuit, exercitu movet, & Oriam urbem de fratre occupat. Commissum inde (a) prælium, acre magis, quàm cruentum. In ipso pugnæ ardore cùm frater fratri instaret, primores ambarum partium, qui sub Guiscardo stipendia meruerant, clarissimi parentis veneratione, & caritate filiorum, in id incubuere precibus atque interpositu corporum, ut ne manus fraterno sanguine polluerent. Pax eâ conditione tunc impetrata, ut Rogerius Ducis Apuliæ titulum obtineret, Buamundus Tarento, & alijs quibusdam locis frueretur. Qui tametsi his minimè contentus, acquievit tamen in præsens, amoribus avocatus ab armis. Dedisse se fortuna videbatur adeundæ & coram ambi-

(a) *Pandulph.*

ambiendæ Constantiæ. Patruus Rogerius celebratissimus Siciliæ Princeps ex inopi, & secundario in Normanniâ cliente, eò jam evaserat, ut potentiâ parem se Regibus ferret, opulentiâ superiorem. Hinc, ut affinitates cum summis Principum jungeret, rogabatur sæpius, quàm rogaret. Per id tempus Francorum (a) Rex Philippus missis oratoribus petijt, ut sibi filiam Emmam nuptui daret, formâ, & spe gazæ dotalis insignem. Concessit Rogerius, & navibus apparatis præstituto tempore virginem cum splendido comitatu, magnisque thesauris transmisit maritimo itinere usque ad S. Ægidij oram, quo Rex obviam se sponsæ venturum significarat. Sperabat Rogerius fore, ut Sanctægidianus Comes Raymundus pro veteri secum necessitudine, & nuperâ affinitate Regi sponsam cum pompâ consignaret. Nam & Raymundo aliam Rogerius filiam in matrimonium collocarat. Nunc, ne quid splendoris deesset Regijs nuptijs, summo studio providerat. Præ-

X 3

tèr

(a) *Gauf. Malat. Chesuens.*

ter dotalem gazam mundúmque muliebrem adjunxerat filix proceres Normannos, qui non tantum splendore cultus, & urbanitate certarent cum Francis in aulâ nuptiali, sed etiam cum iisdem in equestribus ludis de virium & dexteritatis laude contenderent. Adeam rem non alius inventus vel aptior, vel propensior Buamundo. Ibat is magnis animis, nec spe minori tum satisfaciendi patrui votis, tum potiundi suis. Opportunitas harum nuptiarum inflabat fiduciam obtinendæ à Philippo Rege Constantiæ. Cogitabat se procum adesse simul patrui opibus, simul Reginae novæ consanguinitate, atque auctoritate fretum; nec verò suis ornamentis destitutum, quando Buamundi nomen afferebat, quo nullum esset partâ bello gloriâ notius. Verum id occultandum principiò censebat, donec de suâ militari virtute credere non soli famæ Constantia, sed & suis oculis posset. Enimverò equestri ludicro probaturum ei se, quantum procis Francis Normannus ante ocat. Non destitit Emma patrui sui

vota

vota commendare, quamdiu navigatio tenuit. Quâ secundâ usi ad Sanctægidianum Comitem læti pervenere. At Rex ad conditum diem non aderat. Quæ moræ causa esset, missi qui explorarent; quorum princeps tum studio, tum calliditate Buamundus fuit. Nec prius, aut studiosius exploravit inter viam, quis Regis, quàm quis filiæ Constantiæ animus esset ad nuptias, quique rivales sibi essent maximè metuendi. Audiebat regiam virginem in eâ ætatu nondum ejusmodi affectum prodere. Non defuturos suo tempore juvenes præstantes, qui se procos ferrent. Interroganti, qui maximè gratiâ & auctoritate pollerent in regiâ, & quibus magis affici Constantia videretur: respondebatur plurimum apud virginem valituram famam fortitudinis, ac probitatis; hæc autem laude neminem spei nuptiarum Constantiæ propiorum esse eo, qui absit æger, Godefredo Prorege Lothariæ, si aliquando convalescat. Præsertim cum præter fortitudinis, & virtutum omnium opinionem, generis cla-

ritudine vix parem habeat, & in aulâ regiâ maximè gratiâ polleat: nempe qui & floreat amicitia dudum initâ cum inclyto Hugone Regis Philippi fratre, & nitatur necessitudine & dignatione patris sui, qui summæ sit auctoritatis in Francia, Regni præfectus juris, & urbis regis Pontifex. Sires ad horum arbitrium consiliûmve referatur, haud dubiè Godefredo Proregi pro virili suffragaturos. Per molestè tulit Buamundus tantum rivalem sibi fore. Quem cum ægrum esse cogitasset, nec equestribus ludis interfuturum, id ipsum doluit, non posse se in oculis Regis patefacere armis, uter filiâ ejus dignior esset. Id quoque non lubens audiebat, non videri à patre despondendam ulli, antequam nobiles annos attigisset. Verùm non desperabat hanc rem sibi confectum iri à novâ Reginâ, quæ amantem Regem posset quovis impellere. Occultatâ personâ profectus in regiam, dum spes suas propius explorat, stupore, ac velut monstro attonitus hæsit. Quàm eum conspecta forma Constantiæ delectavit, tam con-

ster-

sternavit audita mutatio Regiæ voluntatis. Philippus, (a) qui Bertam conjugem per causam consanguinitatis relinquere, Emmamque ducere modò decreverat, jam alia omnia cogitabat. Horrere Buamundus ad improvisum fortunæ ludibrium : tanquam repulsam cum Emmâ passus fremere, spēsque suas pessum datas tantùm non deslere. Intellexit sibi tempore illo importuno nihil petendum à Rege, id unum aëturo, ut nihil ageretur. Nec morandum illic ratus citato equo recurrit ad Sanctægidianum Comitem & Emmam, nuncius nulli tristior, quàm sibi. Consilio habito inter Normannos proceres, rogatu Emmæ clanculum pecuniâ dotali in naves reportatâ, solutisque mox ancoris ad Rogerium in Siciliam contendere. Virgo apud sororis maritum Raymundum relicta, deinde Comiti Claramontano nupsit, sed tanto claritudinis intervallo, dum enupsit è regibus. Casum puellæ leviùs tulere Rogerij pater & patruelis, ab adversæ for-

X 5 tis

(a) *Idem Gaufred. Chesneus. &c.*

tis alienæ sensu avvocati suâ lætioro. Patruelis dux Apuliæ duxerat Adam nuper Daniæ Reginam, viduam Canuti Regis, Roberti Flandrorum Comitis sororem. Siciliæ verò Comes Emmæ pater mortuæ uxori subrogat Adelisiam, Mathildis regiæ Italarum Amazonis patruo Conrado natam. At Buamundus auditis his propinquorum claris connubijs cò graviùs ferebat repulsam suam. Id imprimis urebat animum, quòd frater natus minor opulento Principatu & Regio connubio frueretur. Cæterùm non desperabat feliciorē in Gallias reditum. Verùm ad impetrandam Constantiam videbat sibi non alienā potentiā, sed suā nitendum, nec Lutetiam nudum Buamundi referendum nomen. Ergo minimè contentus exiguā illā paterni imperij parte, quam concesserat frater, rursus in hujus agrum impetum facit, Melfimque occupat. Sed magnanimum juvenem fortuna gloriosior manebat alibi, quò & paulò post vocavit. Obsidebat rebelles jam Melfitanos frater Dux Apulorum, cui venerat auxilio cum Siculis

culis patruus Rogerius. Aderat & in obsidione Buamundus sive contra fratrem, sive jam pro fratre faceret. Nam utroque scriptores trahunt. Advolat ad eum nuncius, affertque ingentes armatorum copias è Gallia per Italiam adventare. Inusitatum eis esse cultum, morémque clamandi. Singulis in humero dextrorubere crucem, Itentidem eos pro clamore militari in hanc vocem, DEUS HOC VULT, erumpere. Duces singulis esse agminibus, nullum univēsis. Miranti Buamundo, explorantique quinam essent, & quid venirent; relatum, primo agmini præiro Hugonem Magnum Regis Francorum germanum, secundo Robertum Ducem Normanniæ, tertio Robertum alterum Comitem Flandriæ. Suspectus fuit Buamundo postremi hujus adventus, quòd ejus sororem haberet in matrimonio Rogerius frater. Sed audiit deinde proceres hos omnes sacro in Turcas bello initiatos movere Constantinopolim, ac deinde Hierosolymam. Hic (a) Buamundus

(a) *Gausf. Malat.*

mundus rursus animo infinita complexus cupiditatem potiundi Græci imperij resumit occasione belli sacri. Spem item concipit fore ut sacro exercitui, cui desit dux, præficiatur ipse. Gaudet quoque vel maximè Francum Hugonem adesse, quem comitari possit, & sibi conciliare officijs, ut per eum deinde filiam fratris Regis demereatur. Sic excitatus concionem suorum advocat, hortaturque ut se duce sequantur proceres Hierosymam petentes. Cumque persuasisset, mox plaudamentum puniceum in cruces discindit, quas, insigne sacrae expeditionis, dividit in singulos. Exemplo horum, & Buamundi itidem hortatu, tracti plurimi militum utriusque Rogerij, junxere se Buamundo. Ad viginti millia Apulæ Siculæque juventutis secuta. In his eminebant egregij duo fratres ex Buamundi sorore & Odone Bono Marchione Italico geniti, Tancredus & Guilielmus. Ille indole impiger, ardens, & bello acerrimus: hic præterquam quod itidem manu promptus, comitate, & solertiâ comparatus ad animos

mos demerendos. Horum Tancredum Buamundus apud se retinet, Guilielmum ad Hugonem Magnum præmittit, qui ei sua & avunculi officia, necnon sacri belli societatem offerat, ac Franci voluntatem urbanâ dexteritate conciliare conetur. Id Guilielmus scitissimè auspicatus, Francorum omnibus deinde officijs colere, familiares affari, interrogare de rebus Domini, Regisque fratris, de quo filia Constantiaë procis: felicem illum dicere, cui denique nuberet. Ex responsis cognovit non videri Jam nupturam, moventibus ad bellum sacrum summis procerum. Virum illustrem Tricassinum Comitem Blesensis Comitis fratrem, se palam & præ omnibus procum ferre. Sed sanguinis propinquitatem nuptijs impedimento fore. Cæterum Godefredum Bullionium illum ingenti famâ Ducem, si ejus dotes spectantur & Hugonis amici studium, prælatum iri. Eum nuper pro mortuo habitum, jam prodigio sospitem & Francicâ aulâ spectatum, in admirationem amorémque sui omnes rapuisse.

Molestè

Molestè tulit Guilielmus tantum avunculo rivalem revixisse. Verùm dicebat eum denique dignum Constantiæ nuptijs fore, qui omnium maximè virtute excelleret; bello autem sacro, quisnam is esset, patefactum iri. At quamprimum significandum rerum statum Buamundo censuit; qui mox venit ipse ad Magnum. Peramicè, & cum laude rerum bello Græco gestarum exceptus est ab Hugone. Cui Normannus, præclarè, inquit, aliorum res videri possunt, quamdiu tacentur tuæ. Vel hoc tuum quanti est, quod primum agmen ducis sacræ militiæ? cujus susceptæ decus primum refers, dum eam sic auspicas. Hugo simpliciter ac generosè ad hæc, secundâ, inquit, laude contentus fuero; prima debetur immortalis nominis pari bellatorum, Godefredo Proregi Lothariæ, & Anachoretæ ejus altori, quorum amborum amicitia meritò gloriôr. Apparebat Regium juvenem ex animo loqui, nihilque libentiùs, quàm, quæ de utroque dixerat, narratione docturum. Buamundus, licet æmulum vul-

gò non delectet æmuli laudatio; tamen, ut erat minimè vulgari excelsitate animi, magnificiebat etiam in adversarijs virtutem, malebátque eorum præclara facinora superare factis, quàm vel auri- bus respuere, vel obtrectare verbis. Ergo postulavit beneficij loco, ut Hugo sacræ expeditionis originem, non gravaretur paucis narrare, id se quoque consecuturum ratus, ut & Hugoni rem gratam faceret, & disceret quo genere laudis ad ejus amicitiam, & Constantiæ necessitudinem aspirari posset. Magnus sanè quàm libenter retulit Godefredi & Anachoretæ res præclaras, atque amborum secum familiaritatem, sacrique belli originem. Addidit Duces cum copijs suis singulos Constantinopolim iter intendere. Godefredum præmisso Petro per Germaniam proficisci; se cum reliquis per Italiam. Hâc qui sequantur, videri hiematu- ros in Apuliâ; se propediem trajecturum in Græciam. Buamundus properari Hugoni comitem adjunxit illum filium sororis suæ Guilielmum, ac seipsum fuisse comitatu-
rum

rum dixit, nisi sibi & parandus esset instructus bellicus, & officij causâ expectandus salutandusque Dominus suus Normanniæ Dux Robertus. Nec diu moratus in Apulia Hugo. Qui deinde, ut suprâ memoravimus, trajecto mari captus Dyrrhachij, ductus Constantinopolim, & à Godefredo frustra repetitus per legatos. Ita Augustus Græcus Latinorum vires, quas ad opem acciverat, in suam perniciem detento Hugone Magno & intempestivâ calliditate convertit. Mox Prorex Godefredus amicum Principem armatâ manu asserturus adventat, & quacumque exercitum ducit, aut ducturus fertur, pavorem agris latè vulgat. Omnes passim vias impleverant rusticanorum virorum agmina, feminarum & puerorum turbæ, pecorûmque greges, quos præ se agrestes agebant. Subitò relinqui Thraciam crederes. Quæ fugientium ex agris multitudo majorem, quàm attulerat, terrorem inferebat oppidis. Præcipuè Constantinopoli propè ut captæ tumultus fuit, cum visus ad muros accedere ingens exercitus Belgæ

Pro-

Proregis. Ibat ipse ante signa specie insigni armorum & corporis, stipatus procerum familiarium globo. Primores horum erant frater Godefredi Balduinus, sororius Cuno Montis Acuti ad Urtam fluvium Comes, consanguineus Balduinus Burgius Comes Castri Retexti seu Rhethelensis, alterque Balduinus, ille à puero Godefredi amicus, Comes Hannoniæ : consanguinei item Proregis Tullenses fratres, & Adalbero Lucemburgi Comitis frater. Nec tacendum nobile par amicorum Belgarum memorabili exitu magis nobilitandum Anselmus Ribodimontius Comes Austrovan-diæ & Engelramus Hugonis Comitis Sanpaulani (qui etiam aderat) filius. Sed inter omnes procures nitore atque elegantia militaris cultûs, ætatisque flore maximè conspicua se ferebant capita duo. Dixisses vel geminas Amazonas, vel geminos tirones nobiles. Reipsâ erat altera virili animo femina, alter virgineâ pulchritudine adolescens egregius. Hic erat Tiro ille stirpe & indole nobilissimus, de quo nobis suprà

Y fuit

fuit & erit infrà multus sermo, qui haud
secus quàm filius diligebatur à Prorege.
Amazon nomine Gundechildis nuper
Balduino Proregis fratri nupserat. In
militibus non prætereundi silentio equi-
tes duodecim, quos magno habito no-
bilitatis & virtutis delectu sub discessum
Antuerpiâ Bullionius Antuerpianus
Marchio creaverat. Constantinopoli
tanquam si protinus Godefredus mœnia
aggressurus esset, ita ad arma conclama-
tum est. Portæ raptim clausæ, armati-
que in muris dispositi. Alexius ubi vi-
dit non expediri à Latinis tela, sed cir-
cum urbem figi tentoria, respirare cœ-
pit, cæterùm minimè securus. Exer-
citus validus domi erat, sed dux, quem
Godefredo opponeret, deerat. Filix
Annæ Comnenæ conjux Cæsar Brienni-
us, etsi bello clarus, par ut esset illi Bel-
gæ, verendum erat. Æstulare Alexius,
astus novos excogitare, versarèque o-
mnia. At nihil artes adversus hæc arma
profuturas, nihil denique cunctandum
vidit. Ergo Hugonem Magnum cum
Guilielmo sororis Buamundi filio & so-
cijijs

cijſ (a) cuſtodiâ emittit ad Proregem, ſuôſque ad eum oratores ſubſequi jubet. Vix Hugonem advenire audierat Prorex, cùm è prætorio accurrit obviam, gaudióque exultans excipit exultantem. (b) Inter amiciffimos Principes amplexu ex animo dati. Grates agere Hugo, officium Bullionij ſui prædicare, tanti fuiſſe capi ſe, ut liberatoris tanti experiretur fidem. Ei ſuam ipſe operam atque adeò vitam, ſive bello, ſive in fratris Philippi regiâ utilis eſſe poſſet, addicere. Godefredus viciffim ſibi gratulari fortunam, quòd Magnus Franciæ juvenutis non genere modò, ſed & indole ac virtute princeps liberatus eſſet potiffimùm ab ſe, quo nullus unquam futurus potiore in ipſum animo. Sub hæc officioſè verſus ad Guilielmum ac ſocios, gratulatus itidem eſt ſibi, quòd ad tantorum virotum libertatem aliquid conferre potuerat. Mox Alexij oratores ſuperveniant, rogántque ejus verbis Proregem, Chriſtianiffimum ducem appellantes, ut in palatium Cæſareum ve-

Y 2

nire

(a) *Aqueniſis.* (b) *Rob. Monach.*

nire cum aliquot primoribus ne grave-
tur, ab Augusto ornandus honoribus
neutro eorum indignis. Vix legationem
audierat Godefredus (a) cùm Franci qui-
dam, quibus Constantinopoli domicili-
um erat, clàm adsunt, monéntque ma-
gnopere Bullionium, ut Alexij versutias
caveat ac dona, speciosas nominatim ve-
stes, at veneno medicatas usque adeò
præsenti, ut induentem, honoris obten-
tu, perniciæ certâ conficiant. Quibus
auditis, ire distulit Godefredus. Ale-
xius indignatus, Latino exercitui inter-
dixit venalium foro. Vicissim offensus
Latinus ad prædas & agrorum popula-
tionem convertitur. Sub natalis Do-
minici sollemnes ferias datum id sanctita-
ti temporis, ut manus à vi utrimque con-
tinerentur. Post (b) quatrimum Græci
oratores denuo adsunt nunciantes Au-
gustum ob brumæ incommoda metuen-
tem ne amicus exercitus in tentorijs gra-
vius aliquid à frigore atque imbribus pa-
teretur, orare præstantissimum Ducem,
ut castra transferat ultra cornu Bospho-
ri,

(a) *Aquen.* (b) *Aquen. an. 1097.*

ri, militemque in commodis illic tectis
 refoveat. Urbem Constantinopolim si-
 tu triquetram alluit angustus tractus ma-
 ris, Bosphorus Thracius nomine, qui A-
 siam Europamque limes interfuit. Pro-
 xime mœnia divisus bipertito partim
 prolabitur in vicinam Propontidem, par-
 tim terræ infusus supra urbem ad Occi-
 dentem, sinum facit & commodissimum
 urbi portum. Bosphori cornu appel-
 lant. Ultra quod perpetua secundum
 littus ædificia turrata, ac magnifica por-
 riguntur xxx. millium spatio. Gode-
 fredus actis Augusto gratijs commigrat
 cum copijs in eas domos littorales, ubi
 copia annonæ maxima concessa. Con-
 tinuò redeunt oratores Alexij, qui Pro-
 regem in urbem invitent. Ille non ob-
 litus monitorum de fraudibus venena-
 tisque vestibis cavendis, ne tamen Græ-
 ci rursus iram excitet, mittit ad eum Co-
 mites nobilitate & facundiâ insignes so-
 rorium Cunonem, & consanguineum
 Balduinum Burgium, qui verbis suis A-
 lexio fidem & obsequia offerant, dicant-
 que venturum libenter ipsum & Græcæ

aulæ splendorem visurum, sed, quod pace ejus dicatur, retardari quibusdam de eo nunciatis; nescire tamen, an odio, invidiæve conficta sint. Purgabat se de his Alexius, non esse cur dux Christianissimus, aut militum quisquam à se dolum malum timeat. Habere se Latinos milites pro amicis, ducem pro filio culturum in aulâ, si venire non dubitet. Nec commissurum se, ut quidquam hostile aut inhospitale obveniat eis, quos ad opem evocarit adversus Turcas. Horum imperium everti, nullius magis, quam suâ interesse. Quod acciderit Hugoni Magno venienti Dyrrachium, injusso suo & præfectorum imprudentiâ factum. Cæterum in aulâ suâ retentum Hugonem non incommodè, nec inhonorè remissum Proregi. De venenatis vestibis figmentum esse adversantium utrique parti. At cum Godefredus verbis fidendum non putasset, postquam Hugo facta contraria (utcumque excusarentur) esset expertus, ad arma res denique venit. Alexius interdicto Latinis rursus venalium foro, manè dubiâ adhuc

huc luce quingentos mittit milites suos, qui navibus littoralem oram legant. Improvisò hi incessunt telis militem Latinum partim egressum ædibus annonæ emendæ gratiâ, partim spectantem è fenestris. Quod facinus ubi cognovit Bullionius, illicò signa canere jubet, militem arma corripere, in ordines ire, atque ad muros urbis castra reponere. Nempe jam patebat, cur Latinos Græcus trans portum misisset, nimirum ut officij & honoris specie amotos ab urbe, inter gemini littoris angustias tanquam intra repagula coërceret, unde non nisi per pontem unicum reditus erat. Armati Latini domibus erumpere, imperata facere, &, quod non erat imperatum, tectis magnificis ignem iniicere, immenso damno Græcorum. Ubi proximis tectis hæsit ignis, extemplò effusa flamma pluribus sparsa locis reluxit, dein serpens, continuâsque ædes amplexa, toto se passim littore dissipavit, & uno omnia incendio hausit. Matutinas tenebras citiùs, quàm pro tempore, dispulerat horrenda lux. Littorales illæ domus
ad

ad sex millia passuum, eoque ampliùs continuatâ peste usque ad portum urbî proximum ardebant. Cadentium re-
torum fragor, militum Latinorum vo-
ciferatio, Græcorum ambustorum aut
igni afflatorum fuga, tubarum cantus
Constantinopolitanos turbatos in mœ-
nia exciverat, non plus mille passibus
(tot patebat sinus) à flammarum vorti-
cibus separata. Vibrabat medijs in aquis
terrificus fulgor, & repercussâ imaginē
horrorem spectaculi geminabat. Me-
tus quoque erat ne ventorum flatibus
transmissum incendium Constantino-
polim corriperet. Mox & Constanti-
nopolitani ad arma versi. Procurre-
re ad portas, sub signis stare, ducto-
rem Cæsarem Briennium præstolari,
quem Alexius, & uxor dissimili preca-
tione profecuti. Orabat Alexius ne fo-
cerum, ne conjugem, patriamque exter-
nis prædam fieri sineret, neu iisdem
flammis Constantinopolim, quibus sub-
urbia conflagrant, absumi pateretur:
magnis animis & præiret dux, & pugna-
ret. At conjux plena lacrymarum ob-
testa-

testabatur, sic armis patriam ac suos, ut & seipsum, fervaret. Pons erat per quem solum (ut modò dicebam) à citiore portûs littore reditus patebat Latinis ad muros urbis. Quem Godefredus, ne Græci occuparent, & Latinos transitu intercluderent, loricatedos quingentos, qui prævertant, mittit. Ducebat eques specie corporis eximius, qui toto capite fociis eminebat. Arma auro argentoque cælata corpus raræ dignitatis honestabant. Proceritati robur, & robori par animus erat, quantûsq; decebat Bullionij germanum Balduinum. Qui socios cohortans paucis, videat, inquit, frater hodie quos milites habeat, Alexius quos hostes. Mox concitati calcaribus equi. Vix in ponte constiterat, cum dextrâ, sinistrâ Græci navigiis circumfusi expeditis arcubus juvenē transitu arcere conantur. Ille per medium sagittarum nimbum (a) superato ponte gradum in ripâ ulteriore figit. Sed hîc alia insuper procella fuit sustinenda. Briennius, dum instruit aciem, præmiserat;

Y. 5

qui

(a) *Aquen.*

qui Belgam à ponte submoverent. Balduinus citatos videns accurrere novos hostes, trepidamque suorum turbam, hortari, erigere animos, orare singulos, ut sibi & duci adsint, ut toti exercitui sequenti. Certè impetum omnium hostium ex amne ac terrâ ingruentium se, quantum corpore uno obsisti posset, excepturum. Stabat in capite pontis anceps ad Græcorum tela, insignisque ante suos, circumferebat scutum & minaces oculos, nunc provocans hostium ferocissimum quemque, nunc increpans. Illi clamore sublato undique in unum tela conjiciunt, quæ in uno scuto pleraque cum hæsisent, non minùs obstinatus Belga ingenti gradu pontem obtinuit. Ibi immobilis atque insuperabilis perstitit ab ortu solis penè ad occasum, quoad traductis omnibus copiis structisque à Godefredo ordinibus processit ad muros. In campo ad Blaquernas pugnatum. Principiò non pauci utrimque cecidere. Deinde Græcus pedem referre cœpit, propinquitate urbis & ad fugam pronior, & in fugâ tutior. Hærens

in

in terga Balduinus multos sauciare ac cedere, priusquam portis inciderent. Ipse supernè ex logicâ murorum telis & tormentorum jactu repelli. Jàmque pudore & indignatione accensi Græci in coerant, ut iteratò portis erumperent; cùm Godefredus extremum cogens agmen supervenit, & quia nox instabat, receptui cani jussit. Idem lætus Alexius fecit. Ingentem eâ die tulit laudem Balduini spectata virtus etiam apud hostem, non modò apud suos. Castris ad urbem comunitis rursus miles pabulatum missus ad milliaria quinquaginta. Alexius clade suorum & agri populatione tactus, ut tuta consilia speciosis præferre solitus erat, oratores ad Godefredum remittit invitandum ad aulam & fœdera. Iterum se respondit Bullionius, si tales darentur obsides, quibus de vitâ & salute suâ credere posset. Alexius de obside mittendo filio suo Calojoanne agitabat, paxque coalitura putabatur, cùm oratores alij veniunt aliunde ad Proregem. Mittebat Buamundus, ille magnanimus æmulus. Rescierat Hugonem Magnum à Bul-

à Bullionio liberatum. Non placuit per alium, quàm per se, id factum. Nempe ita sibi antevertisse rivalem Belgam, & occupasse gratiam Franci ad conciliandas sibi Regiæ virginis Constantiæ nuptias, quas deperibat. Cæterum Gavius est bellum à Prorege illatum Alexio, atque ita statuit apud se, eò tendendum in præsens, ut ne pacem faceret cum Græco Belga. Qui si rivalem se ferret, privati certaminis rem illam postea fore. Nunc bellum Græcum, quantum fieri posset, fovendum esse, unde sibi spes affulgeret comparandi imperij. Hâc de re mittebat ad Bullionium oratores. Litteris quoque laudabat eum de bello fortiter commisso, monebátque ut ne cum Alexio rediret in gratiam. Quam non sincerâ fide is esset, ostendisse in Hugone Magno capto, nec restituto, nisi metu adigente. Se quoque & ipsum met Proregem jam experientiâ suâ doctos, quâ indole sit Græcus; nempe ei solemne esse semper fallere, & fraudibus, si hæ non sufficiant, (a) venena adjicere.

Ergo

(a) *Anna in Alex.*

Ergo hic maret Prorex in vicinis Constantinopoli urbibus. Se Martio proximo cum universis copijs auxilio venturum, ejusque signa (a) tanquam ducis & domini sui secuturum, ad profligandum tyrannum Alexium, partoque per scelus Imperio exuendum. Quibus acceptis Bullionium angebat ea cura, quòd neque Alexium bello persequendum censebat, ne quid non pro Christiano egisse videretur, & verendum erat, ne si Buamundus repulsâ irritatus veniret, expeditioni sacræ non opem, sed moram afferret. Cæterùm sumpto ad consultandum spatio responsorias postridie oratoribus tradidit, quibus legendis obstupuit Buamundus, cùm alia omnia quàm expectarat, acciperet. Scribebat Bullionius nullâ ferociæ specie, sed Christiano animo, (b) se non quæstûs causâ venisse de patriâ procul, nec ibi arma sumpsisse in Alexium Christiani nominis Principem, sed in barbaros Ecclesiæ hostes. Quare videri Alexium Christianis potius artibus, quàm armis vincendum;

(a) *G. Tyr.* (b) *G. Tyr.*

dum ; & fœdus cum eo , si quo modo possit , fanciendum , ut ad Turcas transitus aperiatur , atque ad Hierosolymam jugo liberandam. Hoc responso intellexit Buamundus quanto animo esset Bullionius , quàm religioso , minimèque cupido. At miratus magis ejus continentiam , quam ratus imitandam contractis omnibus copijs dedit se in viam. Interim ejus ad Godefredum legatio non latuerat Alexium , qui gnarus Buamundum spes versare de Constantinopoli occupandâ , veritusque ejus cum Bullionio conjunctionem , festinavit huiç obfidem offerre filium suum Caloioannem. Serum id jam futurum videbatur , damnabantque Græcorum non pauci Alexium , qui cunctatione rem Græcam perditum îsser. Cùm tamen oppidani , qui oppugnationem urbis expectabant , rescire Bullionio placere pacem , benignitas ejus & fides in aulâ foroque celebrari cœpit. Idque tantò magis factum , cùm missi à Godefredo venire in conspectum Montacutus & Burgius Comites Calojoannem oblatum obsidem excepturi.

cepturi. Ductus in castra egregius & minimè paterni ingenij Princeps obvio Godefredo ita loquitur : Cùm me obsidem, & fœdus nobiscum admittis, victoriæ genus, cui nullus nisi malus invidet, reportas. Nempe quo nihil victori pulchrius est, Græcos non magis acie, quàm humanitate vicisti. Proinde meritò tibi id tribuit pater Augustus, ut censeat se meliùs sub tutelâ tuâ, quàm armis suis regnaturum. Cùm Bullionius humanissimis verbis respondisset, relicto ad ejus & castrorum custodiam Balduino fratre & Amazone Gundechilde, ipse cum Hugone Magno, & reliquis proceribus suis magnifico cultu Constantinopolim navigio per sinum maris devehitur. In hâc tantarum rerum mole tametsi obversabatur memoriæ Latinorum omnium denunciatum non semel insidiarum & veneni periculum, tamen vir fortis ingressus est Augusti Græci aulam metuendus magis, quàm metuens. Eminebat in solio Alexius procerum multitudine circumfusus, quos magna cupido incesserat spectandi

etandi celebratissimi famâ Godefredi:
 sed præsentis major admiratio cepit. E-
 micabat in eo dignitas formæ aliquantò
 humanâ amplioris, certans cum gravi-
 tate humanitas, & animus vel bello,
 vel paci paratus. Cui Alexium vene-
 ranti de genu, atque in id officij decorè
 composito Augustus dato osculo fidem
 futuræ amicitiz sanxit. Deinde, salve,
 inquit, Princeps Christianissime, quem
 famâ dudum novi excellentem bello vi-
 rum, prudentissimum ducem, &, quæ
 rara virtus est, servantissimum fidei.
 Nec sum deceptus, quòd de his credidi
 famæ tuæ. Virum fortissimum exper-
 tus, video te non fortitudinem magis,
 quàm fidem colere. Quare te (a) ado-
 pto, habeoque impofterum filij loco, &
 quidquid meæ ditionis est, in tuâ pote-
 state ac tutelâ colloco, ut imperium me-
 um à Latinorum præsentibus & securu-
 ris copijs præstes incolume. Tu fac ut
 ego non meliorem filium genuisse vide-
 ar, quàm sumpsisse. Sub hæc Augustus
 (b) magnificum suoque simillimum in-
 du-

(a) *Aquæ.* (b) *Idem.*

dumentum, quod aulici habebant in manibus, jussit adinoveri. Prorex neque hinc trepidus recordatione intentatarum alias venenatarum vestium, induitur Cæsareo cultu. Tum Alexio Sacramentum dixit, non modò se filium, sed clientem manibus junctis professus. Græcus vicissim pollicitus est se ei socia arma juncturum, item venturis alijs proceribus, nominatim Buamundo, si Sacramentum simile dicerent. Admissi deinde ad osculum Augusti comites Proregis clientelam in eadem verba juravere. Mox inter Græcos Latinósque proceres salutatio facta profitentes inter se hoc sacro fœdere omne Græci Latinique discrimen exclusum. Inde itum ad Augustæ Gynæceum, quod Purpura dicitur. Est (a) id ædificium intra septa palatij Cæsarei, insigne opere, & marmoris, quo constat, genere. Ab imo usque ad tecti suggrundia constructum formâ quadratâ, exinde fastigiatum in pyramidem definit. Totus locus marmore rubet, quo & sola exedrarum constrata, & incru-

Z stati

(a) *Anna in Alex.*

stati parietes. Pretiosum lapidis genus colore purpureum, candidis punctis inspersum est. Hinc ea pars domûs Purpura dicta, Augustarum puerperijs addicta, unde liberis nomen est Porphyrogenitis. Prospectum amœnum habet ad mare, cum portûs locum versus, in quo insigni opere fabricata visuntur leonum boumque simulacra. Hic Prorex exceptus ab Augustâ, cui aderant Pyrisca Calojoannis Principis conjux Hungara, & Anna Comnena Alexij filia, eademque historiz rerum à patre gestarum auctor, quam Alexiadem inscripsit. Aderat & Helena soror Buamundi, mul-
tæque aliæ nobiles feminæ. Ibi Alexius, equidem, inquit, fili, tecum non modò amicitiam, sed etiam affinitatem lubens jungerem, si mihi filia innupta superesset. Nunc in hoc gynæceo vide sine aliqua, quam tuo amore digneris. Certè nulla est, quin se eo beatam putarit, licet nonnulla sit Cæsareis nuptijs digna. Hæc postrema verba cum diceret, ad Helenam aspexit, dixitque in autem Godefreda, sororem illam esse
Bua-

Buamundi priùs Cæsari puero Constantino desponsam. Ad hæc Godefredus ita urbanus, ut à lenocinijs verborum alienus, sic respondit, ut omnibus virginibus sui vel amorem, vel venerationem crearit. Aperta deinde gaza Cæsarea. Proregi donata inæstimabilis pretij munera, aurum, argentum, purpura. Addita raræ bonitatis jumenta. Verùm Prorex (ut erat ab avaritiæ, & cupiditatis labe prorsus alienus) omnia militibus statim elargitus est, mirantibus Græcis viri quâ liberalitatem, quâ magnitudinem animi, aspernantis ea, quæ alij vitæ periculo quærunt. In primis admirabatur in omnibus Ducem Helena, quod non semel sororis filio Guilielmo testata est, nec sine manifestis amoris indicijs. Et Guilielmus Buamundo tantum adversarium obtigisse non jam magis dolebat, quàm mirabatur. De eo scripsit ad avunculum in hæc verba: Bullionius ijs dotibus præditus est, ut amicus tibi esse mereatur, si adversari nolit. Utcumque erit, cùm te virtus adversariorum adeò non deterreat, ut

etiam delectet, non verebor memorare tibi, quantis ille honoribus & dignus & cultus sit ab Alexio. Postquam narravit deinde adoptionem ejus, & juratam ab eodem clientelam, & tutelam Græci Imperij, sic clausit epistolam; vides, avuncule, quantum Alexius conciliarit sibi defensorem. Ita foedere junctus est ei Godefredus, ut non possis jam alterum bello adoriri, quin alterum habeas hostem. Cæterum sive Godefredum amicum voles, sive inimicum adorieris, parem animo tuo invenisti. Buamundus impavidus his moveri non potuit, ut spem consequendi Græci Imperij deponeret, aut voluntatem Alexij ulciscendi. Trajecto mari per Macedoniam contendit in Thraciam, haud ignarus non fidendum Alexio, quantumvis se Latinis omnibus profiteretur amicum. Ad flumen Bardarium in Illyrico ventum erat. Iamque Buamundus cum Tancredo Guilielmi fratre, & agminis parte transmiserat amnem, cum adsunt infesti ad ripam Græci Tatino duce, & eam partem, quæ nondum transierat, prælio

prælio imparatam telis incessunt, cruentaque cæde afficiunt. Quo nunciato Tancredus (a) revolat fulminis more, & cum equo desilit in fluvium, multisque licet superincidentibus telis, in Græcos invehitur sequentibus duobus equitum millibus. Periculum ingens fervidi animi juvenis discussit audaciâ. Multi hostium cæsi, capti non pauci, reliqui scædam infugam compulsi. Adducti ad Buamundum captivi interrogantur cur Græci Latinos nihil hostile gerentes infestent. Respondere se Augusto suo militare, & officij sui esse imperata facere. Inde Alexius non modò in suspicionem doli mali vocatus, sed insimulatus perfidiæ manifestæ. Ad Constantinopolim cum appropinquaret Buamundus, evocatur ad aulam ab Alexio amicitiam proficiente. Ille abnuere, & nuperum ejus facinus causari. Alexius, ut aliàs, culpam non suam, sed præfectorum dicere; orare, ut veniam erroris illis imprudentibus daret. Respondit Normannus, præfectis ignosci posse, Alexio non posse,

(a) Tudebot. G. Tyr.

se, qui peccare suos vel non vetuisset, vel jussisset, fraudesque ex fraudibus scereret. Ceterum Augustus misit munerâ ad Buamundum. Cumque sciret hunc timere à se venena, (a) misit carnes & crudas & coctas, additâ excusatione coquos Græcos nescire, quibus condimentis Normanni delectentur. Quare si cocti cibi non arriderent palato, crudos suo arbitratu coquendos curaret. Et verò Buamundus his usus, illis abstinuit. Ita inter se calliditate certabant Græcus, & Normannus, uterque vaferimus: sed Alexio fides haberi non poterat: Buamundum constabat gloriæ velificantem, nihil magis quàm famam timere perfidiæ. Res ad vim, atque ad arma spectabat. Græcus à copiis erat instructior: Buamundus præpollebat animis. Pugnam deposcebat Tancredus, præsertim eo tempore, cum jam Godfredus discessisset. Ita scripserat Guilielmus frater, Alexium ineunte jejunio verno, cum audiisset Latinos aliorum agminum ductores in propinquo esse,

veri-

(a) *Anna in Alex.*

veritum multitudinem, orasse Bullionium, ut cum copijs traiceret Bosphorum, locumque faceret secuturis, ne Constantinopolitanus ager numero laboraret. Facilem Ducem annuisse, transmissoque Bosphoro jam in Chalcedonis campestribus, Asiæ limine, metatum esse castra. Sed ecce improvise fecialis Belga, qui Buamundo nunciat, in campo propinquo sub ejus castris (a) adesse Godefredum viginti delectis comitatum, qui eum ad colloquium vocet. Locum undique conspectum esse, nequid insidiarum latere possit. Ducem ac socios ensibus solis armatos esse. Expectare Buamundum eodem instructu venturum. Ad inexpectatum nuncium mirabundus tantisper hæsit Buamundus. Verum intrepidus mox ad condictum locum pari comitatu armatūque processit. Inter viam nondum admiratione vacuus conferebat cum Tancredo comitum fidissimo juxta fortissimoque, unde improvise Dux adesset, quem trajecisse in Asiam sciebatur; & quænam esset causa

Z 4 tali

(a) *Aquæ.*

taliloco atque instructu veniendi. Ceterum ipse, seu ad colloquium, seu ad pugnam vocaretur, nihil moratus pervenit ad campum. Ubi invicem conspicati eminus Buamundus & Bullionius, jussis consistere pari spatio socijs, ipsi adversos concitant equos. Congressi alter alterius aspectu paulisper propè attoniti siluere. Cojerant duo juvenes non modò suæ ætatis maximi duces, sed omnis memoriæ facilè principes. Nuper eodem tempore ex venenatâ portione ægri, persanati deinde, & in eundem servati erant, nescientes jam annon ad vitam invicem ferro tentandam. Cerneret ambos in medio virium robore, quod plenius nitidiùsque post morbum velut renovatus flos juventæ faciebat. Normannus jam antè ex famâ & Hugonis Guilielmique narratione admiratus erat animum Godefredi; speciem quoque corporis amplam & magnificam cogitatione præceperat. Crevit admiratio conspectu Belgæ, quem, præterquam quod ori suapte naturâ multa majestas inerat, promissa subflava cæsarics,

ries, habitusque corporis rerum patientiâ durati, & virilis cultus honestabant. Non dissimili animi motu spectabat Godefredus Normannum, & ipsum magnitudine, & conformatione membrorum insignem. Ex oris statu & oculorum acie virum æstimares, cui (a) pallor ex venenato haustu relictus, militare & toruum quiddam addiderat. Summus erat consilij dux, manu miles, calliditate Græcis superior, odio Græcorum memorandus, at neminem fide in Græcos, neque fortitudine adversus se Godefredo parem invenerat. Post aliquantum silentium sermonem miscuere lenem principiò, deinde acriorem, quod ex utriusque gestibus posset intelligi. Semoti utrimque socij, hinc Balduinus, inde Tancredus pugnacissimi amicorum, ac res alter in alterum oculos eminus intenderant. Ambobus pares anni, & par adhuc laus bellica. Balduinus in ponte ad Constantinopolim, Tancredus in amne Bardario superando claruerat. Hinc rivales gloriæ, & hostiles pe-

Z 5 nè

(a) Order.

nè jam spiritus gerentes, optabant occasionem sibi præberi, quâ de excellentiâ decernerent. Neque verò ea defuit diu. Interim postquam duces militarem in modum consalutarunt inter se, Godefredus, quo solebat virili candore, dixit, se ab Alexio revocatum ex Asiaticis castris, ut minantem sibi fortissimum Normannum conetur verbis armisve compescere. Orare se, ut præbeat animum à quietis Christianisque consilijs non abhorrentem, nec parata in Turcas arma, minimè idoneo tempore, in se convertat. Respondit Buamundus, nunquam se metu à proposito avocatum. Neque, si bellum placeat, nunc primum Normannis rem fore contra Græcum pariter ac Latinum, quos ambos nuper ad Dyrrhachium, & Romam eodem tempore vicerint. Tum (ut excelsissimos spiritus promptâ comitate temperare noverat) subjecit sibi quoque notum esse famâ fortitudinis Godefredum, sed siue amicus, siue inimicus occurrat, se vel suâ virtute tutum, vel non formidatâ alienâ nobilem fore.

Verùm

Verùm orare se vicissim , ut ipse Alexium semel pernosset. Ab eo per scelus usurpatum Græcorum Imperium. Eo auctore novercam suam veneno fatum patri Guiscardo conscivisse ; sibi machinatum esse. Iam Hugoni Magno, & rursus sibi Constantinopolim venientibus quas illatas injurias ? Nempe ab illo Cæsare venefico, cui militatum venerint, pro stipendijs accepta vulnera & vincula. Ita favere Augustum socijs, Imperatorem militibus. In tantum tyrannum, non illatâ vi, sed lenitate peccatum iri. Quare Godefredus Buamundum vel juvaret inferendo bello, vel pateretur violatæ Christianæ majestatis vindicem esse. Hîc Belgadicensi vim, quâ valebat, explicuit. Dicebat, à se, non patrocinium Alexij, sed Terræ sanctæ liberationem esse susceptam. Optimum futurum fuisse, si à DEO data esset ea mens Alexio, ut abstineret injurijs. Quamquam fortè plura de eo dici, quam constare. Sed quidquid commeritus sit Alexius, primum præterita magis reprehendi, quàm corrigi

corrigi posse: deinde intempestivam
nunc esse vindictam. Expeditioni sa-
cræ mirandis modis & à Deo persuasæ,
& à Christianis proceribus susceptæ si
moram Buamundus objiciat jam bello
Græco, nulli magis profuturum, quàm
Turcis. Utervis denique vincat, utri-
usque vires attritum iri, quæ integræ
non nimis futuræ essent in Barbaros.
Ita dimicationem finitum iri aut pœni-
tendâ fortunâ, aut pudendâ victoriâ.
Atqui clarissimum omnium esse victo-
rem, qui non tam certamine, quàm cer-
taminis causâ vincat. Quare celebra-
tatem nominis bello sanctiore quæreret
magni Guiscardi parentis exemplo, qui
non alio magis opere claruisset, quàm
susceptâ Ecclesiæ tutelâ, liberatôque Ro-
mæ Pontifice. Quam virtutem pater
in Occidente probavit, filius in Oriente
haud paulò patientiore campo repræsen-
tet ac superet. Buamundus eò placidi-
us hæc audivit, quòd Godefredum jam
(ob fortunæ mutationem mox expli-
candam) pro rivali amorem habere de-
suerat. Cujus oratione piè victus ambi-
tiosus.

riosissimos spiritus & vindictæ consilia
 Christianæ lenitati subjecit. Tum ad
 Godefredum, si ita cœlo visum est, in-
 quit, ut, qui dudum Alexio bellum in-
 tuli, & nunc injuriâ novâ læsus ad Con-
 stantinopolis portas signa atque arma ad-
 movi, cum eo pacem facerem, id mihi
 jucundum accidit, potissimum à Gode-
 fredo rogari. Concedo pacem Alexio,
 quòd per te, non quòd dignus petat.
 Belga conciliato Buamundo mirificè læ-
 tus, gratulatus est sibi nonnullâ suâ ope-
 râ tantum ducem expeditioni sacræ ac-
 cessisse. Datæ dexteræ & complexus in
 fidei pignus; advocatque Balduinus,
 Tancredus, aliique focij ad idem offi-
 cium. Inde Buamundus, quod & per-
 suaserat Bullionius, cum eo petijt aulam
 Alexij, à quo splendide exceptus est.
 De fœderis legibus deinde conventum.
 Buamundus Augusto clientelam profes-
 sus spondit (a) nihil quod posthac
 bello partum esset de ejus imperio, re-
 tenturum, nisi per eum liceret: omnia,
 quæ reciperentur loca de Turcis, præ-
 ter

(a) *Tudeb. Agnen.*

ter Hierosolymam, Alexij futura. Pollicitus vicissim Alexius fore ut Latinos milite & commeatu juvaret præsens ipse. In hæc verba ultrò citròque juratum à præsentibus & deinceps à secutis Latinis proceribus omnibus, excepto Tancredo. Is & in aulam Alexij venire abnuvit, negavitque se ulli Græco fisurum, semel proditum ab Alexio. Sive ejus animum acriùs irritaverat Græcorum ad Bardarium amnem incursatio, sive Buamundus clàm ita jusserat, nullo promisso Græcis obstrictus, proripuit secum Normannicis copijs ultra Bosphorum in castra Godefredi. Hæc Augustum malè habuere, veritum ne in eo facto lateret fraus aliqua Buamundi. Cæterùm suspiciones & animum de more dissimulavit tacitus. Buamundus quid consilij agitarer, vulgò prædicabatur magis, quàm sciebatur. Palàm vultu præferebat non tantum sacri belli studium, sed & alacritatem & gaudium: quamquam, si diligentius spectares, latentis metoris signa omnia celare non poterat. Officij causâ convenerat Augustam

gustam in Gynæceo, ubi & inter alias matronas exporrecto vultu salutarat Helenam sororem. At perspicax illa mox privatim in conclavi fratrem familiariter interrogavit de causâ ægritudinis, cujus quædam indicia observasset. Tum Buamundus, ultro, inquit, tibi aperturus eram, soror, me ingentem dolorem animo premere. Perpetuâ fortunæ vicissitudine jactatus sum à puero: sed non æquè omnibus meis adversis moveor. Priora illa, quæ nosti, de jacturâ opum, imperij, & tantum non vitæ, animo si non æquo tuli, certè magno superavi: at casu ultimo, tibi adhuc ignoto, conficior. Nempe damnum fortunarum dignitatisque industriâ & virtute refarciri potest: at nullâ reparabilis est jactura Constantiæ. Subjecit hanc regiam virginem à se amatam, & verò speratam conjugem. Quam ut à Rege parente obtineret, ideò se armis in Græcos, & ad principatum esse grassatum. Omnium rivalium maximè sibi metuendum merito visum Bullionium: eo ad bellum sacrum profecto in Orientem, se minori

in

in metu esse cœpisse, ratum illo campo
 quæsitum iri Constantiam à digniori;
 quam laudem sibi non desperandam pu-
 tasset. Interim absentibus fortibus vi-
 ris procum alium esse prælatum. Tri-
 cassinum Comitem Hugonem nullâ bel-
 licâ laude notum, genere quidem pro-
 pinquum Constantiæ, sed quo prohiben-
 dus ejus nuptijs putabatur, virginem jam
 duxisse. Hic cum gemitu ingenti ser-
 monem abruptit. Soror de acerbissimo
 fortunæ ictu queri: fratris animum mul-
 cere, atque erigere: viro fortissimo, nec
 opes in Asiâ, quò tendat, nec aliam spon-
 sam regiam defuturam. Immo nec
 ipsam Constantiam penitus desperan-
 dam, quandoquidem ejus cum Tricassi-
 no consanguineo matrimonium non
 consisteret, solvendumque aliquando
 esse videretur. Cæterum id saltem He-
 lenæ placuit, Godefredum omisâ Con-
 stantiâ, quam alteri nuptam sciret, jam
 cogitaturum de aliâ sibi jungendâ:
 Omnino cupiisset & Buamundus Hele-
 nam placere Bullionio cum alijs de cau-
 sis, tum vel idcò, ne cum rivalem habe-
 ret,

ret, quamcumque amaturus posthac esset. Et Alexius optasset gratiam inter eos juvenes affinitate firmari, dicebátque identidem Helenæ, Godefredum & fratris amicitia, & sororis amore esse dignissimum. Ipsa salutanti per occasionem Bullionio gratias egit de reconciliato Græcis fratre, laudavitque humanitatem & beneficam indolem principis, ubique grates, laudes, & amores promerentis. Bullionius solitâ comitate sine amatorijs delicijs ita respondit, ut magis magisque amaretur. Ornabat summas juvenis dotes urbanitas eò gratior, quòd nihil illo simplicius, aut sincerius; cùm plerique omnes, qui, ut ipse, diu in aulis castrisque versati sunt, multum malitiæ vel nolentes condiscent. Non ille vultu, aut sermone ambiguus; in verbis omnia aperta, candida, & dicentis ori simillima. Interrogatus, quod inerat animo, proferebat; si hoc unum exciperes, quòd, quam virginum præhaberet, sponsamque cuperet, ex illo sciri non poterat. Anna Comnena Alexij filia, elegantis ingenij & ra-

ræ eruditionis matrona , in opere , quò
 res patris Attico sermone complexa est,
 quòdque Alexiadem inscripsit , de sacri
 belli ducibus Latinis , quos familiariter
 novit , quid senserit , prodidit memoriæ.
 Ibi Buamundum tradit anteijsse cæteris
 proceribus fortitudine , & astutiâ , item
 inopiâ : quippe cui urbs nulla pareret.
 Godefredi autem elogium adscribit e-
 jusmodi : Ducem opulentissimum , nulli
 generositate , nobilitate , fortitudine in-
 ferio rem , se duxisse. Alij tamen Bua-
 mundum à Tarenti dominio , quod ad-
 ceptus erat , Tarentinum appellant. Sed
 brevî erit , cùm calliditate atque industriâ
 magnas opes & titulos acquireret : fortibus
 autem factis , an ille , an Godefredus præ-
 ster , campus docebit. Sub discessum in
 Asiam Alexius à proceribus Latinis ro-
 gatus , ut oblatum non semel belli sacri
 imperium capefferet , & jam nunc duceret
 in Turcas. Verùm ille magna quæ-
 dam Græciæ negotia excusavit in præ-
 sens , secuturumque propediem dixit.
 Par heroïum Belga & Tarentinus tra-
 jecto

jecto Bosphoro in castra festinant, & ab
amicis proceribus, universisque co-
pijs summo excipiuntur
gaudio.

LABORUM HERCULIS CHRISTIANI

LIBER QUARTUS.



MA conflati belli illius,
quod à religione bellato-
rum Sacrum, à fortitudine
(a) Heroicum appellatum
est, non Europæ atque A-
siæ modò, sed etiam Africæ arma com-
moverat. Ex ijs sub signa confluxere
tot gentes linguis ac religionibus disso-
næ, ut, quod gessere, si ullum, bellum
humani generis dici possit. Non aliàs
concursum majoribus vel copijs vel ani-
mis, nec gloriosius unquam de Terræ

Aa 2

San-

(a) *Bargaus.*

Sanctæ imperio decertatum. Tantæ expeditioni adversus formidabilem Imperatorum trium, Græci, Turcæ, & Saraceni potentiam pares se tulere nostrates Heroës : cum quibus tantum operum gessit Christianus Hercules, ut hominis unius historia videatur orbis esse totius. Bello Græco in Europâ (quemadmodum memoravimus) intra paucos dies concito & compresso, omnis terror, & belli moles in Asiam Turcâsque versa. Comparatis rebus illuxit profectionis dies: tympanorum crepitus, tubarum clangor, nihil præterea, audiebantur. Equi, arma, tela, ubique in oculis erant. Cum exercitûs ordinati pompa visu dignissima esset, pauci tamen (ut in castris) spectatores, plurimi spectaculum erant. Tantus omnibus ardor vadendi in barbaros, ut non ad incerta belli viderentur ire, sed ad certa victoriæ præmia. Duo præsertim duces Bullionius & Buamundus partim fortibus factis, partim suâpæ fortunâ quâdam ad incrementa gloriæ celebrati converterant omnium animos. Uter vinceret, non dico Turcas.

eas armis (quod utrumque facturum
 non dubitabatur) sed alterum gloriâ, in-
 gens expectatio erat. Urbs Nicæa pete-
 batur: quò procedentibus (a) accessit
 cum magnâ manu Flandriæ Comes Ro-
 bertus, ille opibus & egregiâ virtute
 Princeps, Godefredo Duci olim bello
 Flandrico hostis, nunc amicissimus; me-
 rito suo consecuturus in Oriente nobile
 filij Divi Georgij cognomentum. Co-
 mitabatur fratrem Amazon Flandra Ger-
 trudis nuper Henrici Lovaniensium &
 Brabantia Comitum fortissimi conjunx.
 Quo Tornaci in hastarum ludicrâ incur-
 sione perempto ipsa viri desiderio non
 victa viriles animos ad bellum sacrum
 afferebat. Salute inter proceres, duâs-
 que heroïdes Gundechildem & Gertru-
 dem datâ, quod rei Christianæ benè
 verteret, unâ processere. Accedenti-
 bus ad Nicomediam, urbem illam na-
 talibus & martyrio Divæ Barbaræ, & a-
 liorum Christi Athletarum celebrem,
 comparantibusque antiqua tyrannorum
 tempora cum præsentis Turcarum sævi-

A a 3 tie,

(a) *Aquen.*

tie, miserabile agmen occurrit. Vir canitie venerabilis præibat exiguo militum Christianorum manipulo, qui ex tantâ, quam adduxerat ille, multitudine supererant, Turcici furoris reliquæ. Exceptus à Godefredo mœstus senex, agnitusque est sacre expeditionis præco, sed adhuc belli studio, quàm eventu felicior, Anachoreta Petrus. Narrabat is plerosque militum suorum, transmissò Bosphoro, licèt à se monitos, ne ante ducis adventum progrederentur ultra litoralem Asiæ oram, neu se Turcis longè numero & locorum notitiâ superioribus committerent, impatientes moræ & imperij, movisse castra, præfecto sibi homine imperito. De Turcis quidem castellum Exerogorgum cepisse: at eo successu incautiores, barbarorum insidijs circumventos, & amisso castello magnâ strage profligatos pluribus locis. Quanta illa (prò dolor) fuerit. Ducem in proximis campestribus tristi spectaculo cogniturum. Petri orationem excipere lamenta & fletus militum, quos comites & testes calamitatis habebat.

Bul-

Bullionius Anachoretam benignè complexus, solatúsque milites, lamentis parcere & sequi strenuè jubet, secum Turcis luctum vicissim lacrymáque laturus. Nicomediæ triduo recreata sunt corpora. Ubi cùm cognovisset iter ad interiora Bithyniæ saltuosum, & jugis dumísque impeditum esse, præmisit hominum millia quatuor, qui ad Nicæam usque, viam & securibus aperirent, & collocatis ad diverticula crucibus ligneis indicarent sequentibus. Deinde paulum progressus ipse non potuit non vehementer commoveri tragicâ illâ, de quâ narrarat Petrus, specie. Iacebant in campo ultra Nicomediam innumera Christiani agminis cadavera. Quâ plânitie mons funestior non procul Nicæâ (a) surgebat. Videre erat horrendam struem, demessa capita, perfossas telis calvas, disruptas vertebrae, aliâque humanorum ossium fragmina in cumulum immanem aggesta. Turcicæ crudelitatis monumentum non magis id fuit, quàm irritamentum vindictæ Christiana-

A a 4 nx.

(a) *Anna in Alex.*

na. Bello Heroico initium dedit in Asia Nicææ obsidio, (a) quæ sita in amœnâ uberique planitie, montium jugis caminus surgentibus undique cingebatur, muro duplici, editisque turribus, & opere perquam solido munita. Urbs Bithyniæ princeps, antiquitate atque Christianâ religione quondam nobilis, tunc cum ab Europæis obseffa est, sedes erat regni, quod præpotens Turca Solimanus quæsierat sibi, Christianis gentibus à Tharso Ciliciæ usque ad Bosphorum Europæ limitem subactis. Ipse loco & præsidiariorum suorum virtute fretus aberat; & trans proximos montes copias ingentes contrahebat, totis viribus castra hostium aggressurus. Ita bellum utrimque summâ ope parabatur. Dux (b) Godefredus cum Franco & Flandro ab Oriente pro majore urbis portâ castra posuerat, Buamundus à Septentrionibus. Ad Meridiem locus servatus venturis, Sanctægidiano Comiti Raymundo, Robertoque Normanniæ Duci. Ad Occidentem obsideri urbs nequijt,
câ

(a) *Majo an. 1097.* (b) *Aquen.*

eâ parte munita eximie magnitudinis
 lacu, qui muris ipsis vento incumbente
 illiditur. Advenere & Græcæ copię ad
 quadraginta millia. Præerat Tatinus
 præcitæ naris dehonestamento notabilis,
 verum pravitate mentis deformior; ab
 Alexio datus in speciem dux peritus lo-
 corum, at revera castrorum inspector,
 & sinister rerum interpret. Buamun-
 do non probabatur adventus Græco-
 rum, ac minimè Tancredo, dicenti A-
 lexium, cum præsens Latinis prodesse
 noller, Tatinum misisse, ut absens quo-
 que noceret. At Godefredus auxilia ad
 hoc bellum sine discrimine, Græci an
 Latini essent, admittenda censebat.
 Cupiebat quoque, advenire Alexium, &
 universis copijs imperare. Ita suâ ipse
 virtute securus, suæque dignationis ne-
 gligens, unicè Christianæ rei studebat
 in commune. Dum ad oppugnandam
 urbem fabricantur machinæ, expectan-
 tûrque reliqui proceres, vicina duo ca-
 stella Exerogorgum & Amca, ne quid
 hostile à tergo relinqueretur, obsessa,
 Exerogorgum, quod Nicæâ tertio lapi-
 de

de aberat, facili negotio in potestatem venit. At Amca & loci munimento, & Turcæ præfecti pertinaciâ resistebat. Huc Godefredus ipse divertit è castris cum Anachoretâ Petro, & egregiæ juventutis globo, in quo Tiro, perpetuus ille Ducis comes, præ reliquis sibi nomen fecit insigne. (a)

Tradit facinus ejus (b) Helmoldus, commendaturus, (ut profitetur) fidem omni ævo memorabilem. Godefredus arcem oppugnare adortus caduceatorem præmisit, qui denunciaret præfecto, nî dederet, ultima esse passurum. Ille per captivum Teutonem de muris hanc conditionem deditiois tulit, prodiret utrimque in campum pugnator: si Turca vinceretur, excederent Amcâ Turcæ; sin Christianus, omitteretur obsidio. Placuit Duci singularis pugna oblata, tum ut ne viderentur Christiani Turcis audaciâ aut virtute cedere, tum ut obsidionis moram abrumperet. Habebat in comitatu iuvenem magnitudi-
ne

(a) PRIMORDIA *Tironis Gerardi Auesnatis.*

(b) *In Chr. Slav.*

ne corporis & formâ elegantem Eliam, quem misit in arcem, ut pugnae constitueretur dies. Conspicatus Eliam præfectus eo membrorum habitu, censuit se non habere in præsidio viribus parem. Ergo sollicitare juvenis fidem cœpit magna pollicitus. Sed nihil effecisset, nisi puellæ adjecisset illecebras. Produxit in conspectum filiam formâ insigni, promisitque juveni conjugem, & ditionis suæ dimidium, si pro se descenderet in singulare certamen. Elias oculis pellectus annuit, puellamque ducit, & quod malorum caput, Christi sacra ejurat. Mirabatur interim Dux, quid is hæreret, & in vinculis detentum putabat. At post solemne turpium nuptiarum, rursus clamatum è muro, cum primum paratus esset Christianus ad pugnam, Turcam contra proditurum. Quo in castris audito, mirabili alacritate quisque juvenum se Duci pugnatorem offerre: Petrus Anachoreta sibi eas partes deponere: Dux seipsum pugnatorem dicere. Verum dehortari illi, & affirmare id infra tanti Principis dignitatem futurum;

rum; manus illi viritum non cum præfecto castelli, sed cum Rege aut Imperatore Turcarum conferendas esse. In eo dehortantium numero fuit Tiro ille intimus Ducis, qui ætatis flore verbisque blandus, cum in se convertisset omnium animos, sic deinde loqui perrexit: En, inquit, magne Dux, tot annis, ut mea est ætas, operam navo tibi devotissimus à puero; nequedum tamen à te, quem liberalissimum scio, præmij quidquam petij. Per te liceat aliquid nunc post tot annos petere, & quod primum petam, impetrare. Cum annuisset Dux, oravit, sibi concedi singularis cum Turcâ pugnæ decus. Adolescentis ingenua, & in pulchro corpore gratior virtus, nec non egregij capitis pro omnibus devotio rapuit & Ducis, & aliorum omnium animos. Quibus acclamantibus & suffragantibus hærebat incertus consilij Godefredus. Obstabat caritas ne adolescentem intimum, & cum annis, si non animi, certè virium incrementa capturum, protinus tanto periculo committeret. Verùm Numini, cujus

cujus res agebatur, moventi confusus, tandem votorum compotem fecit, & iussit armis accingi. Simul in equo conspectus est galeâ, loricâ, & cætero instructu splendidus, lætitiâ commovit omnes primò; sed deinde multis incessit pietas, non sine metu & horrore quodam providentibus animo processurum contra mox Turcam mole membrorum ac robore inter suos principem, & cum eo comparantibus tantulum Tironem suum. At Godefredus, præpotentem Deum, inquit, cuius auspicijs militamus, pollicitum à se concessum iri, quidquid nomine suo peteretur, oro, quæsoque, tibi, Christiane pugil, ut adsit, & quemadmodum adolescentem Davidem à Gigantis ferro vindicavit, ita te nobis incolumem hodie, victorémque præstet. Sub hæc præeunte Duce in genua reliqui, obortis lacrymis, provolvuntur opem divinam flagitantes. Procedenti in campum Tironi occurrit desertor Elias, fastu, quàm corpore elatior, sedénsque in equo superbe instructo & tinnulo. Quippe cuius phaleris nova nupta crebra

crebra tintinnabula subligarat, tum ad luxum pompamque, tum ad incutendum equo hostili terrorem. Verum Dux gnarus Turcicarum fraudum, avertendi periculi causâ curarat Tironi equo aures lanâ & pice obstruendas. Datum pugnatoribus liberum spatium, Turcis è muro, Christianis è castrorum aggere spectantibus; intentis utrisque in eventum non duorum modò, sed etiam suæ fortis: quippe victoriam alienam secuturis. Primo equorum concursu hastæ amborum fractæ, & pugnatores ad pedes devoluti. Inde strictis gladijs gesta res. Alternis iectibus corpora appere; nunc cassidis, nunc lorice aditus mucrone rimari, & diu invicem arte artem eludere. Tandem cælo precibus piorum favente, valido Tironis ictu vastus Elias corruit. Conanti à terrâ exurgere incubuit Tiro, & frementem intento in jugulum ense, quis sit, interrogat. Alter alterum tunc non norant, antè non modò inter se noti, sed etiam singulares amici. Respondente illi, Eliam se esse, obstupuit Tiro hominis peritiâ, ac fortunâ.

tunâ. Et, quid, inquit, hic te valiturum putasti, Duci, Deoque perjurum? Tam inaudito scelere obstrictus quomodo adversus nostrum vel minimum stare potuisses? pudeat nunc saltem, pigeatque perfidiæ. Age sis, Numinis misericordiam implora, & veniam ex animo pete; Deo placato & Ducem placaturus. Abrumpe salutari pœnitentiâ fascinum infamem & pristino animo mecum castra repete. Id si facturum spondes, non modò vitæ tuæ parcam, sed etiam fortunæ consulam. •Pristinæ tuæ fidei & amicitæ memor, tibi sororem meam collocabo, & dotis nomine è quatuor urbibus, quas juris mei esse nosti, duas attribuam. Ad quæ ille instinctus furijs respondit se, jam initiatum Turcicis sacris & Turcicis nuptijs non pœnitendis, turpiusque desertorem fore secundum, quàm fuisset primum. Cui Tiro, cùm Christianus vivere nolis, ergo Turca morere. Quo dicto pervicacem obtruncat, & caput in castra relatum ostentat non minùs ad agnitum perfidiæ monstrum stupentibus, quàm ad stupendam

dam exultantibus victoriam. Gratiæ Numini ab universis actæ, spēsque concepta ingens, post tale auspiciū, pijs contra impios in reliquis affuturum cælum. Deditâ arce, Godefredoque in castra ad Niczā reverso, fama victoris adolescentis ubique celebrata est. Subierat omnes cupido spectandi vultum noscendique patriam, genus, nomen ejus, qui tirocinium tam grande posuerat. In horum notitiam cum illis mihi quoque nunc inquirendum est. Eum Tironem fuisse Godefredi sororis filium putavit Helmoldus. Et verò aderant ibi cum patre Cunone Montacuto Comite tirones duo strenui ex Idâ Godefredi sorore suscepti, Gothilo & Lambertus: sed in neutrum eorum vel nomen victoris adolescentis, vel alia, ab Helmoldo ipso suprâ allata, conveniunt. Victorem illum non modò Principem adolescentem esse oportuit, qui plurimum oppidorum dominus esset, sed etiam patriâ potestate jam solutum, qui & de ijs, & de sororis nuptijs statuere posset. Atqui hæc egregiè quadrant in adolescentem.

scientem alterum, indole, fortitudine, Godefredi Ducis necessitudine eximium, & belli exitu magis etiam quam exordio memorabilem, Gerardum Avesnatem. Hunc Aquensis Albertus, expeditionis Heroicæ locupletissimus inter omnes auctor, præsignibus titulis ornat. Hunc egregium, hunc strenuum adolescentem prædicat, &, quod laudum caput est, hunc Duci Godefredo DEVOTUM ET DILECTUM militem appellat, quo elogio nullum alium è belli proceribus ornatum invenio. Ubi vocabulo devotionis, quemadmodum Hel moldus, ita & Albertus utens, videri potest alludere ad Heroicum animum, quo hesterno pugnae discrimini caput suum Tiro prodece exercitûque devoverat. Genus (a) referebat ad antiquissimum Burgundiæ Ducem Gerardum Ruscinonensem è Magni Caroli bellatoribus unum. Qui, cum & Comes Brabantii fuisset, quæ vetus est eis Flandriam ad Scaldim ditio, repetiere hanc avito jure posteris. Partem ejus Lutofam,

Bb

Con-

(a) *Annal. Hanon. Paradin.*

Condatum, aîa que loca possedit Comit-
tis Hannoniæ beneficio Uvedricus A-
vesnæ Dynasta, quo genitus est Gerar-
dus, de quo mihi sermo. Moriens U-
vedricus tres liberos reliquerat, Theo-
dor cum Gerardum, & Addam. Tho-
doricus celebratus Lætiensis asceterij in-
staurator occiderat inter venandum nu-
perrimè, cùm Gerardus frater bello sa-
cro nomen dedit, multùm reclamante
Addâ sorore. Fratrem adolescentem,
formâ, & indole insignem Godefredo
Duci nuper comitem bello Italico mi-
litasse æquiore animo tulerat. At non
ferebat nunc tam longè à se atque à pa-
triâ periclitari inter hostes barbaros he-
redem paterni principatûs unicum, sibi-
que non minùs ob alia carum, quàm
quòd frater esset. Omnes in eo jam a-
gnoscebant dignitatem oris ante annos
pubescentem, mirantésque prospiciebant
virtutem mox se prolaturam, heroïcæ
illi avitæ simillimam. Verùm ajebat
Adda, fratrem esse in eâ ætate valentio-
rem formæ illecebris, quàm firmitate la-
certorum; nec parem adhuc tanto vel
itineri,

itineri, vel labori. Respiceret se tanti-
 sper, ac sororis mœrorem; & priusquam
 longinqui belli discrimen adiret, con-
 suleret Avesnensi nomini, ac posteritati.
 Esse virginem specie ac genere insignem,
 Agnetem, Comitis Anselmi Ribodi-
 montij filiam, quæ eum conjugem op-
 tet, ipsa optanda. Verùm minùs valu-
 it apud Gerardum Agnetis amor, quàm
 Anselmi patris exemplum. Huic ad bel-
 lum sacrum proficiscenti junctus cum
 Engelramo Sanpaulano æquali suo Go-
 defredum Ducem secutus est, & magni-
 tudine animi pensavit ætatem. Nicæa
 fabricatis machinis impugnari cœpta.
 Sed non procedebat res principiò: ob-
 stabat tum præfidiariorum virtus, tum
 loci munimentum, atque imprimis op-
 portunitas lacûs mœnia subluentis, per
 quem auxilia, commeatus, & quæcum-
 que usui erant, invehì poterant. Inter
 hæc nuncius Turca intercipitur, à quo
 rescitum, Solimanum Regem crastino
 die impressionem in castra facturum;
 quæ res ad præsens periculum advertit
 omnium animos. Bullionius cursorem

equo citatissimo misit ad Raymundum Sanctægidianum Comitem, qui Constantinopolim pervenerat, oratum, ut socijs in præsentî discrimine ne desit, cogitè que, ut belli initia cesserint, famam in cætera fore. Rex Solimanus copias dividerat in agmina duo, callido (a) hoc consilio, ut altero oppugnante ad Orientem Bullionij castra, alterum per patentem campum ad Meridiem (neque enim ibi ullum Christianorum adesse aut adfuturum putarat) portam urbis adversam subiret, & per averfam egrediens Bullionium in castris à tergo, nil tale expectantem, opprimeret. Ita Dux utroque agmine petebatur. Verùm nec pugnatorum virtus, nec propitium numen defuit. In tempore & loco advenere auxilia. Evocatus à Godefredo Raymundus, nullâ interpositâ morâ post Ademarium Aniciensem Episcopum advolarat, & cum eo (b) Amazon Hispana. In adventu tantorum hospitum spatium eos salutandi, noscendique in eramicos procures non dedit hostis adven-

tus.

(a) *Rey. Agiles.* (b) *Guib. Abb. Rod. Tolet.*

tus. Vix Raymundus Heroïdem suam in designatum ad Meridiem locum castrorum duxerat, vix tentoria posuerant primo mane, cùm Solimanus è montibus adest horâ tertiâ, & bipertito, ut decreverat, agmine impetum facit. Ipse cum eorum altero validissimo, quâ crediderat se per vacuum campum irrupturum in urbem, objecta Raymundi castra & Hispanum robur invenit. Balduinus Ducis frater animadversâ Hispanorum castrorum simul virtute, simul periculo, socios ad opem ferendam hortatur: Ne expectent, dum ab Amazone nuncius auxilium petens adsit: periculum ipsum, & mutuam fidem, & sociales Divos id poscere. Demerendi beneficio tam nobilem Heroïdem, & Christianæ rei consulendi nunquam parrem occasionem datum iri. Mox procurrens ante signa erigit aciem, junctusque Raymundi, & Amazonis copijs strenuè Solimani impetum sustinet, ac retundit. Interim alterâ parte castrorum Godefredus cum Franco, & Flandro, Buamundusque cum Tancredo, & Gui-

lielmo cæterisque procerum laxatis habenis in medios hostes inveci plurimam eadem edebant. Quo cognito Solimanus opinione falsus, & utrimque repulsus, signo receptui dato in montes se subduxit. Tum inter victores salutatio, & gratulatio facta. Frequentes proceres in tabernaculum Raymundi, & Hispanæ Amazonis convenere. Quæ cum cæteris, tum Balduino auxiliatori suo plurimum se debere professa est. Ibi cognitum eam Eluiram appellari, & nobilissimæ stirpis, atque indolis esse. Filia erat Alphonsi, cognomento Magni, Hispaniæ Regis, quam pater in matrimonium collocarat Raymundo, propter egregiam nuper in Hispaniâ navatam adversus Mauros operam. Vir fortis in conflictu orbatus altero oculo solebat hâc notâ gloriari, quòd nempe, quemadmodum eâ referebat Hannibalem, & Alexandrum Philippi Macedonis fratrem, ita esset relaturus virtute. Lucum fortuna, senem natura fecerat, sed neutra efficere potuerat, ut parùm aut videret mente, aut animo vigeret. El-

ELUIRA

vira

vira, conjugem bello sacro comitata cum
 filiolo Bertramo, & claris Hispanis, Ce-
 retariæ & Cannerensi Comitibus, addi-
 dit forti proposito constantiam, & non
 unum virilis an mi facinus. Guiliel-
 mus Aquitanix Dux ad eandem expedi-
 tionem secuturus, ut haberet unde
 sumptus faceret, Tolosam dotem ux-
 oris suæ Philippæ oppignerarat Raymun-
 do ejus patruo. Hinc Raymundus To-
 losæ pariter, & S. Aegidij Comes appel-
 latus. Post aliquantò, quàm ad Nicæam
 advenit, nunciatur ultimum, quod in
 præsens expectabatur in castris, adveni-
 re agmen Roberti Notmanniæ Ducis.
 Erat Robertus Guilielmi Rufi Anglorum
 Regis frater, is qui Mathildis nuptias
 nuper ambierat. Habebat in comitatu
 Alanum Fergandum Britonum Princi-
 pem, Stephanum Blefensium & Carno-
 tensium Comitem, aliósque claros pro-
 ceres, inter quos eminebat ætate, & ar-
 morum elegantia nobilis Belga, Nor-
 manno Duci carus in paucis, Eustachius.
 Precessere his obviam Godefredus
 Dux, Hugo Magnus, Buamundus.

Raymundus, Robertus Flander, aliique procerum. Nec defuere officio huic Heroïdes Eluira, Gertrudis, Gundechildis, licet hæc ab aliquo tempore minus bellè haberet. Roberto Normanno erat elegans, festivaque indoles, & quidlibet dicendi libertas ingenua. Solebat interserere serijs jocos, & subinde delicias amatorias, in quas non parùm propendebat. Postquam gratulatus est felix belli auspiciū omnibus, ac nominatim Amazonibus, versus ad Raymundum, ac Balduinum Bullionij fratrem, privatim gratulatus ijs adesse conjuges Eluiram, & Gundechildem, quarum & conspectu, & ope impellantur ad magna. Nec illibenter, inquit, viderit hîc regiam suam Scotam noster hic Belga. Cùm id diceret, intuebatur amicissimum comitem, quem dixi, Eustachium. Adverterat Hispana hunc antè exceptum à Duce Godefredo cum tenerioris benevolentia notis. Quisnam is esset, interrogavit adstantem Gundechildem. Quæ cùm respondisset Eustachium esse Godefredi, ac Balduini

duini sui fratrem, Eustachius, audito de se sermone, decorè veneratus Hispanam, si, inquit, in tantâ Heroüm, & Heroidum multitudine mea fama lateret, certè est, cur claritate officientium meo nomini me consolet. Cui Eluira, non potest, inquit, tua fama in obscuro esse, cujus præconem habes Regis Anglorum fratrem, testémque regiam, quam amare te audio, Scotam. Interim Normanniæ Dux intulerat de Mathilde sermonem, deque Guelfone ab eâ digresso, & causis mirabilis ejus secessionis, quas nemo meliùs vel norat, vel tacebat, quàm Godefredus. Normannus Dux, Godefredo quoque delicias faciens, vovebat, ut ei adesset bello, quam maximiè caram meditaretur sibi uxorem jungere. Ad hæc Bullionius, placidè, gravitérque subridens, dixit, nunc sacræ expeditioni totos animos, virésque deberi; eâ perfectâ vacaturum, quibus id cordi esset, de ducendis uxoribus cogitare. Sed nulli injucundior acciderat, quàm Buamundo Roberti oratio, quâ revocabatur ei in memoriam amissa

Con-

Constantia , præsertim adstante lateri Roberti Comite Blefensium Stephano. Quippe quem Buamundus non poterat sine gemitu intueri , nimirum fratrem Tricassini Comitis Hugonis , qui regiæ illius Francorum Principis nuptias occuparat , à se heu frustra speratas. Roberto , & socijs in sua castra perductis , reversus ad prætorium Godefredus cum duobus fratribus , & Anachoretâ Petro familiariùs Eustachio collocutus. Sciſcitanti de Mathilde , referebat Eustachius se convenisse eam , & Heroïdem absolutissimam admiratum. Guelfonem ab hac digressum Henrico se junxisse. Utrumque Italiâ jam exivisse. Gibertum , licet item absentem , ibi tamen adhuc turbare per suos. Romæ (a) in ipsâ Divi Petri Basilicâ visos à se latrones Gibertinos. Hos strictis ensibus identidem superposita altaribus dona eripere : cursitantes in trabibus devolvere lapides in orantes : quemcumque advertant Urbano studere , conari de medio tollere. Cæterum vicinam

arcem :

(a) *Fulch. Carnot.*

arcem teneri Urbani præsidio. Mathildem, licet compescendis Gibertinis intentam, tamen Godefredo auxilia polliceri, & classem parare. Neque animum Heroïdis, neque verò corpus abfuturum à bello sacro, si per res Italix liceat. His audiendis magnam cepit animo voluptatem Dux, nec minorem Anachoreta. Is inter tres fratres quondam alumnos, & discipulos suos, nunc tantos principes, velut triumpho quodam exultabat. Ab ijs impensè, atque adeò ab alijs omnibus colebatur, etiam supra insignes, qui plures in castris aderant, Antistites. Senex, animo, & corpore etiamnum validus, religione, & fortitudine clarus, priscæque gravitatis eximium specimen. Iam spectabat fructum laboris sui inclytus belli præco, collectam immensam bellatorum multitudinem. Fidem superet, nisi Fulcherius Carnotensis vir sacra ordinis, & (a) oculatus testis memoriæ prodidisset. Conflatum ad Niczæ ex omnibus procerum copijs exercitum tantum

(a) *Fulch.*

tum fuisse testatur, quem periti numeri æstimatores censuerint ad sexies centena millia bello valentes milites (non annumeratis inermibus, nec hominibus sacris, feminisve, aut pueris) equi es verò loricatedos ad centum millia pervenisse. Admirandâ multitudine mirabilior etiam fuit multitudinis (a) animorum conjunctio, compositioque castrorum. Disciplina militaris vigeat non magis ducum mutuâ caritate, & vigilantia, quàm exemplo. Ipsi excubias non raro, ipsi alia munia gregariorum obibant. Nescisses, quid dux à milite, quid miles à duce differret. Fratres inter se appellabant omnes, nec fraternum nomen modò, sed & officium usurpabant. Ita habebant communia omnia, vix ut quisquam proprium aliquid diceret. Certatim consilio, ac re juvare, in partes subire, pro se mutuò laboribus, periculisque defungi. Quæ res eo mirabilior, quòd ibi versabantur procerum plures, antè inter se professi adversarios emulatione gloriæ, amorumque certamine

(a) *Baldric, Æmil.*

mine. Quotidie de virtutibus, atque imprimis de pudicitiae laudibus, dicebant ad concionem Episcopi, quorum princeps Urbani Pontificis vicarius Ademarus, Aniciensis Antistes, consultissimus omnis humani divinique juris. Prostibulum exulabat à castris, potissimumque erat de morum honestate certamen. Si quis in culpam inciderat, palàm increpabatur, vel etiam gravius luebat. Manè Sacerdotibus ad aram facientibus milites, ducésque aderant: vespertino cultu cælestem opem implorabant, mediâ quoque nocte vigiles non magis ad excubias, quam ad hymnos, psalmósque concinendos. Claustra religiosa, non castra dixisses. Planè ut nemini mirum videri debeat, tam sanctis armis adfuisse Deum, Deique Matrem. Adeò compositi exercitus tunc nullus dum, nisi Christus, imperator. Dum Alexius Augustus expectatur, aut alius rerum summæ præfuturus eligatur, coibant procères, eoque, quod major pars eorum decreverat, stabatur. Adverterunt minùs procedere obli-

obsidionem ideò, quòd Rex Solimanus urbi suppetias identidem submitteret per lacum. Quibus intereludendis na-
ves ab Alexio petitæ ex fœdere. Im-
peratæ ab hoc portuensibus, & mox
impositæ curribus, terrestri septem mil-
liarium itinere; noctis silentio in castra
pervectæ. Manè in lacu apparuere,
obsidentibus læto spectaculo, obsessis
metuendo. Proceres pro se quisque
objectam murorum partem machinis,
telisque quatiebant. Verùm defende-
bat eos sua altitudo, ac firmitas, visque
pertinax barbarorum. Cæterùm Ray-
mundus cum Amazone Hispanâ tan-
dem strenuâ jaculatione principi urbis
turri labem intulit. Indè molitur in-
gressum; at ponè exaggeratâ ab oppida-
nis lapidum mole prohibetur. Eodem
vineam, arietemque cùm egisset, illi u-
traque injectis ignibus absumpsere. Quo
successu feroces militem nostrum emi-
nus telis, cominus saxis submovere;
propiùs subire ausos uncis ferreis inje-
ctis in murum attrahere, fœdèque lace-
ratos in castra tormentis reijcere. E-
minebat

minebat (a) inter barbaros ferociâ quidam, non viribus modò, sed & membrorum mole habitûque terribilis. Is arcu magnam in Christianis edebat stragem, proceresque provocatos telis, & contumelijs incessebat, desides appellans ac timidos. Ipse, ut erat in muro expositus, à pluribus oppugnantum appetitus, fixusque est sagittis. Verùm hæc clypeo, loricæque impactæ, partim impetu subsilientes, partim trans arma addactæ vi languescere non satîs ponderis habebant ad barbari cædem. Idem, (mirum dictum) vulnerum vitæque contemptor, abjecto clypeo, nudatum pectus telis cunctorum exposuit, non specie magis, quàm desperatione formidabilis. Tum saxa immania in medios oppugnatōres manibus ambabus torquere cœpit. Fidem excederet, nisi, qui vidēre, retulissent. Viginti sagittis ad præcordia hærentibus licet fixus, nec manus à jaciendis saxis, nec linguam à contumelijs continebat. Quo observato, Bullionius suorum nec damna, nec ludificatio-

nem

(a) *Agiles. Tyrinus. Paris.*

nem tulit. Correpto arcu sortitus locum vulneri, barbarum telo per vitalia adacto exanimem è muro in fossas precipitem dedit. Sublato multitudinis gratulantis clamore, privatim facinus Ducis sui, cui nunquam non aderat, Gerardus Avesnas semel iterumque exiliens, plausu & laudibus prosecutus est. Ita erectis omnium ad oppugnationem animis Longobardus è ditione Mathildis præfectus fabrùm, & peritissimus machinator offert se Godefredo, polliceturque machinam, quæ rem conficiat. Promissa vicissim merces quindecim pondo Cartanensium nummum. Ille in opus incubuit. (a) Vineæ tecto declivi structa, munitaque cratibus latera. Sub eam Longobardus cum socijs succedit. Armati collatis viribus machinam ultra vallum ad muros usque propulere, Turcis igni & saxorum grandine frustra prohibere conatis. Longobardus ad fundamenta principis turris adto cuniculo, suffosilos pedetentim muros, ne ante perfectum opus corrumpant,

(a) *Aguen.*

rant, validis trabibus fulcit. Tum far-
mentis, stipulisque suppositis ignem in-
ijci curat. Media nox erat, cum re-
pentè exortus fragor vicino lacu, mon-
tiumque jugis percussus, adeò imma-
nis exsonuit, ut excusso omnibus som-
no non modò obsessis, atque obsidenti-
bus, sed etiam procul agenti ultra mon-
tes Solimano Regi horrorem incussit.
Evoluebatur è ruinâ turris immensa
pulveris nubes, quæ oculis prospectum
omnem eripuit geminatis tenebris no-
ctis. Interim ex urbe naves aliquot in-
ter caliginem solventes, per lacum oc-
culto lapsu tentabant effugere. Verùm
festinatione, atque ipso latendi studio
proditæ sunt. Exaudito remorum so-
nitu, cinguntur concurrentibus Chri-
stianorum vigilum navigijs, agnoscun-
túrque Turcicæ. Inclamatur vectori-
bus, nisi se dedant, passuros ultima.
Trepidi, & paratiores fugæ, quàm pu-
gnæ, cùm nihil admodum repugnas-
sent, Christianus victor injecto unco in
prætoriam insilit. Ibi ex conclavi lu-
gubris ululatus planctu permixtus audi-

tus est. Illatis inter arma luminibus apparuit intus nobilium feminarum turba: inter quas una oris dignitate, & regio gradu præstans, convertit ad se oculos, animúmque victoris. Quem cum supplici gestu, ac voce propitiasset, postulavit se deduci ad eum procerum, quem nuper Augustus Græcus adoptasset. Cojerant in tabernaculum procedere, deliberabánq; de conditionibus accipiendæ in deditionem urbis. Ad (a) eam enim faciendam perpulsi erant terrore oppidani tum ob ruinam principis turris palatio regio proximæ, tum ob fugam Reginæ, quam noctu cum liberis clam excessisse per lacum jam compererant. At hæc, dum fugam intendit ad maritum Solimanum, capta, & in castra perducta sistitur Duci. Regina, ætate florens, sic ad habitum præsentis fortunæ composuerat vultum, ut retineret majestatem. Erant ad latera parvuli duo sortis suæ ignorance securi. Sequebatur nobilium feminarum, & captorum aliorum supplex agmen. Regina

(a) *Tyrius.*

ginæ intranti prætorium in limine Godefredus occurrit. Quem in medio procerum conspicata insignem cultu, habitûque corporis, & Ducem esse ex his signis, vel, si non esset indicatum, intelligens, genibus ejus parvulos duos admovet, atque ipsa advolvitur. Tum, licet, inquit, felicitate tuâ, ac virtute consecutus sis, ut in nos posses omnia, Dux parente Augusto digne, tamen oro, quæloque vicissitudinum fortunæ memor, cogites summum virtutis esse clementer in victos uti victoriâ. Precibus blanditias addituram non est passus plura dicere Godefredus, & remoturus ab oculis procerum barbaræ illecebras nocituras, breviter respondit: Quidquid in eam statueretur, experturam quantum inter Christianam humanitatem, & Turcicam sævitiam interesset. Interim Solimanus Rex, cognorat hesterni fragoris nocturni causam hanc fuisse, turrim regis suæ proximam, magnitudine, atque opere præcipuam, in quâ propugnandâ Turcæ, ut in oppugnandâ Christiani, industriam virésque consumpse-

rant, suffossam corruisse. Id ille pro eo, ac debuit gravissimè tulit. Verùm audio Reginam conjugem suam turris ruinâ contreritam, dum ad ipsum fugam intenderet, captam cum duobus filijs in potestate Ducis Christianorum esse, dici non potest, quo animi sensu fuerit. Amor, & amoris stimulis exulceratus dolor, atque ira, limites omnes excesserant. Inclamat arma, belli proceres orat, atque obsecrat, secum provolent, & conjugis pudori urbique perenti succurrant. Huic bello, Christianorum cladibus prius, quàm Turcarum insigni, finem imponant initio similem. At dum in procinctu est, audit præsidiarijs suis cum turri cecidisse animos, consternatósque urbem dedidisse. Qui malorum cumulus animum Solimani desperatione non minùs, quàm furore implevit. His instinctus de rei summâ statuit acie decernere. Legatos ad Turcarum Imperatorem, Regesque Turcas, & Arabes auxilia petita miserat, omnémque Orientem adversus Latinos armarat. Iam concurrerant ad
cum

eum ducenta Turcarum millia, equites omnes, Satrapæ ac Reguli plures, atque in his Boldagis filius Acciani Antiochiæ Regis. Solimano quidam amicorum auctores erant, ut Arabum suppetias, quæ haud procul aberant, expectaret, ac eorum præsertim magno Satrapæ fideret, viro Gigantææ molis, ac virtutis. Verùm nullam moram interponi passa est præceps ira: præsertim ex quo cognoverat Christianos ab Nicæâ Syriam divisis agminibus petere & eâ divisione exercitum velut ad paucitatem redactum præbere se opportunum cladi. Captam (a) Nicæam proceres ex pacto reddiderant Alexio, non paucis militum frementibus, quòd opulentam urbem, quam se directuros sperarant, intactam Græco reliquissent, unaque cunctos bello captos. Motis castris bidui itinere progressi junctis agminibus ad pontem quendam noctem egerant. Quo transito digressi in diversa. Godefredo ad dextram tendente cum majori exercitûs parte, Bua-

Cc 3

mun-

(a) *An. 1097. 20. Iunij.*

mundus luce adhuc dubiâ profectus cum Normanniæ Duce, & Blesensi, ac Sanpaulano Comitibus, declinavit ad lævam, atque in vallem nomine Gorgoniam descendit, quod siue errore, siue de industriâ, certè inauspicatissimè fecit. Postero die speculatores, qui circum castra in montibus locati erant, sub auroram trepidi nunciant, Solimanum adesse, & copijs immensis circumstantes montes implere. Stupuere proceres, castra turbata tanto tumultu, ut nec consuli ordine duces, nec pacatum responsum arma nunciantibus arma, ipsi capientes, dare possent. Cæterùm Buamundus consuetâ animi magnitudine cum Roberto Normanno equestrem aciem ordinat, quam educat in hostem, pedites in castris relicturus. Præterfluebat locum rivus arundineto inumbratus. Secundum hunc tentoria posita, & currus paribus intervallis circumdati: ibi collectæ feminæ, pueri, peditumque præsidium. Buamundus cursorem citato equo nunciare Godefredo jubet sociorum periculum. Sed

isad

is ad duo milliaria jam processerat, & commodo loco castra posuerat. Eodem ipso mane sub horam tertiam Solimanus adest terribilis cum ducentis millibus equitum sagittariorum, & trepidationem auget in castris. Turcæ primùm imbre sagittarum incessere Christianos, qui metuentes equis suis, spatium sublaturi jaculationi hostili, admissis habenis propius hostem invehuntur. At hi more gentis refugiunt divisi, ac nihilo minùs aversis petunt sagittis insequentes. Quibus in ordines redeuntibus, redeunt & ipsi collecti, sagittisque plurimos equos virósque convulnerant. Quo impetu Christiani equites ad tentoria usque repulsi. Æstuans Buamundus, age, inquit, pugnando potiùs, quàm hortando ascendamus animos. Sic in hostem infestus hastâ provolat, totâque fecum rursus movet aciem. Prælium, quàm prius, atrocius fuit: duces non ad regendum consilio rem solùm adfuere, sed suis met-ipsis corporibus dimicantes subiere discrimen. Normannus Robertus cre-

aturus

Eturus suorum animos auratum vibrans
 hastæ vexillum, & militarem tesseram
 inclamans, Deum hoc velle, Regulam
 Turcam confecit. Nihilo seciùs fra-
 tres Tancredus, & Guilielmus ciebant
 pugnam, certi mori priùs, quàm fuge-
 re. Nec ullus erat effugio locus.
 Multi Christiani ferro cadebant, plu-
 resque æstu perituri erant, nisi feminæ,
 victo malis muliebri pavore, ausæ è
 tentorijs prodire; & inter arma se in-
 ferre, haustam è rivo aquam præbuis-
 sent laborantibus. Tancredi frater (a)
 Guilielmus, satrapam Turcam magnificè
 armatum conspicatus, concitum calcari-
 bus equum egit in eum infestus hastâ:
 nec segniùs in venientem dirigit arcum
 Turca. Præ animi impetu, neuter, dum
 alterum vulneraret, sui protegendi me-
 minit. Guilielmus simul hastâ Turcam
 transfixit, simul ab eo sagittâ perfoßus
 est; quâ extractâ præceps in vulnus ob-
 ijt in oculis avunculi Buamundi. Quo
 cognito, Tancredus dolore percitus dum
 ulturus fratrem in medijs hostibus ful-
 minat

(a) *Aquen.*

minat armis, vitæ ipse prodigus, & immemor sui, undique telis petitus, vix & invitus mortis periculo à Buamundo eripitur. Inclinatâ acie, multi Christianorum terga verterant. Nec ullis fœdam fugam monitis, aut minis poterant sistere duces. (a) Pars hostium insecuta transito rivo tentoria, atque in ijs pedites, & sexum imbecillem invaserat, jussu Solimani uxorem requirentis. Exortus clamor ingens, & ululatus nobilium feminarum, quarum pleræque periculo consternatæ: quædam tamen animi tenaces, potum ministrare pugnantibus pergebant, & in tentoria trahebant fauciorum corpora. Iam ab horâ tertiâ matutinâ ad nonam extracto prælio fatigati Christiani, oppressique multitudine cedebant. Diripiebant hostes castra invalescentibus cædibus, nec ulli parcebatur ætati. Non paucæ virgines teneræ, ac nobilissimæ imminentis mortis horrore offerebant se ipsæ Turcis, ut formarum illecebrâ capti parcerent vitæ captarum. Passim ab-

(a) *Idem Aq.*

abstrahebantur corpora cum spolijs. Multi Militum per tentoria nihil jam pugnae intenti, re desperatâ, ad precatationes versi gemitibus auras implebant, numenque propitiabant confessione meritæ per noxas iræ divinæ. (a) Ecce autem in monte vicino, lucentibus adverfo sole armis, vexillisque, globus equitum (quinquaginta erant) conspectus habenis admissis accurrere. Quem Buamundus circumacto equo speculatus notavit in signis cruces, ostendensque militibus inelamavit, advenire fociorum auxilia, propitium numen in tempore rem Christianam respicere, adesse Ducem Godefredum, stragem, in hostes versurum. Et verò Godefredus monitus per cursorem de fratrum periculo, dolore percitus, universis agminis sui jussis arma corripere, ipse, (b) cum quinquagenis equitibus præcucurrerat; quem sequebatur ex intervallo Hugo Magnus cum sexaginta equitum millibus, & deinceps reliquus exercitus. His observatis, repentina
atque

(a) *Aquen.* (b) *Idem Aq.*

atque ingens lætitia periclitantium Christianorum animos incessit, in spem ex desperatione conversos. Cecinere de integro signa. Qui terga dederant, obliti vulnerum, ac laboris in prælium ordinésque rediere, & quasi tunc primum commisere pugnam. Solimanus rei novitate attonitus principiò, dein animadverso & ipse auxilio Christianorum, recepit se in montem acclivem cum potissimâ copiarum parte, cùmque caprivis & spolijs. Ibi aciem denuò disposuit. Bullionius militi ostendens hostem secedentem, trepidat, inquit, jam Solimanus, nec ulli rei, nisi loco fidit. Captat tumulum, clivi fiducia, non virtutis. Sed magis ardua mœnia habuit Nicæa, ubi cum modò vicinus, Deo adjutore, qui neque hîc deerit nobis. Ita suos hortans copias ordinabat. Ipse (a) in dextro cornu stetit cum fratribus Balduino, & Eustachio, amicisque Franco, Flandro, Avesnate: in sinistro Buamundus, Normannus Robertus, & Blesensis: quibus adequitabat

To-

(a) *Tudeb. in gest. Fran.*

Tolosanus, Episcopo Podiensi cursum ad hostium terga flectente. Universi, velut conspiratione quâdam animorum, signo crucis frontibus impresso, & tesserario illo clamore, DEUS VULT, sublato, in hostes invehuntur. Pugna Christiana stabilis & suo, & armorum pondere incumbentium in Turcam: concursatio, & velocitas illic major quàm vis erat. Continuo versa belli fortuna, non sustinentibus impetum barbaris. Bullionius ordines perturbatos irrumpens (a) cum amico Hugone, Solimanum fœdam in fugam conjecit, de Regno, & recuperandâ conjugē Reginâ desperantem. Victor barbaros (b) ultra sua castra palantes secutus ad sex millia passuum partim cædit, partim capit potitus castris eorum, omnique annonâ, & impedimentis, ac magnâ vi auri argentique. Insuper prædas recepit & captivos, atque in ijs puellas nobillissimas, quas ad libidinem abducebant. Cæsi in prælio Turcæ ter mille: Christiani quater mille ceciderant

(a) *Guib. Abb.* (b) *Aquen.*

rant. Bullionio ad arundinerum castrorum revertenti fit ab omnibus gratulatio, quod socijs in extremo discrimine, quod festinus, ac primus adfuisset. Nobiles feminæ præsertim præsubitâ lætitiâ vix sui compotes, liberatori grates egere. Causâ deinde attentâ periculi, in quod inciderant, & quo Bullionij virtute evaserant, primùm decretum in commune est, ne in posterum dividerentur agmina; deinde actum de summo uno duce eligendô, qui universis providentiâ, & belli scientiâ consuleret, saltem quoad veniret Augustus Alexius, qui se affuturum promiserat. Godefredo viro illi, cujus operâ servati ac victores erant, nullum præferendum putarunt. Qui, cùm in superiore loco, unde posset conspici, constitisset, omnes conversis in eum oculis, clamore, ac favore ominati sunt felix, faustumque imperium. Bellator non minus modestiâ, quàm fortitudine spectatus honorem sic accepit, ut videatur exercitum auctoritate magis, quàm imperio rexisse. Quâ moderatione a-

nimi

nimi factum opinor, ut apud scriptores variantes in obscuro sit, an belli Imperator unquam extiterit. Verùm minimè pœnitet me eorum sententiæ esse, quibus placet fuisse. Eam opinionem, præterquam quòd nobilitavit viri claritas & admiratio, suadet allatum suprà visum, quo futurum illum DUCEM, ET PRÆCEPTOREM POPULI CHRISTIANI declaratum erat. Ac ne veterum testimonia deesse dicantur; duos profero, Albertum Aquensem Bullionij æqualem & Helmoldum. Scribit Helmoldus omnes duces, & copias Christianas ad iter Hierosolymorum egressas duce fortissimo Godefredo; Aquensis verò præter visum suprà memoratum refert ea de Godefredi imperio verba fratris Balduini in exorto mox hunc inter & Tancredum certamine recitanda, ex quibus conficiatur Godefredo summam belli sub Gorgonium prælium esse delatam. Postquam (a) Christianæ copiz triduo in valle Gorgoniâ recreatæ, imperator Godefredus iter pronuntiari jubet.

(a) *Aquen.*

jubet. Transcursâ Bithyniâ in Pisidi-
am ventum. Ibi dum viæ compendi-
um quæritur, in regionem rupibus a-
speram, arentem, & inhabitabilem in-
currere. Fervebat mensis Iulius: nihil
aquæ, nihil annonæ inveniebatur. Si
quæ spicæ apparuerant, vellebantur
certatim, crudæque ingerebantur sto-
macho. Ita æstu, siti, fame arefacta
corpora non hominibus modò, sed &
pecori. Equi, canes, accipitres patu-
lo ore captantes auram passim extincti.
Pro jumentis mortuis plurimi coacti
bobus, aut magnis ejus regionis arjeti-
bus, aut canibus uri. Plusquam quin-
genti mortales siticulosis faucibus hian-
tes interjere. Feminae plures ex dolo-
re immaturos fetus enixæ, & in am-
plexu extinctæ prolis immortuæ. In
hâc cultûs humani solitudine, & suo-
rum calamitate eluxit ducis Bullionij
pietas. Irrequietus circuibat agmen,
jacentes sermone erigebat, & manu.
Nunc ad prima signa, nunc in medio
agmine, nunc in postremo spectabatur
multiplicato labore velut multiplex.

Quin

Quin communi rei consulebat, privatæ immemor, cùm diceret se imperatorem non tam exercitui, quàm exercitûs causâ præesse. Ipse potu abstinens, de suo penu, quæ sibi providerat, erogabat in egentes. (a) Imprimis imbecilliori sexui magnâ cum curâ suppeditavit annonam. Tandem perventum ad locum, ubi fons ex opaco specu manans largis aquis arens solum irrigabat. Verùm & hîc, dum alij alios antevertere festinant, & ingurgitant se haustibus immodicis, non pauci periere. Postquam rupibus confragosis egressi sunt, læta se regio aperuit, aurâ salubri, & arborum umbrâ vim solis identidem levantibus. Ventum ad Antiochiam Pisidiæ, quàm Minorem dixere collatam cum Antiochiâ Syriæ regiâ urbe, quæ petebatur. Ibi Godefredus, Buamundus, aliique proceres cum pleroque exercitu stativa habuere, dum interim præclari duo juvenes Balduinus Godefredi frater, & Tancredus (b) singuli cum suâ militum manu præcessere in Ciliciam rei benè

ge-

(a) *Lannet.* (b) *Fulch. Tud. Aquen.*

gerendæ studio. Consilium erat, dum exercitus ad Antiochiam Minorem transper quiescit, iter explorare, ulteriores urbes tentare, fortunamque experiri, quæ admodum varia, & mirabilis obtrigit egregio æmulorum pari. Balduino frater Bullionius, & Tancredus avunculus Buamundus non modò gloriæ, sed & incitamento erant ad gloriam. Godefredi virtus ante in Occidente, quibusdam identidem involuta velut nebulis, jam in Oriente, tamquam in bono lumine collocata splendebat, spatiumque se dignum invenerat. Buamundus dudum celebre nomen obtinebat in Græcia. Nec tanti faciendum, nec Godefredo invidendum ducebat titulum imperatoris belli, dum ipse Græciæ obtineret imperium. Ejus neque spem deponebat, & præsens Tancredus possessionem Græcarum Asiæ urbium promittebat, ac belli jure quæsitum ibat, nullo (ut prædiximus) Sacramenti vinculo obstrictus Alexio. Versabat Balduini, & Tancredi iuvenes animos certamen, incitabátque vir-

D d

tutem

tutem cupido primæ laudis. Tanquam uterque ducis, & gentis suæ decus sustinendum dexteris suscepissent, ita præcessère exercitui reliquo. Utrique modicum agmen, sed animus ingens, acèrque ad magna stimulus perspecta invicem fortitudo. Septingentos equites ducebat Belga, quingentos Apulus, ambo peditum cohortes aliquot. Syriæ ob-
jacet Cilicia, regio pertransitis, quibus cingitur, montibus amœna, & campestris. Huc juvenes iter intendere primum juncti, deinde diversi. Balduinus per dorsum montium movit, Tancredus, quæ inter eos angustus aditus patet. Ibat Balduinus per jura aspera, arida, ac deserta, ubi ingens labor, rerumque penuria. Equi pabulo deficiente vix sequi viros, nedum vehere poterant. Et progredi pigebat, & regredi ad exercitum jam tridui itinere distantem. Post multos circuitus tandem eluctatus ex anfractibus evasit in verticem montis. Inde prospicienti primum apparuit eminus mare: cis littoralem oram campestris regio: in eâ mediâ nobilis urbs

Tar-

Tarsus Ciliciæ caput, quam Cydnus amnis Alexandri Magni periculo memorabilis interfuit, Balduini quoque nobilitandus casibus. Circum Tarsi muros fixa tentoria obsidionis speciem præbuere. Interrogavit Balduinus peritos viarum, ac regionis, quinam oppidani, & à quibus obsessi viderentur. Responsum, Tarsi incolas religione Christianos esse, eosque Armenos, & Græcos, sed à Turcis subactos, armisque exutos mercatui solum, & agriculturæ operam dare. Quæ spectentur circum urbem tentoria, non esse obsidentium hostium castra, sed apparatus Turcarum, qui oppidi præsidiarijs itidem Turcis auxilio venerint adversus imminentem Europæorum exercitum. Balduinus vera hæc ratus hærebat consilij anceps. Formidolosum erat de monte descendere cum paucis in campum multitudine barbarorum infessum. Verùm, inopiâ premente, formidinem virtus vicit. Si moriendum, satius visum ferro hostili, quàm fame interire. Ergo contrà vadit, & contractis cohor-

tium signis ipse ante agmen erigit aciem. Descendentibus ijs, visi mox, qui in castris erant, equos frenare, conscendere, in ordines flectere, arma expedire, tubis tympanisque ex urbe canentibus. (a) Aciei utrimque ordinatæ præibat suus ductor specie corporis egregius. Alter alterum Turcam putabat, uterque fallebatur. Nempe (ut sunt humani casus) qui è castris veniebant, Itali ducem sequebantur Tancredum, qui commodiore viâ Ciliciam ingressus, coactis ex agrò prædis, & viris, urbem Tarsum obsidione cinxerat. Is quoque Belgas, in quos ducebat, Turcas esse existimabat obsessis opem ferentes. Nec soli fallebantur congressuri Belgæ, atque Itali: decepti etiam, qui in mœnibus stabant, Turcæ; Belgas venientes arbitrabantur esse Turcarum suppetias sibi adversus Tancredum missas. Ergo insultabant abeuntibus Italis inclamantes aciem suæ gentis adventare, hanc se expectasse, & siqua cum Tancredo de deditione pepigerant, moræ trahendæ

(a) *Aquen.*

trahendæ causâ fecisse: nunc pacta gladijs rescissum iri. Simul tubarum, & cornuum terrifico sono Tancredum è muris insectantur. Ita omnia plena erant erroris. Iamque Balduinus, & Tancredus, exhortati utrimque suos, Christianis & armis, & animis usuri veniebant ad manus, cum in vexillis, & scutis Christianum insigne cruces animadversæ. Murmur primùm: deinde restitere duces, galeisque apertis, alter alterum agnoscentes, inter se complectuntur. Agmen utrimque cum festivo clamore admotum. Salutant sacri belli commilitones, amicos, & quo nomine inter se appellabant, fratres. Semotis telis ruunt in amplexus, incredibili quâdam voluptate, lacrymisque perfusi, & gratulantes, quòd Dei beneficio mutux cædis præsentè periculo defuncti essent. Iunctis agminibus, ad urbem redeunt spectaculo inexpectato horrentibus Turcis. Sub nocte in castra conjungunt, tanquam pariter obsidionem continuaturi. Hospitibus famentibus militare epulum instruitur. In

perpetuum, ut arbitrabantur, concordia, paxque firmata: verum fortunæ invidiâ admovebatur egregiæ juventuti civile bellum. Postridie mane Balduinus cum Belgis propius urbem spectans, in culmine principis turris advertit erectum Tancredi vexillum. Miratus, quid id sibi velit, interrogat. Audit Tancredum post dies aliquot obsidionis cō compulisse oppidanos minis, & terrore nominis Buamundi, ut vexillum suum in eam turrini acciperent, signum deditionis futuræ, eâ conditione, ut sub Tancredi tutelâ interim essent, donec adveniente Christiano exercitu in Buamundi jus, potestatemque concederent. Belgis id displicuit. Aiebant, communi militiâ præcipuam minimè esse Buamundi causam. Injuriâ imperatoris Bullionij, atque exercitûs, Buamundo privato homini Tarsum pacto esse concessam. Se imprimis admitteudos in partem recipiendæ opulentæ civitatis, qui obsidionis consortes essent. Stimulatus Balduinus militum querelâ, fratrisque caritate, Tancredum

conve-

convenit. Apparebat ex vultu esse commotum. Principiò postulanti fieri se, ac suos participes prædæ & gloriæ, negavit Tancredus, quòd prior urbem obsedisset. Inde altercatione congressi certamine irarum eò controversia deducitur, ut jam propè à capulo manus abessent, læto Turcis spectaculo. Ad erat Balduino consanguineus Comes Burgius juvenis forti, sed placidiore ingenio. Hic, aliique prudentiores componere jurgium conantur. Gratiæ reconciliandæ hæc via proposita est, ut per missos caduceatores ab oppidanis, uterque cognosceret sub utrius ditio- nem mallent urbem suam venire. Assensus est Balduinus fiduciâ fraterni nominis ac sui. Tancredus non modò id probavit, sed etiam expetijt, probè sciens, quomodo animati erga se Tarsenses essent. Habebat in urbe Armenum amicum, cujus operæ fidebat, jam antè fidelem expertus. Is Armenus convocatis oppidanorum primoribus: Ecquid videtis, inquit, Tarsenses, qualis sit Balduinus in socios? Quem nunc,

privatum adhuc, viribus, & audaciâ, a fastu regnantem cernitis, quem adversus vos deditos fore putatis? Tum dilaudans Tancredum exposuit, quomodo is primo, quo advenissent, die virtutem probasset. Turcarum agmen accurrisset, Tarsensibus ad spectaculum effusis, murisque complentibus: fugatos hostes: oppidanos admiratione captos virtutis Apulorum, atque imprimis Tancredi ducis. Deinde, cum de conditionibus tradendæ urbis actum, expertos ipsos in legibus pacis fanciendæ mitissimum victorem. Adhæc meminissent Tancredum esse filium sororis Buamundi summi omnium viri, qui famâ longè ante hanc expeditionem in Græciâ, Syriâque claruerit bellicis in Alexium facinoribus, atque victorijs. Eum esse Buamundum, qui Græcum imperium jam tunc armis tantum non sibi subegerit, & verò nunc subactum eat. Quare Tarsenses, sub cujus ditionem aliquando venire necesse sit, nunc ultro veniant: Tancredo Buamundi vicario se committant, & promptâ deditione

tione gratiam victoris concilient, cujus in potestate mox futuri sint Græci omnes. His moti Tarsenses, quibus nondum sat notus erat Bullionius, elegere subesse Tancredo. Excanduit Balduinus caritate in fratrem, cujus auctoritatem contemni, violarique majestatem censebat. Tancredum ardentibus oculis intuitus, coram eo ad oppidanos adhibito interprete orationem habuit, quam Aquensis Albertus memoriæ prodidit; unde de Bullionij supremo belli imperio constet. Buamundum, & hunc Tancredum, inquit, quos adeò veneramini nunc, ac timeatis, discite ex me, nequaquam esse summos procures Christiani exercitus, nec fratri meo Godefredo vel dignitate comparandos, vel virtute. Frater enim meus Latini Cæsaris sororius, Græci Augusti adoptione filius (a) dux est, princepsque militiæ totius Galliæ, & Imperij Romanorum; quod hereditarium jus à majoribus suis accepit. Is ab omni colitur exercitu. Ejus di-

ctis

(a) *Aquen.*

etis summi intimique in omnibus parent ; quippe qui CAPUT ET DOMINUS AB OMNIBUS ELECTUS, CONSTITUTUSQUE SIT. Jam virtute quid possit, si mavultis experiri, quam me auctore declinare, certum habete vos, ac vestra ferro, flammâque deletum iri, nec Buamundum, nec hunc Tancredum eripere vos posse exitio. Neque verò Tancredus, quem adeò suspicitis, hodie manus nostras evadet, nisi vexillum ejus è turri, ubi id ad decus suum, fratrisque mei dedecus locavit, deturbetis, portasque nobis aperiendas curetis. Quòd si in animum inducitis petitioni meæ, ut par est, facere satis, honore. & officijs vos prosequemur, efficiemúsque, ut præ reliquis omnibus conterminis imperatori fratri meo accepti honestique sitis. His magno spiritu à Balduino dictis, Tarsenses deliberavère tant sper, quid responderent. Videbant urbem suam v. etoribus in medio positam : instare Balduinum juvenem ardentis animi : hujus partes esse poriores ipsum Tancredi silentium confessio tacita erat. Ergo

con.

consilio, quod prius non Tancredi amore, sed Buamundi metu inierant, mutato, amicitia, & fœdere cum Belga junguntur iisdem conditionibus, quibus antè cum Italo. Illicò vexillum Balduini acceptum in turrim, Tancredi amotum, & in locum palustrem procul abjectum. Apulus spectaculo confusus indignatusque, impetum animi vel temperavit, vel dissimulavit in præsens. Vidensque motam contentionem inter suos ac Belgas, qui & numero, & oppidanorum favore valentiores erant, solutis castris discessit, & ad vicinas urbes alma vertit. Verùm ea certaminis mora non finis fuit, gladijs bonâ fide non conditis. Balduinus, cum toto comitatu admissus à Tarsensibus intra muros duas turres obtinuit, reliqua propugnacula retinente Turcico præsidio, donec Godfredus adveniret. Post die venero ad Tarsum milites trecenti Apuli, qui à Buamundo ad Tancredum mittebantur. Quem cum inde profectum audissent, Balduinum orabant, ut mœnibus reciperet nocte oppressos, de viâ fessos,

&

& commeatûs egentes. Veritus est Balduinus insidias. Re cum Magistratu collatâ, prohibentur ingressu. Cæterùm cibaria in sportis demissâ in cœnam. Ante portam urbis Apuli labore, cibóque graves sine metu corpora somno straverant in pratis, cùm noctis silentio Turcæ trecenti primores præsidij, deploratâ spe retinendî oppidi, comparatis clàm ad fugam rebus, partim amne avecti, partim patefactâ portâ egressi offendunt passim jacentes. A barbaris cædes nullo negotio velut muti pecoris facta. Ubi illuxit, Christiani oppidani veniunt ad mœnia, visuri an è pratis discesserit Christianus miles. Hic insolenti spectaculo percelluntur. Apparuit miseranda cladis facies, campus constratus cadaveribus, sanguine fœdata gramina, effusa telis ilia, præfecta capita, manus pedésque dispersi. Deinde, cognitâ Turcarum ex oppido fugâ, non dubitavere, quin ij facinoris essent auctores. Continuo accensus irâ populus tumultuatur, arma corripit, ulturus innocentûm sanguinem.

nem. Primum fit concursatio ad turres, ut Turcæ, si qui supersint, dolori litentur. Tubarum sonitu, atque ingenti vociferatione seditio crebrescit. Balduinus tanto motu, cujus causam ignorabat, stupens, at interritus, è turre, in quâ pernoctarat, devolat, & per mediam urbem equo raptus tumultuantes abstinere clamoribus, & armis jubet, & in sua redire cæta, initi foederis memores. Sed magis, magisque accenditur seditio. Adhuc reveritus Balduinum populus magistratui urbano cædem Italogum imputat, quòd eos exclusisset hospitio. Ergo fit impetus in urbis primores. At in Balduinum increpantem mox conversi clamant ipsum auctorem inclementis consilij, & inhospitalis sævitæ, quâ innocentes proditi sint hostibus. Mox tela intentata minaciter; deinde tot sagittis appetitus, ut verbis nihil proficiens, recipere se in turrim coactus sit. Circumstrepere multitudo: ille è superiore turris parte per fenestras ad plateam versas silentium postulare; quo denique impetrato

fidem.

fidem fecit se à Tarsensibus jurejurando adactum, ante adventum universi exercitûs nullum militem in urbem acceptum iri. Nulli, quàm sibi, flebilius optimorum commilitonum exitium; nulli gratiorem fore vindictam. Secum irent auditores, & ultionem in Turcas, siqui in propugnaculis reliqui erant, expromerent. Placatus his Balduino populus. Mox, eo ducente, in turres impetus factus, quibus expugnantis ducenti inibi Turcæ obtruncati. Verùm major tempestas ingruerat foris. Post paulò Balduinus ex muro fortè oculos ad mare converterat, cùm (a) ibi classẽ videt mole, & opibus mirandam, vix tribus passuum millibus Tarso distantem. Allabebatur navium diversi generis, atque operis multitudo. Vela magnifica, vexilla nitentia versicolore picturâ, mali raræ altitudinis obducti auro solis radijs refulgebant. Prætoria tabulatis elata castelli specie, & opibus gravis sequebatur non sine gemitu maris, & labore ventorum. Ap-
puli

(a) *Aquen.*

pulsi ad portum vectores in arenam magno numero exscendêre. Balduinus hos esse Turcas ad vindictam occisorum accitos censuit. Ad arma conclamatum ; equites, peditésque certim ad litus procurrunt. Ibi frequentes classarij exportatas è navibus ingentes opes inter se partiebantur ; qui, nostris conspectis, strenuè arma itidem corripunt. Balduinus intrepidus percunctatus eos, quinam essent, & unde domo, quòve duce advenirent. Respondere feroces, sibi domum naves esse, vitæ genus piraticam. Hanc jam ab octo annis agere. Classi præesse præstantem bello virum Vinemarum nomine. Hujus ductu sæpe impetum in naves, nec rarò in litora fecisse, multis victis adhuc invictos, plurimisque spolijs ditatos, quæ modò inter se diviserint. Balduino perinde visum est, piratæ, an Turcæ advenissent. Interrogati insuper illi de natali suo, sciscitatos stupefecere responso. Dicebant, se ex ultimo Occidente profectos gente Belgas esse, alios Antuerpiæ, alios in Flan-

Flandriâ, alios in Hollandiâ, ac Frisiâ natos. Miratus Balduinus pari eos admiratione affecit, cum fecit certiores, se ac suos esse ipsorum populares Belgas, patriâ nuper egressos, ut sacro Bello sepulchrum Christi barbarorum jugo liberent. Crevit utrimque admiratio, cum accessit Archipirata vir specie corporis supra barbarum eminens, dignusque, qui alijs præssset. Is audito Balduinum Belgam esse, & Eustachio Bononiæ Belgicæ Comite natum, præ gaudio exclamavit herilem illum esse filium, sibi monstrari flagitavit, se ex ditione, & domo inclyti Principis Eustachij Bononiensem Vinemarum esse. Ingenti gaudio datis dextris fœdus inter eos initum, junctâque hœpitia. Invitatus ad urbem Vinemarus, classe in tuto locatâ, exportatisque sarcinis, Tarsum cum suorum plerisque concedit. Exceptus domo hilariter Balduini convivium celebrat. Inter epulas Archipirata cogitabat ejusdem nationis atque adeò religionis homines convenisse, sed diversissimum vitæ genus adhuc secutos:

cutos:

cutos : alios milites sacros, alios piratas
 esse. Sensim magnæ indolis viro di-
 splicuit piratica, quantumvis summas
 opes ex eâ nacto. Animum quæstüm-
 que illum deponere statuit, & prioris
 vitæ pœnitentiâ sacram militiam pro-
 fessus, cum classis juventute, quantâ-
 cumque posset, Balduinum sequi, quem
 sibi principem nascendi conditio dede-
 rit. Suos ad idem cohortatus, pluri-
 mis persuasit. Ita Balduinum novâ læ-
 titiâ perfudit. Inde arctiore amicitia
 devincti consilium ineunt, junctis viri-
 bus vicinas urbes tentandi. Præsidio
 urbis Tarsi ex navali exercitu trecenti
 relictî, ex Balduini copijs ducenti. His
 compositis, cum reliquo milite proce-
 dunt ad vicinam urbem Mamistram,
 quam à Turcis teneri putabant, sed o-
 pinione fallebantur. Haud procul mu-
 ris spatiosum erat viridarium arboribus
 frequens. Ibi locata tentoria; equis,
 dum viri corpora curant, per vicina
 prata pascuntibus. Ecce Mamistrâ ur-
 be sagittariorum manus effunditur, &
 militem Belgam in tentorijs infesta pe-

E c tit.

tit. Mox sequitur indidem ex urbe quingentorum equitum loricatorum agmen, ductore insigni, qui per viam suos ad ulciscendum Balduinum hortabatur. Nec ostendit prius bellum, quàm intulit. In castra Balduini ruens, & nomine eum ad pugnam vocans, antequam arma corripere posset Belga, jam non paucos prostraverat. Ex voce, atque ex armis agnitus Tancredus, qui Mamistrâ nuperrimè potitus, monitus adesse Balduinum, & increpitus erat à consanguineo Richardo juvene feroci, Salerni principe, segnem appellante, qui otiosus, & inultus adstantem Balduinum spectaret, à quo ei Tarsus opulenta urbs esset per summam injuriam erepta. Si vir esset, irer, & de merente pœnas expeteret. Aboleret vulgatam jam in Ciliçiâ opinionem, Italos Belgarum experiri nolle vires, declinare congressum, & horum metu arma circumferre, scilicet metuenda oppidulis. Quid multa? Nihil verbis opus hîc esse, aut ad Tarsum fuisse. Re ipsâ patefaciendum, quantum Itali alijs præstent. Vilia jam esse

esse spolia de Turcis : glori flores manubias, & pœnas de hostibus Belgis esse sumendas. His instinctus Tancredus, tametsi indole, & prudentiâ moderatus, incaluerat æmulatione Balduini. Agganè: omnes eo duce citatis equis provolarant ad vindictam. Iam Belgastoto, quantum spatium erat, viridario effusos egerant, clamitante Richardo, vicinus perfidos hospites, imbelles hostes. Iam sciunt, longè aliud esse lenocinari Tarsensium timidorum auribus, aliud pugnare cum viris. Sed hæc gloriari non diu Richardo fas fuit. Illicò Balduinus cum Archipirata suo, consanguineisque Burgio, & Tullensibus, nec non Comite Claromontano correptis armis in equos insiliunt, collectoque palabundo milite in Tancredum irutubis clangentibus properant. At Balduini manus impar numero futura erat, nisi Archipirata in tempore arma junxisset, ignorante Tancredo. Nunc æquatis copijs acre prælium, licèt tumultuarium, gestum est, multis, ubicumque sibi occurrerant, utrimque cadentibus.

Ecce 2 tibus.

tibus, Non aliàs acriùs cum Turcis, quàm ipsi Christiani tunc inter se ferro dimicavere. Principes utrimque pugnam ciebant ab Italis Tancredus, à Belgis Balduinus. Quærebat alter alterum perruptis ordinibus, nec inveniebat, irâ tumultúque præpediente, aut veriùs cælesti numine par nobile procerum Christianorum perire prohibente. Cæterùm Vinemari egregia fides, ac virtus eo die enituit. Absque eo fasset, Balduinus in ultimum discrimen venerat, In Richardũ multa gloriantem facit impetum cum ferocissimo piratarum globo. Cujus audaciâ accensi socij, pulsiq̃ue Itali. Iunctas eorum vires Tancredus sustinere non valens, multis amissis ad oppidum festinavit se recipere. Persecutus eum Balduinus ad usque Mamistræ portam. Ibi in pontis angustijs involutus, Balduini socius Claromontius, à Tancredo capitur. Vicissim exceptus à Belga Salerni princeps ille pugne suator Richardus. De ambobus captivis solliciti duces doluere, atque etiam

tiam tamquam pro cæsis luxere. Mitigatis utrimque eo luctu animis detu-
muere sensim odia. Postridie missi o-
ratores de finiendâ discordiâ. Burgius
egregiâ prudentiâ Comes utrumque
ducem hortatus seorsum, memores es-
sent professionis sacrae militiæ, & fra-
terni nominis, quod ambo violassent:
neu iræ magis consularent, quàm famæ.
Juvenes magnanimos non tam injurijs,
quàm æmulatione gloriæ ad arma sti-
mulatos. Pugnandum sanè, sed in
barbaros. Christianis proceribus inter
se certantibus, præmia Turcas, qui qui-
escant, occupaturos. Vos potiùs, in-
quiebat, partiti, quos barbarorum hosti-
um impugnetis, probate victorijs, uter
utri præstet, vel magis neutrum alteri
cedere. Ita pax amico auctore sancit-
ur. Captivi utrimque, & spolia resti-
tuta: æmuli juvenes, facti non tantum
pœnitentiâ, sed etiam pudore faciunt
invicem satis, & interjunctis dexteris,
complexûque, & osculis iræ noxam elu-
unt, gratiâque redintegrant, polliciti
nunquam inter ipsos, nisi gloriæ, fore

certamen. Sub hæc disiunguntur. Tancredus Ciliciæ loca expugnanda sumpsit. Reddatur ejus virtuti testimonium, quâ istic urbes, quotquot Turcarum ditionis erant, partim vi, partim metu subegit. Balduinus interim exercitum Godefredi fratris repetere festinat, Vinemaro gratijs actis ob navatam insignem operam. Hic classem repetit, com meatûs exercitui parandi causâ, at varium fortunæ ludibrium experturus. Revocabatur ad exercitum fratrum Balduinus allato tristissimo nuncio de ferali, funestoque casu, qui Bullionium exceperat ad Antiochiam Minorem primo, quo is venerat, die. Et paulò antè Augusto mense mirum in cælo signum Christiani juxtâ, Turcæque conspexerant. (a) Fulgor terribilis longo tractu candicabat ingentis gladii specie, atque in Orientem cuspidem protendebat. Precati omnes, ut omen in hostes esset, haud multò post scivere, in quem sæviisset mucro fatalis. Res non modò atrox, sed intellectu anceps,

&

(a) *Fulcher.*

& obscura narrabatur, Bullionium in nemore simul à belluâ, simul gladio prostratum esse, percussore incognito. Rei series sic habebat. (a) Europæus exercitus, ex molesti itineris labore recreaturus se in lætis Pisidiæ campis, ad Antiochiam substiterat. Alij venatui, alij alijs oblectamentis indulgebant, cum primâ ferè vespërâ totis castris repente turbatum est. In conspectu nemorosum erat frutetum, ut amœnum visu, ita periculi plenum. Nemo accolarum eò diudum audebat accedere. Inde primum edita feralis vox, quam vicinis montium jugis percussam non pauci è castris observarunt, mirantes, atque inter se, quænam ea esset, percunctantes. Certè humanam non esse declarabat immanitas soni. Sub hæc strepente nemore erupit miles pedester, pallidus, tardusque vulnere, quod in femore acceperat. Cum ad eum interrogandum à proximis concursus esset, hominem anhelitus, vóxque defecerat. Cæterum ex signis, quæ dabat,

Ec 4 nemi-

(a) *Aquen.*

nemini relinquebatur dubium, quin grandius aliquid, quàm quod passus erat, horreret. Relatâ identidem ad frutetum manu tandem adjecit, illîc à belluâ periclitari Godefredum ducem. Vix à trepidis militibus auditum fuerat nomen ducis, cum tristi sono inclamatum illud socijs, ac deinceps ab alijs atque alijs remotioribus acceptum redditumque brevî totis castris personuit. Incredibili caritate omnes ille, illum omnes complectebantur, quæ nullâ occasione luculentiùs patefacta. Primos ad opem ferendam provolantes effusè secutus est reliquus exercitus. Ibant permixti gregarijs belli procures è prima Europæ nobilitate, ducemque diversi investigabant, multis adhuc inscijs, cur quærerent, & quânam quæri oporteret. Ergo diu per nemus nequidquam erratum est. Spelæum inibi erat, ad quod perlatis fortè nonnullis præbuit funestum spectaculum humus partim ossibus siccis albens, partim recenti cæde frædata. Ibi equus ducis cruentus, ac sessore vacuus ex vulneribus

bus

bus deficiebat. Non procul jacebat bellua, monstrosus ursus, quô non alius visus immanior. Licet confossus, & jam exanimis, terruit non paucos spectatorum. Iuxta dux prostratus natabat in suo ac belluæ sanguine. Vultus pallens, os semiapertum, clausi oculi, vitæ nullum indicium. Intuentibus obortæ lacrymæ. Mox inter lamenta & gemitus advoluti jacenti venam explorare, vulneribus obligandis vestem detrahere, lecticam ex ramalibus struere, quâ in castra referretur. Ut quisque accurrerat, circumstantes premebant sese, atque impetu pietatis penè obruebant jacentem. Eminebat luctus procerum, ac præsertim duorum, quorum alter erat ducis frater Eustachius, alter amicus singularis ac delictum Avesnas, qui pietatem repræsentavit absentis alterius fratris Balduini. Nec ulli caritate, aut mœrore cedebat Anachoreta. Petrus ducis olim educator. Hugo Magnus semper amarat Godefredum, sed ejus vulneribus, & vitæ periculo excitata pietas sic amorem auxerat, ut tamquam alterum

alterum se moribundum aspiceret. Omnes deplorabant Ducis, suamq; sortem. Querebantur Principem summâ virtute, omnisque memoriæ fortissimum virum, tot in Europâ, atque Asiâ palmarum victorem, in eo cursu belli sacri circumventum silvæ latebrâ, atque iniquitate fortunæ, eripi sibi morte obscurâ, non prælio saltem prostratum, sed laniatum à bestia. Verùm, dum vulnera obligantur, animadversum est pauca ab urso esse, nec feræ dentes altè in corpus descendisse, at gravissimum vulnus gladio fuisse illatum. Hinc stupore dolori mixto causam requirentes interrogabant, quid de ipso modò narrasset miles fauciat. Hæc ab eo erant audita. Dux sub vesperam nemus ingressus animi causâ, ut magnis bellici imperij curis breve otium interponeret, opinione brevius habuerat. Repente vidit illum militem pauperem, qui indidem ex castris ligna arida collectum venerat, fugientem. Persequebatur ille horrendæ magnitudinis ursus, qui viatores, quotquot istuc diverterant, vorare solitus,

tus, frutetum lævitæ notis impleverat,
 & terrore viciniam. Jàmque instabat
 miseri tergo. Miles metu exanimatus
 ciulare, opem superûm poscere, & ut
 feræ dentes, quos effugere non pote-
 rat, parumper eluderet, cursitate cir-
 cum grandem arboris truncum. Inter
 fugam conspicatus Godefredum agno-
 vit, & heu opitulare, Dux optime, in-
 clamavit. Sic orantem ursus simul ar-
 ripit, simul prosternit. Dux Godefre-
 dus, ut erat promptæ in miseros beni-
 gnitatis, solitûsque sacræ militiæ socijs
 eximiâ caritate subvenire, vix hujus
 periculum adverterat, cùm eum libe-
 raturus, vitæ discrimen subire statuit.
 Ensem attulerat, cæterà inermis; quo
 stricto equum calcaribus incitat, provo-
 látque vociferans. Bellua nec strepitu
 currentis equi, nec voce fessoris abster-
 rita, femori jacentis infixerat dentes.
 In bellæ caput cum Dux validè ferrum
 torssisset, ictum partim demissione ver-
 tice, partim duritiæ frustrata est. Mox
 irritata periculosiùs, quàm læsa, relicto
 jacente in auxiliatorem insurgit, edito
 ferali

ferali clamore, quo totum nemus insonuit. Erigitur in posteriores pedes, & sese, quanta erat, immanem objicit, cruento rictu, ardentibus oculis, atque ipsâ membrorum mole terribilem. Molem viribus, & vires æquabat astutiâ. Nunc incurrit, nunc resilit. Jam caput, & crura subducit ferro, mox irruens equum dentibus unguibûsque configit. Sessor indignatus feræ nequam ingenium totâ vi connixus intentavit ictum in pectus, sed non pertulit, prohibitus simul ursi velocitate, simul equi faucij tarditate. Quo exscendere parantem, subito ursus invadit, injectis que vesti unguibus detrahit, & priusquam firmasset Dux vestigium, complexu ligatum humi devoluit. Mox jacenti incubuit, & hianti ore jugulum petijt. Interim miles modò liberatus ab Duce, consternatus tum suo, tum Ducis periculo, ad castra fugerat fera auxilia evocaturus. Nec plura, quàm retuli, viderat, nec cujusnam gladio Dux vulnus gravissimum accepisset, referre poterat. Incidit nonnullis suspicio

cio de insidijs ab æmulo Buamundo stru-
ctis. Sed alij, magnanimus Buamun-
dus, inquiebant, siquibus iratus est, eos
ab insidijs velit salvos esse, ut vincat ar-
mis. Hærebant ergo proceres, & re-
quirebant secum, cujus illud fatale fere-
rum, quis insidiator in silva ducem a-
dortus esset, & quonam pacto in ejus
cædem cum belluâ conspirasset, ipsâ bel-
luâ sævior. Magico facinori hæc simil-
lîma videbantur. Sub hæc irâ in ur-
sum conversâ, in frustra discerpitur.
Interim paratæ lecticæ dux imponitur,
& luctum exercitûs, quem ex parte ne-
mus texerat, totum campus ostendit.
Gestabant amicissimi procerum, dubij,
an mortuum efferrent. Silens agmen,
ac velut longæ exequiæ sequebantur.
Tristis species castrorum, etiam Turcis
exploratoribus, qui aderant; si qua res
eos homines tangeret præter lucrum,
quod ex muncijs sperant. Funebris illius
pompe silentium in aditu castrorum
abrupte lugubris ululatus feminarum
quâ nobilium, quâ cæterarum, quarum
alias in valle Gorgoniâ captas liberarat
Dux,

Dux, alias siti faméque deficientes in itinere refecerat. Inter gemitus & lacrymas inclamant, moribundum verè caritatis victimam esse, qui non modò annonam victumque socijs, sed & sanguinem suum prodegerit. At seipsas cum illo jam perire. Quem enim virginum esse curam acturum? quem earum pudori, victui, vitæque prospecturum? Quem alium inventum iri Godefredum? Crederes iterum captas de pudore, & salute periclitari. In hoc luctu Hundechildis Amazon, Balduini conjux, mala sociarum omnium una capiebat. Jam antè corpore, nunc & animo ægra, ad ultimum dolori succubuit. Nec defuisset lugubribus in Duces Godefredum officijs Hispana Amazon Eluira, nisi eam in tentorio suo distinuisset alius carus æger, conjux Raymondus, & ipse spe incertâ vitæ decumbens. Quin ambo paulò post pro mortuis deplorati. Hinc territi milites ad plura millia dilapsi sunt. Cæteris pro utriusque principis salute Deum assiduè precantibus, & frequentantibus

rem

rem divinam , tandem ad se rediens Godefredus oculos allevare cœperat, & circumstantes noscitare ; Raymundus quoque habere meliusculè. A Godefredo , postquam liberum vocis usum recepit , rescitum de accepto gladij ictu. Nempe, cùm ab urso deturbatus erat humi , vir fortis animo non ceciderat, nec dextrâ remiserat gladium. Verùm hunc inter luctam implicuerat cruribus. At, ne expediret, prohibebatur ulnis belluæ incumbentis, & hianti ore jugulum perentis. Pigebat bellatorem laniari à bestiâ , infortunio, non virtute prostratum. Inclamatâ cœlesti ope connixus brachijs, ac pedibus tandem belluam repulerat , & expedito ense petitam confoderat. Verùm inter feram repellendam, figendâque, elatis, ut erat, tibijs, ferro crus sibi graviter læserat. Ita tantus vir nullo, nisi suo gladio fauciatus , nullius nisi suo robore & victus erat, & vicerat. Ob cœsum immanem ursum sicut progenitor (a) Carolus

(a) *Chron. Nivell.*

rolus Cæsar tulerat Magni cognomen-
tum, ita nunc Godefredus meruerat.
Verùm Herculis Christiani appellatio-
nem tanto gloriosiore obtinuit virtu-
tum, ac facinorum magnitudine, quâ
gentium omnium Heroibus umbram
induxit. Sunt quoque, qui leonem
immanem ab eo ad Antiochiam Syriæ
confectum scribant. Verùm ex rei ad-
iunctis alijs patet, eos accepisse leonem
pro urso ad Antiochiam Pisidiæ perem-
pto. Cæterùm ex nupero vulnere lon-
ga, & pertinax imperatoris Godefredi va-
letudo perturbavit exercitum per aliquot
deinceps menses, quibus non nisi lecti-
câ iter facere potuit. Quâ transeun-
dum fuit, urbium alias vi, alias de-
ditione, alias fugâ custodum relictas oc-
cupavit. Ad Maresiam urbem cum e-
xercitu pervenerat, cùm ad eum venit
frater Balduinus; ubi intellectis tum
Godefredi, tum conjugis suæ Gunde-
childis rebus (de qua paulò pòst me-
morabitur) mox digressus est rursus ab
exercitu, & ad magna quædam abdu-
ctus

Æus à Pancratio Armeno. Maresiâ processit exercitus Artasiam, quam præmissus Robertus Flander impigrè feliciterque in potestatem redegerat.

LABORUM

HERCULIS

CHRISTIANI

LIBER QUINTUS.

IMPERATOR Bullionius gravem jam Solimani & multarum urbium spolijs exercitum trahens, non diu substitit ad Artasiam, in Antiochiam Syriæ regiam urbem intentus. Hæc non plusquam quindecim millia passuum aberat. An protinus obsideretur, deliberatum à proceribus. Erant, qui prætereundam, omittendamque censerent, quia inexpugnabilem, & nequaquam Nicææ, licet validissimæ,

Ff

com.

comparandam. Multi differendam ejus obsidionem arbitrati, dum ab Augusto Græco, ac Mathilde venissent, quæ expectabantur, auxilia. Nec videbatur prius capi posse urbs, tum ob loci munimenta, tum ob imminentem hiemem. Neque verò Turcæ eam diutissimè obteffam aliter, quàm fame ad deditionem compulerant quatuordecim ante Concilium Claromontanum annis. Verùm Dux Godefredus censuit continuò obsidendam. Id in rem, famamque esse, ne Antiochia, dato spatio, communiretur operibus, númeroque militum augeretur, & animis. (a) Ducis sententiam cum magnopere probassent reliqui, adacti sunt omnes jurejurando, se non recessuros, nisi captâ urbe. Decretum quoque, nequis injussus abscederet ab exercitu. Revocatus è Cilicia Tancredus. Balduino miranda incepta sua ad Euphratem persequi concessum. Vinemar, ille ex Archipiratâ sacræ classis præfectus, quo loco esset, diu ignoratum. Procedentibus copijs Robertus

(a) *Aquens*.

bertus Normannus præmittitur, qui Orontis fluvij trajectum liberum præstet. Orontes, qui Antiochenis Fernus dicitur, (a) rapidissimo cursu per uberem amplamque vallem ad Antiochiæ muros usque fertur, ibique jungitur ponte. Inde in mare, quod abest ab urbe decem passuum millibus, evoluitur. Vallem ex utroque latere cingunt editi montes perpetuo dorso; quorum qui ad Septentriones, Amanus nomine, Syriam à Ciliciâ determinat; qui ad Austrum, Orontes quoque nominatur. Amne longè supra urbem trajecto Christiani ordinatâ acie XII. cal. Novembres anno ejus (b) seculi nonagesimo septimo alacres processere ad Antiochiæ muros canentibus signis. Quæ è contrario toto illo die expers strepitûs, & ita quieta mansit, quasi vacua defensoribus foret. Verùm non operibus solum, omnique telorum genere instructissima erat, sed eo armatorum numero, qui campestri justoque prælio possent decernere. Atque haud scio, an

Ff 2

ulla

(a) *G. Tyr.* (b) *An. 1097.*

ulla umquam obsidio fuerit vel obsidentium obsessorumque multitudine, vel copiarum auxiliarium potentiâ, vel casuum varietate memorabilior. Urbem formâ elegantio-rem, aut munitio-rem spectasse se negabant procures Latini. Quanta tunc fuerit, hodiêque ostendit ruinarum, & superstitum murorum magnitudo. Seleucus conditor ex nomine Antiochi parentis urbi appellationem fecerat. Mœnia quadrato magni modi saxo constat, ex intervallo distincta turribus quadringentis, & septuagenis in orbem æquâ inter se proportionem distantibus. Fossa circum lata, atque altissima versatilibus pontibus ad portas transmittitur. Longitudo urbis duum millium, & quingentorum passuum est; situs partim planus, partim montosus. Imposita declivi montis lateri mœnibus complectitur duos montes multum editos, angustâ valle sejunctos, per quam torrens urbem præterfluit. In eorum celsiore arx regia visabatur, quatuor validis turribus cincta.

Ha-

Habebat in arce domicilium (a) Rex Syriæ seu Satrapa summus Accianus cum Reginâ, & filiâ, cujus forma multos procos pariter ac defensores urbis allexerat. Singulorum turrium custodia singulis minoribus Satrapis demandata erat, Adorfonio, Copatrici, Rossole ni, Carcornuto. Iam urbis præfectum agebat Sensadolus Regis Acciani filius, bello acer juvenis; cui mox accessit frater Buldagis, reduxitque copias Gorgoniæ cladi superstites. Nunciabat advenire Arabes duce Gigante, gentis ejus Satrapâ, maximo Antiochiæ præsidio futuros. Brevi item Solimanum Regem affore. Neque hi urbis ingressu arceri poterant ab obsessores, quod urbs propter magnitudinem undique claudi nequierat. Quibus partibus in montem assurgit, inaccessa; quibus subsidit in planitiem fluvium versus, obsessa est. At ex quinque ejus portis (b) non nisi tres obsessæ, una ad Orientem, & proximæ duæ ad Septentriones versæ. Ad primam meta-

Ff 3 tus

(a) *Aquen.* (b) *Aquen.*

tus castra Buamundus, inde Robertus uterque, & Hugo : ad alteram mediam Tolosas & Podiensis; ad tertiam Bullionius, quæ hodièque porta Ducis nominatur, nobilitata claris ejus casibus. Duci, præterquam quod æger erat, major impendebat labor, majusque ab obsessis periculum. Amnis enim, qui à tergo fluebat, inde sensim deflexus propius muros ponte lapideo antiqui operis jungebatur ad portam quartam, quæ ideò Pontis dicta. Per hanc non obsessam patebat commodus hostibus egressus ad vim, atque insidias intentandas Duci. Ab Acciano Rege datum negotium Syris quibusdam urbis incolis, ut specie fugæ, arcanæque fidei ac familiaritatis cum Christianis, eorum castra adirent; ducum nomina & vires, castrorum formam, aditus, & exitus omnes explorarent, atque ad se explorata referrent. Per hos rescivit omnia ibi diligenter apparari ad oppugnationem, promoveri opera, abundare annonam, militumque non defuturam virtutem. In ducibus nunc maximè spectari

ſpectari Buamundum. Godefredum belli imperatorem, qui proximus ponti confederit, lecticâ advectum, etiamnum ex cruris vulnere infirmum eſſe: ſed in eo, ſi convaleſcat, ſpem eſſe caſtrorum. De Mathilde feminâ bellatrice & Italiæ Reginâ ſermonem multum eſſe, expectarique ejus claſſem, & ab Græco Cæſare auxilia. Hæc relata Acciano ſpem fecere per occaſionem propinquitatis loci Ducem in caſtris opprimendi. Ergo in eum mittit pereuſſores, qui (a) per Pontis portam egreſſi, inde per vadum tranſmiſſo fluvio clam inter loci humentis çalamos acceſſere. Sirporum denſitatem excipiebat ad inſidias aptum nemus, ferebátque in caſtra Ducis. In proximo viridarium erat, fruticibus conſitum, altâque herbâ veſtitum. Inſidiatores per ramos ſpeculati, vident confidentem ibi egregium Principem, & aleâ colludentem feminæ præſtantis formæ, adſtante nobili ſpectatorum coronâ. Inter arbores herbâſque illi adrepentes procurrunt ſubitò

Ff 4

ſa-

(a) *Aquen.*

sagittis infesti. Spectatoribus partim fauciatis, partim timore disperlis, alij juvenem micantibus gladijs adriuntur, tabulâ lusoriâ malè tectum; matronâ nequidquam inclamante, ut inermis Principis vitæ parcant, captum abducant potius litrum magnum accepturi; regij cum sanguinis esse, & Cæsari Latino, Godefredoque Duci propinquum. Erat is Adalbero Comitis Lucemburgij filius. Barbari implacabiles secant juveni cervicem, capûtque auferunt. Matronam quoque abductam in urbem, postquam captivo corpori turpissimè illuserunt, obtruncant in oculis nostrorum, & caput utrumque tormento in castra excutiunt, inclamantes cupere se tantundem Duci Europæo, tantundem Mathildi factum. Aliàs quoque eodem tramite per arundinetum grassati facinus non minùs impium designant. Speculati castra Ducis, ac præfixum ejus prætorio vexillum, oculos figunt in hoc admiratione venustatis. (a) Eminebat in eo vexillo pictum amœnis coloribus auró-

(a) *Guib. Abb.*

auróque illud simulacrum excellentis formâ feminæ, cui corona in vertice, sceptrum in manu erat. Quoties hanc præteribant milites, quanti eam reginam facerent, veneratione indicabant. Evolant insidiatores è latebrâ, vexillum revellunt, & in mœnia relatum ventilant primùm, tracturi ad spectaculum Christianos. Dein inversum ad ludibrium summâ cuspide humi depangunt, ægrè facturi nostris, sive ea effigies Mathildis, sive alterius esset. Vehementer oderant illi, timebântque Mathildem, non ignari suppetias nuperrimè ab ea promissas, lintre appulso, de quo Domnizo canit,

EVEHITUR LINTRI TRANS PONTUM

FAMA MATHILDIS,

NOMINE DE CUIUS TURCARUM CA-

STRA LOQUUNTUR.

Ægri fratris partibus fungebatur Eustachius. Jussu ejus arundinetum curavit (a) demetendum, nemûsque ac pomarium stirpitus excindendum, nequis impostero istic latere ad insidias pos-

set.

(a) *Aquen.*

set. Turcæ eâ parte dolis suis occursum videntes, aliâ sæviunt. Dux ut nostris ad pabulationem transitus liber daretur, fluvium Orontem frenandum censuerat. Commodissimo opere lati milites contractas ex amne, vicinôque lacu naves passibus mille à ponte urbis ita jungunt, ut proræ proris, & puppes cohærerent puppibus. Dein validis eas inter se retinaculis sistunt, ne secundo flumine delabantur. Easdem tabulis asseribusque colligatis pontis in modum sternunt, terrâque operiunt, & complanant, ut tamquam per continentem non homines solum ire, sed etiam jumenta & vehicula commodè agi possint. Ad utramque ripam turres ex materia excitatæ, unde procurrere in hostem miles, & tutò recipi queat. Neque Turcæ segne otium in eâ occasione terunt. Juventute armatâ navalem hunc pontem non semel tentant, ut vi solutum, ignive corruptum, aut absumptum propugnatoribus nudent. Anceps dimicatio fuit. At vicit nostrorum pertinax virtus, pontemque obtinuit. Ceterum

terùm è Christianis, hàc transeuntibus in campum, multos intercipiebat hostis ; quòd paucæ cohortes turmæque transibant. Nec enim multæ committere se temerè procul à munitionibus tutum existimabant, ne castra nudarentur. Ad arcendas eruptiones hostium (a) è regione pontis ipsorum extructa munitio, Tancredique custodiæ tradita. Cujus virtus, quantumvis magna, cùm non sufficeret, Hugo Sanpaulanus Comes cum filio Engelramo, hujusque amicis, quorum longè principes Anselmus Ribodimontius, & Gerardus Avesnas erant, memorabilem opem tulit, cæsis non paucis Turcarum. Hi verò promptam vindictam parant. Venerat Antiochiam memorabile auxilium, ille magnus Arabs, vir gigantei non solùm roboris, sed & fastûs. Qui impatiens cædis Antiochenorum, cupidusque approbandæ suæ virtutis Acciano regi filiaque, quam amatorio ambitu colebat, jubet suos in armis esse. In multitudinem pabulatorum nostrorum securiùs jam yagan-

(a) *Aguen.*

vagantium intentus primò paucos equites à ponte urbis emittit , qui jaculis submoti recurrère ad suos è tuto speculantes. Inde incurfiones invicem factæ , pulsósque accendente irâ , plures subiere discrimen. Eo irritamento Christianos spes vincendi ad majus certamen impulit , cùm interim hostes sæpiùs simulato , quàm vero timore refugerent. Tum Arabs repente emisit numerosius agmen , à quo Christiani fugati , & redacti ad pontem suum , multis desideratis. Id ubi cognitum in castris concurrentes ad arma aliquot milia loricati, Oronte superato, feruntur in victores , & ad pontem urbis usque persequuntur. Inde mox, patefactâ portâ, erumpunt magnus Arabs, regis filij, Senfadolus, & Buldagis, aliique Satrapæ , & cum ijs multitudo ingens. Magnis animis principiò resistere Christiani; deinde numero obruti vertuntur in fugam ad pontem navalem, ubi multi partim ferro cæsi , partim aquis hausti. Nec semel ejusmodi eruptio Turcarum Arabumque facta in Christianos, nec successu

cessu dissimili. Hæc dolebant maximo-
 pere cum nostris omnibus, tum impri-
 mis imperatori Godefredo, quod per
 valetudinem in dies magis ingravescen-
 tem non posset suis opem, & exultan-
 tibus hostibus exitium ferre. Et sollici-
 tudo incessebat omnes, ne castra sine
 imperio, militem sine duce vis hostilis
 opprimeret. Visus eligendus aliquis
 prudentiâ & opibus pollens, qui in tan-
 tâ rei Christianæ inclinatione, Turca-
 rumque fortunâ pro Godefredo summæ
 rerum præficeret. Buamundo approban-
 te, atque alijs implicito, quod arcano
 consilio magnum quiddam agitarer,
 creatus Dictator Stephanus Blesensium
 Comes: de quâ re præter Roberti Mo-
 nachi testimonium extant ipsiusmet Ste-
 phani ad conjugem Adelam literæ. (a)
 Erat is genere, canitie, prudentiâ, &
 opibus spectabilis. Cæterum ex com-
 paratione senis Dictatoris desiderium
 excitabatur Godefredi ducis. Subibat
 animos vigor hortantis, & educantis ad
 prælium militem, fortitudo pugnantis,
 beni-

(a) *In spicil. Dacherij.*

benignitâsque fortes viros pro concione laudantis , & proportionè navatæ operæ donantis. Lenimen aliquod dolori communi attulit facinus (a) egregij adolescentis Engelrami, qui Turcam equitem armorum specie ferociâque præstantem affecutus, in oculis procerum aliorum è ripâ spectantium hastâ confodit. Reduci omnes mirâ lætitiâ plausere , imprimis Comes pater, & amicissimi proceres duo Ribodemontius, & Avesnas Gerardus. Ab his perductus victor veluti pompâ ad lectum Ducis , laudibus & amplexu exceptus est. Gerardus instar filij ferè assiduus apud ægrum imperatorem erat. Ad ejus lectum scholam nactus virtutum, mirabatur imprimis, quâ patientiâ valetudinem toleraret. Extractâ in (b) tertium mensem obsidione, neque spes armis expugnandæ urbis apparebat, & plus periculi à fame erat obsidentibus, quàm obsessis. Deficere cœperat annona ; quibus alimenta supererant, valerudo tentabatur inclementiâ hiberni frigoris. Im-

brium

(a) *Aquen.* (b) *Aquen.*

brium frequentia vestes, & tentoria
 putrescebant. Pabulum pecori ita
 deerat, ut, cum plusquam septuagies mil-
 le equi adducti essent, vix bis mille re-
 starent. In remedium qualecumque
 mali cum Buamundus, Flander, Tan-
 credus, parsque exercitus ad prædas in
 hostico agendas excurrissent, Antio-
 cheni castra adorti, ægrè repulsi sunt à
 Tolosate, & Hispanâ Amazone. Go-
 defredus periculosè ægrotabat, nec in
 Blesensi creato Dictatore multum opis
 erat. Hinc Tatinus Græci militis præ-
 fectus attentis castrorum ærumnis ve-
 ritus, ne involveretur crescente in dies
 malo, per causam evocandi ad opem
 Græci Augusti abscessit non rediturus,
 multis pravum exemplum secutis. Con-
 trà autem (a) Antiochenis, præter ma-
 gnum Arabem, venerat auxilio Rex So-
 limanus, & oppresserat venientes ad
 castra suppetias, quas adducebat Sueno
 filius Daniæ Regis cum Florinna Ducis
 Burgundiæ filia. Noctu in eos irruens
 Solimanus non militem solum, sed &
 du-

(a) *Idem.*

ducem, & Florinnam sponsam cæciderat. Cujus rei nuncius castris tristissimus accidit. Inter tot mala duo illa imprimis acerba erant, imperatoris Godfredi valetudo exigua in spe trahentis animam, & multitudo, hostilium speculatorum. Qui alieno habitu, mentisque amicitiam vagantes per castra res adversas nostrorum referebant ad suos, prosperas suorum nostris nunciabant, ut ita Turcis animos erigerent, nostris dejicerent. Querebantur proceres Christiani nihil in castris esse occultum, non factum, non consilium. Adhuc tamen latebat Buamundi arcum, ejus unus erat Tancredus confcius. Quod necui alteri innotesceret, pesti exploratorum exterminandæ tale remedium commentus est Buamundus. Turcas aliquot, (a) quos habebat in vinculis, jubet educi, ac jugulari. Cùmque sub noctem multi egentes per castra de cœnâ solliciti vagarentur, Turcas illos curavit palam veribus infingendos, atque ad amplum ignem torrendos.

Co-

(a) *G. Tyr.*

Coqui interrogati, quidnam sibi veller tale supplicium, ut jussi, respondebant præceptum esse à proceribus, ut quotquot impostero exploratorum hostilium caperentur, omnes ad victum exercitus similem in modum assarentur. Quo vulgato, ingens multitudo, atque in hac plurimi speculatores eò venire, tracti novitate atrocis spectaculi. Quo deterriti pessimi homines, ratique seriò rem agi, diffugere, famelicorumque Christianorum sævitiam & voracitatem nunciavere oppidanis horrentibus. Eo astu Buamundi haud satis humano factum, ut castris speculatores pestis excederet. Quid in ijs fieret, posthac Antiocheni de mœnibus ac turribus observando nosse conati sunt. Nec multò post ibi subita ac multa lætitiæ signa advertere. Audiebant nomina Mathildis, ac Genuensium lætis vocibus celebrari: unde non dubitavere, quin Mathildana classis, quam expectari sciebant, ad fauces Orontis fluvij esset appulsa. Atque ita res erat. Spectacula

Gg

(a)

(a) deinde per castra voce præconum indicta sunt, moxque ludi apparatus. Tentoria armis, quæ maximè decora erant, circumpendentibus, aliisque ornamentis instructa: ad prætorium Ducis stadium descriptum: solo infixæ sudes, scutæque appensa, ut Quintanum luderetur. Intererat ostentare alacritatem, & in tantis malis vires ac fiduciam. Inter hæc à portu advehuntur cum pompâ hospites maximæ, ut apparebat, dignationis, & præter oculos spectantium è muris oppidanorum adducuntur (b) in prætorium Godefredi. Quo vultu, cultûve essent; procul è mœnibus non satis dignosci poterat. Inde per castra festivi cantus nunc tibarum, nunc tubarum auditi. Hospites postquam epulo excepti sunt, ludos spectaturi confedere in suggestu multis procerum assidentibus, circumfususque militibus. Plurimi quoque mortales ex oppidanis in mœnia spectandi studio c. jerant. Hæc sinebat quâdam induciarum specie Rex Accianus, at non
sine

(a) *Rob. Mon.* (b) *Frising.*

sine dolo latente. Is in sequentes proximè dies expectabat auxiliares ingentes copias à Rodohano Alapiæ Satrapa contractas ; à quibus, ut incauti Christiani ludis operam dantes opprimerentur, eos interturbari non placuit. Interim se victorem putabat, quòd suos muris tenens, hostibus copiam vincendi non daret, sed ludendi tantummodò. In Christianorum ludicro generis omnis spectacula edita, alijs diebus alia. Equestri decursione prælusere juniores procerum, inter quos imprimis Gerardus Avesnas eleganter stadium inijt acri insidens equo. Principiò ferocem domitare, nunc in orbes dextros laevosque flectere, nunc presso freno sistere, & in saltus admittere. Deinde temperato impetu superbè gradientem præteregit suggestum hospitum, quibus decorè salutatis, extemplo subditis calcaribus, effusisque habenis concitavit. In extremo demum curriculo reluctantem compescuit, atque ex arte sustinuit. Eâdem pompâ cæteri equites transuecti virtutis & dexteritatis varium,

rarúmque specimen edidere. Cumu-
lati omnes laude ab hospitibus, sed præ-
sertim Avesnas, postquam cognorant
ejus nuperam memorabilem de Elia de-
fertore victoriam. Verùm & suum lu-
dum minimè lætum parabant Antio-
cheni in proximum diem, condictum
Rodohani adventui; constitutúmque e-
rat, ut dum ipse primo diluculo invadit
castra, in eadem oppidani irrumperent.
Rati consilia sua latuisse Christianos,
nocte inter eruptionem apparandam ex-
actâ sub auroram intenti in partem
vallis, quâ ventura auxilia expectabant,
illac vident accedere globum eque-
strem citato ferocique gressu. Equi fa-
cilè bis mille erant, iique insignes.
Cum tot, talesque scirent non superesse
in castris, non dubitavere, quin hæc
prima turma essent expectatæ sociorum
aciei. Quare alacres subito cum cla-
more pars ex muris castra infestis telis
impetit, pars vexillum, quod nuper ca-
ptum, exponit, inversúmque in cuspi-
dem figit ad ludibrium depictæ in eo
Reginæ. Maxima pars per pontem e-
rupit

rupit factura impetum in castra. Verum in appropinquante agmine vidit Christianorum signa, paucosque equites (septingenti erant) qui multos equos ducebant spolijs oneratos. Atque hi eminus equitum præbuerant speciem. Quæ cum aspicerent oppidani mirantes, paulatim remisere clamorem & imperum : quique urbe exhibant, regressi, quid actum esset, nondum gnari. Mox septingenti illi, inter quos cernebantur proceres hospites, quorum gratiâ ludi celebrati erant, insultantes oppidanis ostentant spolia & capita Turcarum quingenta, quæ de ephippijs suspensa attulerant. Ea partim machinis in urbem excussa, partim infixâ palis in conspectum oppidanorum admota, inclamantibus ministris tot capita pro duobus nuper ex urbe missis rependi. Itâ liberales Christianos in Turcas esse. Quibus cognitis ingens ira Accianum, Solimanum, magnûmque Arabem, & cæteros incessit, neque minor admiratio, quomodo tam pauci tam multos vicissent. Profligatum enim esse Ro-

dohanum cum suis , quandoquidem non comparebat, consequens nec dubium videbatur. Inter hæc vexillum illud Reginæ amotum , & à ludibrio cessatum , edentibus signa lætitiæ summæ Christianis. Dum alij Turcarum stupent , emicuit furor magni Arabis. Vociferabatur expetendas protinus de carnificibus Christianis pœnas. Hortabatur suos , irent in hostes barbaros, qui non modò in vivos, sed in corpora exanimata sæviant , & qui belluarum sævitiam superent ; nempe quibus nihil satès sit , nisi præbeantur epulanda hominum testa viscera , & humanus sanguis circumlatis pateris hauriendus. Irent ergo fidentes, affuturum suis Mahometen. Eo duce & scelerum ultore bellum gesturos, & ludicra spectacula funesto conclusuros. Et verò mox dare se vindictæ occasio visa. Animadversum manè agmen Christianorum mare versus proficisci. Arbitrati sunt Turcæ quod erat, nimirum eos ad portum tendere, ut multitudinem Mathildanam classe

classe advectam cum annonâ in castra perducerent. Consilium initum eos insidijs opprimendi. Illuxit inde quartus dies casuum magnitudine & varietate mirandus. Buamundus, ac Raymundus, qui euntes ad portum duxerant, in castra regrediebantur hoc ordine. Tolosas præibat agmini suorum ac Mathildanorum. In mediam turbam collecti inermes cum curribus annonâ oneratis. Buamundus cum extremo agmine sequebatur. Mons erat à ponte urbis spatium duum millium remotus, cujus latus vestitum fruticibus ac vepribus, & per hos medium iter angustum opportunum insidijs. Raymundus fauces ingressus extenuato suorum agmine, ubi paulum processit, hæsit dubius quidnam sublustris atque insolita loci facies ostenderet. Inter arbusta nitor armorum interlucebat: equites delecti Turcarum ad quatuor millia istic confederant inter ramos humilésque vepres semiconspicui. Cognitâ hostis fraude, substitit agmen nullo imperante. Stupor ac deinde trepidatio invasit animos. Nec

Gg 4 quid.

quidquam minùs, quàm multitudo decrat : sed eam ad paucitatem redegerant angustia. Venit in mentem citato gradu relegere viam : verùm impedita hæc erat sequentibus curribus & obversantibus arborum ramis. Spe ademptâ torpor quidam insolitus membris incubuit. Alij alios intueri, & cùm nihil consilij succurreret, silere immobiles. Mox Turcæ dato signo cohorti. Raymundus, & qui firmioris animi erant, quamquam frustrâ se fore perditis rebus cernebant, tamen, ne ignavia notam malis adjicerent, pro se quisque hortante nullo, nec imperante, ad resistendum improvisis insidiatoribus versi. Turcæ invadere, in primos atque acriores invehire : pars à dextrâ, pars à sinistrâ irruere, omnibus locis Christianorum ordines conturbare. Ludificati illi incerto prælio eminus atque ex alto feriebantur, neque contrâ ferendi, aut conferendi manus copia erat. Paucis ad pugnam, reliquis ad fugam animus fuit. Hi per diverticula montium conantur evadere. At eos Turcæ equi-

equites per notos tramites à tergo, à lateribus circumveniebant. Omnes fusi, multi capti, & cum annona atque impedimentis abducti. Non defuit qui felicis pugnae nuncius ad Regem Accianum accurreret. Rex meritò gavisus, at veritus, ne ex castris Christiani in redeuntes victores erumperent (& verò jam eruperant) reliquos suos Antiochiâ jussit prodire armatos, & socios regere. Hortatus agmen in egressu; denunciânsque ei, aut vincendum, aut moriendum, portam urbis claudendam curavit. Summam deinde turrim ipse cum Reginâ ac filiâ conscendit spectaturus successum, quem ex initijs expectabat lætissimum. In Turcicis copijs celebres virtute duces erant, Solimanus Rex, Sensadolus Acciani Regis filius, Reguli quos Amiralios vocant, supra duodecim, inter quos magnus Arabs corpore eminebat & viribus. Nec diu Acciano defuit spectaculum. Citra proximum montem advertit magnam vim pulveris attolli, eamque non pro venti flatu, sed directò magis magisque pontem

tem urbis versus advolui. Quæ ut sensim discussa clarescere cœpit, faciem rerum mirabilem aliam atque aliam aperuit. Primùm omnium globus equitum advolabat ad pontem, non turbato agmine, ut fugientium, sed collecto. Ex quo indicio intulit Accianus suos reverti victores. Præibat globo ductor eximiâ corporis & armorum specie, sed adhuc propter loci intervallum pulveremque incognitâ. Is propiùs pontem occupat tumulum: inde vultum gladiumque convertit in sequentes. Accianum, & reliquos spectatores incertos quis esset, aut quid moliretur, expectatione suspenderat. At mox è nebula extitere alij fugientes effusè nullòque ordine, quos ad pontem transire nitentes mirandus ille eques, qui præcucurrerat, excepit stupendo robore, nec habituro fidem, nisi facerent auctores idonei. Primi fugientium non turmatim, sed ferè singuli adveniebant, ut quisque velocissimo insederat equo. In hos ille ignotus cum suis faciebat impetum ex tumulo, in quem, habebat receptum, for-

fortitúsque valentíssimos quosque ingenti gladio alijs caput, alijs lacertum singulis ictibus amputabat, alios detruncabat aliter. Plurimos terribilis gladij metu, vel in anem agebat, vel in prælium, unde fugerant, redigebat, utrovis loco perituros. Rex Accianus jam non dubius, quin ille hostis infensissimus esset, irâ percitus requirebat à se tacitus, ac deinde ab adstantibus, quis gladiator ille ex omni Christianorum numero in tantam vim cadémque sufficeret, Godefredo ægrotante, Buamundo & Raymundo (ut nunciatum modò erat) occisis vel captis. Cæterùm obfirmarat animum Rex ad portam non recludendam, tum ut suos desperatione accenderet ad pugnandum, tum ne gladiator cum suis in urbem ferè propugnatoribus vacuum irrumperet. Major sensim confertiórque fugientium multitudo appropinquabat. Qui cùm scirent instare à tergo victores Christianos, à fronte gladiatorem cum suisævientem, clausamque portam viderent, pauci audebant subire novam aleam pugnae.

gnæ. Refugere ad amnem, jactare arma, inermesque (quod tutius fortuna fecerat) sese aquis inferre. At multi transire frustra conati hauriebantur fluctibus. Ac nisi portam denique aperientem curasset Rex, ultimam Turcis cladem ille dies attulerat. Quam parentem conspicati, resumptis animis conferti obiterque pugnantes subire festinant, multis ab Heroë gladiatore cadentibus. Sed adhuc consueta sibi virtutis exempla ediderat. Duobus maximè, Tudebodo qui aderat, teste, inclaruit. Fuit eques Turca præferox, quem tantâ vi percussit ense, ut à capite ad chippium usque diffiderit. Post hunc magnus Arabs, ille Asiæ terror, aureâ lorica & proceritate spectandus apparuit. Quo in bellatorem Christianum invento memorabilis pugna edita est. Sed quisnam ille esset Christianus bellator, antè videtur dicendum, quàm quo eventu cum Gigante manus conseruerit. Nuper ante ludos hospitibus exhibitos, castra Christianorum gravibus malis premebantur, rerum inopiâ, fame, rebus

bus bello adversis. Verùm suberat malum cæteris majus & causa cæterorum, quod pristinam cæli benignitatem averterat. Prosperis elati animi, & in copiâ rerum inventâ ad Antiochiam solutæ cupiditates. Cibi potionisque intemperantia, alex, furta, & malorum caput licentior cum feminis consuetudo. Imperatori Godefredo probitatis omnis & nominatim pudicitie studiosissimo hæc delicta exercitûs graviora erant ipso morbo corporis, quem ægritudo animi auxit. Et offensa noxis Virgo Dei Mater visa erat non tantùm avertisse oculos, sed è castris recessisse tunc, cùm vexillum illud, quod Reginæ præfererat effigiem, captum & ablatum est in urbem. Ea erat imago purissimæ Virginis, cujus cultui amorique cùm mirè addictus Dux Godefredus esset, ejus tutelæ commiserat exercitum. Mariæ (a) opem in omnibus pugnis invocandam curabat, ejusque effigiem præferendam in vexillo. Ejusdem iconem locabat in sua statione, ubi Virginem pro Regina

(a) *Poirans citans Tyr.*

gina, & armorum præfide venerabatur. Ergo cumulus ingens accesserat ejus ægritudini, cum cognorat Virgineum vexillum non modò captum, sed ab impurissimis Turcis palàm in muris urbis atque in oculis castrorum ludibrio haberi solitum. Ea res tam lugubris Godefredo fuit, quàm si acie victus signa omnia amisisset. Inter hæc cum fames, pestilentia, militum cædes ac desertio castra affligerent, necnon Dux æger contra vim malorum primùm viribus animi luctatus deinde superaretur, Aniciensis Episcopus cum Anachoreta, ipsòque Godefredo remedium ad avertendam cælestem iram exquirat. Indictæ preces publicæ, triduique jejunium: dein Anachoreta ad convocatos, confertòsque circum prætorium Godefredi milites insignem de pudicitia laude ac necessitate orationem habuit, quâ multis audientium non solùm rubor suffusus, sed & expressæ lacrymæ. Decretæ deinde poenæ in nocentes, adulteria, & stupra capitis supplicio proscripta, feminæ

minæ leves ejectæ, (a) nuptæ innuptæque in unum locum à viris secretæ. Nonnulli virorum Deo se devotentes cælibem vitam pro viribus agitare aggressi, deliberatâ continentia nobiles. Ita miles in Ducis Godefredi velut unici exempli mores formabat, & castigabat vitam. His castè præclarèque factis, visi sunt expiasse, quidquid in eos irarum cælestium fuerat. Et verò multitudine ad meliorem frugem revocatâ cælestis ira conquievit, & præmium casti consilij permagnum illicò superi concessere. Námque, ut affirmat Tyrius Pontifex, statim Dux Godefredus, illud columen exercitûs dudum desideratum, ex longâ ægitudine convaluit, insultantibus hostibus probaturus, quantus esset alter Carolus Magnus jam tertium redivivus. Et mox famem quidem castrorum levavere partæ ex hostico prædæ. Animos quoque erexit hospitum nobilium adventus, quibus honor ludorum datum est. Amerinas (b) Imperator præpotens Saracenorum, cui Babilone

(a) *Fulch. Tyr. &c.* (b) *Aque. Frising.*

lone Ægypti regiâ urbe imperij sedes erat, legatos ad Ducem Godefredum navigio miserat. Intercedebat Saraceno cum Turcis dissidium superstitionum, licet utrique Mahometem sectarentur. Inde odium & bellum, quo Saracenus magnâ ditionis parte exutus à Turca fuerat, atque ejectus urbe Hierosolyina. Lætus ergo Latinorum in Turcas bello Saracenus, atque adductus in spem, fore, ut imperium Turcarum armis Christianis everteretur, & nostri partâ victoriâ exercitum deducerent, atque ita ipse nullo suo labore velut vacantia recuperaret, quæ amiserat, oratores ad Godefredum miserat, qui in castris magnificè culti. Postquam ludi editi, quibus celebritatem, & lætitiâ addidit conspectus inter spectatores ipso præcipuum spectaculum Dux Godefredus nuperrimè valetudini & militibus restitutus, nuntiatum erat Rodohanum Antiochensibus venire auxilio. Duxerat in eos nocte Godefredus comitantibus Saracenis oratoribus, ut Christianæ virtutis specimen jam non ludicrum
spe-

spectarent. Dimicatum manè loco angusto inter Orontem & lacum. A septingentis delectis Christianis Barbarorum millia duo cæsa, fugata viginti sex millia. Locus, virtus, Virgo dedere victoriam. Caputum recisorum spectaculo confusi horrentesque Antiocheni cessavere à ludibrio vexilli Mariani, summâ Ducis lætitiâ, nec sine oratorum Saracenorum plausu, qui (teste Agile) JESUM MARIÆ filium laudavere sternentem potentes infirmorum operâ. Utrumque illud nomen in honore etiam his barbaris erat. Ijs redeuntibus in Ægyptum adjuncti legati Christiani ad amicitiam & societatem armorum confirmandam cum Imperatore Amerinâ. Christianæ legationis princeps Gerardus Avesnas fuit. Nec alium maluissent mitti Saraceni, aut mittere Godefredus. Hic carum caput belli periculis tantisper subducere cupijt, illi habere comitem & Imperatori suo offerre intimum Christiano duci adulescentem. Quos abeuntes comitati ad portum Buamundus, & Raymundus,

Hh dus,

dus, partim honoris causâ, partim ut
 multitudinem Mathildanam classe ad-
 vectam adducerent, in reditu oppressi
 Antiochenorum insidijs. Auditâ clade
 Godefredus incredibili dolore affectus
 est. Mox summum potestate & virtu-
 te ducem se gessit, Blesensi Comite jam
 dictaturâ defuncto. Supremi imperij
 opera hæc fuere. Missis (a) per castra
 præconibus corripere arma jubet, & o-
 mnes propositâ poenâ capitis adesse arma-
 tos fratrum ulturos sanguinem, modi-
 cis præsidijs ad speciem modò castro-
 rum relictis. Tum pro summi ducis
 potestate dividit in agmina exercitum,
 quibus ductores præficit Robertos Nor-
 mannum & Flandrum, Hugonem, &
 Eustachium fratrem. Ipse nullam sibi
 aciei partem sumpsit privatim ducen-
 dam, ut & omnibus consuleret, & ad
 subitos casus expeditior esset. Instru-
 ctâ acie jam progressuris conspectus e-
 minus eques accedens gradu concitato,
 ac turbido, capite tristem in modum
 demisso, cæterum armis insignis. A-
 gnitus denique Buamundus, qui per ab-
 rupta

(a) *Aquen. S. Tyr.*

rupta rupium & solis feris pervia elapsus periculo, sed pudore malæ gestæ rei ac dolore turbatus, cum è vepteti umbrâ in conspectum castrorum venit, velut ab inferis extractus tunc primum lucem aspiceret, ingemuit, ei que lux nocte tristior fuit. Reputabat inter viam ordinem atrocissimæ calamitatis, quâ nulla post cladem Gorgoniæ vallis gravior acciderat. Volebat animo lætitiâ urbis, dolorem castrorum, quo fremitu procerum excipiendus rediret; quid hostes, amicique exprobraturi essent. Non provisum periculum, non exploratores præmissos; temeritate ducum in eum locum deductum militem, & subsidiarios Mathildanos belluarum modo in foveam missos. Inter has cogitationes appropinquantem castris secutus modico intervallo Raymundus, & post alij, trecentis omnino desideratis. Ex insperato incolumes Godefredus excepit amplexu, lætus tantorum Principum salute & ope restituta, solatus quoque eos perhumaniter, scire se dicens insidijs cladem acceptam,

Hh 2 non

non prælio. Eum bello inferiorem, qui armis vincatur. Nunc secum ad vindictam properarent. Illi laudato Ducis consilio pariter in hostes magnis animis invehuntur. Acriter utrimque dimicatum principio. Cùm Turcæ deinde cederent, submissum ab Acciano auxilium restituit animos, & prælium. Godefredus ubique suis adesse, subsidia, quibus res postulabat locis, inducere, alibi peditum manu, alibi procellâ equestri barbaros circumfundere, ipse ordines identidem hostiles irrumperere, ac turbare. Ubi advertit inclinatam aciem, multosque jam fugam inceptantes, Buamundo, Hugone, Tancredo in terga hærentibus, ipse belli scientissimus globum familiarium equitum ex acie sumit, citatisque equis, transverso campo præcurrit ad portam urbis. Ubi (ut dicere suprâ cœpimus) inauditæ virtutis exempla edenti supervenit fugientium turbâ involutus magnus Arabs. Is (a) gigas (talem describit Robertus) alto vertice advertens

Gode-

(a) *Rob. Mon.*

Godefredum Turcas fugientes stragemorantem, irâ turbidus suos hortatur ut animis collectis saltem consistant, dum ipse fugæ eorum moram sustulerit gladiatorem Christianum. Ita effecit, ut inhibito tantisper suorum cursu spatium intercesserit committendæ, & spectandæ brevis, sed memorabilis pugnæ. Proximè pontem urbis concurrere. Intus spectabant ex arce Rex, Regina, horûmque filia; è mœnibus Syri indigenæ, Turcæque fugâ servati; foris reliqui. Par bellatorum utriusque partis fortissimorum eo loco fortuna commiserat. Arabi arma fulgebant auro, Christiano rubebant cruce bellitesserâ, & cruore hostili. Notum erat Arabis robur, parque corporis moli. Christiano licet intra communem modum proceritas esset, occultatûmque diuturno morbo nomen, immensa virtutis opera nunc edita parem admirabilitatem indiderant. Godefredus eâdem fugientium cæde occupabatur, cum eminus Arabs ira præcipiti, nec dilato in congressum impetu, arcum

Corripit & alijs super alias sagittis hostem incessit. Quibus partim furore exerrantibus, partim retusis armorum Ducis firmitate, nihil egit, nisi hunc in se convertit. Inde adversos equos caribus concitant. Spectatores arrecti, suspensique animis intenduntur in minimè ludicrum, ut nuper, certamen, sed ominosum ad cæterum bellum. Horror quidam omnes invaserat, & neutrò inclinatâ spe vox pariter spiritusque torpebat. Arabs (ut Tudebodus & Agiles oculati testes, nec non æqualis eorum Aquensis Albertus aliique produnt) acinacem altè sublatum in caput Ducis tanto impetu torfit, ut interpositum scutum ejus diffiderit, verticem quoque divisurus, nisi Dux flexisset in latus. Deus Deique mater bellatorem suum texere. Godefredus irâ generosâ succensus vicem rependit inaudito roboris exemplo. Ferro à lævâ cæsim incusso barbari latus pectusque non solum hausit, sed ita divisit corpus medium, quamvis loricatum, ut ab umbilico superior pars humi deciderit, inferi-

or equum complexa cruribus (ita firmiter infederat) per pontem intra portam inuenta sit. Equus (a) rectore carens, laxatasque sentiens habenas, cursu agitatæ calcaribus utrimque suffixus proripitur in urbem. Inter oppidanos tanquam furiâ infessus hinnit, truncumque sessorem ostentat. Exhorruerant ad spectaculi novitatem barbari, tum qui foris, tum quotquot intus erant. Hi procurrere ad muri crepidinem, intentis arcubus victorem incessere, & arcere urbis ingressu. Dux grandine telorum non territus, repulsus tamen à portâ, fugientium stragem instaurat. Arabis cædes quàm exhilararat Christianos, tam Turcas cumularat ubique terrore. In eos inveci tantò acrius Buamundus, Hugo, Eustachius, aliique proceres. Ibi proditur facinus Roberti Normanni, qui cum ingenti ictu barbarum stravisset, joco prosequens ruentem, spiritum, inquit, tuum cruentum Tartareis omnibus genijs commendo. Ad noctem producta cæ-

Hh 4 des,

(a) Order.

des, velut pecudum. Dux cani denique receptui iussit, & capita hostium multa ad portum ferri Saracenis legatis ostendenda. Iam erant legati vela facturi, cum eorum comes Gerardus Avelnas animadvertit (a) sanguineum Orientem affluere, simulque factum prælium ingens intellexit. Frutiantia deinde amne Turcica arma & spolia, victoriam, priusquam nunciari posset, insignem fecere. Tum venientes nuncij cum Turcarum capitibus, referentisque longè præcipuam fuisse gloriam Godefredi gigante cæso, legatis omnibus moverunt admirationem maximam. Sed Gerardum perfuderunt insuper ingenti lætitiâ, pro summâ, quæ inter eum & ducem intercedebat, necessitudine. Verum erit aliquando, ubi magno stabit utrique ea mutua caritas barbaris comperta. Perinde quasi pulcherrima quæque insectari fortuna gaudeat. Dum Gerardus cum legatis Ægyptum petit, Godefredus velut triumpho reiectus in castra prædicabatur omnium vocibus.

Antio-

(a) Tyr.

Antiochiæ verò silentium & consternatio summa Turcarum erat. Numero deinde occisorum inito, ubi compere-
rant occubuisse præter magnum Arabem
nobilissimos suæ gentis undecim Satra-
pas, & militum ad quinque millia, per-
sonuere plateæ & domus funestis que-
relis. At Syri indigenæ religione Chri-
stiani, sicut pugnæ tempore, ita partâ
victoriâ non tenebant signa lætitiæ spei-
que conceptæ. Qui favor in obsiden-
tes egit Turcas in occultam rabiem, quæ
post paulò erumpet in vindictam. Ac-
cianum Regem, antè curæ expertem &
fiduciâ in solio dormitantem, nunc ter-
ror, quantus antè nullus, invaserat, &
rerum moles nullam quietis partem ca-
pere sinebat. Convocatis (a) in arcem
proceribus, postquam in commune de-
liberatum est, Solimanum consanguini-
tate proximum, virum facundiâ & in-
dustriâ Turcis notissimum orat, ut pro-
peret ad Belchiarocum Turcarum Impe-
ratorem, & auxilia quàm maxima &
celerrima postulet. Ei filium suum Sen-
sado-

(a) *Aquen.*

fadolum (Buldagim jam ante præmiserat) & duodecim legatos adjungit. (a) Turcæ, Scythica gens, principio imperium ac religiones secuti Saracenorum. Deinde rebelles victis ijs in Asiâ cœpere dominari creato rege Sadroco. Saraceni Ægyptum tenebant, quorum Calipha Turcam Sadroco timens, Sultannum eum, hoc est, Imperatorem Persidis & Asiæ salutavit. Sadroco successit Dogrissa, Belcepho quoque dictus: huic Asphasalemus, cujus fratris filius Solimanus missus adversus Græcos, Nicææ regno potitus erat. Quartus imperarat Melecla, cui filius successerat Belchiarocus, & regnum Coroslanum jam obtinebat, fratre alteram imperij partem occupante. Ingressi Sammarcham urbem regiam Solimanus & Senfadolus cum legatis (b) Imperatorem venerantur, & priusquam legationis causam aperiant, more gentis (cùm quid gravius conquerendum est) tristi gestu pileos à capite jacentes barbâque vellentes, suspirijs, lamentisque

præ-

(a) *Hayton.*

præfantur. Simul legati ante solium cum flebili vociferatione procubuerant. Interrogante Belchiaroco quid tantum querantur, exponit Solimanus à Christianis se regno spoliatum, & Accianum Antiochiæ obsidione ad extrema redactum orare atque efflagitare Principis auxilium, reliquàmque spem nullam, nisi in ejus armis, habere. Moverant hæc Imperatorem. At, qui aderat, Corbagathus, inter proceres non solum auctoritate ac robore, sed etiam ferociâ summus Christianorum virtutem spernens, si vivo, inquit, non sex abibunt menses, quin eos tibi, Imperator, subactos dabo; juroque sic deleturum, ut omnis Christianorum gens ac posteritas horreat. Innumeræ copiæ mox contractæ ex Corosano regno, Alapiâ, Damasco. Præcessit Sensadolus, atque Antiochiam redire festinavit ad patrem lætus nuncius de adventante Corbagatho. Nihil de hujus formidabili exercitu sciebatur in Christianorum castris: deque ijs actum erat, nisi Corbagathus mora injecta memorabilis à Balduino fuisset

fuiſſet ad Edeſſam. Interim ærumnæ Chriſtianos ad Antiochiam premebant. Corruptis tentorijs ſub dio dormiebatur. Inediâ pallebant vultus non militum modo, ſed & procerum. Ex fame aliifque malis vulgabantur morbi & metus. Adhæc videbant urbem humanis viribus inexpugnabilem. Acceſſit ultimus terror à Corbagatho, nunciantibus Syris eum prope jam abeſſe. Ut de re conſtaret, miſſi exploratores: qui (a) undique è montium jugis velut undatim ſcaturire innumerabiles Turcas retulere clam Duci, ne vulgus militum conſternaretur nuncio. Cæterùm peſſimo exemplo prævit ad fugam ille nuper dictator Stephanus Bleſenſium Comes. Per cauſam ægritudinis reſceſſit à caſtris, & cum eo ad quatuor hominum millia Calendis Iunij (poſtridie cujus diei ſecuta eſt horrenda nox) proceres conſulturi de imminente periculo convenire. Imperator Godefredus, ut erat impavidus, auctor fuit, ut quando res nec moram nec aliud remedium patiebatur,

armati

(a) *Aquæ.*

armati omnes occurrerent Corbagatho, & in divina ope spem locarent, vel pugnam victoriâ, vel vitam gloriosâ morte claufuri. Assensu Robertus Flander, Eustachius frater, alique. Addidero quidam illud, dum maxima pars Christianorum prodiret in hostes, partem manere in castris oportere, ne obsessi erumpentes urbe conjungerentur Corbagatho. Verum Buamundo neutrum probabatur. Noluit tamen palam in conventu dissentire, sed ut aperiret mentem arcanumque, quod dudum agitabat, sevocavit in secretum locum primores quinque, ducem Godefredum, Hugonem Magnum, Robertum utrumque, & Raymundum; quos sic allocutus: Etsi magnitudo animi vestri & semper alijs in rebus, & maximè nunc patet in eo, quod in Corbagathum eundem censetis, videtur tamen attendendum prius, quantum inde periculum immincat: non dicam vitæ vestræ, quam Christi causâ lubentes prodigitis, sed obsidioni, quam eadem causa suscepistis. Sive enim totis copijs, sive cum earum

earum parte in Corbagathum tenditis, facile erit hostibus in urbem milites & commeatum inducere. Restat ergo, ut ante adventum Corbagathi potiri urbe conemur. Armis inexpugnabilem hanc meritò videri scio : at nunc fidei vestræ committam belli furtum, occultamque rationem, quâ confido potituros. Arrectis tanta pollicitatione animis procerum, aperit arcani consilij rationem, quæ nunc mihi altius repetenda. Adolescens (a) erat Antiochenus domo nobili, ingenio mirè callido. Iam inde à cœpta obsidione solitus penè quotidie egredi portis, per intervalla stationum subire castra, alio atque alio habitu ac nomine ultro citròque inobservatus commeare. In castris nomen ei Buamundus, in urbe aliud erat. Ibi Christianus, hîc Turca habebatur. Agitabat aliquid magnum, sed utrobique paucissimis familiaris reliquos fallebat. Tres tantùm consiliorum participes habebat, in castris Buamundum & Tancredum, in urbe patrem, quibus quæ acta,

(a) *Aquen. G. Tyr.*

acta, quæque agenda erant, clàm omnia significabat. Is inter primas ad Antiochiam velitationes captus seu vi, seu ultro in Buamundi Principis omnium tunc (Godefredo ægrotante) celebratissimi potestatem venerat. Speravit Buamundus adolescentem effici Christianum posse, & rei Christianæ utilem. Pater captivi Pirus nomine per causam filij redimendi agere cum Buamundo cœpit. Normannus ut erat vicissim callidissimus, data occasione clàm utriusque animum sollicitare ad prodendam urbem, negare alia conditione liberatum iri adolescentem: si annuerent, magna polliceri. Interim benignè lautèque habitus adolescens Christianæ religionis leges edocebatur eò facilius, quòd à Christianis genus ducebat. Antiocheni enim jam inde ab Apostolicis temporibus imbuti Christianis sacris, licet deinde urbe Mahometanorum armis subactâ, plerique omnes in Christi fide permanferant. In ijs erant familiæ nobiles, atque inter has Benizerra gens, cujus princeps ille, quem dixi, Pirus.

Qui

Qui dominantibus ab annis quatuordecim Antiochiæ Turcis, divexantibusque Christianos incolas, ijs tantum exceptis, quos Turcicis ritibus addictos uxoribus & libertate donarant; ut se molestijs eximeret, Turcicas superstitiones vel amplecti visus; passus certè filium profiteri eas, baptismatis expertem. Hinc gratiâ valebat apud Accianum Regem: cumque alij indigenæ nullum obtinerent in urbe dignitatis gradum, neque tractandis armis, sed tantum negotiationi & illiberalibus artificijs operam dare sinerentur, maximè suspecti, ex quo Christianus exercitus urbem obsederat; Pirus contrà Emiri prænomen (quod Principem sonat) accepit. Regi multa familiaritate conjunctus, & regius Scriba minimè suspectus vivebat in aula, turriumque unam ad portam urbis occidentalem habebat suæ curæ demandatam. Cæterum tædebat eum externi barbarique imperij. Quare Turcarum sævitæ obnitendum, finemque imponendum censuit. Filius in castris sacratione lavacro tinctus, deque eo à
Bua-

Buamundo susceptus, Buamundi nomen acceperat. Remissus ad patrem ac deinde internuncius conficiendo negotio navavit impigram operam. Promisit denique Pirus se turrim, cui præerat, Buamundo traditurum. Verùm necessebat moras partim periculo trepidus, partim majoris præmij spe, partim Buamundo ipso captante occasionem non solùm potiundæ urbis in commune, sed privato jure possidendæ. Hic, Corbagatho imminente, tandem Godefredo paucisque alijs procerum aperuit commercium suum clandestinum cum Piro, pollicitumque hunc sibi, quando luberet, dediturum turrium unam. Addidit se multum in hac re totis septem mensibus insumpsisse operæ, multa homini donasse, plura pactum. Quare, inquit, peto à vobis meo Pirique nomine primùm silentij fidem, deinde ut urbs Antiochia, cùm venerit in potestatem, mei sit juris. Sin id non placet, habeat eam sibi, quisquis vestrum occupare aliâ viâ poterit. His auditis Dux, Robertus uterque, & Ha-

go Magnus vehementer gavisi, Buamundo civitatem concessere, eâ tamen lege, ut redderet Græco Augusto, si ex pacto is opem ferret. Datæ dexteræ in fidei pignus. Mox Buamundus in rem perficiendam incubuit. Monitus Pirus per filium respondit lætus, se altera post proximam nocte traditurum turrim. Annulus datus, ut nulli nuncio fides haberetur, nisi qui eum deferret; id pignus documentumque, ne capi fraude adversæ factionis possent, futurum. Verùm & obsessi Turcæ arcum consilium idque tragicum injerant eadem nocte exequendum; in quam insolens, si unquam, rerum perturbatio utriusque partis fraudibus sibi obstantibus confluit. Adhuc Pirus consiliorum omnium Acciani fuisse se participem putabat. Verùm ante paucos dies in suspicionem vocari cœperat. Injecta erat præfagitio quædam oppidanis partim Turcis partim Christianis, tractari clam de urbe prodendâ, nullo adhuc probabili indicio, sed ita augurabantur alij ex rei metu, alij ex desiderio.

derio. Id cū inaudijſſent proceres Turcarum, ſolliciti cojerant apud regem advocato Piro jam ſuſpecto; decretūque fuerat, ut noctu Chriſtiani incolæ omnes contrucidarentur. Interceſſerat tamen quidam è Turcis Princeps Amirdalis, qui ſemper ſe Chriſtianiſ incolis æquum benignūque præbuerat. Per eum obtenta octo dierum mora eā lege, ut ſi intra eos dies non ſolveretur obſidio, ex funeſto decreto perpetraretur cædes. Iamque temporis illius reſtabat dies ultimus. Interim Piro in Turcas magis inflammando reſ ejusmodi contigerat. Fortè filius ejus urgente neſcio quā cauſā domum miſſus à patre, deprehendit ibi unum è primoribus Turcarum in flagitio cum matre. Adoleſcens dolore percitus rem nunciat patri, qui furens, non ſatiſ eſt, inquit, canibus Turcis nos quotidianis exactionibus & ſervitute premere, niſi & toros noſtros inceſtent. At, ſi vivo, breviabo eorum tyrannidem & digna mercede penſabo. Ita inflammatus promiſerat turræ in ſequentem o-

Item Buamundo, monito, ut ad rem melius tegendam simularent Christiani, se totis castris movere in vicinam regionem prædæ gratiâ; primâ autem noctis vigiliâ ad turrim redirent, in quam eos acciperet. Principes nostri, probato consilio, per castra voce præconis (ut audirent scilicet Turcæ, fallerenturque) edixere profectiorem. Iamque dederant se in viam, ignaris, quid ageretur, militibus, cum rei sic optimè institutæ cæptæque intervenit ingens turbatio. Pirus repentè ab Acciano evocatur ad aulam, quò primores Turcarum convenerant. Licèt Rex ei diffidendum non putaret, illis videbatur timendus præ cæteris, quòd à stirpe Christianus esset, quòd potentiâ, industriâ & calliditate præcipuus. In conventu questi coram eo de suspectis oppidanis, deliberavere, quid opus factò, & rogavere sententias ut, quo animo esset Pirus, ex ejus responsoprehenderent. Sensit ille se incidisse in suspicionem; quam ut astu effugeret, dixit, eos perquàm laudabili sollicitudine

ne

ne affici. Timeri enim prudenter, quod accidere possit : nec ullam nimiam esse cautionem in communi salutis discrimine. Cæterùm prodicionem impediri posse hoc modo videri. Cùm prodi civitas nequeat nisi ab ijs, qui turribus, muris, & portis præfecti sint, mutari eos crebrius oportere. Subitâ enim & frequenti ejusmodi mutatione sublatum iri opportunitatem periculosi cum hoste commercij. Laudata est Piri sententia, placuitque ex eâ permurare stationum custodes. Verùm, id si fieret, intelligebat Pirus anxius se actore omnes arcani sui consilij rationes esse turbatas. Iamque appetebat condita nox, quâ & procures Christiani ad turrim occupandam venturi erant, & in urbe primores Turcæ Christianos incolas ad internecionem cæsuri, octo diebus moræ concessæ jam elapsis. Ita alteri alteris eâdem illâ nocte mirandâ perdendis immincebant. Tenebris (a) se intendentibus Dux Godefredus & Robertus Flander cum quingentis mi-

litibus, præeunte adolescente obside, silentio per averſas rupes contendere ad regionem arcis in austrum verſam & conſedere in valle haud procul turri promiſſâ. Inde Longobardum ex Buamundi familia præmiſere cum annulo ad Pirum. Hic in turris ſuæ fenestrâ pervigil adventum præſtolabatur noſtrorum. Licet enim mutationem cuſtodum ab eo propositam probaſſent magnopere Turcæ, tamen eâ tunc abſtinuerant, quod ſubita ac tanta præſectorum per turres mutatio | magnam perturbationem paritura viſa eſſet. At juſſerant curâ intentiore firmari ſtationes, & præfectum vigilum obambulare mœnia cum lumine & armatorum comitatu, dum interim alij per urbem Chriſtianos incolas perimerent. Iamque provectâ nocte & accedente præfecto vigilum Pirus formidabat, ne exequendi ſui conſilij tempus efflueret, cum Logobardus adfuit ad imam turrim. A Piro conſpectus, juſſuſque ſilere, quoad tranſiſſent vigiles, ijs prætergreſſis, annulum datæ fidei teſſeram repræ-

reptæsentavit. Gavifus Antiochenus urget hominem, ut socios advocet. Dum id agitur, nova ingens Piri animo incessit cura. Erat ei frater natu minor, quem, quia norat Christianis infensum, arcani sui conscium esse noluerat. Ecce autem cum turrin ingressum, & somno jacentem animadvertit. Anxius primum, deinde pium ratus impedire, ne pio suo consilio obstarer frater evigilans, dormientem confodit. Inter hæc recurrerat Longobardus ad Ducem, remque procedere nunciarat. E militibus partim Ducis, partim Roberti Flandri, partim Buamundi, qui haud procul aberat, electi sexaginta viri, qui scalis in turrin subirent. Hos periculi magnitudine & Piri dubiâ fide trepidos Dux confirmavit. Roberto Flandro ducente processere ad turrin ferentes arma & scalas è corio. Mox Pirus demisit funem, quo scalæ sublatae & ad muri pinnam alligatae. Nec mora, præeunte Longobardo inclytus Robertus Flandriæ Comes ascendit armatus & hastâ nitens,

secutique ordine aliquot evadunt in turrini silentio. Quod mirati infrà reliqui timentesque, ne Flander cum socijs deceptus & jugulatus esset, hærebant. At è fenestrâ ab eo vocati, tanto strepitu ac numero ascendere, ut pondere detracta pinna, cui funis annexus erat, omnes destituerit. Alij incuspides hastarum subjectas sese induere, alij ruentibus è muro saxis obtriti. Inhorruere cæteri jam rati se proditos & actum esse de ingressis socijs. Verùm rursus apparuit demissus ab Antiocheno funis, ex quo religatis scalis in murum successere. Pirus numerum ingressorum animadvertens, paucos, inquit, habemus Francos. Eo nomine Latinos omnes appellabant. Cùmque inter ingressos Buamundum non videret, ubi est, inquit, ille miles invictus? Mox remissus à Flandro Longobardus, qui eum advocaret, ac cæteros. Tyriorum pontifex quantum differt, qui scribat Buamundum ascendisse primum! Ego pace diligentia Tyrij dixerim, potius Tudebodo & Agili, qui rei interfue-

fuerunt, esse credendum. Acciti à Longobardo focij concurrere ad scalas, quæ c in multitudini non sufficerent, & pondere certatim ascendentium fractæ essent, indicata à Piro porta adulterina in propinquo perrumpitur. Arietis incussi fragor ne exaudiretur à Turcis, coortus, Deo providente, validus ventus effecerat, Patefacto aditu Dux & Buamundus cum equitum & peditum agmine irruunt in urbem & in barbarorum domos, dum Flander in muris alias atque alias occupat turres. Liberatoribus suis agnitis indigenæ Christiani gratulantes præbant indicaturi hostium tecta & receptus. Fluebat passim cruor; penetralia, plateæ, mœnia cadaveribus sternebantur. Strepitu & clamoribus per urbem crebrescentibus expergefæcti tandem in arce Rex & præfecti, ne tum quidem animo sollicito fuere, arbitrati non aliunde tumultum oriri, quàm ex imperatâ in id tempus Christianorum incolarum cæde. Et verò inventi sunt in horum ædibus Turcæ non pauci, & ibi, quam illatum alijs venerant, necem passi.

passi. Multi dum diverticula & latebras quærunt, in Godefredi & sociorum gladios incurrere. Pars patente urbis portâ se ejecit, hærente in terga victore: pars in arcem perfugit incolumis. Interea milites Christiani reliqui, qui in castris remanserant, ignari clandestinæ irruptionis, clamores urbis mirabantur. In mentem venit, Turcas ibi lætas voces tollere ob nunciatum adventum Corbagathi. At Raymundus, Robertus Normannus, Eustachius rei conscij evulgato denique arcano exhilaratos & arma capere jussos ducunt ad urbem. Primo diluculo conspexerant erectum in edito loco Buamundi vexillum, captæ urbis indicium. Apertis portis conferti intrant, & juncti socijs veniunt in partem cædis & gloriæ. Jam familiæ regiæ fortuna hæc fuit. Nobilis vir Raymundi popularis, in nocturna irruptione magnificam domum effractis foribus ingressus, inciderat in dormientem Reginam accubante filiâ, quas captas Raymundo tradidit quiritantes, & de Acciano Rege sollicitas. Manè con-

vene.

venerant proceres deliberaturi de arce oppugnandâ, cum per urbem spargitur rumor, captum quoque regem adduci. Multitudo velut ad triumphi spectaculum effusa est. Quantum quisque plurimum poterat, famæ Acciani Turcicæque gentis addebat ad augendum partæ victoriæ decus. Ita celebratus sermonibus Rex dum expectatur, Syri tres Christiani magnis lætitijs incedentes adsunt, petuntque ad Godefredum admitti. Saccum præferebant sanguineis notis respersum. Inde educunt prægrande humanum caput, insigne oculis, & oris torvitate. Promissa canities, prælargæ pilosæque aures, barba ingens, quæ ad procერი hominis umbilicum usque deflueret. Acciani caput id erat, qui noctu arcem compleri fugitivis conspicatus, veritúsque, ne hæc seu proditione seu vi caperetur, clam suis abjecto cultu regio, vilibúsque panis tectus, mulo conscenso effugerat, latitaturus in montibus, quoad eventum rei planiùs cognosceret. Ibi dum incomitatus erat, Syri illi tres Principem
emi-

eminus agnoverè. Suspicati, fugere eum captâ urbe, statuunt ulcisci mala, quæ eo auctore acceperant. Animo dissimulato accedunt, regémque submissis cervicibus venerantes, repentè mulo deturbatum interimunt. Caput Antiochiam allatum non perinde Godefredum, ac plerósque alios affecit. Hi lætitiâ gestientes eò magis curas ponere; multi per domos vagari, omnium præter prædam obliti; pars vacare epulis; non pauci spectandis barbaris saltatricibus animum pascere. Nonnulli quoque procerum captivæ Reginae ac filiae blandiebantur otiantes, fidentésque rumori de Alexio adventante, qui propulsaret Corbagathum. At Godefredus intenderat animum in belli curas, quæ multæ simul undique circumstant. Licèt urbs capta cæsusque Rex esset, arcem situ, operibus, præsidioque validam obtinebant præfecti, quibus Sensadulus Regis filius à Corbagatho reversus accessit. Ipse Corbagathus cum copijs mox erat futurus in conspectu, moras præcul trahente Alexio.

xio. Annona non solum in castris, sed & in urbe per plures menses obsessâ defecerat. Ex adductis equis supererant CL. tantummodo, nec plures in urbe inventi quàm D. In conventu procerum decreta arcis oppugnatio, eoque soluto mox cœpta, reliquo toto die tenuit, sed nullo successu, Buamuudo etiam læso in femore. Manè Corbagathi primum equitum agmen apparuit. Qui advolantes sub muros convitijs incessère Christianos, jactisque in aërem telis ac receptis ludibundi vocavere ad pugnam. Cúmque ijs fatigatis non esset facta congrediendi potestas, illi victoriæ specie exultantes arcem ingressi. Postridiè infinita Turcarum multitudo Antiochenam vallem subiit. Equitum trecenta millia, peditum innumerabilis turba inter fluvium lacumque cœnsedit, cum egregio bellico instructu, nec sine magno numero librorum magicorum & hariolorum Corbagatho fausta omnia spondentium. Ibidem cum Princeps maga convenit, Calabro erat

erat (a) Corbagathi mater, fatidica mulier, quæ caritate in filium profecta urbe Alapiâ sequebatur exercitum. Arcanum longumque cum filio colloquium habuit. Nescitum tunc, quid agitarint. Cæterum ex vultuum commotione, cum digressi sunt, satis constitit de magnis rebus studiosè actum. Inde anus Alapiam redijt, pretiosis donis, multisque honoribus culta. Corbagathus motis castris propiùs urbem accessit. Partem copiarum in campestribus ultra Orontem amnem ita diffudit per bis mille passus, ut ad portam Pontis pertingerent. Reliquas explicuit circum montem australem, multis millibus in arcem immissis. Ipse progressus in editam rupem è regione portæ, quâ urbs capta fuerat, substitit. Inde & urbem & castra sua conspiceret poterat & conspici ille gentium terror, magæ Principis filius. Et verò mox in excelsa, quo constiterat, jugo spectaculum urbi edidit, quod eum matre magâ ortum, adiutumque magicis artibus pro-

(a) *Tud.*

probaret. Ibi repentinè illi non tabernaculum de more, sed (a) novum oppidum excitatum, ac velut ex terrâ ortum. Circùm muri, propugnacula, pinnae, turres: intus ordines ædium, plateis divisi: in medio princeps turris Carbagathique prætorium, ad quod undique plateæ ducebant. Oppidum totum ex symmetriæ legibus structum, mirabili artificio & varietate colorum nitebat, adeò capax, in quo duo hominum millia commodè amplèque habitare possent. Spectantium nostrorum stuporem auxit id oppidum, cum totum, post paucos dies, subductum oculis è rupe evanuit, & subito in alteram Antiochiæ partem ultra fluvium in campestri tumultu denuò conspicuum exiit. Eò demigravit Corbagathus pabuli copiosioris causâ, sicque circumfudit urbi militem, ut nostros undique cingeret, & portis omnibus obsessis exitu intercluderet. Ita nostri intus obidentes arcem, undique foris obsessi. Accessit sinistri ominis res. Dux Go-

de.

(a) *Aquen. G. Tyr.*

defredus, qui portâ ad orientem versâ habebat stationem, conspiciatus Turcarum multitudinem & vires eâ parte crescere, eruperat portâ cum multis suorum. Pugnâ confertâ pro tentorijs magno animo, corporum vires labore inediâque debilitatæ & equi pauci ac jejuni non suffecere conatui. Dux ante signa inclinatam suorum aciem animo, audaciâ, manu sustinuit. At Turcis acriùs instantibus tandem repulsus in urbem ducentis ad portam desideratis. Elati hostibus animi propulsato duce, illo celebri gladiatore, magni Arabis interfectore, priùsque invictò, sed quem nunc docuerant vinci posse. Et Sensadolus, ex arce infestus perpetua jaculatione adhuc, nunc majora aggreditur. Erat modica vallis inter arcis montem, & humiliorem alterum, in quo Buamundus præsidium excitarat, fossâque & muro firmarat. Non aliâ viâ, quàm per hunc collem, ex arce in urbem aditus erat. Repentè Sensadolus cum ingenti peditum agmine, trucique tum clamore, tum impetu,

tu, Buamundi munitionem adoritur. Præfidiarij perculsi multitudine & vi hostium, fessique pugnâ, lubrica suo sudore & sanguine arma vix sustinebant. Iamque multis amissis Buamundus loco cessurus erat, Turcis in urbem secuturis, cum nunciato ejus & omnium discrimine Dux Godefredus accurrit auxilio cum Eustachio fratre, aliisque. Ab ortu solis ad noctem dimicatum magno animo, parique periculo. Dubij eventus pugne finem nox attulit, at non quietem nostris, somnive securitatem. Per tenebras major, atque ominosus pavor non paucorum animos, etiam procerum, oppresserat. Cogitabant sibi Turcas ex arce, ex castris, instare; non interdiu, non noctu respirandi tempus, aut locum relinqui. Ægrè modò, nec tam virtute, quàm nocte Turcas urbis ingressu & expugnatione prohibet. s. Cùm primùm ad arma redierint, debellatum esse. Deesse in urbe omnia, etiam animos. Ergo velut deploratis rebus viri nobiles, (a) atque in his

K k Gran-

(a) *Aquens.*

Grandimenillius, cui soror Buamundi nupserat, noctis silentio è muris per funes delapsi, fugientisque per abrupta manibus pedibusque laceris ad fauces Orontis pervenere. Ibi classiarijs Mathildanis res perditas, receptam à Turcis Antiochiam dictitavere, neque tantam eo loco esse classi stationem. Territi hac narratione Mathildani, profugis illis in naves receptis abitum parabant, cum supervenit Turcarum manus, inijcitque in navigia ignes. Quæ subduci fugam potuere, vela fecere Philomelim ad Alexium, qui, Antiochiæ obsessis auxilio venturus, grandem contraxerat exercitum. Advectis ad eum profugis, eodem tempore locoque adfuit Stephanus Comes Blesensis, qui per causam morbi pridie captæ urbis digressus è castris, deinde viso Corbagathi exercitu territus profugerat. Sciebat Alexius, Stephanum nuper creatum Dictatorem inter procures Latinos primas auctoritatis dignitatisque partes obtinuisse. Ab hoc, aliisque ubi intellexit de Christianis Antiochiæ actum esse, sibi

ultrà

ultrà procedendum non exstimavit, & reportavit exercitum. Antiochia Christiani reliqui sustentabant quidem adhuc: at tot malis oppressos afflixit sociorum ista defectio. Primum irasci atque indignari, Grandimenillium comitésque vocitare nocturnos funambulos, Stephanum transfugam, Dictatorem, Alexium Græcæ, hoc est, nullius fidei Cæsarem. Subivit deinde plurimum animos tædium, desperatio, & fugæ, quam in alijs damnarant, consilium. Petrum Anachoretam, non illum sacri belli præconem inclytum, sed ejus filium retraxit ex fugâ Tancredus, cujus signifer erat. Iam fames tanta invaluerat, ut non solum equinis carnibus, sed immundis quibusque vescerentur. Milites abstinebant publico, nec jussis præfectorum ad militaria munera extrahere poterant. Ita animos ex luctu & inediâ subjerat pigritia, tædumque vitæ. Hic Buamundus, ut erat ingenio ad comminiscenda insolentia promptus, ignem tectis injici jubet. Ad duo millia domorum, coorto vento, confla-

gravere. Lugubri spectaculo periculôque territi milites prodire quidem, sed ex mutuo ærumnarum conspectu mœstiores. Fluere illuvie & lacrymis, pectora plangere, non alteri alteros aut salutare aut aspicere. Ipsi Proceres reputantes hæc, & Turcam esse sibi hostem, tam sævum ubi vicerit, quam potentem ut vincat; defecere animis. Aliquot dies consumpti secretas cogitationesvolvendo, suspectique invicem non adire propius, non alloqui audebant. Tandem convenere aliquot, deinde plures, & arcanum ultimæ desperationis iniere consilium. Decrevire reliquam Christianorum multitudinem, quandoquidem nec in urbe incolumem præstare, nec per hostes educere salvam possent, deferere, fugâque sibi consulere. Fœdissimum dictu facinus post conflatum bellum sacrum eo die patratum erat, nisi fuisset, qui conjurationem Duci Godefredo nunciasset, longè alia tunc agitant. Erat ei jam inde à captâ urbe statio ad portam, quæ à vicino fonte, antrôque memorabili
nomen

nomen accepit. Ex (a) rupe contiguâ fons largo hiatu prorumpens in subiectum labrum lapideum magno strepitu aquarum cadit. Inde limpidus ac saluber per canales deductus vicinos rigat hortos, longeque per urbem excurrit. A fonte ascensus est in rupem præruptam, nec procul ab hac in montis latere caverna amplissima visitur. Rupî ipsi incisa triplici aditu patet, plurimisque columnis ex eadem rupe cæsis innititur. Dux cum primùm ingressus erat locum hunc, animadverterat, circum ad muros columnasque fragmenta signorum, & vestigia quædam pictarum imaginum. Interrogatis indigenis, quænam illa caverna, quæ simulacra essent, intellexerat, id pium delubrum fuisse ornatissimum Divorum iconibus. Verùm impios Turcas Antiochiâ potitos locum, ut alibi alia, profanasse. Exturbatis sacris ministris, jumenta velut in stabulum induxisse, disjecisse aras, cælestium imagines diffregisse. Quin earum lineamenta ex ipsis

Kk 3

de-

(a) *Cojovic.*

derasisse muris, & quasi in viva capita
friviente effodisse oculos, mutilasse na-
res, obduxisse ora sordibus. Dux in-
dignatione in barbaros & religiosâ qua-
dam in deformata simulacra miseratione
cavernam obire cœpit, & (a) sin-
gulas icones noscitate; nomina exqui-
rere, & reverenter piéque appellare:
hîc Christum servatorem venerari, ibi
Christi Parentem, alibi Divum Pau-
lum, de cujus nomine caverna fonsque
portæ contiguus atque ipsa porta erat
appellata. Ad eam cavernam venti-
tare, ibi immorari, nec posse à cultu
eorum piisque votis abduci, nisi ferò,
licèt impransus; (b) non sine querelis
amicis familiarium, quibus placuisset
precatio brevior. Hæc erant studia
Ducis, ita partiri militiæ & religionis
munia, ut neutris unquam deesset.
Urîsque tantò impensius dabat operam,
ex quo res Antiochena in ultimum pe-
riculi venerat. Secundùm Deum fre-
tus ope Virginis, sacri belli præsidis, cu-
jus iconem in cavernâ tanquam sacrum
Pal-

(a) *Tyr.* (b) *Idem.*

Palladium colebat, versabat animo, quâ ratione obsidionem expediret: consultiusne esset includi diutius muris; an erumpere instructâ acie in hostes; an ad singulare certamen vocare Corbagathum. Certè pro salute sociorum statuerat discrimen vitæ subire vel solus. Hæc agitati nunciatur exercitus principes conjuratos decrevisse fugâ se subducere, & militum vulgus destitueret perituum. Vir per omnia mirandus, à quo præ multitudinis caritate ac miseratione quærebatur majori ardore periculum, quàm incolumitas à timidis, ad id nuncij fremuit, seque ex cavernâ proripuit. Mox conjuratos proceres (a) (nominibus pepercere scriptores) convocat. Aperit sibi eorum innotuisse, aut potius nunciatam mentem, quam nondum satis credere possit. Perennem sibi, ac posteris inussisse notam infamiæ priores desertores. Fugisse immemores fidei, ducum, sociorum, cælestisque opis ac præmij. Irent sanè illi, & fortes viros timidi suo con-

Kk 4

spectu

(a) *Aquen.*

spectu liberarent. Nempe à lætis parentibus ac liberis excipiendi, qui sine duce redeant, sine spolijs, nullo reportato nomine, nisi funambulatorum nocturnorum; qui nulla ostentare vulnera possint, nisi laceratorum in fugâ pedum ac manuum. Demonstrat deinde parem aut majorem inustus sibi notam, quicumque turpissimum exemplum sequerentur. Tum interrogat quid hoc rei sit? verumne esse possit, ut timidorum illorum ductu & auspicijs virorum fortium aliqui tracti sint, quæ non commoverint militum vulgus? Cùm hi fortiter stent in urbe, ubi hostem supra caput, & circum undique habeant; quantum piaculum fore, siqui ductores ab armis discedant, suosque non solum milites, sed populares ac fratres barbaris prodant. At si quem fortè nec sui nominis, nec salutis suorum cura tangat, reverendum esse Numen, Dei matrem, ac Divos, qui in signis militaribus deserti dedantur hostium lubibrò, & ejciantur è templis, Christianâ re rursus eversâ. Docet

cer denique, non esse diffidendum cælesti opī, quam toties manifestam experti sint. DEUM HOC VELLE, Deique Matrem belli præsidem hoc jubere. Addeò potens dehortatio fuit, similia addentibus Episcopo Ademaro, & Roberto Flandro (quos nominatim fugæ cogitatæ probro exemit historia) ut conjurati mutatâ mente statuerint cum Duce vel mori, vel vincere. Confirmandis omnium animis accessere visa, & in ijs manifestus exorata Virginis favor. Duo (a) erant Sacerdotes Stephanus & Petrus, viri boni, ab Europâ secuti exercitum. Stephano in Antiochenâ de Dei Matris noctu jacenti, atque inter precandum lacrymis perfuso, præ metu imminentis exitij, obtulit se aspectabilem Servator cum Matre, atque minaci voce, se Christianis auxilio fuisse in urbibus Niczâ atque Antiochiâ capiendis: verum eos beneficiorum oblitos secundis rebus, quæ circumfluxerant, insanire cœpisse. Antiochiæ mulierum Christianarum atque Ethnica-

ca-

(a) *Tudeb. Agil.*

carum consuetudine fœdatos, cœlôque jam invisos, & pro meritis plectendos. Hîc Mater Virgo se ad pedes filij advolvere, supplêxque intercedere. Filius placatior converso ad sacerdotem vultu, vade, inquit, & populo meo refer, ad me revertatur & ad frugem; vicissim respecturum me, & infra dies quinque missurum suppetitas. Hæc sacerdos Stephanus. Petrus (a) verò cognomento Bartholomæus, domo Massiliensis, similia sibi obversata referebat. Ac primùm agebat, quiescenti in æde Divi Petri demonstratum divinitus locum, ubi lateat terrâ obrutum ferrum lanceæ, quod Servatoris latus foderit. Hoc invento, pugnare cum hostibus ne dubitarent. Quæ cùm proceribus enarrasset, juratus rem ita habere, præivit ad Divi Petri. Loco præmonstrato refoditur sacræ lanceæ ferrum. Insecuta multitudinis acclamatio, index religionis, speique conceptæ. Addebat Massiliensis ex viso altero vaticinium, advenisse dies, quibus sanciturum

sc

(a) *Agil.*

se atque evecturum in Oriente regnum
Christianorum Christus Matri pollicitus
esset.

VATICINIUM

PETRI BARTHOLOMÆI.

VINCENT CHRISTIADÆ : FAVET EXO-
RATUS JESUS;

HOC TRIBUIT PRECIBUS, MAGNA MA-
RIA, TUIS.

PROMISSI FULSERE DIES : MARIANUS
EOD

CHRISTIADUM REGNUM SANCIET OR-
BE FAVOR.

Vulgata hæc ita movere universos ut
post tam certa cælestis favoris pignora
nihil timendum conclamarent. Iam
inediæ, jam imbecillitatis immemores
prælium deposcebant, quando Christus,
Virgine exorante, promitteret non mo-
dò suppetias, sed etiam Regnum. In-
dictum tridui jejunium, ut bene eveni-
re omnia superi juberent. Dux con-
ventu procerum coacto censuit cælesti-
bus promissis, & animorum alacritate
utendum, sed citra temeritatis notam.

Im.

Immenſas eſſe barbarorum vires, Chriſtianos ærumnis debilitatos. Periclitaturos hos omnes, ſi decernatur acie. Eligendum potiùs aliquem, aut aliquot, qui ſuo periculo rem communem decùſque ſuſtineant. Miſſo in compendium bello, delectis paucis utriuſque exercitus fata committenda. Mecum, inquebat, Corbagathus, aut, ſi minùs dignus videar, cum altero veſtrum conferat manus; vel ſi malit, tres aut plures utrimque certamen ſubeant. Sin ita denique videatur, exercitus cum exercitu æquo loco ſignâ conferat. Aſſenſere magnâ alacritate proceres. Electedus Petrus Anachoreta, qui Corbagathum hâc de re conveniret. Periculosa legatione non territus Petrus diſcedit ad caſtra. Interim in urbe fortiffimi procerum pugnae ſe parabant, licet incerti, quinam ſubituri diſcrimen eſſent, Si Corbagathus viritim experiri vellet, non alium vulgò cenſebant cum eo, quàm Godefredum Ducem, committendum; ſi plures ſocios admitteret, valentiſſimos procerum opponendos.

dos. Tolosatem ægrotare, Hugonem Magnum debilitatum insolentiâ victûs; viribus pollere Buamundum, Eustachium, Robertos, Balduinos, Tancredum, Ribodimontium. Hi, atque alij spe pugnæ æstuabant. Inter quos Hugo Magnus, licet pallidus ac debilis, neque ego, inquit, qualitercûmque affecto corpore sim, pugnâ abfuero. Vigorem, ac vires, si obsequentia mea fiduciaque cælo placebit, reddet magna Virgo, quæ opem nobis, regnûmque promittit. Fiduciam meam excitat imprimis ab eâ patrata in oculis meis nupero Flandrico bello prodigiosa Tungrensis Hectoris curatio. Quam cum enarrasset, Robertus Normannus retulit aliud prodigium Virginis, quo Regis Angliæ parentis sui legatus ereptus naufragio fuerat; unde Conceptus Virginei festum duxerat originem. Addidit Dux miranda de Divâ Antuerpianâ, item de Bononiensi. Quibus auditis, qui jam pugnæ studio calebant, inflammati lāmque inter eos amica concertatio erat, nec componi posse videbatur.

batur, nisi forti entur, quinam cum Godefredo in Turcas viritum pugnarent, felicésque dicebant, quos fors illa contingeret; quando Anachoreta Petrus à Corbagatho rediens omnes expectatione suspendit. Qui per circumfusus, sciscitantésque transiens celato Corbagathi responso rectà ad Ducem contendit. Inter viam non defuere, qui interrogarent de Corbagathi castris, magicóque illius ac mobili oppido. Respondit Corbagathum (a) in equo sibi occurrísse, nec se castra ingressum; inspecturos ipsos ac direpturos, cum vicissent. Godefredo retulit, Barbarum auditis certaminis conditionibus cum supercilio (b) stomachóque respondisse, conditiones ac leges ferre ejus esse, qui vicerit. Victi Christiani cum fortunam suam ignorent, se victorem effecturum, ut eam in vinculis supplicíisque intelligant; neque commissurum, ut optionem habeant generis moriendi. Dux Petrum hæc in vulgus edere vetuit, ne atrocibus barbari minis

terre.

(a) *Fulch.* (b) *Aquen.*

terrèrentur aliqui. Id tantum enunciare jussit, Corbagathum sic respondisse, ut omnibus fiat pugnandi copia. Pulchram procerum de pugnâ contentionem exitum, quo digna esset, habituram. Nullum non compotem voti fore, pugnaturos omnes. His vulgatis tota multitudo exilijs ærumnarum oblita, ac velut secunda victoriæ. Decretum prælium in posterum diem, edictumque, ut universi primo diliculo armati adessent loco patente ad portam Pontis, quisque sub sui Principis signis. Gestientes omnes in tecta reversi, longam noctem venire rati, quæ moram tantulam certamini faceret. IV. Cal. Iulias (a) ante lucem sacerdotes ritè ad aras operati, duces militesque procurati sacra confessione, & (b) divinâ dape refecti, præeunte Godefredo. Ita scilicet egregiè litatum est. Mox summâ omnium alacritate arma capiuntur. Dux nihil neque humanæ, neque divinæ opis prætermisit; nunc proceres, nunc milites hortatus, ut non minùs animos reli-

(a) *An. 1098.* (b) *Agil.*

religione & fiduciâ in Deum ac Dei Matrem, quàm ferro dextras armarent. Inter hæc (a) conversis fortè in arcem oculis videt ingens veli nigrantis volumen attolli atque explicari. Non dubitavit, quid id rei esset. Nempè Sensadulus arci præfectus, ubi è superiore loco adverterat nostros coire frequentes & parari ad pugnam, ejus rei signum, quod convenerat, sustulit Corbagacho. Bullionius ac Buamundus pro suâ scientiâ militari copias ordinavere. In octona agmina distributæ sunt intra urbem, sed quæ explicatæ in campo terna dena effecere. Cujusque agminis præeuntem peditatum equites tegere jussi. Miserabilis facies exercitus (b) erat, si vigorem animorum excluderes. Pallebant fame macilenti artus. Non pauci armis præ inopiâ venditis, aut nullis, aut Turcicis tegebantur. Equi prælio apti non plures supererant, quàm ducenti, reliquis in alimenta consumptis. Et septimus erat dies, ex quò nihil iis pabuli præter arborum folia corticésque præ-

(a) *Aquen.* (b) *Agil. G. Tyr.*

præbitum fuerat. Ergo non gregarij modò, sed illustres etiam viri plurimi pedibus ingrediebantur, aut mulis vehabantur, aut asinis. Præibat signifer Hugo Magnus. Movit omnibus commiserationem videntibus regij juvenis pallorem & debilitatem ciborum insolentiâ ac tenuitate contractam. Cùmque is ægrè insideret equo, monitus est ab amicis, ut absisteret prælio. At magno regiòque spiritu (a) respondisse legitur, absit, planè vadam: atque utinam cum bellatoribus casuris felici morte conjungar. Proximus ibat Hugoni Robertus Flander & ipse multa passus. (b) Ditissimi soli Princeps sæpius in urbe conspectus stipem petere, eo die insidebat equo, quem mendicatò compararat. Non fuisset id passus amicorum intîmus Dux Godefredus misericordiâ & liberalitate memorabilis, nisi perpetua largitione in commilitones egenos modò ad suam mensam adhibitos, modò pecuniâ, aut misso demenso sustentatos rem familiarem exhausisset.

L I

At-

(a) *Guib. Abb.* (b) *Tyr.*

Atque ipsimet equus ad prælium defuerat, & eum, quo tunc vehebatur, à Comite Tolosano multis precibus ac tantum non mendicatò extorserat. Patet factâ portâ exhibant, (a) cùm ros cælo lapsus recreavit corporum vires, nec non alacritate ac pietate animos imbu-
it. Pro divino imbri acceptus est, creditumque adesse huic aciei Numen. Conclamavere DEUM HOC VELLE, seque ductu cælestium cum hoste conflaturus. Et mox vigor factis ipsis patuit. Corbagathus signo admonitus præmiserat de suis ad duo millia equitum, qui nostros urbis egressu prohiberent. Citatis equis ad pontem advecti, mox exscendunt, & acerrimè incessunt exeuntes. Hic Magnus Hugo, ille modò vix equo sedens, & cum eo Flander præmissa manu sagittariorum prorumpunt, obstantes frangunt, & in fugam conijciunt tam subitam, ut ægrè in equos evaserint. Inde memorabile proditur facinus (b) Anselmi Ribodimontij, quo in se omnium oculos, studiumque

(a) *Agil.* (b) *Aquen.*

úmque convertit. In medios involans hostes, dum hos dejicit, illos perfodit, & in eorum cæde exultat, involuitur. Admiratione virtutis atque opitulandi studio advolant Hugo & uterque Robertus ex vicinis agminibus, nec non ex remotiore acer Eustachius. Ingen-tem opinionem indolis ac fortitudinis ante eum diem Godefredi fratris clari-tate suppressam ea prompta atque im-pavida excitavit opera. Illi proceres quatuor junctis viribus Ribodimontium discrimine explicant, & unà cum eo magnâ editâ strage hostem penè ad ca-stra usque infectati redeunt in ordines plaudente exercitu, oménque captante victoriæ. Dum nostri ex urbe in cam-pum longo agmine prodeunt, in castris Turcicis miles in armis stare jussus erat, quoad signum congressionis daretur. Corbagathi oppidum mobile in edito colle cernebatur, pro cujus portâ stans ipse procedentes nostros observabat. Quos cùm advertisset iter non ad castra intendere, sed flectere ad montes mare

versus, fugam, (a) inquit, hi, non pugnam meditantur. Ergo curæ expers confedit, & ludere latrunculis coepit stipatus coronâ procerum. Quibus identidem Christianos spectantibus, finite, inquit, urbe egredi omnes, ut opprimantur à nobis facilius. Cæterum conversus ad Solimanum Regem & Rodohanum Alapiæ satrapam, (b) ambos cladium acceptarum memores, & vindictæ avidos occulto itinere per montes circummittit cum expedito equitatu ferreis ollis latentem pestem ferentes, ut Christianos ex improvise armis & fraude adoriantur à tergo. Aderant ludenti spectatores duo Antiochia egressi, (c) alter Turca Amyrdalis, alter Christianæ fidei ac militiæ desertor Aquitanus. Corbagathus inter ludendum oculos subinde referens ad egredientium ordines, cum (d) non paucas Christianorum cohortes adverteret, monitus est ab Amyrdali rem ad prælium spectare, ludoque abstinendum.

Cui

(a) *Agil.* (b) *Aquen. Tudeb.* (c) *Fuleh. Rob. Mon.* (d) *Aquen.*

Cui ille , an non , inquit , mihi à te relatatum, Christianos esse paucos , nec pugnatu-
 ros inecum ? Negavit Amyr-
 dalis dixisse non pugnatu-
 ros , licet pau-
 ci essent Turcis collati. At Aquitanus
 transfuga dictitabat famelicos illos , de-
 biles , ærumnis confectos : scuta eis ex-
 cratibus esse , enses rubigine obductos.
 Hoc cultu nitentes congregari non au-
 furos. Interrogabatur hic à Corbaga-
 tho , ut quæque acies prodierat , cujus
 procerum esset. (a) Transfuga sole
 matutino auratas galeas loricâsque &
 vexilla collustrante noſcitabat singulo-
 rum ducum arma atque insignia. In-
 dicavit Corbagatho primum agmen esse
 Hugonis & Flandri , secundum Nor-
 manni , tertium Ducis Godefredi ;
 quem prodeuntem observans Amyrda-
 lis , admiratione militaris ordinis & re-
 cordatione fortissimi gladiatoris , nunc,
 inquit , amoto ludo instruenda seriò a-
 cies adversus hos neutiquam fugientes.
 Occidi possunt , non fugari. Itane non
 possunt ? excepit Corbagathus. Non ,

LI 3 inquit,

(a) *Aquen.*

inquit, vel si omnis occurrat Turcarum natio. Et Corbagathum ceperat admiratio egregiè instructi agminis: quàm tamen dissimulans, intuitus Amyrdalim, age, inquit, hi tantopere à te laudati quid virtute possint, experiamur. Tum animo reputans pugnae singularis genus, quod pridie Godefredus obtulerat, (a) eo decernere statuit. Simul caduceatorem renunciare Duci Christiano jubet copiam atque optionem certaminis sibi, heri ab eo factam, nunc à se vicissim ei fieri. Inter duas acies quinque aut decem Christiani prodirent in totidem Turcas pugnaturi. Antiochiâ decederent, quorum pugnatorez vincerentur. Audito caduceatore dum Godefredus deliberat tantisper quid responsi det, murmur per proceres pervagatum, ardorque pugnae & hesternæ æmulatio renovata. Dux animadverso in omnibus eodem studio, re cum primoribus collatâ jussit referri Corbagatho, noluisse eum subire viritim aleam, cùm ipsi voluerant; nunc quando

(a) *Agil.*

do ad pugnam parati omnes essent, decernendam acie. Ad hæc Corbagathus irâ percitus, versusque (a) ad Aquitanum, tu ignave, ausus mihi mentiri Europæos tabidos inediâ fugituros, per Mahometem capite lues. Quibus dictis iussit transfugam obtruncari, digno perfidiæ præmio. Campum, quantus patebat in latitudinem à ponte urbis ad proximum montem, Christianus exercitus longo ac lento agmine progressus occuparat, non animo fugiendi, sed ne (b) cingi à barbaris posset. Inde ad hostem vultus gradusque conversus. Universa acies hoc modo stetit. Lævum cornu, quod ad montes pertinebat, Hugo Magnus & Robertus Flander tuebantur cum xxx. millibus Francorum & Flandrensium. In eodem Normannus xv. millia Andegavorum, Cenomanorum, Britonum, Anglorumque sub signis habebat. Aniciens Antistes (c) mediam aciem rexit iunctus Tolosatibus & Hispanis,

LI 4

qui-

(a) *Rob. Mon.* (s) *Tudeb. Aque. Ord.*

(c) *Agil.*

quibus ferrum Dominicæ lanceæ præferebat. (ut scribit ipse) Raymundus Agiles sacrario præfectus Raymundi Tolosani, qui Comes gravissimè æger partem copiarum (ad xx. hominum millia erant) ducentos in urbe retinuerat præsidio futuros contra custodes arcis præside armorum uxore Hispanâ Amazone cum Flandra Gertrude ; reliquos ad prælium miserat. In dextro cornu , quod à fluvio stabat, pugnaturum imperatorem Godefredum, Eustachiúmque fratrem sequebantur xxx. millia pugnacissimorum militum Lothariensium , Boloniensium , Brabantorum , aliorúmque Belgarum ac Teutonum. Legionem gladiatoriam vocabant ab gladiatorum , quibus instructi erant, magnitudine atque acie. Hoc erat haud dubiè robur exercitus. In eodem cornu interior Reginaldus Comes Tullensis consanguineus Ducis habebat Burgundionum , & Teutonicorum quatuor millia. Cornu (a) claudabat exterior Tancredus cum Gastone

(a) *Tudeb.*

ne Foixio præpositus agmini iv. millium Apulorum. In subsidijs Buamundus tria millia Normannorum atque Italorum tenuit ad incerta belli. Summa centum millia superabat : sed nihil ud Corbagathi copias. (a) Trecenta equitum millia sub signis habebat, pedites innumeros, quos ad sexcenta sexaginta millia fuisse proditum est, & in his reges satrapæque supra triginta nominibus enumerati. Cæterum Corbagathus tanti exercitus dux, memor longi colloquij & monitorum matris hæsit tantisper cogitabundus, an pugnae signum daret. Tandem legatum suum jubet acie dispositâ eò niti, ut à fronte ac lateribus Christianos claudat, dum Rex Solimanus circumvehitur terga. Mandat item, ut quando excitatum à Solimano fumum viderit, copias suas retrocedere paulum, & fugam simulare jubeat. In dextro cornu Sosmanus Hierosolymorum Rex; in lævo propius fluvium objectum Bullionio rebur barbarorum ductoribus infestissimis Bul-
dage

(a) *Fulch.*

dage Acciani filio , ac (a) Balduco Samofathi satrapa. Sustulere immanem clamorem Turcarum tot millia, & procurrere diffusi ad cornua , ut nostros includerent. A Ducis cornu cœptum prælium , cujus miles , ut iussus, stetit immotus , dum primus sagittarum hostilium impetus se remisisset : tum signo crucis munitus inclamatóque JESU ac MARIÆ nomine Turcam pedetentim invadit impavidus. Exemplo Ducis alia quoque agmina strenuè progressa in hostem. Inter hæc Solimanus (b) à tergo apparuit, in quem mox converfis signis quatuor millium agmen collectum ex Ducis & Normanni copijs tendit ductu Reginaldi. Ecce autem repente ferreis ollis allata à Solimano pestis erupit. Profluentis fumi terra nebula adspirante vento in ora oculóſque Reginaldi adventantis impellitur. Denso atque adverso vapore suffusus miles turbari primùm , deinde hostibus per nebulam ingruentibus cædi , agique in fugam. Inde in Buamundi agmen

(a) *Aquen.* (b) *Idem. Aquen.*

gmen versa tempestas. Solimanus pulsum Reginaldum aliquantisper sequutus revertens in averſam Buamundi aciem incurrit. Noſtri permixti cum hoſtibus in caligine inhibere tela cogebantur, ne ſuos configerent. Dum hæc à tergo geruntur, à fronte inſtans Turcarum acies viſo fumo, ut juffa erat, pedem referre cœpit, tamquam pulſa loco, ut Chriſtiani fugere eos rati creſcente audaciâ perturbatis ordinibus ſequerentur. Verùm & iſti memores imperiorum Ducis, lentè, & extento (ut erant) agmine proſecuti firmo gradu, telisque & umbonibus pulſantes hoſtem recedentem, nec jam ſponte ſubmotum. Inde acris pugna exorta. Omnium maximum Ducis periculum fuit, quem armis, imperiisque conſpicuum Buldagis, & Balducus urgebant, ille dolore amiſſi patris Acciani, Balducus occulto odio in fratrem ducis Balduinum atque in ipſum. Dux inſignis robore, quotquot conferre pedem audebant, obtruncans, ſuos voce, & maximè exemplis accendebat. Primi hoſtium

stium terga dant, & cùm signa quoque fluctuare cœpissent, proximi in suos versi turbatis alijs addidere terrorem. Iam eo cornu victor in terga Buldagis & Balduci hærebat Godefredus, cùm nunciatur Reginaldi agmen horrendo (a) fumo, unde unde coorto, turbatum, ac profligatum à Solimano. Mox impetum factum in Buamundum, & jam ab hoc quantumvis strenuo ægrè sustentari. Nuncium pluribus opem oraturum prævertit Godefredus, & equo converso in Solimanum provolat, concurrente è sinistro cornu Hugone. Contra Heroëm Godefredum nihil valuit suâ illâ fumi telorumve nube Solimanus. Eo profligato, liberatôque Buamundo Dux junctus huic. Hugonique & Tancredo subvenire properat laborantibus in sinistro cornu Robertis, ubi etiam superior fuit. In acie mediâ Episcopo Ademaro magna vis barbarorum à fronte objecta fuerat, ac deinde à tergo fumus. Quo ille viso sacrum Lanceæ ferrum
dex.

(a) *Aquen.*

dextrâ proferens, eoque contra emergentem nebulam in crucis figuram ducto Christum invocans terri vaporis globum in barbaros, qui emiserant, retorfit. Eodem præsidio nullum in suo agmine vulneratum Agiles sacri ferri baculus scribit, ac ne sagittâ quidem quemquam petiturum. Ita hostes toto campo pulsi ad sua castra refugere. Ibi Corbagathus in colle ad oppidi sui mobilis portam stabat, visâque Turcarum clade jam anxius perpendebat monita matris. Hæc (ut dixi) Calabre nomine, Regis Holofernæ vidua, dudum Alapiæ domicilium habebat, & suarum artium sedem. (a) Anus centenaria, vegeta tamen etiamnum & experrectæ mentis, astrologiæ magicisque libris ac fortibus ætatem impenderat, maga vulgò dicta, ac fatidica. (b) Fertur hæc, cum aliquando de more per noctem sudam intendisset contemplationem in cælum stellis illustre, animadvertisse ostentum ejusmodi. Micabant lumina tria siderum instar, sub quibus sublustris & versico-

(a) *Tudeb. Baldric.* (b) *Geneal. Bonon.*

ficolor umbra multitudinem serpentium figurabat. Hinc malè augurata genti suæ anus proceres Turcas convenit, monētque tribus sideribus, quæ viderat, Christianos tres bellatores significari; substratâ autem serpentium multitudine Turcicam gentem, armis eorum subigendam. Ingratus sermo proceribus fuit, ac neglectus. At sollicitudo Calabres animo hæsit, crevītque Christianis copijs Asiam ingressis. Famâ vulgante virtutem bellicam Godefredi, clatâque duorum ejus fratrum opera, venit in mentem, hos tres sideribus tribus designatos, à quibus esset Turcis timenda perniciēs. Nec dissimilia sunt hæc ominoso illi fulgori serpentiumque numero, quos sub Godefredi ortum in Belgica visos, suprâ memoravi. Ergo Princeps anus pro suâ gente ac præsertim pro Corbagatho filio sollicita codices volvere, sortes versare, scrutari characteres & totâ intentione astra consulere. Ei filia erat Floria, quæ cum matre timere principio bellatorem Godefredum, dein audito Magni Arabis

cum

cum esse victorem, mirari quoque cœpit, tum laudare etiam, amare denique. Cùm in eum movit Corbagathus, secuta anxia mater ad Antiochiam multis filium monuit, editam esse veteribus libris exploratamque sibi sortem Christianos victis Turcis potituros Orientis regno: quare obsecravit ut exitio se ille subduceret. Corbagathus ferox & irridenti similis interrogavit matrem, dijne essent Christiani duces, quos formidaret tantopere. Respondit illa non deos esse, sed divinâ virrute firmatos viros, quâ tanta patrarent. Post multa ultro citrôque addita denunciavit mater non solum genti suæ perniciem, sed filio nominatim proximam intra annum mortem, nisi reportaret exercitum. Sciscitanti Corbagatho, in quod tempus portenderetur Turcicæ gentis illa clades, cum mater respondisset, incertum quidem ejus tempus esse, sed timendum omnino, ne brevi contingeret, illo ferocior, mortales, inquit, utroque in exercitu sumus, quorum ij citiùs morientur, qui pugnabunt ignaviùs. Sub
hæc

hæc mœsta mater & suffusa lacrymis filium osculata revertit Alapiam. Corbagathus maternis minis ita spretis, tamen haud securus nihil prætermisit, quod ad rem pertineret. Singulari arte disposuerat aciem, pugnaeque præluserat palam, ut ludentis ducis securitas militi fiduciam & animos adderet. Impetum à fronte, à tergo fieri jusserat; vim adhibuerat & fraudem. Igni ferreis ollis incluso & in multum fœnum aridum, quod prius in campo jacere animadverterat, injecto solerter excitarat fumum. Ad extremum fugatos suos consistere jubet & instaurare pugnam. Vallis erat pro castris, per quam torrens hieme præcipitatus altè ruperat terram, excavatumque amplum alveum longè produxerat. Ultra hunc compulsi Turæ in vicinum collem se receperunt. Ibi collectis viribus denuo tubis tympanisque canentibus resistere parant. Godefredus egregiique socii transitâ impigrè valle, clamore sublato, in adversum subeunt, hostem de colle depulsuri. Corbagathus, qui priores suos

sona-

conatus cum fumo in auras abijſſo
 viderat , expectabat , quid efficeretur
 hoc poſtremo , quid fortibus magico-
 rum librorum , quos harioli plurimos
 convexerant. Ecce autem offeruntur
 in aëre aſpectabiles proceres tres albaty,
 humana ſpecie auguſtiores , qui alben-
 tibus in equis ingens eodem colore ag-
 men ducebant in hoſtes. Non ſolùm
 à Turcis , ſed etiam à Chriſtianorum
 pluribus , nominatim ab Anicienſi Pon-
 tifice conſpecti. Territi barbari cæleſti
 oſtento pariter ac virtute Godefredi.
 Iam propè erat , ut hic in cacumen col-
 lis evaderet , cum terga dedere effuſo
 curſu , penè uno agmine fugientes.
 Ipſe Corbagathus inter hos effugit mu-
 tatis ſæpius equis , Alapiâque declinatâ
 matris fatidicæ conſpectum ſubire ve-
 ritus , tranſmiſit Euphratem. Ad ſe-
 quendum plerisque Chriſtianorum de-
 erant equi. Acer Tancredus cum pau-
 cis ad ſolis occaſum tergis inſtans tri-
 bus millibus paſſuum continuavit cæ-
 dem. Plus centum millia hoſtium ce-
 cidere , noſtrorum circiter quatuor milia

lia ducenti. Victores potiti castris Turcicis, magnâ vi commeatus ac supellectilis, & quinque camelorum millibus. Libri magiei ingenti numero inventi, & concremati. Post obvias prædas ventum in montem ad ducis Corbagathi gazam. Accedentes contemplabantur eminus oppidum illud mobile ac mirabile, in quo medio eminebat pro prætorio turris primaria. Cupiditatem stimulabat præda, sed retardabat quidam lætitiæ mixtus horror magiei loci. Mirabantur nitorem murorum, versicolorem tectorum splendorem, turrium altitudinem. Totum opus magnificum, & omnia in eo ex artis legibus, & mutuâ mensuræ proportionē constructa. Portæ appropinquantes nullas advertēre præstigias, nullum ludibrium oculorum. Et verò (a) tantæ molis substructio tamque capax, in quo (ut dixi) commodè amplèque habitare poterant hominum duo millia, tota serico pretioso, & versicolore constabat. Nitebant ex serico muri, tecta, turres,

api-

(a) *Aquen.*

apicibus harum auro fulgentibus. Ingressi portam subeunt plateas perpetuâ magnificarum ædium serire ducentes ad principem turrim. Ibi tantum opulentix, quantum qui oculis non subiecere, animis concipere nequeant. Reditum cum spolijs Antiochiam inter lætos clamores celebrantium nunc sua, nunc aliorum, præsertim procerum facta præclara. Omnes laudibus tollebant imprimis Ducis Godefredi bellicam scientiam & virtutem effectricem victoriæ, quòd peritissimè instruxisset aciem, quòd in suo cornu victor mox periclitanti Buamundo tulisset opem, deinde Robertis; & Corbagatho denique intulisset arma victricia. Introëunti urbem effusi obviam incolæ præfidiarii que milites Eluirâ præeunte. Hæc suo, hæc ægri conjugis Raymundi, & orbis totius Christiani nomine Godefredo cæterisque victoribus gratulatur. Godefredus sublatis in arcem oculis, in quâ cernebatur erectum Raymundi vexillum, vicissim gratulatus Hispanæ Amazoni, quòd eâ rerum

fatagente pro viro non solum urbs servata esset, sed etiam arx in deditionem redacta. Inde præivit omnibus ad templum. Gratijs Deo, Deique matri communiter actis, decretum primum omnium, ut ædes sacræ, aræ, cælitumque cultus instaurarentur, quibus bona pars spoliolum attributa meritò, quando victoria cælo debebatur, unde vigor virisque fluxissent. Deinde urbis Antiochiæ dominium Buamundo, cui antè promissum fuerat, sancivere procures omnes præter Raymundum contendentem, id ex pacto deberi Augusto Græco. Eam ob causam ad Alexium decreta legatio, quâ mōneretur, procures quidem Latinos pactos, ut quidquid bello captum ab ipsis esset, id, exceptis Hierosolymis, ei cederet; verum eâ lege, ut vicissim Alexius auxilio veniret Latinis. Quibus conventis cum non stetisset, ne ægrè ferret, quod Latini soluti fœderis lege Buamundum Antiochiæ Principem appellassent. Adestet Augustus impostertum, & bellum per se capeßere ne gravaretur.

Electus

Electus Legatus Hugo Magnus Godefredo imprimis auctore, ut mitteretur regius juvenis modò sanatus cælesti rore ad profligandos Turcas, & videret Alexius victorem, quem captivum tenuisset. Adjunctus Hugoni Balduinus Hannoniæ Comes, profectique Legati. Hugo Constantinopolim pervenit, & munere functus pertendit in Galliam. Balduinus in itinere Turcicis armis (incertum quò modo) oppressus videri desijt. Id ubi rescitum Antiochiæ, graviter, sed variè affecit animos. Multi gloriosorem aiebant interitum Hannonis, quàm salutem Franci, qui rebus adhuc bene gestis inconstantiae maculam aspersisset repetendâ patriâ. Alij à culpâ eximebant Principem, qui Godefredi peritissimi virtutum æstimatoris amicitia perpetuâ floruiſſet, rediturumque cum copijs valentioribus angurabantur ex vero. At Buamundus altiùs rem suspicioso animo perpendens augebatur, quòd Hugo se non monito reversus esset in Galliam, re fortè deliberatâ eum Godefredo, ut huic Constantiam

priori matrimonio solutam conciliaret, atque adeò sponsam adduceret. Rursum induit animum rivalis & æmuli repetitâ memoriâ certamini Tancredi cum Balduino, notæque nomini suo iniustæ in eâ contentione aliisque mox ortis, quibus ad ultimam dimicationem res vocata.

L A B O R U M

H E R C U L I S
C H R I S T I A N I

LIBER SEXTUS.



MAXIMA res ab heroibus Christianis effecta erat Nicæâ & Antiochiâ captis, sed restabat expeditionis meta & belli caput Hierosolyma. Godefredum Ducem, ut eam continuo peteret, impellebat sua religio: tamen visum est iter differendum tantisper, quòd & fatigati militis vires
qui

quiete aliqua recreandæ essent, & æstas appeteret haud opportuna novo & maximè arduo labori. In proximum Octobrem dilata atque indicta profectio. Neque segne otium interim trivit Godefredus. Primùm cum copijs movit ad Euphratem contra Bodohanum Alapiæ Satrapam illum nuper victum, nunc oppidum Hafarchum obsidentem. Eò evocavit Dux ad opem conferendam tum Buamundum & proceres alios Antiochiâ, tum Edessâ Balduinum fratrem. Venire abnuvit Buamundus pluribus de causis Godefredo jam iratus; quæ ut intelligantur, Balduini res cognoscendæ priùs. Querebantur æmuli Balduinum, postquam certamine iratum armisque cum Tancredo congressus erat, sejunctum ab exercitu, Godefredo connivente sectatum opes ac delicias hæsisse in Mesopotamiâ, indulgentem amoribus Andæ Armenorum Regis filiæ, dum reliqui ad Antiochiam labore premerentur & ærumnis. Contrà alij tollebant eum laudibus, quòd ibi præclaris factis, nobilique partâ fortunâ plu-

rimum contulisset non solum ad privatum decus, sed ad belli totius summam. Armenia universa interfluente Euphrate dividitur in duas, Minorem, quæ cis amnem; & Majorem, quæ ultra est. Ambæ ea tempestate, quemadmodum & Syria aliæque finitimæ regiones, Christianos habebant indigenas, sed Turcarum præfidijs pleræque tenebantur. (a) Cæterum Tasfocus Armenorum Rex Christianus ultra Euphratem colens valida obtinebat in Tauro monte castella. Modicum id relictum inter Turcas regnum, congestis tamen in arces opibus & armis adhuc inaccessum. Eratei frater Constantinus regni consors, filiæque Anda insigni formâ, frustra à multis procis conjux petita. Pater avaritiâ & patruus calliditate obstabant nuptijs. Arce regia clausa virgo servabatur non solum horum voluntate, sed ipsâ loci naturâ. Arx imposita arduo Tauri montis jugo. Ingentes duo amnes Euphrates & Tigris in Armenia superiore exorti montem objectum diversi pervadunt.

Inde

(a) *Aque Tyr.*

Inde prorumpentes cingunt amplam atque uberem regionem, Mesopotamiam ideo dictam ; cujus primaria urbs Edessa septem dierum iter abest Antiochiâ. Brevi pervenerat in Taurum & Taurici regiam fama juvenis egregij Balduini, digressi ab exercitu Europæo cum parva manu , ac mira quædam in Armenia Minore & Edessanis finibus patrantis in Turcas. De ejus victorijs cum alia super alia nunciarentur, lætari Rex cum fratre, laudibus juvenis Andagdelectari , & venire in spem videndi aliquando tanti victoris. Verùm cum audire Balduino comitem & operum adiutorem esse Pancratium , stupuere. Erat Pancratius indidem Armenus illustri genere, vir ingenio manûque promptus, & , si quisquam, vafer. Ars illi prima suas artes occultare ; aliena consilia scrutari, sua tegere ; amicis in speciem studere , re verâ sibi. Cum ab hujus hominis perfidiâ timeret rex Balduino , adfuere missi Edessâ oratores cum arcanis mandatis ad regis fratrem Constantinum , petentes ut veniret Edessam

deffam, acturus cum Senatu de Balduino, qui eò victis Turcis pervenerat. Regem, regisque fratrem atque imprimis filiam non tantum admiratio ejus juvenis incesferat, sed etiam ardor noscendi, quis ille Balduinus, & quænam adhuc inter tot armorum perfidiæque pericula gessisset. Erat in oratorum numero Fulcherius, idemque Balduino à sacris, & de sacri Belli scriptoribus unus; qui interrogatus de Domini rebus, non lubentius dixit, quàm auditus est. (a)

Postquam Balduini patriam, genus, & utrumque fratrem magna cum laude recensuit, addiditque, eis matrem esse Idam sanctimonix notis illustrem Principem, quæ prædixerit Balduinum aliquando futurum Regem; juveni quoque ipsi, inquit, oblata species, quæ magnam quandam felicitatem portendat. Ex Belgicâ in Normanniam profectus erat famâ tractus Gundechildis Amazonis, studioque probandæ suæ bellicæ virtutis. Grave bellum ibi exarserat

(a) PRIMORDIA *Balduini; Gundechildis & Andæ.*

arferat æmulatione Principum duarum
feminarum. Nempe novarum Ama-
zonum hoc sæculum est, qua laude im-
primis in Italia Mathildis Proregina flo-
ret, in Flandria Richildis, inter Hispa-
nos Eluira, in Normannis Isabella cum
filia Gundechilde. Est hujus mater gen-
te Montefortia, Bertrandæ famosæ Fran-
corum Reginæ soror; pater verò Ru-
dolphus Concharum & Toënij Dynasta,
celebratus Normanniæ vexillifer, genus
ducens à patruo Rollonis conditoris Nor-
mannici principatus. Balduinus cum
ad Amazonem Gundechildem venisset,
mira virginem caritate complexus est.
Cum hac pugnare in hostes ac vincere
studuit, ut animum ejus, quam spon-
sam optabat, expugnaret officijs. Vi-
cissim Gundechildis diligere juvenem
cœpit tantò magis, quantò propiùs ejus
fortitudinem inspexit & felicitatis o-
mina. (a) Fortè in aulâ coram eâ ac
matre nobilis juvenus varios miscebat
sermones. De somnijs illata mentio.
Fuerunt tres procerum, qui sua, eâque o-
minosa narrarent. Primus equestris
(a) Orderic. ordinis

ordinis vir memorabat, sibi nuper oblatam in somnio speciem servatoris Christi de cruce pendentis, totóque corpore lividi, à quo terrificis oculis esset aspectus. Non sine terrore ab Amazonibus excepta est eanarratio, fuitque audientium sententia homini aliquid grave portendi. Tum Balduinus, & mihi, inquit, quiescenti visus Servator pendens in cruce. Hic Gundechildis prior narratione jam territa, & ex hac malè metuens Balduino suo cùm exclamasset, ne me, suscepit Balduinus, è somno excites; si tamen, quod narro, somnium fuit. Certè, quidquid fuit, boni omnis fuisse existimem. Dein exporrectiore vultu, vidi, inquit, Servatorem cruci quidem fixum, sed venustum, benignè arridentem, & bene precantis habitu dextrâ mihi caput cruce consignantem. Ob tam dissimile superiori somnium auditores & maximè Gundechildis applausere Balduino, augurati favente illo aspectu gestuque lætum quiddam felixque promitti. Postremò virginis frater Rogerius nomine narra-

vit.

vit, sibi quoque objectam speciem Christi benedicientis, seque evocantis ad sincerum gaudium. Atque hi tres proceres suorum seu somniorum, seu visorum perquam diversorum eventa diversissima sortiti sunt. Primus ille minimè probus in excursionem bellicâ sauciatus confessionis piacularis sacrique viatici expers infelicitè obiit diem. Rogerius, eximie probitatis adolescens, eodem anno moriens vocantem ad gaudium cæleste Christum secutus. At Balduinus qui à Servatore insigniri cruce sibi visus fuerat, post paulò sacræ militiæ initiatus, & ejus tessera cruce rubrâ insignis fratrem Godefredum Ducem comitatus est, juvenis destinatus ad extollendam crucis inter barbaros gloriam, regiûmque insigne haud dubiè affecuturus ex materni vaticinij fide. Heroïna Gundechildis tandem Balduino nupta ex utriusque voto, sacræque expeditionis socia, sejungi se à viro non est passa ullo vel labore vel periculo. Fulcherium de Normannâ hæc narrantem audiebat Andæ æmula minimè læta.

Et

Et superiùs quidem appellari eam Amazonem patientiùs tulerat : at nunc ubi Balduini uxorem & comitem esse audivit , gemitum non tenuit , aversóque identidem vultu , vix percipiebat , quæ addebantur à Fulcherio , nempe Gundechildem magno animo labores itineris cum viro tulisse , licet inde usque à Constantinopoli tentatam invaletudine. Ad Antiochiam Minorẽ læso periculosè Godfredo Duce , graviùs & ipsam corpore , ut animo , affectam. Denique naturæ ad Maresiam concessisse virili patientia feminam , caritate in virum , religione in superos , piâque morte memorabilem Christianam Amazonem. Ad hæc postrema Fulcherij verba excitatam atque attentam Andam cepit miseratio , sed non sine quodam lætitiæ sensu , quòd esset sublata rivalis. Pergens Fulcherius , justis , inquit , uxori persolutis , Balduinus ab exercitu reliquo discessit hortante Pancratio vestro , ut excursionem bellicâ avocaret à dolore animum , secúmque diverteret in vicinam Armeniam , inventurus patentem campum ad

ex-

expromendam in Turcas virtutem , & comparandas opes summamque fortunam. (a) Collegit Balduinus equites ducentos pedestremque non magnam manum , & fretus animi sui magnitudine in Minorem Armeniam movit eodem Pancratio duce. Primum Bersabeam oppidum prævalidum obsidet. Christiani incolæ clàm communicatis cum eo consilijs , quòd mallent principi Christiano quàm barbaris subesse, his expulsis illi se dedunt. Tantus inde terror nominis Balduini , ut Ravenelæ loco inexpugnabili Turcas expulerit hoste non viso. Famâ ita convalescente paucis diebus universâ regione ad Euphratem usque potitus Belga. Nec Turcas magis terruit, quàm Armenos sibi devinxit. Captis locis præfecit nobiles viros, Bersabeæ Ferium, vicinis oppidis Nicusum. At Ravenelæ arci illi inexpugnabili præfectum imposuit hominem perfidiæ summæ, sed nondum tunc notæ, Pancratium. Ejus indolem, facinora, consilia Balduino

apc.

(a) *Aguen.*

aperuit is, quem dixi, Princeps egregiâ fide Nicusus. Pancratium Turcis clam amicum & insidiosum esse latronem. Grassari nuper ausum in Edesanos, ab his captum, Constantinopolim missum, & ab Alexio coniectum in vincula. Carcere, quo perpetuo dignus erat, elapsum junxisse se Balduino, simulataque amicitia præiisse in Armeniam Minorem, ut sibi regnum, illi perniciem pariat. Iam ab eo præfectum; Ravenelæ judicare se ejus arcis firmitate reliquam regionem obtinere posse. Ideo nullum è Belgis militibus illuc admissum. Interim perfidum hominem relicto in arce sectari foris Balduinum, & fidem obsequentiâque simulare, quoad par sit ad vim apertam. Balduinus gratijs Nicuso actis repetit à Pancratio arcem. Ille non scelestior, quàm in scelere pervicacior, ad reddendam compelli nec minis nec cruciatu potuit, nec denique aliter, quàm admotis tormentis, quibus membratim discerperetur. Restituta arce vinculis solutus, & piè magis quàm

ex usu dimissus, adit furens Turcam Balducum Samosathi Satrapam, & inflammatur ad Balduinum tollendum insidijs. Interim fortissimum juvenem latè differente famâ Edeffani evocandum ad se communi studio decreverant. Missi à Prætore duodecim senatores, quod est sanctius urbis consilium, orant Balduinum, ut ne gravetur populo constantis in Christum fidei venire subsidio contra vim barbarorum, polliciti eum Prætori opulento futurum ex æquo confortem imperij, & deinde heredem ex asse, quòd is senex liberis careat. Quæ cum jurejurando firmassent, Balduinus cum ijs & equitibus non pluribus quàm octoginta, reliquo milite in præsidij relicto, transmittit Euphratem, & ingreditur iter Turcis infestum. Ad viginti millia coëgerant Pancratius & Balducus, habebantque in latebris disposita. (a) Belga cum accessit ad locum, ubi in insidijs erant, ijs detectis substitit in vicino castello biduum. Moræ impatientes barbari consurgunt magno nu-

Nu mero

(a) *Fulch.*

mero & obequitando muris provocandoque, pecora è pascuis abigunt. Iuvenis magnanimus nec pavidè post muros latuit, nec temerè subijt iniquæ pugnx aleam, sed prodiens cum suis stetit in armis extra pomerium. Barbari telis frustra in eum jactis dissipati denique in sua præsidia rediere, fremente Pantatio, & ad vindictam magis accenso. Interim Balduinus incredibili celeritate persecutus iter incolumis cum socijs omnibus Edeffam pervenit. Læti indigenæ vias passim impleverant, & propugnatorem suum salutantes non tantum acclamationes auribus ejus ingerebant, sed & pedibus oscula. Ex oppido effusi summi infimique inter contentus musicos exceptum stipatumque senatoribus, præeunte longo sacerdotum ordine, sacrum carmen canentium perducunt ad palatium Prætoris, seu, ut vocant, Ducis. Ibi ingenti lætitiâ & splendore acceptus est, ac deinde adoptatus novo miroque nobis exteris ritu. (a) Prætor senex intra lineam interulam
nudo

(a) *Agil. Guib.*

nudo pectori suo nudatum juvenem appressit, osculansque filium salutavit. Idem & anus conjux deinde fecit. Hæc aliæque de Balduino narrantem Fulcherium dum Rex lætus audiret cum filiâ ita lætante, ut semper timeret Pancratij pessimas artes, alij oratorum se vocatum Constantinum monebant se ad eum à Duodecimviris, urbis Edeßanæ primoribus, clam prætore suo missos, oratum, ut ad eos Edeßam venire festineret de summis rebus consulendus. Ivit Constantinus probante Rege, exceptusque palàm magno cum honore in aula Prætoris, deinde in conclavi à Tobia senatûs principe accepit arcanum senatorum omnium de Prætoris Balduinôque consilium. Senem illum non modò invalidum esse adversus hostes, sed erga cives periniquum. Eum ante adventum Balduini rem Edeßanam precariò & pecuniâ magis tutatum, quàm armis. Indigenas injurijs crebris ab eo affectos, juris obtentu nummorum vim ingentem extortam. Avaritiæ ejus obnitentibus odium apud Turcas Pancratium.

tiūmque conflatum , & unā periculum
fortunarum & salutis. Ita promeritum
eum sæpius capitale supplicium. Si
non statim , ut dignus erat, vitā extur-
bandum , certè præfecturā movendum,
& Balduinum fortissimum pariter ac
nobilissimum juvenem subrogandum in
ejus locum. Quoque is arctiore vin-
culo apud Edeſſanos attineatur, quæ-
rendam virginem eo marito dignam;
qualis imprimis eſſe videatur filia Re-
gis Armenorum Anda. Cū hæc di-
xiſſet Senatorum princeps , obſecravit
Constantinum , ut ipsis aſſentiri & alla-
borare velit. Lætus Constantinus non
ſolūm aſſenſus eſt , ſed etiam pollicitus
ſe de matrimonio , quod cupiant , cum
fratre Rege & filiā litteris & corā a-
cturum , dotēque Andæ luculentam
curaturum. Mox de his miſſus nunci-
us Regi periucundus , Andæ jucundiſſi-
mus accidit. At dum virgo lætitia ſpē-
que nuptiarum exultat , ſupervenit nun-
cius alius , qui rem Balduini cum Edeſ-
ſanis omnino perturbatam narrat. Ut
vitio generis humani ſemper à nonnul-
his

lis aliena felicitas ægris oculis aspicitur, fuit Edessæ Stantor bello non ignobilis, Prætoris vexillifer, qui decedere sibi censuit, quidquid accedebat honoris Balduino. Is monet Prætorem, ut caveat sibi ab externo juvene atque oppidanis. Qui ab his exceptus sit tanquam cælo missus genius, accersitum ut imperet abdicato senæ Prætore. Reputanti hæc senæ minùs lætus esse cœperat honor Balduino habitus & civium favor. Interim cùm Balduinus frequentibus in finitimos Turcas excursionibus victor magis magisque claresceret, usque eò crevit æmulatio Stantis, ut secretis cum Balduco & Pancratio colloquijs conjurarit in Belgam. Instructis dolis atque insidijs convenit Prætorem, conqueritur Balduinum ei non modò æquatum, sed jam prælatum. Senæ abdicando atque adeò tollendo insidiari cives. Ergo jus imperij retineret, & sanciret morte Balduini. Ad hæc senex trepidus fluctuare animo, respondere ambiguè. Stantor interpretatus cum timorem, tanquam Prætor juberet peri-

Nn 3 mi,

mi, quem metueret, Balduinum in Turcas de more excurrentem comitatur. (a) Initum erat consilium vel inferrem opprimendi, vel prodendi Turcis, & in acie cædendi. Tentata prior ratio sceleris. Felici excursionē latus, sed fatigatus Balduinus redibat cum agmine, in quo pauciores erant Belgæ, quàm Edeſſani familiares Stantoris, consiliiq̃ue participes. Invitat hic Balduinum, ut jam remotus ab hostibus lever laborem, & exutâ galeâ liberius respirer. Verùm perspicax Belga, quem non latebat æmulatio Stantoris, dolum veritus, periculum cavit. Illo defunctus mox incurrit in alterum. Turcæ faucibus opaci nemoris erumpunt. Ab his pariter ac proditoribus Edeſſanis invaditur. Erat ei globus equitum exiguus, sed fide in ducem insignis. Ita exceperunt hostilem impetum, ut proditores mox senserint, periculum, quod Balduino intenderant, in se rediisse. Fugatis Turcis victor Belga fugientes Edeſſanos ad portam urbis usque persecutus.

(a) *Gillo.*

cutus. Ibi subsistens suos tabernacula tendere extra muros jubet. Spectaculo turbatis & tumultuantibus oppidanis Tobias senatus princeps Balduinum convenit de ejus mente cogniturus. Cui Belga, quid in vos peccasse vidcor, inquit, aut dignum egisse, quod milites vestri gladijs uleiscerentur hodie nos in reditu adorti cum Turcis? Verum infontibus & proditis adfuit Deus: proditorum plerique nostris armis cecidere: reliqui vestro judicio reserventur. Nunc in tentorijs hinc positos hæremus, vel urbem, si inimica est, obsidentes; vel, si amica, tutantes. Tobias scelere suorum & Balduini periculo attonitus sumpsit rem componendam, regressusque in urbem, Prætorem adiit. Interim in foro atque in vicis rumor per Stantorem aliosque proditores sparsus erat imperatam esse à Prætore eadem Belgarum perfidiæ compertorum. At plerique omnes Edessani Balduinum experti defensorem, Prætori infensiminantésque arma corripunt. Prætor, qui in Balduinum non aliter quàm su-

spicione metúque peccaverat , interrogatus de insidijs, negavit se Principis ejus , quem in loco filij amet, aut ullius Belgarum eadem cogitasse , nedum imperasse. Quo responso paritérque populi favore nunciato Balduinus in urbem à Tobia reducitur. Intransentem armata multitudo circumfistit, orat, ut secum in perfidi senis caput stringat ferrum , opibus ejus & dignitate potiturus. Pio juveni improvisâ rei novitate & atrocitate admiratio incluserat vocem. Respondit deinde minimè se commissurum, ut respergantur manus sanguine ejus, quem parentem appellarit, & cui Sacramentum fidei dixerit. Pergentibus illis furerè, clamantibúque cum contra fas repugnare , repetendáque nunc esse pœnas & fœnoris in ipsum, & tot aliorum in rempublicam commissorum ; postulavit Balduinus , ut, antequam ad arma veniretur, sibi liceret Prætorem alloqui. Quod eum ægre, sed tamen impetrasset, turrim, in quam se pavidus senex receperat,

rat, (a) subiit, & pietate permotus liberare eum vel capitis sui periculo statuit. Senem complexus & patrem appellans auctor ei fuit, ut ad sedandum populi furorem, largitionem faceret. Interpellavit sermonem Balduini vociferatio tumultuantium, sēque ad impugnandam turrim cohortantium; tum stridor incussarum fenestris ac foribus sagittarum. Prætor in hoc manifesto vitæ discrimine gazam aperit, Balduinōque vasa aurea, gemmas, purpuram, nummorum cumulos offert, orans, ut quantum velit, sumat effundatque in multitudinem, ut sibi nudo exire liceat incolumi. Belga magis magisque miseratus, de fenestrâ manu advocat populi primores, hortaturque obnixè, ut aures, quas ira obstruat, parumper advertant, & à Prætoris sibi satisfdari patiantur. Omnes uno velut ore succlamant, perfidum hominem scelera non aliter, quàm capite luiturum. Balduinus cum nec precibus nec pretio proficeret,

(a) *Guib.*

ceret, Christianâ pietatē in senem patrem, ferrum stringere, vimque, si quis inferat, propulsare parat. Stupebant Edeſſani ſenatores, militēſque Belgæ ſuſpenſi atque anxij, quonam modo ille Prætorem, aut etiam ſeipſum, ſi multitudinis exacerbaret animos, expediret. Senex viciffim mirâ in pium juvenem caritate, ſtringentem arma cohibet amplexu & voce: fruſtra earum filium miſeri ſenis cauſâ offenſionem civium & dimicationem capitis ſubiturum. Semet corpus oblaturum iræ, trucidarent, modò liberatori urbis parcerent. In copietatis certamine Balduinus obortis lacrymis negare, ſe exiturum turri niſi cum patre, malle cum eo mori, quàm apud parricidas ſuperſeſſe: ſed antequam ad arma & extrema veniatur, tentandum dolum. Auctor deinde Prætori eſt, ut ſportâ ſe per averſam fenestram demittat & conetur effugere, dum ipſe per adverſam diſtinebit ſermone populum. Fraus magis piâ quàm felix ad irritum cecidit. Dum enim ſenex per funem delabitur, animadverſus à qui-

quibusdam civium configitur sagittis, & præceps in terram datur. Caput amputatum hastæque præfixum per vicos ad vindictam ludibriumque differtur, ac deinde Balduino offertur pariter cum occisi præfecturâ. Atrox rei species mite Balduini & militum Belgarum ingenium mœrore iraque affecerat. Oblatum tali cum munere imperium aversatus Balduinus sub noctem in domicilium incertus animi recessit. Postridie redierunt ad eum Duodecimviri multis exponentes crimina Prætoris, populi justam iram; obsecrantésque, quando ita visum superis, ut ille occumberet, ne rempublicam ipse adhuc fortiter felicitérque defensam, nunc capite destitutam & objectam hostibus deferat, sed capeffat imperium, cujus heres sit & jure adoptionis, & voluntate civium. Diu multumque renitentem denique perpulerunt, ut annueret, & Edessæ Comittem salutarunt. Postmodum cum juvene actum de uxore ducendâ, deque regis virginis Armenæ formâ. Sed hæc agitantibus affertur, Turcas plures
satrapas

satrapas à Pancratio nuperæ seditionis Edessanorum occasione excitos his Balduinóque parare perniciem. Dum Balduinus in hostes movet, fortuna ejus casuumque varietas nunciata Regi Armeno ac filix alternum gaudium metumque attulerant. Ecce autem Constantius Edessâ reversus Regem fratrem monet, ipsi quoque imminere discrimen à Turcis, nisi Edessanis auxilio veniat, & cum ijs arma hospitiumque conjungat. Eo patruï sui consilio nullum Andæ virgini gratius esse potuerat. Balduinus victis de more hostibus Edessam redibat, cum audit adventare Tasrocum cum Regiâ totâ familiâ. Tantos hospites ita excepit in palatio, ut laudem consecutus sit utentis splendide ijs, quæ decessor avarè sordidéque condebat. (a) Nuptiæ Andæ cum Balduino brevi confectæ magno eorum omnique studio, celebratæque regio apparatu. Genero Belgæ dotis nomine Rex suas omnes arces attribuit, numeravitque Bizantinorum nummum millia septem,

(a) *Order. Aqueen.*

ptem, pollicitus sexaginta millium summam. Hæc Balduini læta fortuna Pancratio audienti è propinquo erat summo vel dolori vel incitamento ad vindictam. Quam dum assiduè molitur, monitus Balduinus, meritòque iratus redegit armis in potestatem, quidquid ditionis ejus erat, excepto castello unico. Hic scelesti hominis dolor in furorem vertit. Perniciem machinatus non tantum Balduino, sed & Godefredo fratri, mox adversus hunc accendit Buamundum, in illum autem Corbagathum excivit. Quod reliquum erat ei castellum ad Euphratem, quâ Edessâ iter est Antiochiam, arx scelerum & latrociniorum receptaculum fuit. Ex hoc grassabatur tum in viatores alios, tum studiosissimè in eos, qui Balduini & amicorum Armenorum ampla munera ferebant Godefredo tunc Antiochiam obsidenti. (a) Inter cætera insigne tentorium, quod Nicusus Princeps donum mittebat Godefredo, subripuit. Mox excogitavit, quemadmodum furto uteretur

(a) *Aquen.*

retur ad flagitium majus & multiplex. Id tentorium prædo suo nomine donandum Buamundo curavit, precatus, ut sibi adesset contra Balduini vim illam nefariam, quam & Tancredus nuper esset expertus. Pancratij nuncios sequebantur accusatores ij, quibus tentorium erat extortum. Eâ de re conqueruntur apud Godefredum. Aderant sorte ei amicissimi procerum Hugo Magnus & Flander, qui indignati confestim id donum à Buamundo repetunt, asserentes injuriâ & ludibrio Godefredi imperatoris interversum. Buamundus enim verò quod sibi donatum sit, restitutum negat. Urgentibus illis perstat in sententiâ, & irritatus recordatione Balduini Tancredo sibi que pariter adversati responderet acerbius. Offensi Hugo & Robertus milites convocant. Iamque res ad arma spectabat, cum procerum aliorum precibus denique Buamundo permoto ad tentorium reddendum controversia tunc composita est, sed mox in graviores eruptura. Interim Corbagathus adversus Balduinum à Pancratio concili-

concitatus immensis suis copijs circum-
 sedit Edeffam. Balduinus sustinuit bar-
 bari assultus non solum fortiter, sed tam
 diu, quoad ille moræ objectæ impati-
 ens avertit arma in Godefredum, inte-
 rim Antiochiâ jam potitum, alioqui fu-
 turum imparem & periturum cum suis,
 si Corbagathus adortus esset nondum
 mœnibus tectos. Pancratius, qui per
 Baldicum familiarem suum in Baldui-
 num exciverat Corbagathum, per eun-
 dem prælio Antiocheno impugnavit a-
 cerrimè in lævo cornu Godefredum
 fratrem. Sed victis utrobique barbaris
 desperavit, Christianos bellatores alijs,
 quàm mutuis armis, vinci posse. Id
 quoque censuit, se inulto Godefredum
 & Balduinum usquè victores fore, quo-
 ad cum eis Buamundum & Tancredum
 æmulatione committeret. Cujus spe-
 ctaculi voluptatem insidiator dum ca-
 ptat, ejus fruendæ occasionem audit e-
 xortam haud procul castello suo. Erat
 in propinquo Hasarchum oppidum,
 quod (ut narrare suprâ exorsus sum)
 magnis cum copijs obsederat Turea Ro-
 dophanus

dohanus infensus ejus oppidi præfecto licet itidem Turcæ. (a) Is præfectus in tanto discrimine Godefredi opem implorarat litteris perhonorificis MAGNO PRINCEPI AC DUCI CHRISTIANORUM inscriptis, datoque obside filio. Ac, ne Godefredi responsoriæ vel interci-perentur vel retardarentur in viâ, per oratores miserat cicuratam domi columbam, cujus plumis subligatæ litteræ mox tutoque referrentur. Ita certior factus de affuturis suppetijs à Godefredo. Qui confestim dedit se in viam cum copijs, rogavitque imprimis Buamundum, ut sibi vires adjungeret. Recentia erant in eum merita Godefredi, qui & periclitanti in prælio nuper opitulatus, & petenti Principatum egregiè suffragatus erat. Ergo auxilium quod petebat, quodque similitudo ipsa periculi & societas armorum reposcebat, non rebatur negandum. Verùm urebant Normannum multa, eoque acriùs, quòd felici belli furto positus Antiochiâ, auctusque jam Principatu

(a) *Aquem.*

patu ex successu animos sumpserat. Delata à proceribus tanti imperij insignia effecisse videbantur, ut non jam Imperatoris Godefredi, sed Buamundi Principis majestas potior esset. Nunc autem veteribus illis, quibus violatum suum nomen à Godefredo vel Godefredi causâ censebat, accesserat hoc recens, quòd Hasarchi præfectus Godefredum appellatione Ducis Christianorum & splendidâ missâ de auxilijs legatione coluisset; de Buamundo ne verbum quidem fecisset. Ergo venire auxilio recusat. Hanc repulsam ita moderatè tulit Godefredus, ut ostenderit, se gravissimè laturum iteratam. Litteris in hæc verba scriptis denuo rogavit Buamundum, unâque Raymundum: haud decet vos, qui Christiani exercitûs ductores & columnina estis, operâ deesse socijs ac fratribus; cùm hoc bello semper parati fuerimus vestrâ causâ perpeti quemvis laborem, atque etiam mortem. Sin desitis nobis, ex amicis hostes effeceritis. In me, si in hostem noletis, arma capite. Paucis his, sed magni ponderis

Q o ris

ris verbis, laudes simul minasque complexus Dux Buamundo declarabat & quanti eum faceret, & quàm non timeret. Proceres Ducem comitantes, atque in his Balduinus, qui evocatus à fratre tria millia Edessanorum adduxerat, suspensis mentibus ambigebant, quid hæ litteræ effecturæ essent apud Normannum; an spe dignius esset, quòd eum Dux appellasset Christiani exercitûs columen; an magis metuendum, quòd neganti denuo suppetias hostem se professus esset. Quo enim id animo laturum illum tanti spiritûs bellatorem Antiochiæ Principatu ferocem, minarum impatientem, nunc velut ad arma provocatum? Et verò rescitum est in castris, Buamundum litteris gravissimè commotum, mox armis accinctum cum Tancredo & copijs, Antiochiâ intendisse iter ad Godefredum. Eo nuncio variè affectis alijs, Pancratius in propinquâ suâ speculâ exultavit erectus in spem dimicationis optatæ. Omnium animos suspenderant magna illa nomina Godefredus & Buamundus summi du-

tes ad supremum certamen velut à fortunâ comparati. Non jam cum Turcis victis rem fore, sed inter victores Turcarum clarissimos duces tot ante parta decora mox cumulatu-
 ros. Jam appropinquabat Buamundus, in cujus pectus Godefredi verba altius, quàm quisquam ratus, descenderant. Causarum omnium offensionis renovata erat memoria. Modò secum ipse fremens, modò alloquens Tancredum, parum erat, inquiebat, quòd Godefredus fratris operâ ad Tarsum vexillum tuum, Tancrede, meumque nomen pessumdedit. Parum, quòd ad Antiochiam ereptum mihi ab eo tentorium tanto odio atque invidiâ spectatum sit, quasi in eo monumento quotidie vinci viderer. Nec satis erat, quòd in Galliâ Constantiæ amores ac nuptias mihi intervertere nitatur, sibi que conciliare amici Hugonis operâ; nisi & Antiochiæ Principi imperaret tanquam gregario, atque etiam minaretur, si detrectarem imperium. Usque eò sustulit animum, ex quo dux Christianorum salutus est

baro. Hæc agitati cùm recurreret memoria officiorum à Godefredo acceptorum, subortis grati ac generosi animi motibus obstrepebat ira; còque fremebat magis, cum sibi obtigisse æmulum gloriæ, rivalem amorum, ac denique hostem, quem ulcisci non posset sine aliquâ ingrati animi notâ. Quamquam, inquebat, gratiam officiorum perdidit, qui se mihi contulisse gloria-tur & exprobrat litteris. Hic dies aut æmulo, aut mihi futurus ultimus. Tu mihi, Tancrede, adesto spectator, aut si malis pugnæ socius esse, habes acci-tum Edefsâ, quem ulciscaris, Baldui-num. Erat Buamundo Tancredus ar-canorum omnium & periculorum parti-ceps, meritòque in caris eximius. Ju-venis non fortitudine clarior, quàm bona mente, ita studebat avunculo, ut in omnibus admiraretur Godefredum. Ejus viri perspectâ incredibili virtute & humanitate vix ac ne vix quidem adduci poterat, ut existimaret quidquam ab eo in Buamundum esse peccatum. Er-go hujus animum, siquo modo possit,
placare

placare instituit. Atque ut prudentiâ imprimis valebat, tectis verbis rem aggredditur, visus primùm assentiri Buamundo, nec diffiteri, Godefredum durius locutum. Deinde aliqua ex ijs, quæ Godefredo objecta audierat, excusationis nonnihil habere posse submonebat. Quæ contra se ad Tarsum gesta essent, Balduino tribuenda, neutiquam Godefredo, qui de ijs fratrem etiam objurgasset. Jam tentorium non tam Ducem repetiisse, quàm Hugonem & Flandrum. De Constantiâ virgine conventâ & sollicitatâ per Hugonem, ut amanti Godefredo faveat, suspicionem esse, sed nihildum certi. Minus decere præproperam iram, antequam de causæ veritate constet. (a) Mittendum esse in Galliam idoneum hominem (qualis videatur consanguineus Richardus Salerni Princeps) qui rem exploret ac nunciet, &, si integra sit, Constantiam petat uxorem Antiochiæ Principi. Cum Tancredus id suum monitum probari avunculo sensisset, gratoque consilio

O o 3 mite-

(a) *Guib.*

mitescere iram ejus, tum revocato sensim sermone ad recentem offensionis causam dixit, optandum fuisse, ut præfectus Hasarchius plus tribuisset Buamundo Principi, nec solum Godefredum implorasset & honorificè litteris appellasset. Sed hanc scilicet esse culpam inscientis barbari, non Godefredi, qui eam ipsam reparare contenderit imploratâ semel iterumque ope Buamundi. Passum Ducem inexpectatam repulsam à Buamundo, tamen litteras ad ipsum dedisse, in quibus non possint omnia condemnari. Exorsum verbis honorificentissimis appellasse Buamundum exercitus Christiani ductorem & columen. Quòd addiderit, se semper pro eo mori paratum, non esse gloriantis aut exprobrantis verba, sed obsecrantis. Verùm, quòd æquum postulare se ratus, precibus aliquid minarum adjecerit, id inter viros magnanimos esse tam pronum roganti, quàm acerbum rogato. Sed antequam de vindictâ statuatur, videndum Principi generoso & famæ studioso, an non prius merito.

meritorum ejus, quàm dictorum habenda sit ratio. Avunculum pro sui animi amplitudine candoréque non diffiteri pugnante sibi in valle Gorgoniâ, in Antiochenâ urbe, atque acie felicem opem tulisse Godefredum, nec non suffragatum omnium maximè ad Antiochiæ Principatum. Post hæc facta si verbis offenderit, priùs respondendum videri factis, quàm verbis. Iam occasionem se dare opem ei ferendi, qui tulerit. Postquam ita famæ satisfecerit officijs, visurum de condonandâ vel ulciscendâ acerbitate verborum. Sequidem, etsi sciat, quantus sit vir Godefredus, & amicum malit quàm inimicum, tamen nec metuere, nec dubitaturum armis aggredi, quemcúmque avunculus in hostibus numeret. His audiendis ira Buamundi sensim deferebuit, & placido jam animo sociales copias junxit Godefredo. Qui & illum & Tancredum in aditu castrorum excipit illâ incredibilem humanitate, quâ rapiebat omnes, & sinceræ amicitiae reificatione, quidquid litteris asperserat

acerbitatis , absterfit. Raymundum paulò antè placatum, Eluirâ verbis subserviente, ad sua castra adduxerat. Hac conjunctione armorum territus Rodohanus ultro solvit Hasarchi obsidionem, præfectusque liberatus Godefredo Sacramentum de genibus dixit. Pancratij nefariam expectationem cùm hîc frustrata esset reconciliata inter proceres gratia, alebant adhuc in propinquo structæ Balduino fratribusque insidiæ. At cùm harum administer præcipuus Balducus captus fuisset capite, Pancratius suo consulendi tempus esse sensit, quærendique latebram castello suo occultiore. Vix sese ex hoc ejecerat, cum Godefredus monitus perpetuis ejus latrocinijis exspoliari accolæ & viatores, expilari cœnobîa, commeatus à Balduino fratribus missos averti, arcem illam compertissimi latronis diruendam & æquandam solo curavit. Ille socij Balduci supplicio, suoque damno ac dedecore actus ex furore in rabiem, cùm nil jam relictum esset præter scelestam mentem, hac designavit facinus, quo
haud

haud scio an toto hoc bello memorabilius ullum sit. Dum constitutum petendæ Hierosolymæ tempus expectatur, proceres declinaturi luem, quæ Antiochiæ inter plurima funera sustulerat dignissimum cælo hominem Ademarum Aniciensem Episcopum, alij aliò diverterant. Buaniundus cum Tancredo Ciliciam reliquam sumpserat subigendam, Raymundus expugnandam urbem Albaram, Godefredus Marram. Qui imminente jam tempore Hierosolymam contendendi relicto in castris ad Marram Eustachio fratre, Edeßam Balduino valedicturus excurrit cum familiaribus equitibus duodecim, eminente inter eos consanguineo Burgio. (a) Transmisso Euphrate videt contrà venientem militarem globum candido vexillo spectabilem, præfectumque magno splendore præeuntem. Clypeus aureus præferebatur aquilæ complexus effigiem. Ante vehiculum, in quo sedebat, clangebant tubis argenteis equites duo. Ipse magnificè togatus barbam

pro-

(a) *Guib.*

promiserat more Græcorum. Godefredus nuper eodem ornatu conspectum agnovit fratrem Balduinum. Qui complexus Ducem ac deinde Burgium, caros non magis à cognatione quàm virtute hospites perduxit Edessam. Ibi à rege Tafroco , Andâ , Constantino, Duodecimviris excepti summâ lætitiâ, summisque honoribus culti , ambo regiis digni, & aliquando colendi. Coram Tafroco & Andâ cùm Godefredus esset gratulatus fratri Balduino felix cum regiâ virgine matrimonium , & officiosè pater filiâque respondissent , nova nupta (ut fit) delapsa in sermonem de futuris hospitem conjugibus. Sciebatur caram esse Burgio Morfiam vicini Meleteniæ Ducis filiam. Quam Godefredus amaret ex omnibus, à quibus non solum in Europâ , sed in Asiâ etiam amabatur, erat in obscuro. Ajebat Anda ejus virtute non magis fortissimos Turcarum victos, quàm humanitate devinctas Turcicæ gentis Principes feminas. Captivas duas Reginas alteram Nicææ , Antiochiæ alteram , Bullionij Impe-

Imperatoris curâ honoratè pudicèque habitas & remissas cum liberis, illam ad Solimanum conjugem, hanc ad Sensadolum filium. Eas, cùm Edessâ transjerant; Bullionij victoris benignitatem comitatèmq; laudibus prosecutas. Quin Antiochenæ Reginæ filiam non obscurè testatam, se Antiochiâ illibenter abscedere. De causâ interrogatam, verecundo cum risu dissimulantem quod erat, respondisse, (a) ibi se inter Christianos delectatam esu suillæ, quâ vesci Turcicis moribus nefas sit. Verùm re verâ Antiochiæ Christianorum procerum atque imprimis Godefredi conspectu captam. Cæterùm Turcicis virginibus antecellere (b) Floriam Calabres Reginæ filiam Corbagathique Principis sororem, quæ se Christiana sacra suscepturam promittat, si ipsam Godefredus sibi despondeat. Ad hæc Bullionius mentem de more celans cum lepore respondit, se nimis accensurum Turcarum procerum iras, si, quorum copias pugnando attriixerit, eorum virgines

(a) *Order.* (b) *Geneal. Bonon.*

gines amando subripiat. Verùm jam nunc iras illas, de quibus jocabatur, nìmisquam inflammarat, seque insciens opportunum vindictæ obtulerat. Digressus Edessâ redibat ad castra cum suis equitibus duodecim, aliisque octo, qui præbitum à Balduino viaticum ferebant. Iam Antiochiæ propinquabat, cum parumper substitit. Verùm propiùs aberat à periculo salutis, quàm ab urbe. Ventum erat in convallem peramœnam ad caput fontis viridantem cespitem alluentis. Imminebat mons, ad cujus radices lacum grandem ac piscosum latè junci inumbrabant. Ipsa loci specie invitatus Bullionius discubuerat in gramine cum socijs, corpúsque curabat. Dum securè prandetur, subito ex vicino carecto montisque latebrâ insidiatores erumpunt Pancratio incentore collecti. (a) Turcarum delecti equites cataphracti non pauciores centum viginti præstolabantur rediturum istac Godefredum. Non plures cojerant, ne multitudine proderentur, at plures quàm satis futuri videbantur, quini pugnaturi

(a) *Agil. Guib. Aquen.*

in

in singulos. Qui priúsq̃uam propius accessissent, Dux arma induerat, equoque insidens imperterrito vultu socios hortabatur ad pugnam. Et Burgius cæterique undecim invicem cohortantes erigebant inde animos, quòd Apostolis numero pares sequerentur Ducem Christi vice fortissimè præiturum. Atque ita valuit apud eos fiducia hinc concepta, ut facilè tanti periculi cogitationem excuterent. Turcæ suâ virtute & multitudine freti advolant infesti sagittis, circumfúsique instant Christianis adempturi spem fugæ pariter & salutis. Ferocissimi quique desilierant ex equis, ut cæteri scirent eos non fugituros, quos viderent ad pedes esse degressos. Atrox inter hæc clamor hortantium socios, minitantium hostibus. Eminens in equo Dux utrosque in se converterat tum corporis armorumque specie, tum ingentibus factis. His indicijs Turcæ Godefredum agnoverant. Ergo incum tela conijciunt, & tota in unumacies vertitur. At non ille idoneus metui, nisi inferendo. Nunc resistens ob-

vios,

vios, nunc procurrens recedentes ob-
 truncabat, & cùm tot manus unum in-
 cesslerent, par unus omnibus stabat; ster-
 nebátque complures. Cæsis ad trigin-
 ta Turcis periculum ad cæteros vertit.
 Cumque aliquantisper inter pugnae fu-
 gæque consilium trepidassent, tandem
 terga verterunt. Ac ne dubia foret vis
 cælestis auxiliij, nullum è duodecim so-
 cijs desiderasse Dux legitur. Nimirum
 quâ præside armorum Virgine pugna-
 rat, eadem protegente vicerat. Itaque
 reditus ejus Antiochiam triumpho pro-
 ximus fuit. Ibat pompa penè incredi-
 bilis victoriæ testis. Captivi tantò plu-
 res quàm qui ceperant, erant ad tri-
 ginta. Cæsorum triginta capita præfe-
 rebant ephippijs partim victores, partim
 ipsi captivi. Nonaginta equi Turcici
 ducebantur onusti spolijs eò jucundio-
 ribus, quò minùs speratis. Dux per
 illum Antiochiæ pontem, ubi gigan-
 tem Arabem dissecuerat, nihilo jam
 minore facinore clarus invehitur inter
 plausus procerum & acclamationes po-
 puli, vix eam victoriam præ stupore,

VIX

vix se præ gaudio capientis. Habitis Deo Deique Matri gratijs, de accelerando Hierosolymam itinere actum in commune. Plurculum intermissa profectio non est visa diutiùs differenda.

(a) Sub mensem Martium Bullionius movit Antiochiâ, rediitque ad Eustachium fratrem & proceres alios Marrâ urbe jam potitos. Sed desideratus ibi, defletusque præsertim ab Anselmo Ribodimontio egregius adolescens Engelramus, cujus mortem & miranda mortem secuta post paulò referemus. Exinde maritimâ orâ, processum, ut commodiùs navigijs acciperetur com meatus. Ad Laodiceam Syriæ stativa habita. Ea urbs littoralis, sola ex totâ Syriâ erat in Græci Augusti fide, nuper amissa, mox recepta. Quærenti de his Bulionio narratur captivum in eâ urbe detineri Vinemarum egregium illum nuper Archipiratam : cum eo in vinculis esse Regem memorabili pariter fortunæ ludo jactatum. Miserratus utrumque Dux, cum audiit eum regem vocari

(a) An. 1099.

vocari Edgarum, obstupuit; quique aderant Eustachius frater & Robertus Normannus, ingemuere. Nullúsne, inquit Eustachius, finis erit infortuniorum optimi Principis? Ita nondum cessat, sed augetur denunciata calamitas regiae arboris Anglicanae. (a)

Celebratissimum eâ tempestate erat nuperum Divi Anglorum Regis Eduardi vaticinium de arbore viridi Anglicana; quo loquendi modo fortunam regiae familiae imminentem prædixerat. Is rex patruus fuerat Principis cognominis, quo patre genitus erat Edgarus ille Laodiceæ captivus. (b) Sanctus rex moribundus cum biduò tacuisset, tertio die sibi redditus precatúsque Deum, ut, nisi vera dicturus erat, obmutesceret, rursus expeditâ voce vaticinium edidit in hanc sententiam.

V A T I C I N I U M
EDUARDI REGIS.

ARBOR FATALI VIRIDIS SUCCIDITUR
ICTU:

PARS

(a) PRIMORDIA *Eustachij, Mariae Scota, &c.*

(b) *Malm.*

CHRISTIANI LIBER VI. 603

PARS ABSCISSA SUO STIPITE SUMMA
CADIT:

HOC AMOTA PROCUL TRANS IUGERA
TERNA FERETUR:

POST ITERUM STIRPI REDDITA, PO-
MA FERET.

Vix mortem objekerat rex, cum ob-
scurum illud vaticinium cœpit eventu
rerum explicari. Mox etenim VIRIDIS
ARBOR, hoc est, familia regia Anglica-
na fato Eduardi succisa, regiâque di-
gnitas (quæ Edgardo debebatur) tan-
quam fastigium à trunco arboris deci-
dit, atque ab HOC AMOTA PROCUL ad
externum hominem Haraldum Danum
pervenit, & ad duos deinceps alios ex-
ternos Normannos. Quæ terna exte-
riorum capita TRIUM IUGERUM nomine
adumbrârat Rex vates. Haraldum Da-
num cum Normanniæ Dux Guilielmus
Nothus acie victum regno vitâque pri-
vasset, primores quidem Anglorum
Edgarum tunc puerum sanciverunt Re-
gem. Sed ijs etiam pugnâ victis à No-
tho, coactus Edgarus solum vertere.
Exul cum sororibus duabus Margaretâ

P P

&c

& Christianâ tempestate ad Scotiæ lit-
tus eijcitur. Ibi Regios exules perbe-
nignè hospitio excepit Scotorum Rex
Malcolmus, captusque Margaretæ for-
mâ, & virtute sibi eam matrimonio
junxit, ex quo plures suscepti liberi, at-
que in his Editha, & Maria spes regna-
trici Angliæ familiæ. Margareta Re-
gina morum sanctitate insignis sanctè
educavit liberos. Matris Virginis cul-
trix eximia honoris ejus causâ filiarum
alteram Mariam appellavit. Ei cultui
incrementum, & festo Virginei Con-
ceptus originem dedit celeberrimum
ejus temporis prodigium. Edgarus
non solùm Malcolmi, sed & Sirani Da-
norum Regis auxilijs parabat Angliæ
regnum repetere. Rex Nothus audi-
to eo rumore mittit Helsinum in Da-
niam, qui rem exploret, & ad se refe-
rat. Is Helsinus Normannus cœnobij
Ramseiensis in Angliâ præsul, consecu-
turus immortalitatem nominis, manda-
to Regis impigrè obito, renavigabat in
Angliam, cùm spissis nûbibus exlo se
intendentibus concitatum ventis, mare
innor-

inhorruit. (a) Vectores. fœdâ tempe-
state jactati, desperatâ corporum inco-
lumnitate, salutem animorum commen-
dant superis. Imprimis miserorum sa-
cram ancoram Virginis Matris opem
inclamant. Ecce visus super undis vir
venerabili specie, & infulis insignis ac-
cedere. Qui Helsino illacrymanti, ad
te, inquit, ab orbis Dominâ, quam in
vota vocasti, mittor: mihi si dicto au-
diens fueris, sospes evades. Helsino
pollicito, se quævis ejus imperata factu-
rum; Deo mihi que promitte, excepit
ille, te diem, quo Dei Mater concepta,
& condita est, posthac vi. idus Decem-
bris solemni ritu culturum. Simul ac
promisit Helsinus, simul ille ex oculis
sublimis abiit, & dicto citiùs tempestas
sedata est. Præsul Ramseiensis secun-
dis ventis appulsus in Angliam prodi-
gium prædicat, Regi Notho refert, con-
tra ipsum quidem Edgari Danicam
classem parari, sed spem reponendam
in Virgine intaminatâ, quæ terrâ, ut
modò mari, tempestatem serenô mu-

P p 2 tare

(a) *Vetera off. Concept. S. Ans.*

tare possit, & bellum pace. Moverat Normannum Regem prodigiosa legati sui liberatio: moti eâdem populares, & Virgineum Conceptum novo festivóque cultu profecuti. (a) Festum id Normannorum initiò vocitatum de primorum cultorum nomine, mox Divi Anselmi itidem Normanni epistolâ horatoriâ longè latéque propagatum est. Secuta interim tanquam favente Virgine in Anglia rerum quies. Eò Edgarus venerat, & cælesti consilio cedens, Regi Normanno Sacramentum fidei dixerat. (b) Hîc benignè splendidéque habitus adolevit inter Regis filios Robertum, Guilielmum Rufum, Henricum. Roberto imprimis carus mutua caritatem, fidémque rebus difficillimis probavit. Cùm Rex pater moriens Guilielmum Rufum testamento instituisset Angliæ regem, Robertum verò Ducem Normanniæ, licèt natu majorem; Robertus postpositus bellum Rufo movet, Edgaro armorum socio. Iam Edgarus Angliæ sceptrum tertio

cx-

(a) *Alensis.* (b) *Malmesb. Boëth. &c.*

externo regi obvenisse ex vaticinij fide cernebat ; jam ex eâdem expectabat, ut regia dignitas suæ ITERUM STIRPI REDDITA refloresceret, neque tamen ille sibi regnum armis quæsit, sed amico Roberto. Neque verò futurum erat, ut ipse, sed ut sororis Reginæ Margaretæ Scotica stirps regnaret in Angliâ. Cùm Edgarus in Normanniam ad Robertum bellum parantem profectus esset, ad eos venit Bullionij frater Eustachius, cui cum ambobus annos jam plures familiaritas erat. Egregiam imprimis necessitudinem cum Edgardo junxit. Amicitiam inter eos conciliavit similitudo indolis, candoris animi, & morum optimorum. Cùm voluntatum esset summa consensio, quos Edgarus in caris numerabat, eosdem dilexit Eustachius, sed maximè omnium filiam Reginæ Scotæ Mariam. Sæpe cum Edgardo perpendebat Divi Eduardi prædictionem & regis ejus familiæ fortunam ; utque præsentem adversam miserabatur, ita promissam prosperam habebat in votis. Certiorem Eustachium fecerat Edgarus

fororem suam Christianam ex Scotiâ venisse in Angliam, & in Rumsejensi cœnobio femineo, quod haud procul abest à virili illo Rumsejensi, cui eximius Virginei Conceptus cultor Hælsinus præerat, vitam religiosam profiteri. Ad eam missas à Reginâ sorore filias duas Editham & Mariam ibidem metu Rufi latere inter virgines sacras, & castè pièque educari, sortem expectantes, quam cælum destinasset. Gaudebat Eustachius, erudiri virgines regias ijs artibus, quibus ingenia ad fortunæ magnæ fastigium aspirare numine favente possint; ominabaturque eas evasuras virtutis regiæ, qua mererentur regnum. Quamquam, Edithâ velo monastico paulò post obnuptâ, sola Maria superfuit, quæ nuptura videretur. Hanc latentem Eustachius primùm miseratione, deinde casto amore prosequi cœpit. Cùmque absenti testari coràm animum officijs non posset, quod reliquum erat, avunculo ejus Edgardo ita se probabat industriâ, laborum patientiâ, bellicâ virtute, animique magnitudine, quasi

Maria

Maria spectaret. Bello in Regem Rufum conflato à Roberto fratre, huic strenuam impigrámque navavit operam. Moras trahente in Normanniâ Roberto, ipse præjens cum Edgardo proceribúsq; alijs Normannis & Belgis mare trajcit. Superatísque in Angliâ difficultatibus primis, quas insuperabiles facere absentia Roberti & multitudo hostium videbatur, ferro sibi ad urbem Rovecestriam patefecit aditum. Hanc aliáque Cantuariensis ditionis loca virtute occupat, obtinétque Roberti nomine. Erat Roberto indoles pugnax, sed identidem otio & amoribus solvebatur. Certè in hac tantâ re, quando ei regnum armis quærebant amici, dicere non habeo, quem bellatorem præstiterit, sed quem deseruerit. Actum erat de Rufo, si bene cœptis Eustachij adesse festinasset. Iam is non tantùm munita loca plura, sed, quod plus bello valet, famam sibi compararat. Iam multi Anglorum erecti celebritate nominis Eustachij sollicitabantur novarum rerum cupidine, odióque

præsentium. At dum hæret Robertus, nec se suæ causæ præbet, Rex Rufus Eustachium Rovecestriæ obsidet. Belgæ non elanguerat alienâ segnitie, sed clarus fide in amicos ita fortiter obsidionem tulit, ut in æstatem traxerit. Ac ne tunc quidem Rufi potentia cecidisset, nisi multis hostium cæsis, nec paucis suorum desideratis hostes novi generis protulisset æstus. (a) Ex illuvie cadaverum exorta ingens multitudo muscarum oculis naribusque adstreperè, cutem fodicare, cibis potionisque se ita ingerere, ut his uti nemo posset, nisi cui socij interim flabellis ora defenderent. Ergo agere de deditioe Eustachius cogitur. (b) Rufus præstructis oppido castellis duobus obfirmarat jurejurando animum ad obsessorum expugnationem & necem: at placatus Eustachium à fortitudine laudatum recepit in fidem. Edgarus primum pulsus, deinde redux & reconciliatus Rufo, exortâ denique inter reges Anglorum Scotorumque discordiâ in summum

(a) *Hoved.* (b) *Orderic.*

mum mœrorem & ultimum salutis di-
 scrimen adducitur. Nunciatur ei Mal-
 colmum Regem hastâ Angli proditoris
 occisum, mœrentem Reginam tertio
 die post conjugem sanctè obijisse, Do-
 naldum Malcolmi fratrem nullo filio-
 rum heredum respectu invalisse Scotiæ
 regnum. Tot unâ malis oppressus Ed-
 garus, cum sanctæ sororis filios, ut ty-
 ranno Donaldò eriperet, è Scotiâ clàm
 evocatos occultasset in Angliâ, hîc cum
 eis cumulo malorum obruitur. (a) Or-
 ganus erat ei infensus, homo præferoci
 ingenio, qui ex calumniâ gratiam aucu-
 pans regis, Edgarum acculat majesta-
 tis, quòd regnum affectet, quòd Scotæ
 sororis liberos in spem regni Anglici
 clàm alendos curet, & jure reges esse
 dixerit. Offert se armis evicturum, ita
 rem habere. Rufus excandescens ju-
 bet Edgarum & sororis prolem è late-
 bris erutam comprehendi. Nihil te-
 neræ ætatis, nihil sexûs ratio valuit.
 Filij tres cum Mariâ sorore & avunculo
 capti, & coniecti in vincula. Filiarum
 altera

(a) *Boëth.*

altera Editha, quòd obnupta monastico velo perpetuâ virginitate teneri crederetur, apud materteram antistitem relicta. Captivis denunciatur futurum ut damnentur perduellionis, nisi pugnatorem invenerint, qui Organum falsi convincat armis. Perculerat optimum quemque accusatio & accusator, de cuius robore armorumque peritiâ magna erat opinio. Constitutus pugnae singulari dies aderat, nec apparebat defensor. Stadium subiit armatus Organus feritatis specie ipsi circumfusæ multitudini & extra periculum positæ timendus. Ex adverso producti in suggestum rei vinculis luctuque obruti, & eò miserabiliore habitu, quò conspectiore. Imprimis movebat animos virgo regia in vili cultu, & cui unicum erat ornamentum forma, nitensque in vultu species virtutis. Tandem adest eques armorum instructu splendidus, causâque reorum susceptâ, certamen contra calumniatorem Organum poscit. Juvenem unum eo die fortuna regiae domûs præsidium habuit. Organus vi-

ctus

Aus ac peremptus odij & insanæ cupiditatis meritas dedit pœnas, Edgardo & sororis liberis affectati regni suspicione absolutis. Dignum Eustachij animo & amore facinus, etsi nomen non proditur. Victori grates actæ. Præmium merito par rependi non poterat ullum, nisi regis virginis connubium. Sed recens orbitatis luctus, & Mariæ tenerior ætas, & Scotiæ regnum à tyranno occupatum differri nuptialem lætitiâ cogebant. Et victorem magnanimum curæ militares aliò avocabant. Sub id tempus bellum sacrum indictum, cui initiatus Eustachius Robertum Normanniæ Ducem comitatus est, Edgardo Mariæque non minore studio salutatis, quàm obstrictis. Interim Edgarus jam gratosus apud Rufum impetratis ab eo copiis Donaldum Scotiæ tyrannum acie vicit & cognominem sibi sororis filium Edgarum statuit regem. Inde victor adjecit animum ad amicos belli sacri herôes Robertum & Eustachium sequendos. Navibus à Rufe obtentis juventutem Scotam & Angiam imponit
 facile

facile principe comitum Alano Stuardo. Terras circumvectus secundo cursu ad Syriacum usque mare pervenerat, cum occurrit classi, quam audit esse piraticam, & Archipiratae celebre nomen esse Vinemaro. Ad pugnam se parabat, quando Vinemarus jam sacri belli navarchus agnovit Edgarum Eustachio fratribusque amicissimum. (a) Iunctis navibus praetervecti Antiochiam, quam eo tempore Godefredus obsidebat, vicinam civitatem petunt Laodiceam littori impositam, obversisque mari geminis turribus firmatam. Incolebant Christiani Graeco Augusto subiecti jure, sed oppressi jugo barbarorum. Huc una appulsi Edgarus & Vinemarus, quibus ad xx. millia classiariorum erant, urbem expugnant barbaris caesis. Tempore modico interjecto adest ab Alexio cum classe Ravendinus, urbemque Graecae ditionis repetit. Cum reddere in praesens recusassent victores, secuturi exemplum obsidentium Antiochiam itidem Graecae ditionis; impugnata à Raven-

ven-

(2) *Order. Aquen.*

vendino urbs faventibus oppidanis rur-
 sus capitur. Edgarus, Vinemarus, Stu-
 artus, navalésque focij omnes conjuncti
 in carcerem, navibus in potestatem re-
 ductis. Quæ omnia cum de ijs audis-
 set progressus ad Laodiceam Godefre-
 dus, libertatem amicorum etiam atque
 etiam rogat urbis præfectum. Hic me-
 mor Bullionium præ cæteris proceribus
 Latinis ab Alexio fuisse cultum & ado-
 ptatum, postulatis obniti non ausus, ca-
 ptivos omnes, navésque restituit. Li-
 berati longo agmine Godefredum pe-
 tunt, gratijsque & victoriarum gratula-
 tione prosequuntur. Edgarus ab eo &
 veteribus suis amicis Eustachio & Nor-
 manno Roberto multo vel honore, vel
 amore cultus. Vinemarus quoque Go-
 defredo acceptissimus fidei in Baldui-
 num mercedem cum præsentis libertate
 famam apud posteros tulit. Eustachio
 privatim interroganti cum curâ Edga-
 rum de ejus regis familiæ rebus, nomi-
 natim de Mariâ suâ, respondit ille, Sco-
 tiæ res jam bono loco esse: in Angliâ
 favere Rufum: ejus fratrem Henricum
 indolis

indolis egregiæ adolescentem videri cap-
tum amore Edithæ, licet monastico
more velatæ; Mariam adolescere, spe-
rarique non indignam fore amore Eu-
stachij. His audiendis delectatus non
modò Eustachius, sed & Godefredus,
qui pietate amoris simillimâ Regijs vir-
ginibus affici visus est Eustachio, ambi-
genti an non Mariam dum miseratur
frater, amare cœpisset. Delapsi dein-
de ij proceres ad sermonem de Eduardi
vaticinio. Videbatur reverti sensim
fortuna æquior, aut potius cælum re-
spicere. Iam arboris regiæ fastigium
ad tertium jugerum pervenerat, nempe
ad tertium externum Regem Rufum;
ac proinde spes erat, fore ut brevè Re-
gia dignitas Anglicana restitueretur stir-
pi priori. Verùm quâ ratione id even-
turum esset, ambigebatur scilicet, &
expectabatur à numine. Cùm jam La-
odiceâ progrediendum esset, rogavit
Godefredus Edgarum, ut agmini viâ
maritimâ eunti adnavigaret cum classe,
armisque & comœatu adesset. Præ-
fectura classis ei, Vinemaróque rei na-
valis

valis peritissimo commissa. Buamundus hactenus comitatus Godefredum, Antiochiam, ne sine Principe relictam à tergo hostes reciperent, redijt. At Tancredus exinde Godefredum secutus est, tum admiratione tanti ducis, tum liberandæ Sanctæ Urbis studio. Motis Laodiceâ castris ventum Gabullam, quæ pretio doloque metum expugnationis redemit. Prima hæc erat maritimarum urbium deinceps Caliphæ Saraceno seu Imperatori Ægyptio subjectarum. Imposterum non cum Turcis, sed cum Saracenis negotium futurum erat. Finem belli unius fore principium alterius prospiciebant animis, cum de legatis in Ægyptum missis nihil audiretur, anxio admodum Godefredo tum communi, tum privatâ Gerardi sui causâ. Inde admota castra ad Archam arcem in editâ rupe positam, nec expugnabilem. In ejus obsidione multæ res perdignæ memoriâ evenere, sed omnium maximè memorabilis fors Anselmi Ribodimontij, cujus insignis cum Engelramo Gerardoque amicitia superius

us identidem celebrata est. Timebat is pro Gerardo non redeunte ; at Engelramum ad Marram sibi creptum ita lugebat, ut satiari non posset commemorandâ egegij adolescentis vel virtute, vel tristi morte. In urbis expugnatione cum inter primos transcendisse murum, ferrum flammâque intulisse. Victorem sudore disfluentem, fumoque æstuantem ex labore & inediâ defecisse. Florem illum ætatis emarcuisse, ac denique gloriosâ quidem, sed Comiti parenti amicisque omnibus, ac sibi imprimis acerbissimâ morte sublatum. Cæterum tanto hoc luctu Ribodimontius non retardabatur à belli operibus, sed extimulabatur acrius in hostes. Miranda, quæ subijciam, tradit Agiles qui aderat, sanctè præfatus nihil se, nisi visa & credita, relaturum. Ribodimontius suo more fortiter adversus obsessos rem die toto cum gessisset, sub noctem se in tentorium receperat. Comparabat se ad quietem, cum ecce in vigilantis conspectu se subito dedit Engelramus. Quo viso attonitus pariter

ter & exhilaratus, quid hoc rei est? inquit: te, qui vitâ functus eras, viventem aspicio. Cui Engelramus blandè renidens, NON MORIUNTUR, inquit, QUI IN OPERA CHRISTO NAVANDA FINIUNT VITAM. Cùmque Anselmus fixus in amici obtutu mirabundus observasset venustatem oris, quam modò mors deformarat, nunc non tantùm re-floruisse, sed redditam cum cumulo majestatis cujusdam splendorisque humano majoris, stupens interrogavit, undenam pulchritudo illa incredibilis obtigisset. Nihil mirum, respondit, Engelramus, me eâ esse oris elegantiam, qui tam elegantem incolam domum. Tum sublato vultu digitoque ostendit Anselmo palatium in cælo tantæ pulchritudinis ac magnificentiæ, ut nihil ille elegantius, magnificentiusque videri posse censeret. Magis magisque attonito ad fulgorem admirabilis ædificij Engelramus, multò, inquit, præclarior hâc domus præparatur tibi; subjecitque has voces; IN CRASTINUM. Quæ locus est conspectu sublimis abiit. Stupore

defixus Ribodimontius, reputansque secum, quid postremis illis verbis, INCRASTINUM, significaretur, collegit imminere sibi vitæ finem, & in posterum diem denunciari ab amico. Hæc volentem somnus oppressit. Manè simul ac evigilavit, vocat ad se sacerdotem non unum, noxas confessione expiat, misericordiam & veniam ab eis, atque à Numine efflagitat, vitæ finem sibi imminere testatus. Mirantibus illis, qui valentem cernerent, exposuit quid vidisset vigil, quid audisset. Et verò eodem die, cum hæc enarrasset pluribus, & audito hostili motu correptis armis in Saracenos Archâ latenter egres sos invasisset, calente pugna, in ejus caput lapis ex urbe tormento incutitur. Prostratus vir fortis juxta accipit, cum ter, Deus adjuva me, dixisset, exstinguitur, & ad paratum promissumque ab amico cæleste palatium emigrat. Ortus apud Belgas antiquis Valentianis Comitibus, præfectus erat Castellanus Valentianarum, Austroviandæ Comes, Buccinij & Ribodimontij seu

feu Ribemontij Dynasta. De postremo loco, quod ibi Monasterium fundasset, cognomentum acceperat, Aquicinctini quoque Cœnobij attributâ insulâ conditor, vir heroïca virtute, & heroïcæ cum Engelramo amicitix exemplar. Desiderio utriusque mœstos proceres solabatur Godefredus, cum dolori lenimentum attulit inopinatus, & penè jam desperatus reditus cari capitis Gerardi Avesnatis cum oratoribus socijs. Gerardus cognito gemino funere vix lacrymas tenens, equidem, inquit, vix ereptus ipse mortis discrimini, non rebar me huc redire parentaturum sanctis manibus carissimi amicorum paris. Ita vixeramus inter nos necessitudine conjuncti, ut si mihi fas esset vitam claudere meis auspicijs, à tantis amicis ne ipsâ quidem morte dividerer. Godefredus simul cum, simul omnes erigens, ad fortem operam & spem immortalis vitæ hortatus est, proposito cœlesti illo Engelrami verbo NON MORI EOS, QUI IN OPERA CHRISTO NAVANDA FINIUNT VITAM. Deinde Ge-

ardus longæ moræ suæ causas, sua pericula, & Saracenorum dolos ita referebat. (a) Postquam in Ægyptum pervenissent, ab Amerinâ Imperatore iussos detineri in carcere. Deprecante Ramulæ urbis præfecto, viro, ut inter Saracenos, bono, tandem eductos in conspectum Imperatoris, & mandata de fœdere executos. Cùmque Amerinas audisset multa ex legatis suis de Christianorum ad Antiochiam virtute, rogatum ab eo Gerardum ac socios, ut specimen ibi quoque illius militaris roboris darent. Morem gessisse non invitos, & armis accinctos in circo coram Imperatore & circumfusâ multitudine ludicro certamine concurrisse. Acclamatum heroës Christianos plusquam humani roboris esse, deosque verius, quàm homines. Imperatorem ipsum laudibus summis prosecutum esse pugnatores, partim ex animo, partim arte, ut nempe ejs conciliatâ virtutis famâ hostibus suis Turcis terrorem incuteret. Mox eum movisse cum exercitu.

(a) *Gilo, Viterb. Erising.*

citū ad oppida, quæ de ipso ceperant Turcæ. Locorum præfectos ad colloquium evocatos & ad deditiōem sollicitatos Gerardo cum socijs oratoribus in conspectum dato, celebratâque Christianorum tum heroicâ virtute, tum armorum societate cum Saracenis. Ita terrore Christiani nominis non ignobiles solum urbes tentatas, sed ipsam Hierosolimam, quâ Turcæ nuper expulsis Saracenis potiti erant. Turcas, qui ad Nicæam Antiochiâque se impares Christianis essent experti, vim jam conjunctam nostrorum & Ægyptiorum sustinere se posse diffisos, deditiōem fecisse urbium, ipsamque Hierosolimam Palæstinæ caput in jus ditionemque Saraceni Imperatoris rediisse. His rebus confectis Christianos oratores nihilo seciùs ab Amerinâ detentos. Principio, ut probabilis causa retinendi foret, conditiones fœderis, quas antè vix auribus admiserat, cœpisse non abnuere, & spem facere rem conventuram. Gerardum & socios primis diebus non invitos ibi commoratos esse, ut genus

Qq 3 illud

illud hominum & loca cognoscerent, Christianósque mores fœderatis approbarent; & verò nonnullis, præsertim Ramulæ præfecto, approbasse. Verùm novas semper moræ causas frustrationésque nexuisse Amerinam, auctore exercitus prætore Armeno, viro vafro, Christianæ religionis desertore, & ad quamlibet vicissitudinem fortunæ mobili. Suasisse hunc, ut Imperator exitum Antiochenæ obsidionis expectaret, & pro ejus eventu præstaret vel revocaret initam verbis cum nostris armorum societatem. Deinde Antiochiâ captâ, & Corbagatho victo, at victoribus bello & pestilentia ad paucitatem redactis, Amerinam metu jam solum incensore Armeno jussisse Gerardum & oratores reliquos obtruncari: sed intercedente Ramulæ præfecto tandem remissos. Ita pacem & concordiam speciosis nominibus jactatam, sed irritis. Bellum novum, integrum, illibatúmque adversus Saracenos restare superiori Turcico laboriosius, pleniúsque periculi. Hæc Avelnas. Qui licet negotio

gotio minimè ex animi sententiâ gesto, at discrimine salutis pro Christianâ re fortiter adito magnos honores cum socijs ab exercitu tulit. Cæterùm advenire rursus ab Amerinâ legati, per quos has conditiones pacis offerebat: se Hierosolymis excepturum Christianos, non quidem unâ omnes, sed trecentos, quadringentosve, & eos inermes, ut sacra viderent loca. Hæc Christiani proceres vix audierant, cùm bellum conclamatum ex omni parte confessus. Emoti castris legati Saraceni propè sine responso, & tantùm non violati concursu multitudinis vociferantis eò indigniorem injuriam inferri à Saraceno, quòd qui prior petisset pacem, violasset spem pacis, fidem, & jus gentium in legatis. Retinere eum velle Hierosolymam, quam Christiani nominis terrore & Gerardo cum socijs ostentato, non suis armis, obtinuerit. At Christianos non commissuros, ut Saracenus Hierosolymam perfidiæ præmium habeat. Pronunciatum iter, signaque raptim ferri coëpta. Moram, sed brevem, iniecit adventus

Qq 4 lega-

legatorum Augusti Alexij, spondentis se venturum auxilio, si tantisper expectetur. At sententia procerum fuit, non expectandum; nec fidem ei habendam, qui adhuc fefellerit, quique bellum trahendo alere maluerit, quam profligare protinus viribus junctis. Aliunde promissum est auxilium præsentius & minimè defuturum. Godefredo summam admirationem parèmq; lætitiâ attulit Amazon Hispana, cum anulum ostendens, affirmavit, missum à Virgine Matre. Valentino illi Sacerdoti, cujus in conspectum Diva se dederat Antiochiæ, dedisse & ad Archam heri, ac jussisse, ut anulum, quem is digito ferebat, traderet Raymundo Comiti, pollicitamque, quoties hic egeret opis, affuturam, si donum acceptum reverenter pièque aspiceret. Godefredus id Divæ armorum præsidis & auxiliatricis cæleste pignus religiosè exosculatus & novâ fiduciâ plenus iter ingressus est. Ut obsidio Hierosolymæ maturaretur, omissa Archa, tum deinceps alia oppida Biblus, Tripolis, Beritus, Si-

Sidon, Ptolemais. (a) Ad Cæsaream nuncij genus dictu novum stimulos properantibus addidit. Fortè prætervolans columba placidè tectum reperebat, cùm repente terreri cœpit, clangere pennis, & præcipitare fugam visâ umbrâ venientis accipitris. Qui cùm pavitantem oppressisset, illa capta corpus succutere, alis strepitare & everberare tenentem. Accipiter velut ministerio functus prædâ relictâ sublimis avolat. Columba ex unguibus lapsa in terram ab accurrentibus militibus, cùm faucia pennis allevare se frustra conata esset, excipitur. Inventa sub caudâ epistola Arabicis scripta litteris: quibus nunciabatur Saracenis oppidis, adesse hostes Christianos: strenuè obsisti oportere; Saracenum Imperatorem collectas immensas copias mox ijs canibus objecturum. Quâ contumeliâ & comminatione accensi Christianorum animi. A Godefredo præmissus Robertus Flander Ramulam, cujus urbis præfectus Gerardo nuper apud Imperatorem Sarace-

(a) *Agil. Mart. Polon.*

racenum faverat, desertam ab omnibus oppidanis intravit. Ubi ad montes Iudææ atque in conspectum sanctæ Urbis ventum, Godefredus, & exemplo ejus universus exercitus procumbens in genua veneratione Numinis impressit osculum terræ. Quantum ibi piorum gemituum, quantum lacrymarum religio expresserit, dici non potest. (a) Hierosolyma vii. Idus Iunij anno post millesimum undecentesimo obsideri coepta. Civitas inclyta, Iudææ atque Orientis caput ipso loco eminet pluribus montium jugis imposita. Super Moriâ monte Salomonium templum, super Sione arx Davidica sita est. Destructam à Tito civitatem restauravit quartus ab eo Cæsar Ælius Adrianus, sed non in iisdem omnino vestigijs. Cùm priùs ad meridiem magis vergeret complexa mœnibus partem australem Sionij montis, hac exclusâ sic admota est ad septentriones, ut collis Golgotha priùs exclusus, nunc includatur muris. Haud multùm ab hodiernâ

(a) *Aquen. Tyr. &c.*

ernâ formâ discrepabat civitas, cùm ab heroë Godefredo obsessa est. Figura ei ferè quadrata, & primariæ quatuor portæ eædem, quæ nunc, erant. Proceres hoc ordine castra posuere. Normannus & Flander ad latus urbis septentrionem spectans, ad occiduum Bullionius & Tolosas, Tancredus omnium medius ad turrin angularem. At post paulò transtulit castra Tolosas ad austrum, Bullionius ad angulum murorum, qui inter portam septentrionalem & ortivam interjacet. Ventum erat ad summam belli, arcem rerum, & expeditionis sacræ metam, tot votis à Bullionio petitam, sed non nisi ingenti periculo ac labore obtinendam. Nicæa deditione in potestatem venerat, & Antiochia belli furto; Hierosolyma virtute expugnanda restabat. Hic à Christianis paucis pugnandum erat in barbaros non solum multitudine feroces, sed & muralibus machinis, ignibus, telisque generis omnis, magicis etiam artibus armatos. Hic Maga princeps cum feminarum ejusdem disciplinæ comitatu

mitatu pollicebatur obsessis alia omnia, quàm ad Antiochiam Calabre potuerat. Censebantur in urbe præter plebem quadraginta millia armatorum, in castris non plusquam XII. millia pedum, equitèsq; mille trecenti. Eò tanta illa, quæ Europâ exierat, multitudo decreverat, plurimis fame, pestilentia, defectione, ferro consumptis, nec paucis Antiochiæ cum Buamundo, & Edeßæ cum Balduino relictis. Cæterum protinus denunciari Godefredus jussit urbis præfecto (a) Guinimundo, ni deditionem faceret, eadem ipsum manere moræ præmia, quorum exemplum in Turcarum calamitate conspiceret. Verùm cum Saracenus de præfidiariorum multitudine, & celsitate murorum gloriabundus minas risisset, castra munimentis strenuè instrui cæpta. Quinto die Christianus Dux urbem testudine adoritur, cohortatus suos, ventum esse ad laborum metam: certamen illud, quod jam dudum animo prospexerint, ob oculos esse positum: irrum-

(a) Order.

irrumpendum in mœnia ; audaciam, & fiduciam in cælites pro scalis fore. Vel strage corporum transcendendos ejus muros, & suo cruore urbem emendam, ubi omnes divino sanguine redempti sint. Verùm oppugnatio acrior, quàm felicior fuit. Dux æstimato urbis positu, & propugnatorum numero, invenire rationem instituit, ut, quod Christianorum viribus deerat, arte suppleret. Intellexit sine machinis urbem expugnari non posse. Verùm ad paranda hæc præsidia ei materia deerat. Siccum undique solum, non arbores, pascuæve, non his rigandis rivos aut fontes esse affirmarant exploratores, & multiplicem animo ducis injecerant curam. Multis de successu desperantibus venit ad Godefredum Christiani nominis Syrus, asserens specum esse in valle ultra montes ad Arabiam versos, ubi multum veteris & accommodæ materiæ sit reconditum. Lætus Dux Flandrum ac Normannum eò mittit cum expeditâ equitum peditumque manu. Reportatum affatim cedrinorum cupressi-

pressinörúmque lignorum, & alacriter
 cœptæ fabricari machinæ. Cumulum
 alacritati addidit Mathildis, cujus altera
 classis Genuensis in tempore appulsa
 Ioppen portum nobilem. (a) Genuen-
 sibus præerat Guilielmus Ebriacus, qui
 impar Saracenæ classi propinquæ, cor-
 ruptis igni navibus suis in castra ad
 Godefredum cum annonâ, milite, &
 omnibus socijs navalibus venit. Hi
 periti struendarum omnis generis ma-
 chinarum magno usui fuere. Ab E-
 briaco quoque allati Godefredo læti
 nuncij de Mathilde; alteram ab ea He-
 roïde majorem classem adornari, nihil-
 que omitti, quod in rem vel Occiden-
 tis sit, vel Orientis. Hebdomades qua-
 tuor datæ machinationi, cui præfectus
 à Duce Gasto Foixius Benearnium
 Princeps. Adulto Iunio cœpit exerci-
 tus laborare siti ad Hierosolymam, non
 minùs, quàm priùs ad Antiochiam fa-
 me. (b) Unica erat in propinquo, eâ-
 que periculosa aquatio. Fons Siloë
 subterraneo meatu ex urbe labens in
 mon-

(a) *Folietæ.* (b) *Aquen.*

montis Si-nis latus, excipitur labro lapideo. Nec limpida, nec sapida est aqua, dicebaturque non nisi die hebdomadis sexto profluere, cæteris diebus velut paludosa stagnare. Eò aquatores itabant per media hostium tela, parte illâ mœnium inobscsâ. Turbidæ & lutulentæ haustus unicus nummis duobus constabat, & multo sanguine. Non pauci eâ epotâ cum facibus extincti. Siti famem addidit sensim annona deficiens. Pabulatum alijs aliò missis, captus cum filio nobilis Belga Isaacus in Ægyptum abductus est. Id quàm doluit Godefredo, tam non injucundum fuit consanguinei Comitiss Burgij facinus. Redibat Christianorum agmen partâ non mediocri prædâ, cùm insidijs Saracenorum, qui ab Ascalonis præfecto submissi erant, opprimuntur. Barbaris victoriâ, receptâque præda ferocibus occurrit cum suo agmine Burgius. Pugnatum acriter cum Saracenorum ductore perquàm strenuo. Belga pectore adverso telum excepit, & licet sanguine madens, nihilo segniùs institit.

institit. Profligati hostes, socij cum prædâ recepti. Præfectus Saracenus vinctus in victoris tabernaculum ducitur. Ibi in sellâ ostro vestitâ domini loco superbè confedit. Magni Spiritus barbarum cùm Burgius ad Christiana sacra capeffenda sollicitasset frustrâ, duci jussit in conspectum obsessorum, & ad terrorem obtruncari. (a) Liberiore ingenio fuit Saracenus alter egregius ille Ramulæ præfectus, qui sive Imperatoris metu postquàm oppidum suum cum præsidio deseruerat, sive Christianorum studio castris horum se adjunxit, felix transfuga, Godefredo Duci Gerardoque percarus, nec consilio manûve futurus inutilis. Interim machinis structis repetenda erat oppugnatio urbis à milite siti faméque conflictato. Tridui jejunium & comprecatio indicta, ut ea res piæ militiæ salutaris foret. Supplicatio deinde circum sanctæ Urbis pomerium nudis pedibus instituitur. Contrâ in muris princeps veneficarum cum magico comitatu obambulare,

(a) *Oder. Aquen.*

lare, saltatione ludicrâ obstrepere, cantuque carminibus Christianum agmen irridere pariter & devovere, dum id alij jaculis perunt. At Christiana multitudo iter institutum constanti pietate tenuit. Cœptum à templo Sionio Virginis Matris, quam secundum Deum propitiare cura Godefredi præcipua erat, & ibidem finitum est. Dux, cum tenebræ se cælo intendissent, silentio castra transfert ad angulum murorum Iosaphatæ valli imminentem. Eodem mirabilis artificij molisque turrim particulatim solutam comportari jubet, & circum eam, ut obsessorum oculos lateret, tabernacula erigi. Quæ turris dum suis coagmentatur compagibus, tormenta tria ex ordine statuta moenium crepidinem detergunt, oppidanosque ab inspectione machinationis averunt. Murus eâ parte duplex erat. Tormentis in exteriorem tonantibus, ad ruinam ampliandam producitur aries sub vineâ, quo perruptus murus exterior aditum dedit turri propius ad interiorem admovendæ. Per noctem

Rr per-

perfectum erigitur opus, cedro & fabricatum & dignum. Manè substructio immanis repente excitata apparuit, urbemque despexit. Multiplici tabulato divisa firmataque erat, unde tela ingeri possent. Latera ei quatuor adversus jacula ignesque memorabili arte munita vimineis cratibus, coriisque recentibus. Objectum urbi latus duplici texturâ tegebatur, quarum exterior mobilis demitti posset, & muro injecta esse pro ponte. Ternæ inerant stationes: in imâ locati, qui molem rotis mobilem protruderent, urbique admo-verent: in alijs pugnatore lectissimi, quotquot locus capiebat, certi virtute vincere, vel pro Christo animas dare. Medium tabulatum subjerant fratres duo Belgæ in Nervijs nati Engelbertus & Ludolphus, seu Letholdus, qui leonem occiderat. In summâ turri eminebant par aliud fratrum heroës Godefredus, & perpetuus magnorum operum adjutor Eustachius. Cùm diluculo turris & in turri Dux apparuit, mirantes novum bellandi genus barbari, qui,

qui, ut antè, testudines atque arietes expectabant, ominari sunt nihil arduum, aut inexpugnabile fore bellatori sic ad oppugnationem venienti. Nec priùs viderunt machinam armis, virisque foetam, quàm fenserunt fulminantem. Fastigium ejus excedebat muros hastæ altitudine, unde oppidani in plateis foroque medio sagittis figebantur, obto- rebanturque saxis. A stupore in furorem acti catervatim ad mœnia turri vicina convolant, Ducem vi telorum impetunt, nec segniùs ab eo impetuntur. Dum ita res eâ parte geritur, ab alijs quoque impugnatur civitas. Erexerant & turres alias duas alij proceres, unam Tolosas in Sione monte, alteram cæteri ad angularem Tancredi murum. Verùm & ab hostibus erectæ sunt suæ jaculatoriæ turres, nostris multò plures. Novem Tolosati objectæ, quinque Duci. Nox intervênit. Insomnem egerunt Christiani, veriti, ne in suas machinas injiceretur ignis. Curas auxerant non solum oppidanorum vires, sed maximè Imperator Saracenus, quem

638 LABORUM HERCULIS

immensis cum copijs appropinquare interceptis nuncijs cognorant. Illuxit dies Hebdomadis sextus Christo passo sacer, Ducisque & Christianorum omnium labore memorabilis. Primo diluculo instaurata oppugnatio, & extracta ad meridiem magnis animis, sed nullo successu. Pugnabant in singulos Christianos terni barbari telis, machinisque omnis generis, & casodæmonum opes. Magicis carminibus incantare tormenta præstigiatrices complures nitebantur. Inter hæc Dux, Eustachiúsque frater in suâ turri spectaculo digna prorsus edebant. Godefredus, ut erat lacertoso corpore, ad summam sagittandi scientiam pervenerat, ferturque aliquando tres aves prætervolantes ita destinato ictu excepisse, ut unâ sagittâ confixerit. Multiplex eo die specimen præbuit dexteritatis, roboris, & vigilantix, tum pugnacissimos quosque hostium sternendo telis, tum suæ turri consulendo. Mira ejus in hac struendâ industria, nec minor in servandâ enituit. Cratibus lentis accedentibus vestita horrendos
lapi-

lapidum jactus excipiebat ferè sine no-
xâ. Sicubi revulsæ erant, reparabantur
strenuè. Saxis diffringi cùm non pos-
sent, ollis flammivomis appetuntur.
Verùm & hanc hostium artem Dux ar-
te præverterat. Recentibus madidis-
que corijs obductæ crates non conce-
piebant flammam, prunæque & torres
injecti mox humi defluebant innoxie.
Dux in tabulato summo, telis omnibus
expositus, stabat ingenti animo, pericu-
lo majore. (a) Erat in turris apice con-
spicua crux effigiem Servatoris auro ra-
diantem obijcens Saracenorum oculis;
Barbari perpetuis tormentorum jactibus
eò tendunt, ut & hanc decutiant, &
defensorem Godefredum conficiant.
Mansit crux intacta; infrà destinatus in-
Ducem lapis lateri ejus adstantem mili-
tem cerebro eliso prostravit. Gode-
fredus servatus perstitit in eodem loco
& discrimine impavidus. Erat mashi-
narum ejus una, quæ mittendis magni
ponderis saxis plurimùm nocebat bar-
baris. Advocata in adversum murum

R r 3 maga

(a) *Order. Aquen.*

maga princeps mox adest cum sociâ tribusque pedissequis, & carmina, quibus machinam fascinet, cum pompâ, & magnâ suorum expectatione incinit. Verum eâdem machinâ excussus est lapis molaris tam directò, ut magas ambas, trêsq; puellas in auras extulerit, & ex muro deturbarit exanimés. Acclamavere circùm Christiani majore, quàm pro re, lætitiâ. Sed inter assiduos gemitus, unum illud quantumcûmque ex insperato gaudium affulserat. Dum strenuè res in turri Ducis geritur, alibi plerique despondebant animos. Miles pugnâ æstûque meridiano fatigatus, ardentibusque siti faucibus videbat acriter resisti : supernè ab hostibus gravem & ipso pondere libratiorem ictum esse; à se vana pleraque, utpote supino jactu, tela mitti in muros : in quos vel si tandem evadant, paucis non solum cum barbarorum multitudine, sed etiam cum veneficis orcóque luctandum. Hinc desperabundi ab oppugnatione abstinere, de scalis desilire, cum ejulatu complodere manus, & quasi deferente

Deo

Deo ingemiscere, projectisque armis dilabi. Satis constat, fortissimos quoque proceres Robertum Flandrum, & Normannum non sine fletu suam infelicitatem conquestos, quos Christus ingressu urbis, & conspectu sepulchri sui, & Sanctæ Crucis arceret. Hæc ubi intellexit Dux, gravi curâ correptus confirmare cœpit animos vocibus, nutibus, exemplo. Cùmque hæc apud remotiores non valerent, cælum ipsum spectaculo juvit. In monte Oliveti miles apparuit, qui clypeum insolitâ luce refulgentem quatiens signum dare videbatur Christianis, ut oppugnationi instarent. Quo viso Dux proceres, militesque jactatis manibus erigere, Cælestem bellatorem ostentare, & opem superum non dubiam nutibus promittere. Redijt vigor animis, repetitaque pugna novo ardore, tanquam primum incœpta. Feminæ quoque virilia occupare munia, Eluira Amazone hortante inter jacula volantia victo pavore se inferre, porum pugnantibus ministrare, tela suggerere, atque torquere.

Rr 4 Tan-

Tanta omnium alacritas exinde fuit, ut securi de victoria viderentur. Dux usus alacritate animorum, & favore celesti turrim suam, ut adversus tormentorum hostilium jactus tutior esset, & ad irruptionem paratior, propius ad moveri muris jussit. Mox complanatus, qui obstabat, tumulus, & connidente multitudine moles protrusa cum armatis. Ita hostiles machinæ neque nocere propter propinquitatem, neque removeri propter obstantes domos poterant, jactique in Ducem lapides innoxij transvolabant. Intelligentes barbari, in illa turri verti summam belli, omnibus artibus Ducem à fronte, à lateribus impugnare instituunt. Eam ut subruant, duplicem moliuntur pestem. Novum incendiariæ machinæ, novum arietis genus producit. Immanis trabs erat, quam totam ferreis clavis uncisque asperam stupis, oleo, picæque illitis instruxerant. Trabem ingenti catena vinctam, ne à nostris revelli posset, emoliuntur è mœnibus, & injecto ignis genere, quod aquâ nequiret
extin-

extingui, devolvunt ad imam turrim, ut fulcra ejus flamma corripit, defensorésque sternat. At Ducis vigilantiam latebat nihil. Comperto ex indigenis, pestem illam solo aceto posse extingui, magna ejus copia utribus in turrim comportata ita in trabem incendiariam effusa est, ut mox flamma suppressa sit. Catena totis viribus ultro citroque tracta, tandem Saracenis eripitur. (a) Iam aries hostilis ejusmodi fuit. Malum in muro crexerant, trabemque transversam libramentis appenderant, quâ incutiendâ machinam diffringerent. At Dux falce armatus eum arietem, retinaculo inciso, capite traxit in turrim. Et fortuna consilium adjuvit. Ita enim parte alterâ trabs muro incubuerat, ut in eum mobilis frons turris superijci posset, pontemque firmare. Sed priusquam id tentaretur, nudanda defensoribus mœnia erant, qui undique instabant acerrimè. Stabat Dux inter duo urbis propugnacula, ex quibus Saraceni, Arabes, Æthiopes præter vim sagit.

(a) *Malmesb.*

ſagittarum faces tædâſque frequenti
jactu mittebant. Duci ac ſocijs inter
fumum flammâque non tantum atra-
ti vultus ſudore manabant, ſed veſtes
corporâque uſtulabantur, & ipſa, qui-
bus tegebantur, incanduerant arma.
Iamque minor moles in ſuſtinendis te-
lis, quàm in ſupprimendis ignibus erat.
Utraque ut arceret Dux, vertit in ho-
ſtes incendium. Propugnaculum vi-
cinum ſtoreis ſacciſque ſtipulâ fartis
obtexerant, ut eorum mollitie jactus
Ducis fruſtrarentur. Dux raptas ex
igne ardentes ſagittas alias ſuper alias
arcu baleari in arentia illa tegumenta
contorquet. Et fortè erat vis magna
venti verſa in hoſtes. Concepto cele-
riter igne ingens fumi nubes in ora bar-
barorum inferitur, nec ſtare loco ſinit
tetro vapore & caligine involutos. Ar-
dentis paleæ crepitu, deſagrante pro-
pugnaculo, flammâque in muros effu-
ſâ conſternati barbari. Tunc Dux ni-
hil moratus pontem trabi jubet inſterni,
& facinus audet dignum orbis aſpectu.
Licet in eum vis ingens miſſilium telo-
rum

rum conijceretur, clypeo rectus processit, & omnium primus (teste pontifice Tyrio) cum Eustachio fratre transcendit in murum. Quo hortante subsecuti Nervij fratres & deinceps Gerardus, aliique. Vexillum Ducis icone Virginis insigne statutum in mœnibus, quo viso, sublata à Christianis omnibus acclamatio. Eminens ibi Godefredus robur heroicum, si quando aliàs, explicuit. Nec impetum diu sustinere muri custodes: ferro, igni, terrore vertuntur in fugam. Christiana multitudo circum urbem acclamans Duci, partim per ejus turrim, partim per admotas scalas secuta est. Inter primos Robertus uterque, Tancredus, Burgius, Anachoreta, Acutomontanus urbi inferunt arma. Mox jussu Ducis patefactis portis reliqui conferti admittuntur. Barbari pavore amentes ruunt per vias, per invia dispersati. Omnia obtinebat cædes, nec in ullam partem tutum per fugium erat. Multi in templum Salomonium; nec pauci in arcem Davidicam confluerant. Sed Tancredus &
Gasto

Gasto prægressos in templum secuti. Ibi redintegratum, & ab desperatione accensum pælium, decémque millia hostium cæsa. Locum ita sanguis inundasse fertur, ut pertineret genuum tenus. Interea Raymundo, cui barbari adhuc restiterant, clamor virorum permixtus mulierum ploratibus significavit urbem esse captam. Igitur renovato impetu pulsos ex propugnaculis hostes secutus in urbem, arce Davidicâ potitur. Multi ex tectis præcipites dati : per plateas & domos urbique cadavera : nusquam nisi per truncatos artus & sanguinem via. Postquam à barbarorum cæde cessatum, nullo, qui caderetur, relicto, versi ad prædam victores. Christiani incolæ proceribus, ac militi, ut quisque obvius erat, gratulantur. Petro imprimis Anachoretæ, quem Hierosolymis viatorem ante annos decem viderant, agnito, belli felicitis præconi circumfusi grates agunt. Inter procures oculis requirebatur expeditionis Heroïcæ princeps, auctórque præcipuus victoriæ Dux Godefredus.

Nus-

Nusquam apparebat, nec, quò abijisset, aut se abdidisset, sciebatur. Investigabat imprimis Tancredus fortissimus juvenis, ut ei duci suo ingentem offerret auri massam è templi Salomonij columnis dereptam, cui portandæ cameli plures vix pares erant. Fortè quidam è mœnibus despicientes in pomerium, spectaculum ibi novum, atque inexpectatum advertunt. Hominem vident inermem supplicis habitu, laneâ in veste, demisso capite humilem, nudis pedibus obambulantem. Is erat inclytus Godefredus, qui, dum alij cædibus, alij cupiditati, atque avaritiæ indulgent, postquam victoriam in tuto vidit, cæde omni prædâque abstinerat; tum præsidio ad portas, & opportuna mœnium locato, exierat, sacra loca Christi vestigijs & doloribus sacrata religiosè obiturus, sequentibus tantùm domesticorum tribus. Egressus per portam, quæ respicit ad Oliveti montem, circuitâ civitate regressus in urbem sepulcrum Dominicum petijt, & pijs lacrymis madens provolutus in genua gratijs Deo, Deique

que Matri Virgini referendis incubuit. Tetigit universos eximij viri exemplum, quod secuti proceres, milites, incolæ, conferto agmine supplicabundi eodem feruntur. Gratiarum actione perfuncti, communibus votis implorant Numinis auxilium ad novum, quod restabat, gravius prioribus bellum adversus Imperatorem Saracenum. Quo instante, & ad Ascalonem immensas copias congregante, præcipua Christianorum cura fuit, ut ipsorum aliquis pietate, & fortitudine spectatus eligeretur Hierosolymorum rex, qui in hostem duceret. Omnes in Godefredum oculos, animùmque converterant. Cæterùm ut non ex studio, sed judicio, & æquitate electio fieret, arbitri dati, qui momentis suis procerum merita perpendere. Haudquaquam parvæ rei judicium eos arbitros tenebat, qui vir optimus, regnóque dignissimus esset. Certe victoriam ejus rei sibi quisque malle debuit, quàm ipsum Orientis imperium. Procerum, de quibus deliberatio erat, vocati ab arbitris familiares, & ju-
reju.

rejurando adaſti ſe de moribus Domi-
 norum verâ reſponſuros. Ut paucæ
 virtutes ſine miſturâ vitiorum enitent,
 alia in alijs procerum notata. De duce
 Godefredo interrogati familiares ac do-
 meſtici inexpectatum illud reſponde-
 runt, in moribus ejus Principis nihil
 videri magis abſum, quàm quòd tem-
 plum aliquod ſemel ingreſſus inde ex-
 cedere etiam perfectâ re divinâ non ſu-
 ſtineret, ſed precatione longâ perfun-
 ctus circumeundis luſtrandisque ſaceris
 iconibus inſiſteret, ſingulas noſcicans
 venerânſque, & de ſingulis doceri à
 templorum cuſtodibus vellet. Ità eum
 comitantibus tædium parere, & parata
 prandio obſonia prolixâ religione cor-
 rumpere. Ad hæc arbitri vix ſibi à ri-
 ſu temperantes beatum prædicarunt vi-
 rum eum, cui unicum illud vitio ver-
 teretur, quod alij ſibi virtuti laudique
 ducere meritò poſſent. Quare Gode-
 fredum regio inſigni digniſſimum cen-
 ſuere. Univérſis idem ſentientibus ipſe
 ſolus obſtare, grates agere ob tantum
 de ſe judicium: eſſe alios paratiores tan-

650 **LABORUM HERCULIS**
tæ ferendæ majestati. Hîc admirati
omnes excellentem viri modestiam,
prædicabant sanctam incorruptamque
dominandi cupiditate mentis æquita-
tem. At Petrus Anachoreta præ admi-
ratione cessantes exstimulabat, contem-
dens apud proceres ac populum, quid-
quid Dux contrà niteretur, non alium
esse vel regno digniorem, vel regem
eligendum. Heroëm non armis mo-
dò, & belli scientiâ, sed indole, reli-
gione, æquitate & omni genere virtu-
tum excellere. Illum sacræ expeditio-
nis principem, illum Hierosolymæ vi-
ctorem, & Hierosolymitani regni con-
ditorem, debere quoque moderatorem
esse. Si Buamundo propter felix belli
furtum nocturnum concessa erat Antio-
chia, Godefredo, qui medio die in o-
mnium oculis primus in Hierosolymæ
muros transcendisset heroicâ regiâque
virtute, Hierosolymæ regnum deberi.
Addebat vaticinantis in modum, id præ-
sidij in Godefredo, ejusque familiâ præ-
exteris esse, quòd ex eâ successores sa-
cri regni deesse non possent, in qua tres
essent

essent fratres regno digni. Anachoretæ orationem secuta ex omni multitudine consentiens vox Godefredo Regi ratum nomen, & majestatem effecit. Itaque Bullionius octavo, postquam sanctam urbem expugnarat, die, Rex Hierosolymorum electus in sepulcri Domini templum cum pompa inter concentus musicos, nec non incredibiles omnium acclamationes, & plausus inaugurandus ducitur. Corona aurea gemmis insignis præferebatur, regalisque purpura. In eo templo Godefredum Deo supplicem universi regem, parentemque urbis Hierosolymæ salvere jubent. Inde oblata capiti regis fortunæ insignia. Hic Bullionius novo stupore omnes implevit. Accepit quidem onus regni administrandi, at negavit se in ea urbe coronam auream, in quâ spinam Deus tulisset, gestaturum; se eâ contentum, quâ Christus fuisset redimitus. Neque verò passurum appellari se Regem; Custodem divini sepulcri futurum. Ab omnibus judicatus vel ideo dignissimus supremo decore,

Ss

quod

quòd miraculo virtutis in ipso folio sese in ordinem cogeret. Ut tamen mos ejus religiosæ modestiæ gereretur, omisso tunc regio insigni ac nomine, credita ei regia potestas. Coronam auream traditam quos vellet in usus, accepit, servandamque curavit arcano consilio, alterius caro capiti impositurus, bello in Saracenum confecto. Exinde Godofredum, licèt constaret esse inter Christianos dignitate regiâ, Ducem tamen, ut priùs, quidam appellabant præsertim coràm, at alij plurimi Regem; quibus accessit Tudebodus primus belli Heroïci scriptor; item pontifex Tyrius, qui non Regem modò, sed Regum optimum, luménque & formam omnium cæterorum habendum scribit. Quò celsiore loco posita erat egregij viri virtus, eò splendidius enitere cœpit. Protinus à pietatis operibus auspicatus regnum nullâ de re priùs, quàm de religionibus decrevit. In sepulcri Dominici templo Canonicos instituit, quibus ampla beneficia, domosque attribuit. Item religiosos viros
secum

secum ex Europa adduxerat, toto itinere horis diurnis ac nocturnis sanctos Ecclesiasticis officijs, in valle Iosaphatâ locavit amplissimo agro censuque donatos. Inde ad bellum Ægyptiacum animo toto convertitur. Convocatis proceribus cælestique præsidio communiter implorato, Anachoretâ, cui summam rerum omnium fidem habebat, Hierosolymis relicto Prorege, educit exercitum inter concentus musicos cruce munitum. Regem comitabatur immixtus Christianis proceribus ille Saracenus nuper Ramulæ Præfectus, nunc fœderatus. Qui agminis alacritatem vehementer miratus interrogavit primum Gerardum, deinde etiam Regem, quâ fieret, ut tam pauci contra innumeros pugnaturi eâ lætitiâ ad ultimam capitis dimicationem, tanquam ad epulum, tenderent. Respondit Godofredus lætitiæ causam esse, quòd Christiani, qui sub crucis signo militent Christi auspicijs, sciant eos NON MORI, QUI IN OPERA CHRISTO NAVANDA FINIANT VITAM, sed ad immortalem, beatâmq;

traduci. Quo responso erectus Saracenus animo jam minimè Saraceno petijt & ipse crucis signo muniri ad pugnam. Cæterum fama immensi adversus Godfredum comparati à Saracenis exercitûs toto Oriente intentas mentes tenebat prælij decretorij expectatione suspensas. Ad urbem Aſcalonem, quæ abest ab Hierosolymis sesquidiei itinere, castra posuerat Imperator Amerinas, ad quem copix non solum ex ditionis Saracenæ populis, sed etiam ex socijs ac fœderatis confluxerant. Ægyptijs accesserant Æthiopes, Arabes, atque etiam Turcæ. Non aliàs Turcarum nomen Saraceno imperio conjunctius fuit. Licet prius diffiderent, nunc tamen, ubi commune & periculum & in Christianos odium advenit, mutua invidia & superbia post fuere. Aderat ipse Amerinas Imperator, pro quo ducebat ordines ille Armenus, Elephalius nomine, Christianis parentibus ortus, sed opum & gloriæ illecebrâ desertor religionis paternæ, odio in Bullionium Pancratio populari conjurationis participes,

ceps, at nocendi facultate tantò superior. Imperator Hierosolymam nuper à se de Turcis ostentato Gerardo receptam, nunc à Godefredo expugnatam ferebat indignissimè. Non latebat eum paucitas Christianorum, quibus sub signis non nisi peditum novem millia essent, equites mille ducenti. At gloriabatur sibi contrà jam adesse ad Ascalonem trecenta peditum, equitum centum millia: quibus quotidie fiebat auxiliorum accessio, eaque tanta, ut hoc bello majora in unum non convenirent. Inde conceperat victoriæ non spem, sed fiduciam. Illud barbaro iram accendit, quòd nunciatum est, Christianas copias adventantes occurrisse ingentibus armentis Saraceni exercitûs, iisque potitas, custodibus ignavâ fugâ dilapsis, licèt armis instructiores, numeróque plures essent Christianis. Hósque jam admotos quatuor circiter milliarium intervallo considere ausos. Postridie ferro pœnas sumere statuit, noctem questus intervenire vindictæ. Primo diluculo acies utrimque ordina-

12. Ubi cedentibus tenebris venîre in conspectum , barbari eminus in agmen Christianorum prospicientes pro paucitate existimatâ multitudinem immensam advertunt , & innumerabilium eorum hinnitum audiunt. Hinc stupere omnes primò , & attoniti inter se aspicere : deinde percontari , unde tantâ subitò copiâ extitissent suis numero vel pares , vel superiores , & maximam partem equestres ; quod hinnitus fremitusque jumentorum indicabat. Oculis atque auribus oberrans tam ingens belli moles antè perculit barbarorum animos , quàm collatus pes , aut manus eadem faceret. Ipse Imperator , legatusque Armenus stupebant , nec quibus argumentis confirmarent territi militis animum , invenire poterant. Hinc plurimi fugam circumspicere , mox arripere , ordinésque turbare. Interim accedente Godefredo apparuit vera Christianorum paucitas : mox ludibrium oculorum atque aurium patuit , cujus hæc causa memorabilis erat. Ad Christiani agminis conspectum custodibus pecorum

eorum (ut modò dicebamus) fugâ dilapsis , Ramulanus præfectus Godefredum monuerat hanc esse fraudem hostilem , eò spectantem , ut Christiani oblatâ prædâ illecti , solutisque ordinibus dispersi capta pecora præ se agentes præberent se opportunos cladi. Quo audito militibus à Godefredo iussis abstinere prædâ , hæc tamen secuta erat exercitum. (a) Armenta bouum & camelorum ; equorúmque domiti greges eo numero , qui iniri non posset , ultro ac nemine agente agmini sese adjunxerant , & circumfusi , ut poscebat itineris ratio , nunc cum eo interstebant , nunc æquis passibus procedebant sublatâ ingenti vi simul pulveris , simul vocum. Arma signaque in prima acie apparebant : post altior densiorque pulvis à lateribus & à tergo speciem alarum & subsidiorum dabat. Ita multitudo pecorum eminus per turbidam lucem à barbaris observata , immensus exercitus equestris credita est. Nec terrorem modò , sed & fugam plurimis

SS 4 intulit,

(a) *Aquen. &c.*

ordinat. In dextro cornu dispositi, qui circumveherentur Christianorum terga: in lævo Æthiopes robur exercitûs, & præcipuus hostium terror. Hi locati ante signa, & immoti posito genu manere jussi, ultróque jurati nusquam inde, nisi in hostem, vestigium moturos esse, alioquin caput Mahometi sacrum futuros. Gens visu tetra, & animis indomita. (a) Obarmati pectus clypeis, arcu gladióque instructi gerebant & buccinas, ac flagella ferrea, quibus scuta & loricas gravi ictu penetrarent, & frontes equorum pertunderent. His flagellis quatiendis pariter ac buccinis inflandis sonitum terribilem longè per agmina dabant. Cantaros aquâ plenos de collo suspenderant adversus sitim, quam sibi ad terram hærentibus non nesciebant ab excito pulvere orituram. Quo loco jussi, hæsit conjurata & immobilis acies. Rex Godfredus cernebat hac parte rem haud cum imparatis fore, suorumque non paucos insolito pugnae genere motos. Ergo


(a) *Aquen.*

Ergo pro tempore pauca, sed valida differuit cùm de universâ barbarorum multitudine, tum de Æthiopum apparatu, vanâ magis specie, quàm efficaci ad vincendum. Non enim lagenas, aut buccinas vulnera facere; per pictos clypeos transire Christianorum tela, & longiùs ferire, quàm scuticas. Mansuros se fuisse in Europâ, si potuissent inani specie sonóque debellari. Nec oculis, sed ratione pensandam hostium multitudinem. Eam jam fugâ docuisset, quàm fugari facilè possit. Cernebant aciem nondum excusso pavore fluctuantem, & modò pecorum ludibrio terrefactam viri armis impellerent. Æthiopes, quidquid minitentur, terræ hædere jam penè prostratos. Semet in eos pugnaturum; docturúmque non perinde animis, ut corporibus, esse immotos. Scientissimus belli Rex ordinandis copijs ancipitia posuerat signa. In novem acies tribuerat exercitum. Tres in fronte locaverat, tres in medio, totidem à tergo, ut quâcumque parte ingruerent hostes, invenirent triplicem obje-

objectam aciem. Ipse in primâ lævum cornu è regione Ascalonis tuebatur Æthiopes aggressurus; dextrum Raymundus mare versus; inter eos medij deinceps suam aciem singuli regebant Robertus Normannus, Flander, Eustachius, Tancredus, aliique. Instante pugnâ Rex Dei Matrisque Virginis auxilio, quod toties expertus erat, implorato, alacer insilit in equum, & in hostem ducit acclamantibus circum undique militibus, sint vel plures hostes, dum talem ducem habeamus. Sinistrum Saracenorum cornu impulsum primo clamore atque impetu retulit pedem. Res ibi minimè certamini similis, propius speciem fugæ fuit. Quæ postquam inclinavit ad naves, alij arma foedè jacentes foediùs in aquam ruebant; alij, dum eundantur in littore inter fugæ pugnaque consilium, oppressi à Raymundo, & ad tria millia cæsi. At in dextro suo cornu hærebat immota Æthiopum acies. (a) In hos invectus Rex Godefredus cum Burgio, Montacuto,

(a) Order.

tacuto, Gerardo. Non hīs fuga, nec pugna, sed strages fuit, quoad conterriti Æthiopum superstites dispalati, intentatarum pœnarum immemores, nec jam quidquam præter Godefredum timentes. Interim alibi victores ad spolia versi per tentoria vagantur intempestivâ cupidine. Quod conspicatus Armenus ductor collectâ magnâ suorum manu reversus incautis repentē ingruit. Victoriā Christianis vel cruentam reddiderat, vel eripuerat, nisi Rex animadvertisset creatum avaritiâ periculum. Advolans objurgatos à prædâ reducit ad pugnam, hostēsque denuo profligat. Parte in pomeria dilapsâ, partem ad Ascalonis portam usque persequitur. Ingredi turmatim conantes tantâ vi compressi, ut ad duo millia vel suffocati, vel obruti sint. Eo prælio plus centum millia periere. Præda tanta parta, quanta non alibi antea. Æthiopes, seu cædendi satietate relictī, seu fugâ servati, se non procul recepere in cavernas ardore vindictæ posaturi insidias Regi, & quibusvis Christianorum iter Hierosolymam habituris.



L A B O R U M

HERCULIS CHRISTIANI

LIBER SEPTIMUS.



Larissimæ victoriæ fama latè didita Constantinopolim usque pervenerat, cum eodem secuta est altera tristissima, victorem Regem Godefredum captum esse ab hostibus vindictæ studio ardentibus. Vinculis oneratum, abductum in Ægyptum, retróque carcere inclusum. Barbarum Imperatorem atrociam in eum exempla editurum, ni properè liberetur, vindictam & pœnas acceptarum tot cladum deposcentibus Saracenis, Turcis, Arabibus, Armenis, Æthiopibus. Hæc in aula Imperatoris Alexij vulgata variè animos

animos affecerant. Augustus etsi Ducem adoptarat & benevolentiam singulari Cæsareis honoribus coluerat, tamen ex quo Latini omnes proceres (excepto Tolosate) Antiochiam Buamundo concesserant, minus benevolus Godefredo, minus ejus captivitate doluit. At acerba ea fuit Alexij filio Calojoanni, conjugij ejus Hungaræ Pirisçæ, atque imprimis Helenæ sorori Buamundi. (a) Anna Comnena, quæ parentis Alexij res conscribebat, mox prodidit memoriæ Godefredum à barbaris captum & abductum, eoque cognito Balduinum Edessæ Comitem protinus fratris Regis liberandi gratiam iter arripuisse. Iam Balduinus, antequam de ea captivitate inaudisset, in viam se dederat. Invitatusque à Buamundo Antiochiæ Principe ad Dominicum sepulcrum visendum cum parvâ manu Edessâ discesserat. Mense Novembri Laodiceam ad Hispanam Amazonem Eluiram venit, cujus vir Comes Tolosæ Constantinopolim profectus erat, ab Alexio Lao-

(a) *In Alex.*

Laodiceâ urbe donatus. Novum hoc imperium interim tutelâ Eluiræ (tanta indoles erat in Hispanâ) inter barbaros stabat. Inde digressus Balduinus præeuntis Buamundi vestigijs insistens pervenit ad maritimum oppidum Valeriam. Accedenti tentoria , currus , amplissimâque castra spectaculo fuere. Iam cognorat ex Eluirâ, hæc castra instructissima copijs & apparatu bellico non Buamundi esse, sed Mathildis. In his utriusque sexûs bellatrix multitudo aderat ad millia quinque & viginti. (a) Præerat ijs pro Mathilde vir specie corporis animique dotibus venerabilis Theobertus Pisarum Archiepiscopus Bullionio in Italia notus , Mathildique intimus. Officiosè exceptus à Buamundo Belga perducitur ad prætorium Theoberti, qui Balduinum tantum juvenem ubi cognovit , complexus , & à lacrymis sibi non temperans, te, inquit, teneo dignum Rege Godefredo fratrem. Balduinus modestè avertit à se sermonem in Mathildem, interrogavique

(a) *Aqueni.*

que de ejus Amazonis bellicis in Italiâ rebus, de secessione à Guelfone, deque animo in Godefredum. Theobertus respondit in hanc sententiam. (a)

Ex quo, inquit, ex Occidente in Orientem discessistis, ea gessit femina sine exemplo maxima, juxta magnitudinem operum & fulgore virtutis sola appellari Heroïna meruerit. Omnium, quæ bello patravit, omnis ei laus debetur, cum Amazoni ad res summas adjutor non alius, quàm Deus, adfuerit. Is voluit vos abesse procul, & Conradum ipsum præsentem abstinere armis, ut, quid sine bellatorum Principum ope posset femina, quantâque per se esset, orbi liqueret. Postquam Henricus victus ad Canusium & fugatus solum jam Cæsaris nomen obtinuit, Conrado filiorum potito, Pontifex Urbanus invitatu Mathildis Româ Pisas, & inde sequente me Canusium venit. Ibi adeò magnifico apparatu exceptus est ab Heroïde, ut de Henrico ac Giberto triumphum

(a) RELIQUA *Mathildis, Guelfonis, Henrici, &c.*

phum agere videretur. At interim perpetuus ille turbarum artifex & pravitatis antistes Gibertus novam Italixurbationem moliebatur, mox erupturam defectione Guelfonum. Ubi Pontifex Canusij cum Mathilde deliberavit de re belli sacri, contendit Placentiam, celebravitque cum ducentis Episcopis Concilium, in quo cum Mathilde comparuit soror vestra Praxedis. Exposuit scelera in se Henrici, ut repudiata innocens, ut in custodiam data, ut oblata infamix esset. Deinceps suam liberationem, & Mathildem ejus auctorem ostendit, Conradique castissimi Principis honestam à turpi parente defectionem. Ubere sacro confessui lacrymas expressit tristissima Augustæ narratio, & permovit Urbanum ad Henricum & Gibertum renovato anathemate feriendos. Indicto ibidem sacro bello, quod post paulò Claromonti conflatum est, digressus Urbanus Placentiâ Cremonam cum Augustâ & Mathilde, obviam habuit magnificâ comitatum pompâ Regem Italix Conradum. Juvenis præ-

T t clarus

clarus regium cultum pariter animúm-
 que susceperat. Eximia pulchritudo
 corporis, mite ingenium oríque similli-
 mum, suavissimi mores, & magnitudi-
 ni animi conjuncta modestia singularis.
 Ubi venit in conspectum Pontificis, de
 equo desiliit. Tum dissimillimus re-
 belli patri, miræ modestiæ exemplo,
 Pontifici officium equisonis exhibere
 aggreditur. Frenumprehendit regiâ
 manu, & præjens equitem Pontificem,
 pedes Cæsar deducit. Cúmque jureju-
 rando fidem obligasset Urbano, hic vi-
 cissim eum in Ecclesiæ filium accepit,
 coram Heroïnis & totâ multitudine
 sanctè pollicitus, se consilio & readjutu-
 rum, ut Imperij coronam & Augusta-
 lia decora obtineret. Inde Praxedi
 Augustæ fuit auctor, ut caducis omni-
 bus rebus, quarum vanitatem esset ex-
 perta, nuncium remitteret. Id Praxe-
 dis jam antè cum Mathilde deliberatum
 magno animo fecit, reversaque in pa-
 triam inter candidos virginum greges
 vitam religiosam capeffivit, & jam pro-
 cul ab aulæ turbis animo soluto ac va-
 cuo

cuo ævum jucundum placidè agit coronæ Cæsareæ vel immemor, vel pertæsa. Henricus interim, ut retineret Cæsareum decus, ad summum dedecoris ruebat impellente Giberto. Intellexerat homo hic pervicacis nequitiae, nescio quid offensionis latere inter Guelfonem & Mathildem, nec familiaritatem intercedere, quæ inter conjuges solet, Eos ut dissidio implicaret, ut animis disiungeret, auctor Henrico fuerat, ut Guelfoni patri, cui Bojorum Ducatum ademerat, spem ejus recuperandi faceret. Ita redijt Guelfo cum Henrico in gratiam, petiitque à filio, ut ad amplissimam recuperandam dignitatem, quâ postea ipse heres esset frui-
 turus, sibi operâ & pecuniâ adesset, quantâcûmque posset. Guelfo filius læto nuncio arrectus Mathildem convenit, rem exponit, ad eam efficiendam petit, ut utrumque ipsa possessio-
 num suarum proventibus juvet. Mathildis prudenter speculata Guelfonem jam Henricianarum partium, si Ducatu augeatur, Henrici Giberti que vires de-

denuo restitutum ad instaurandas turbas Italiæ, religionis & Ecclesiæ causâ præcisè negavit, quod petebat conjux. Qui jam antè latente de causâ Mathildi minùs benevolus, repulsâ irritatur. Palàm iratus injungit domesticis suis, ut vasa colligant; sibi constitutum esse, Mathilde relictâ demigrare Canusio. Discedens, eò provectus est iracundiâ, ut arcanum, ad id tempus occultatum, palàm faceret. Denunciavit, sibi res suas haberet Mathildis, quam desereret, à se intactam, conjugem, non conjugem. Ad hanc vocem, audientes mirari, rumores serpere, differri res novitatis plena & inexpectata, nec adhuc penitùs nota. Cùm ita disiliisset matrimonium, quod citra tori commercium famâ magis, quàm usu constiterat, ægrè tulit Mathildis arcanum illud à Guelfone evulgatum, quod ipsa alioqui perpetuò tacuisset. Guelfo pater secessionem illam tulit ægerrimè, qui nôsset, quantæ opportunitates, opésque filio ex societate Mathildis accederent. Diffidentes eos frustra
recon-

reconciliare conatus, denique irâ per-
 citus ad vim convertitur. Opem Hen-
 ricî Cæsaris implorat, ut ejus vel aucto-
 ritate, vel armis compellatur Mathil-
 dis concedere Guelfoni conjugî bonâ
 ex fœdere debita. Negavit Mathildis,
 se quidquam debere de bonis, priûs à
 se donatis Ecclesiæ. Gibertus quàm
 doluit tantam ex oculis, ac manibus a-
 mitti prædam, tam gavisus est occasio-
 ne novi belli, quo amissâ reciperent.
 Discesserat in Galliam Urbanus, & cum
 eo plerique præfules. Remanserat fo-
 la cum Conrado Mathildis, non pau-
 cis militum jam sacri belli causâ Con-
 stantinopolim versus profectis. Guel-
 fo uterque opibus in Italiâ florens Hen-
 rico jam studebat. Ergo peropportu-
 nam occasionem nactus Gibertus belli
 instaurandi erigit animum Henrici: hoc
 esse tempus collabentem existimatio-
 nem bellico aliquo facinore relevandi,
 Mathildemque cum Conrado rebelli
 opprimendi. Res cum Guelfonibus com-
 municatur, contrahuntur copiæ, multi

Veronensium sequuntur signa. Nogara
(a) Mathildanæ ditionis oppidum ob-
sione cingitur. Comperto eorū consilio
Mathildis, gnara opportunitates in ce-
leritate fitas, continuò cogit è præsidijs
militem. Iamque accincta itineri, cum
videret Conradum, ne iret in Henri-
cum, reverentiâ prohiberi, Te quoque,
inquit, Conrade Rex, æquum erat
nunc capeßere pro parte bellum, nisi
in patrem pararetur. Ibo ego in for-
midanda illa nomina, Henricum, Gi-
bertum, Guelfones, nec, ut spero, in-
comitata pugnabo, quando armis meis
tuâ illâ in patrem reverentiâ propitia-
rum numen adjunges. Equo mox con-
scenso Amazon præit copijs, Padum
traiecit, Gubernulam ingreditur, castris-
que nocte motis, summâ celeritate ad
hostes accedit. Militibus suis, ut ani-
mos addat, memorat superiora prælia,
& victorias. Nocturnæ illi ad Sorba-
ram victoriæ similem ominatur eâ no-
cte reportatum iri. Adesse finem bel-
li, & laborum; in manibus esse prædam

ca-

(a) *Domnizo. Florentin.*

castrorum Cæsaris: Gibetti malè parta bene ad ipsos reditura. Guelfones intellecturos, quid Giberto Mathildis, aut potius quid bona causa pessimæ præstet. Adeo celsa corpore, vultuque ita læto dicebat, ut vicissè jam crederes. Interim trepidus nuncius affertur ad Henricum, imminere Mathildem. Primùm pavor, terrôrque animos audientium incessit: deinde cùm clamor ac strepitus castrorum ortus esset ex discursu arma capientium, error metum ac tumultum intendit. Oppidani hinc plus conijcientes, quàm quod erat, læti per muros clamant, adesse Mathildem, salubrique mendacio & suum & ejus impetum minantur obsidentibus. Qui omnia in majus augente nocturno metu, velut pleno jam hostibus vallo, & tamquam Mathilde renovante illatam ad Sorboram cladem, dum putant se victos esse, vincuntur. Henricus, Gibertus, Guelfonésque pavidi, desertis castris, ne vasis quidem collectis per tenebras fugam arripiunt. Lux & exploratores errorem aperuere indignantibus,

invicemque exprobrantibus, quòd non à Mathilde, sed Mathildis nomine fusi essent. Amazon antequam vidisset hostem, jam victrix, omnibus ejus impedimentis potitur, & summâ laude ac propriâ, ex qua nullus procerum quidquam decerpfit. Hæc res ademit Guelfonibus animos, ac spem ditionis Mathildanæ armis obtinendæ. Quare inglorij è Longobardiâ in Germaniam secessere, ubi Guelfo pater in possessionem Ducatus Boïci restitutus, at perterritus impij belli ad sacrum se accingit, vela facturum in Cyprum. Henricus bello Italico septem annorum exhaustus, regno exutus, coopertus dedecore cogitur Italiâ tandem effugere. Gilbertus quoque sordidâ avaritiâ ac libidine apud suos ipsos sectatores solvebat famam, compulsusque est Romæ in castrum se condere. (a) Ad quem exturbandum Mathildis, ut Conradi regnum opum accessione firmaret, auctor huic fuit, ut affinitate se devineiret cum potentissimo Sicilia Comite Buamundi

(a) *Dodech. Ursper.*

mundi patruo Rogerio, filiámque ejus Iolantam secum matrimonio jungeret. Conradus etsi Iolantæ formam & indolem egregiam nosset, tamen purioris perfectiorisque vitæ studio excusabat exemplum tum Bullionij adhuc conjugio abstinentis, tum Mathildis ipsius in nuptijs intactæ. Ad ea cùm respondisset Mathildis, nuptias vel suis similes opportunas Conrado regnóque ejus fore, & Godefredo sacra expeditione perfuncto non defuturam conjugem, missi ad Rogerium oratores. Qui exemplo Romam misit ingentem pecuniæ vim & militum validam manum, filiam deinde missurus. Cum his auxilijs Urbanus, Mathildis, Conradus Gibertum Romæ invadunt. Ego quoque interfui cum Mathildanis copijs, quas huc adduco victrices. Quid enim multis verbis exequar relatam paucis diebus victoriam? Giberto Ravennam fugato Rex Conradus cum Mathilde venit ad me Pisas, quo advenerat Sicola virgo. Duxit eam maximâ pompâ Rex castissimus patrique adeò dissimilis animo & cor.

corpore, vix ut in ullam rem unquam consenserint. Iam summâ gloriâ regnat, & Mathildis cesso sponte regno vitam, etsi non regiam, proximam tamen majestate degit. Subinde Urbanus diras renovavit in Gibertum, & bello vestro supplementa decrevit. Mathildis tot in Europâ districta laboribus nunquam prætermisit studium promovendæ vestræ expeditionis in Asiâ. Ligures suos ac Tuscos hortatu jussûque permovit ad classes plures instruendas, quarum prima vobis ad Antiochiam adfuit, altera ad Hierosolymam, tertia Laodiceam appulsa, cujus classiarijs præire nunc jubeor, & vobis in Oriente Pontificis vice præficio vocatus in partem Argonautici vestri laboris. (a) Huic nec suum vellus aureum deesse passus est Hispaniæ Rex Alfonsus, ad quem Urbani jussu Legatus diverti. Ibi honorificè exceptus ab eo, magnificisque muneribus cultus accepi inter alia arietem aureum mirifici operis, attulique offerendum sacrorum Argonautarum prin-

(b) *Aquen.*

principi Godefredo. Hæc & hujusce-
 modi narrabat Balduino Theobertus;
 qui iisdem ferme diebus litteras à Ma-
 thilde accepit de rebus à discessu suo in
 Italia gestis. Urbanus objerat diem, ve-
 rè maximus Pontifex, dignusque tanto
 cognomine, vel si novum ab eo inci-
 peret. Suffectus erat Paschalis ejus ap-
 pellationis secundus. Quibus auditis
 Gibertus illud purgamentum urbis re-
 dire tanquam postliminio Romam at-
 que in sedem Pontificiam contenderat:
 sed Mathildis perpetua Ecclesiæ vindex
 obstiterat. Quæ cum tanquam feram
 indagine usque est insectata, donec in
 fuga sublatus est morte vitæ simillimâ,
 nullo pœnitentiæ indicio. Ossa ejus
 Ravennæ sepulta: sed cum Gibertini
 mentirentur emicare super ijs igneas fa-
 culas, velut sanctitatis indices, jussu Pa-
 schalis refossa sunt, & in profluentem
 abjecta. Ita nefario homini, qui do-
 minari voluerat in totum terrarum or-
 bem, terra defuit ad sepulcrum. Sic
 & constitit veritas prædictionibus tum
 Alexandri Pontificis, tum Anselmi Lu-
 censis

censis Episcopi; Gibertus GRAVES ULTRICI ECCLESIAE DEDIT POENAS, dedit & Henricus FEMINAE MANU. Cæsar ille, apud suos adeptus Magni cognomen, à Mathilde tantò majore victus in Italiâ, mox rursus in Germania profligatus, & à filiorum altero Henrico deponere diadema Cæsareum coactus Moguntia. Ita desertâ Pontificum observantiâ desertus ab utroque filio, odiosus omnibus, omnes habuit hostes nisi Gibertum, sed omnibus hostibus nocentior. Tandemque rerum omnium inopiâ, lentâ & fegni pœnitentiâ, & mœrore contabuit. Verùm jam redcamus in viam cum Theoberto, duobusque socijs heroibus Buamundo & Balduino. Mortis Valeriâ castris, maritimâ orâ petentes Hierosolymam vario sermone levabant animum. Nunc in Oriente acta memorabant, nunc agenda; imprimis tempus esse dicebat Theobertus, ut uxores sibi Godefredus Rex, Buamundusque Princeps eligerent. Nominabat deinde nobilissimas quasque feminarum nubilium,

lium, & in harum numero Mathildem & Constantiam, quòd Mathildis quidem cum Gueifone matrimonium nullo usu firmatum, Constantiæ autem cum Tricaffino consanguineo nullum, efferet. Sed colloquentium otium tristiffima fama turbavit. Ad Antipatridem accedebant, cùm auditione acceperunt, eam urbem à Rege Godefredo fuiffe nuper obfeffam, fed eventu, non, ut alibi adhuc, felici, fed funefto. Ibi enim nobilem illum & intimum Godefredo adolefcentem Gerardum atroci poft homines natos morte fublato, regémque ipfum captum nihilo mitioribus fupplicijs deftinari. Rei capita fingillatim narrabantur in hunc modum. (a) Godefredus victo ad Afcalonem Imperatore Saraceno intenderat animum ad firmandum inter hoftiles urbes regnum. Non ignarus, magnopere fuis rationibus con ducturum effe, fi in ora maris portum opere & præfidio validum teneret, Ioppen oppidum in proximo littore inftaurandum muniendúmque curavit. Vi-
 cinam

(a) *Aquen.*

cinam autem Saracenorum urbem Antipatridem, licet inexpugnabilis haberetur, magno animo instituit obsidere. Antipatridensium Regulus seu terrore, seu fallendi consilio sancivit cum Godofredo foedus promisso tributo, missisque obsidibus primariæ stirpis. Vicissim à Bullionio petijt obsidem aliquem è proceribus. Tantæ rei conficiendæ gratiâ quem mitteret Rex, deliberato erat opus. Plerique procerum confecto jam bello sacro reditum in Europam adorabant. Ab his invitabatur atque etiam urgebatur ad repetendam patriam Gerardus Avesnas, ut caram sororem Addam reviseret, amplamque possideret hereditatem, & Agnetem aut uxorem duceret, aut certè solaretur afflictam inclyti parentis Ribodimontij morte. Verum tenuit egregium adolescentem caritas & exemplum Regis Godofredi, dulcedoque Terræ sanctæ & studium rei Christianæ cum rege promovendæ. Sororis filio simul hereditatem suam, simul oblatis sibi Agnetis nuptias cessit. Cùmque rescijset Procerum aliquem

aliquem Antipatridem à Rege mittendum obsidem, ultro se obtulit, non ignarus periculi, sed contemptor. Stupere Principis adolescentis fide & excellentia animi Proceres abituri juxta mansurique, quòd patrij soli commodis præferret periculosam in Oriente provinciam. Nec maluisset perfidus Antipatridensis alium obsidem quàm Gerardum clarum legatione ad Imperatorem Saracenum, rerumque gestarum famâ, atque imprimis necessitudine Regis Godefredi. Huic aliisque Proceribus valedixit intrepidus. Cæterum ætatis quodam simplici amabilique candore, magis timuisse visus est cultui suo militari, quàm sibi. Nullus eo muniticii studiosior erat, nullus magis gaudebat præstantibus equis & armis. Parmâ utebatur pulchrè cælatâ, galeâ eleganter cristatâ, loricâ in puri argenti speciem splendoremque politâ. Vehabatur asturcone prævalenti & pulchritudinis raræ. Sub discessum arma sua & equum, ut barbarorum cupiditati periculòque subtraheret, Regi Godefredò

fredo reliquit & commendavit. Ita traditis utrimque obsidibus, postquam jam discesserant in patriam Robertus Normannus, Edgarus, Robertus Flander, petierátque Constantinopolim Raymundus, Antipatridenses obsides compertâ reliquorum regionum paucitate, fiducia sumptâ fugam intendunt ad regulum suum. Qui levatus metu non solùm eos recepit, & urbem patâmque pecuniam tradere Regi recusavit, sed & Gerardum retinuit, & vinculis oneravit sævitæ suæ victimam. Post paulò à barbaris occisum nunciatur Regi, qui desiderio, ac dolore amissi percarî capitis, irâque in Antipatridenses decernit nulli urbium, quas barbari præsidio teneant, fidendum, omnésque armis vel expugnandas, vel ad deditionem compellendas. Idque facturos se Rex, Procerésque jurarunt. Nominatim jurisiurandi religione se obstrinxerunt non passuros se, Antipatridem perfidam & crudelem urbem intra regni viscera inexpugnata sibi impunè illudere. Rex cum Eustachio

fratre,

fratre , sororio Montacuto , consanguineo Burgio & tribus armatorum millibus ad muros castra ponit, relicto Hierosolymis Prorege Anachoretâ cum reliquis. Præter paucitatem eo maxime laborabat, quòd navibus careret adversus maritimam urbem. Aderat quidem Vinemarus , qui Godefredum omni deinde vitâ, ut dignum erat, libertatis auctorem coluit, sed ejus classis fuerat ab Ascalonitano combusta. Erant Antipatride viri multi, bellicosi, omni telorum genere, atque imprimis conscientiam perfidiæ armati. Cæterum muri quati machinis cœpti. Rex ipse denunciat regulo, se bellum afferre eadem dextrâ armatâ, quam pacatam antè dederat. Cum multa castigatione perfidiæ docet , ut tot cladibus gentili-um suorum edoctus, tandem jusiurandum & Deum esse credat. Si urbem dedere cunctentur , & perjurio gaudere pergant, Deo magis irato , quàm se, bellum gesturos. Oppidani perfidi, sed quibus minùs etiam humanitatis, quam fidei erat, ægrè se tanti animi Regi re-

stituros armis arbitrati sunt. At excogitarunt immane, seque dignum defensionis genus ejusmodi. Nauticus malus ingens mediâ urbe jacebat opportunus atroci consilio, quo observato regulus jubet de captivis, quos tenebat carcere, Christianum adolescentem educi. Is malo supinus advolvitur, atque adnectitur manibus ac pedibus exporrectis in modum affixi cruci Servatoris. Dein Regem ad oppugnandos muros redeuntem vocant ad colloquium simul ac ferale spectaculum. (a) Godefredo accedenti obijcitur in erecto malo pendens miserabili habitu adolescens. Inexpectatâ atque atroci specie exhorruere Rex, Eustachius frater, proceresque alij, ac milites omnes. At immane quantum crevit horror stuporque, cum pendentis faciem intuiti sunt propius. Adolescentem, quem dudum sævitiâ barbarorum confectum putarant, & pro mortuo complorabant, vivum agnovere Gerardum Avesnatem, ab interitu servatum,

ut

(a) *Idem Aquen.*

ut interiret sæviùs. Quo visu Rex velut telo confixus ingemuit. Contrà exultantes. gaudio barbari, qui Godefredum illum hostium principem toties insidijs telisque appetitum, semper illæsum atque invictum ulcisci antehac non potuerant, nunc invenerant, qua parte vulneri pateret, & quo aditu cor ejus foderetur. Miserandus adolescens è summo malo oculos lacrymis suffusos circumferens agnovit ante signa Regem, ad quem conversus submissâ ad venerationem cervice in has voces erupit. Agnosce, maxime Ducum, militem tuum. Huc à te missus obses, deinde captivus in retro sarcere detentus à perfidis, nunc in conspectum tuum hoc ornatu proditor. Peto à te atque efflagito, ut mei misertus ne patiaris, ut insons, tibi que quondam non indignus benevolentia visus, atroci cruciatu occidam in oculis tuis, telisque tuis expositus. Rex simul dolore attonitus, simul anceps consilij restiterat tacitus. Reputabat nobilem adolescentem, quem secundum fratres & filij loco diligebat,

Vv 2 indole,

indole, fide, fortitudine eximium ideò à barbaris eo positu, habitúque sibi obiectum, ut ab oppugnandâ urbe, mittendisque telis metu confodiendi ejus avocaretur. At meminerat jurisiurandi religione se, sociósq̃ue teneri de barbarorum oppidis in potestatem redigendis. Inter quæ imprimis perfidiâ & sævitie infamem Antipatridem Gerardo obside detento, crudelitérque habitato, multandam excidio. Neque sperare poterat Rex, quod nec pretio quantovis, nec ulla arte obtinere potuit à Barbaris, ut adolescentem dimitterent. Hos autem post tot scelera, post obsidem carcere inclusum, malóque appensum, post crucem eo facinore ludificatam impunitos non relinqui, Christianæ rei summoperè intererat. Si impunè ferrent Antipatridenses tantum nefas, videbat secuturas exemplum cæteras urbes hostiles, & ad suam immunitatem usuros isto Christianorum captivorum supplicio, crucisque ludibrio. Ita pietate Christianorum tutas fore barbarorum impias urbes. Ingens ani-

mi luctatio erat. Hinc caritas dulcissimi capitis, inde iurisiurandi religio, sacrique regni dignitas atque incolumitas trahebant. Silentio defixus, & visceribus dolore convulsis talia secumolvebat. Itane te, Gerarde, amissum inveni, ut perderem? Ad hoc te barbari impijssimâ lenitate servarunt, ut nostris telis interires? Nec satis erat crudeles eos esse, nisi me invitum cogerent esse crudelem? Vicit demum in religiosissimo Rege privatam caritatem studium reipublicæ Christianæ. Vicit seipsum Rex, reliquis invictus, atque insuperabili animo formam Abrahami, filium Isaacum immolantis, expressit. Ita eum Gerardo respondisse, prodidit Aquensis Albertus. Mi Gerarde, sacri belli milles acerrime, tamen tuî miseratione pro meâ in te perpetuâ, paternâque caritate vehementer moveor, tamen abducere militem ab hac ulciscendâ sceleratâ urbe nefas est. Velim ex animo posse te barbaris eripi, sed vel si frater hic meus Eustachius fores, hac conditione liberari non posses, ut Antipatris

fui juris atque impunita maneat. Erige mentem ad servatorem Christum, cujus gloriæ nos, quotquot bellum sacrum profitemur, sanguinem, spiritumque devovimus. Si inter nostra tela, licet minimè in te dirigenda, objectus à barbaris agitatúsque figaris, tu vulnera, mortemque Christi causâ, ut ille quondam tuâ, sustinebis. Et tibi aliquando denique moriendum erit, & conducibilis in commune est, ut unus moriare, quàm ut decretum iusiurandumque nostrum omnium violetur, atque oppidum hoc semper in Christianos reliquos infestatione, insidijs, & cæde grassetur. Tu verò, si Christi Servatoris causâ sic præsentì vitâ defungare, Christo æternùm in cælo convives. Quamquam (addidit) neque hoc est mori, quandoquidem, ut ab amico Engelramo divinitus apparente dictum meministi, **NON MORIUNTUR, QUI IN OPERA CHRISTO NAVANDA FINIUNT VITAM;** sed cælesti palatio recepti, ut Engelramus & Anselmus, immortalì vita perfruuntur, æternisque delicijs. Gerardus

dus his erectus, lacrymis omissis, studio
 in rem Christianam, & fide in Chri-
 stum plenus, Regis amantissimi religio-
 nem & constantiam imitatus mori com-
 muni sacri regni causâ non renuit.
 Extremis precibus regem oravit, non ut
 milites suos à jactu telorum abstineret,
 sed ut curaret Gerardî sui morituri no-
 mine arma illa sua, quæ discedens Hie-
 rosolymis ipsi reliquerat, Dominico se-
 pulcro appendenda, equumque suum
 sepulcri custodibus donandum, monu-
 mentum suæ religionis & spei vitæ cæ-
 lestis. Post hæc Gerardus velut omni
 vitæ mortalis debito, & curâ liberatus
 cervicem, quam Regis veneratione fle-
 xerat, rejecit, & erectis in cælum ocu-
 lis mortem expectavit immotus. Inti-
 mos animorum sensus moverat constan-
 tia non solum Regis, sed etiam ad de-
 scentis eximij. Non est hîc ab ullo la-
 crymis temperatum. Ad ultimum
 postquam à toto exercitu tristi murmu-
 re Gerardus perſalutatus est, jussu Re-
 gis ab omnibus inter fletus arma non
 cunctanter expediri cœpta. Urbem a-

criter oppugnant : fundis , sagittis , machinis imperunt barbaros circumfufos Gerardo cui quisquis adftabat , malo appendiffe adolefcentem credebant. Strident circum tenerum corpus tela, dùmque omnia Gerardum ulciscuntur, quædam etiam figunt, objectantibus eum huc illuc barbaris, atque interim vociferantibus, impios Christianos effe, qui per latera fratris hostes impugnent. Inclamant quoque per ludibrium Regi, ne viêtricem toties manum parricidio fœdet: tortor filij effe definat, & faltem, fi infontem trucidatum velit, miniftrum supplicij mutet. E plurimis sagittis undique volantibus corpus Gerardi decem fixere. Cruore perfufum & asperum telis advertit Christiana multitudo, & multiplicem doloris fignificationem dedit. At tanto contumeliofius regi militibûsque exprobrabant barbari immitiores eos Saracenis effe: quippe cruci fe funibus alligaffe hostem, at ipfos fratrem cruci telis fixiffe. Inter hæc incredibile dictu effe Regem tantâ in Gerardum caritate, tamen animo in-

fra-

fractum, in eo habitu oris, in quem se religione composuerat, durasse. Qui ut de vitâ Gerardi sui actum esse vidit, tantò deinde majore impetu pugnavit; ut appareret, quàm magna interim pars virium esset dolor. Et milites exemplo Regis licèt necem nobilissimi adolescentis deflerent, tamen instabant acriter hostibus, maximè ex turri lignèâ vasti suspectûs, tribus tabulatis, toridèmq; pugnantium stationibus distinctâ. Cæterùm pervicaces Antipatridenses turrim telis & missilibus ignibus petitam, tandèmq; incensam deturbavere cum quinquaginta, qui inerant, viris. Reliqui deterriti, ab oppugnatione refugiunt dolore amissi Gerardi, & malè gestæ rei pudore. Ut jam relederat pugnandi impetus, silentium subito ortum, & tacita cogitatio, quidnam egissent. Pœnitebat ardorem vincendi plus valuisse, quàm rationem caritatis in fratrem. Rege ad repetendam aggressionem hortante resistentes fortunam conversam horrebant, inauspica-

spicatum cœsentes imperium revocantis ad ea mœnia , ubi fraternum sanguinem fudissent. Rex ubi ab tanto impetu cœptâ re consternationem militum animadvertit , & causam negati à superis in præsens successûs altiùs investigat secum ; hanc non esse , quòd Gerardum confixerint , sed aliam , apprehendit. Tum militem sic ab eo increpitum legimus. Ah miseri , cœcique , quid causæ esse dicam , cur ex fortibus segnes , ex magnanimis timidi nunc pericula vitæ formidetis ? Cur ex Europâ relictis patrijs ædibus ac propinquis huc venistis , nisi ut ad mortem usque pro Christi causâ , pro rei Christianæ tutelâ , fratrumque libertate , pugnetis ? Nempe subest causa timiditatis , eaque non alia , quàm mens delictis obnoxia. Superfunt inter vos contacti pristinâ noxâ turpium amorum , quibus effeminarunt animos. Agitedum , milites , deponite fœdam voluntatem , pœniteat vos turpitudinis toties nobis hâc expediti ne nocentis. Placate sic vobis , & conciliate Deum , cujus ope destituri nihil ;

hil : fulti verò, potestis omnia. Vir summus, cujus innocentia Oriens vi-
 ctorias, & victor exercitus innocentiam
 debuit, verbis castigatos milites ita vul-
 tus animique constantia movit, ut no-
 xarum poenitentia, eum, qui resederat,
 excitarent, & innovarent ardorem.
 Mox reparare machinas instituunt.
 Ipse verò Rex quàm procul haberet illas
 timiditatis, & imbecillitatis causas, quas
 in milite arguerat, perpetuo castimo-
 nia documento probavit. Addidit
 singulare cā obsidione specimen mode-
 stia. Dum reparantur machinae, Re-
 guli ex Samariae montibus in castra ve-
 nerant, magnopere petentes Regem vi-
 dere, regique tabernaculi splendorem.
 Intrò admissos ingens admiratio cepit.
 Non vestibulum satellites magnificè ar-
 mati opplebant, non copiarum duces
 stipabant Regem. Corporis custodi-
 bus pabulatum amissis, perpauci ad-
 erant alij. Ipse Rex cultu, curaque cor-
 poris haud multum supra militis mo-
 dum eminebat. Non ille folio aurato;
 sed humi super saccum stramine factum
 con-

confederat. Regulis interrogantibus, cur tanti nominis Rex, qui Occidente egressus Orientem armis concusserat, tanto regno totque ditatus spolijs, non pretiosius federet, respondit Godefredus digno se verbo, terram pro sede sufficere debere homini mortali, cui mortuo domicilium perpetuum præbitura esset. Quæ vox, & statim excepta à stupentibus, & postea per orbem multo sermone celebrata est. Fuitque de regulis illis unus, qui prædicare non dubitaret, Principem eâ indole non modò parto Palæstinæ regno dignum, sed orbis imperio. Et verò Godefredus, tot tantisque nuper spolijs Imperatoris Ægyptij potitus, aulam & solium sibi regiâ magnificentiâ instruere potuerat, nisi omnia præter virtutem contemneret. Omnium victor, omnium inops erat. Nempe solitus totâ expeditione prædam in milites dividere, sibi nihil opum, gloriæ longè plurimum (licet ne id quidem ageret) pepererat. Refectis interim machinis instauratur murorum oppugnatio. Verùm Anti-

patri-

patridentium perfidiæ, ac sævitæ par
 pertinacia fuit. Ob hanc atque hiemis
 incommoda adulto jam Decembri Rex
 recedere cogitur, relicta in proximo
 suorum manu, quæ oppidanos exitu
 portarum, & commeatu prohiberet,
 donec rediret ipse caro Gerardo paren-
 taturus urbis excidio. Petentibus Hie-
 rosolymam insidiabantur infesti illi, de
 quibus supra meminimus, Æthiopes,
 ex antro subterraneo inobservati impe-
 tum in viatores facere, cæsos spoliare,
 captosve abstrahere, & subito in caver-
 nam suam refugere soliti. Et mox fa-
 ma percrebuit Godefredum Regem op-
 pressum insidijs, abductumque capti-
 vum. Quæ subita calamitas cum enar-
 rata esset accedentibus ad Antipatridem
 Theoberto, Buamundo, Balduinoque,
 nec latuisset militem, dolore amissi
 Gerardi, Regisque periculo totum per-
 culsum agmen gemitu querelisque per-
 sonuit. Mox tristi silentio torpuerunt,
 ad cogitationes, quid Rege, quid se fu-
 turum esset, mœrore cujusque converso.
 Perturbabat Theobertum Archiepisco-
 pum

pum captivitas Godefredi, quem singulariter, & mirabatur, & diligebat tum suâ ipsius animi propensione, tum Mathildis causâ, cui impensè dolituram sciebat calamitatem illius Principis, quo nihil fortius, aut sanctius; ut non unus homo, sed fortitudo ipsa, omnesque virtutes in uno homine viderentur adisse periculum. Reputabat cum Balduino & Buamundo, quantum esset timendum optimo Regum à sævissimis hostibus: documento esse Gerardi supplicium, funestamque mortem; sed Regi tantò funestiora esse timenda, quàm Gerardo, quantò domitorem illum suum magis odissent. Nec apparerebat, quâ ratione liberari posset, variâque consultatione curam distrinxerant. Principiò visum erat tristi magnanimoque Buamundo, jam se rivalem oblito, evocari oportere illicò Hierosolymitanas copias, junctisque omnibus regni viribus tyrannos obterendos. Sed hæc primo impetu agitati Theobertus sollicitus cædem Gerardi revocavit in mentem, & monuit, si locus, in quo
Rex

Rex captivus tenebatur, infestis armis peteretur, tutaturos se barbaros eodem, quo Antipatridenses, defensionis genere, objecturósque telis Regem. Iam si redimere tentarent, quod potiùs Balduino visum scribit in Alexiade Comnena, quodnam pretium redimendo tanto Regi vel suffecturum, vel admitendum à Tyranno Amerinâ, nisi Hierosolyma, totúmque sacrum Regnum restitueretur? Id petiturum illum, nec tamen eo pretio redimi se passurum religiosissimum Regem, præoptaturúmque mori cum Gerardo, quàm suâ causâ Christianam rem Orientis tanto labore partam detrimento affici, nedum pessundari. Cùm omnes in eo virtutes, tum mortis perpetuam contempTIONEM eluxisse. In prælijs, in urbium oppugnationibus viliores ipsi suam salutem, quàm suorum semper fuisse. Vel illud documento esse, quòd ad Antiochiam Pisidiæ peditis pauperis liberândi causâ ursum in se vertisset, fauciusque pro mortuo fuisset deploratus. Inter has mœstissimas sollicitudines

con-

consilij inopes Hierosolymam pervenire festinabant, cùm audire à quam infesti essent eò tendentibus Æthiopes Azoparti, qui inter deserta loca ad Ascalonem versâ in antris subterraneis latebant. An ab ijs Rex captus, & quò ductus esset, erat incompertum. Cæterùm incidit impetus Balduino cavernam scrutandi, pestemque illam seu vi, seu arte tollendi, & prædâ exuendi: quod quia paulò post facere aggressus est, obiter hîc referam. Obsedit cum exercitu cava illâ Æthiopum; sed contra quæ nihil tela, nihil bellicæ machinæ poruere. Latebra subterranea labyrintho perplexior, cæcis meatibus investigabilis erat. Flammâ immissâ experitur, an elici æstu, fumoque dirilatrones possint. Duo tantùm egressi horridâ facie. Benignè exceptos Balduinus pretiosâ veste exornandos curat; de gente ipsorum, de familiâ, vivendique genere somiter interrogat. Humanitate, & clementiâ ejus capti rogant, ut redire in antrum ad socios liceat docendos, quâ benignitate ex-

cepti

cepti sint. Uni permissum, alter clam socio obtruncatus. Ille reversus vestem acceptam ostentans popularibus, ex ijs decem spe similium donorum illectos secum ad Balduinum reducit, qui iidem omnes clam è medio sublati præter unum. Superstes necis sociorum ignarus, pretiosèque vestitus, alios allicit triginta. Quorum itidem trigessimus ex omnibus servatus adducit è latebrâ ducentos, ac tricenos, qui retulerunt nullos in antro præter feminas ac pueros superesse. Feminae, viris non redeuntibus, nempe ad unum cæsis, egredi non ausæ, fumo elicitæ sunt, & partim interemptæ, partim venditæ. Subinde ingressus Christianus miles. Neminem invenere captivum, at cum ingenti prædâ ad Balduinum rediere. Nondum rescitum erat, quo loco Rex detineretur: at auditum denique, Principem Christianum quendam ductum Ascalonem, magno gaudio exceptum ab urbis Præfecto Gemelmucho, summæque curâ custodiri. Quo comperto non est relictus locus dubitandi, quin

X x is

is Princeps Rex esset, cum de cæteris Christianis proceribus, quo loco quisque esset, non ignoraretur. Rursus lugubres totis castris edidere questus. Validissimâ in urbe custodiri Regem, eique liberando jam arma inutilia esse. Invenisse barbaros rationem moenia rutandi captivorum corporibus. Se eò calamitatis adductos, ut certum periculum sit, ne Regem, si liberare contendant, armis ipsi confodiant. Itâ Principem immortalibus editis operibus esse proditum à fortunâ. Antè favisse superos, nunc nullam calamitatem hâc, quâ affecti sint, graviolem ab irato Deo inferri potuisse. Godefredum modò Hierosolymæ expugnatorem & regem extitisse Virginis Matris ope: (a) hujus enim beneficij Mariani testem speciem Idæ Godefredi parenti nuper Bononiæ Belgiæ divinitus objectam, nuntiabatur: at regiæ fortunæ ornamenta nihil aliud ei fuisse quàm funeris pompam. Ad hæc ereptum sibi nullis relictis liberis in regnum successuris. Cùmque de uxore

(a) *Hist. Morinor.*

uxore in malorum remedium ei iungendâ consultaretur, exortâ subito funestâ nebulâ sublatum ex oculis. Civile dein bellum ex cupidine regnandi secuturum, mentibus augurabantur. Æmulos imperij proceres Balduinum, & Buamundum, inter se antè discordes, vetera renovaturos odia, & distracturos publicas vires. Christianos milites non jam de regno Palæstinæ, sed de rege pugnatos, mutuîsque vulneribus celebraturos Godefredo magnos funebres ludos. Hæc inter gemitus lacrymasque volventibus, & Hierosolymam, ubi de rerum summâ deliberaretur, contendere pergentibus, adducuntur ab exploratoribus peregrinatores duo. Qui cùm dicerent se ex Ægypto venire, ad proceres perducuntur interrogandi, numquid de Rege rescijssent. Agnovit Balduinus Isaacum nobilem Belgam Arturûmque filium sacræ militiæ nuper socios, & Godefredum ex Europâ secutos, captos verò ad Hierosolymam & pro mortuis deploratos. Erat Isaacus dominus castrî ad Nivigellam, quod

hodieque Nemus Domini Isaaci nominatur, ita dictum, quod ejus pomerium arboribus frequens esset. (a) Isaac narratione mirificâ moram interposuit Balduini, sociorumque morori. Agebat se ac filium, dum obsessâ Hierosolymâ pabulatum vadunt, captos à Saracenis, & in Ægyptum abductos, datosque in arctam custodiam. In ijs ærûmnis gementi sibi nihil consultius visum, quàm ut animum spemque converteret ad benignissimam Dei Matrem, memor iconis ejus, quam arboris cavo propter castrum suum indiderat. Per noctem sequentem adfuisse adspectabilem sibi in quiete Virginem, & arguisse de incuriâ, quod iconem ipsius ac filij reliquisset in arbore imbribus & ventis expositam. Se subito expergefatum ad pedes magnæ Virginis procubuisse, veniamque precatum, ac pollicitum, si ejus ope vinculis evaderet, reducem liberatrici conditurum sacram ædem, quâ tegeretur ejus effigies. Mirum dictu. Manè se ac filium vinculis solutos,

(a) *Hist. monast.*

solutos, patefactumque carcerem vidisse. Ergo egressum cum eo patriam reperere voti reum, exolvendique percupidum. Atque à Balduino, cæterisque auditoribus magnæ Matri grates, postulatūque par auxilium Regi, (a) ut qui Virginis iconem Antuerpianam, quam ad Stipitem vocant, item Bononicam singulari honore coluerat, quique ejus Virginis ope victorias & regnum adeptus erat, ejusdem subsidio consequeretur libertatem. Inter hæc vota magnasque curas præmissus est cursor Hierosolymam, qui Eustachio regis fratri adventum Pisani Archiepiscopi, Buamundi, Balduinique nunciaret. (b) Eustachium enim nondum in Belgieam reversum audierant. Appropinquantes urbi, vident effundi obvium agmen. Proceres, milites, sacri ordinis viri cum pompâ hilaritatem suam gestibus, canticisque prodebant. Quorum unus concitato equo ad Balduinum procurrat vultu maximæ lætitiæ præferens notas. Cui Balduinus,

X x 3 quid

(a) *Tabula Bruxell.* (b) *Malmesb.*

quid mihi, inquit, nunciaturus es tanto gaudio dignum, nisi fortè Rex salvus est, & liberatus; Ille renidens, saluum esse dixit. sed non liberatum: qui nempe captus non fuisset. Rumorem de cohostium fraude vulgatum, fortè per occasionem alicujus detenti Ascalone captivi. Balduino ac socijs ex mœrore recreatis, & subito gaudio stupentibus supervenit ad portam Rex ipse cum Eustachio fratre, Tancredo, Anachoretâ, Montacuto, Burgio, aliisque primoribus. Rex Archiepiscopum Theobertum in Italiâ apud Urbanum Mathildemque visum agnovit, veneratûsque interrogavit, quî Mathildis haberet. Pontificem rescierat ad superos excessisse. Theobertus respondit, ut tu, Princeps, in Oriente, sic illa in Occidente vincit; debetque tantum Mathildi Roma, quantum Hierosolyma Godefredo. Consultò abstinuit Antistes appellatione Regis, quam Godefredi non ferebat modestia, nihil ambitioni regum permittentis, nisi regni curam. Tum Godefredus Buamundum ac Balduinum com-

ple

plectitur, illi exinde Eustachium ac Tancredum carosque alios passis brachijs invadunt. Interim Rex Isaacum (de quo per eursorem audierat) venerantem amicissimè excepit, atque arridens, en, inquit, ego Magnæ Virgini liberatrici, perinde ac tu, debeo, immò plusquam tu, cum plus beneficij sit captum non fuisse, quàm captivitate liberatum. Urbem ingressi inter acclamations plaususque civium in Dominici sepulcri templum perducuntur pij hospites, ubi pariter omnes Deum suorum assertorem Divamque liberatricem venerantur. Hæc appensa ex voto ad sacrum sepulcrum arma Gerardi Avesnatis fortissimi adolescentis ab rege ostensa hospitibus, addente hoc esse, quod superesset de tanto milite; jacere apud barbaros sine nomine carum corpus. Iam elicitura erant visa arma lacrymas & dici gaudio mixtura tristitiam, nisi Rex eximio constantiæ exemplo avertisset omnes à spectaculo, & consolatus esset Engelrami illo cælesti apophthegmate, NON MORI EOS, QUI IN OPERA CHRI-

STO NAVANDA FINIUNT VITAM. E-

gressi templo hospites, sensim integratâ lætitiâ, in regiam perducuntur, ubi de mutuis rebus gestis & periculis ultro citroque narratum, & observatus in ijs identidem, & laudatus cælestis favor. Quæsitum de causa vulgaræ captivitatis regis. Censebant quidam occasionem rumori dedisse eum, quisquis captus Ascalonémque ductus ferebatur. Sed ambigebatur, quis procerum Christianorum is esse posset, quis tantus, qui pro Rege haberetur. Hugonem, Edgarum, Robertos vela fecisse in Europam: reliquos proceres adesse salvos, præter eos, quos gloriosâ morte functos Deus cælo transcripserat. Omissa Gerardi mentio, ne rursus interturbaret lætitiâ. Ergo existimabant quidam, id quoque finxisse hostes captivum aliquem esse. Verùm cum alijs non videretur de eo ambigi posse, decrevit Rex mittere, qui rem explorarent. Narra-
vit Theobertus Antistes Regi (ut antè Balduino) præclara Mathildis Conradique facta bello Pontificio, Henrici
fugam,

fugam, Giberti exitium, Siculæ Iolan-
 tæ cum Conrado conjugium, Augustæ
 Praxedis reditum in patriam, & felicem
 inter sacras virgines vitam. Addidit iter
 suum in Hispaniam, Hispani regis victori-
 as Syriacis similes, donumque ab eo sacræ
 expeditionis auctori destinatum. Nunc
 quando Urbanus ille Apostolicus Heroïci
 belli auctor animam cælo dignam exhal-
 rat, id regium donum non alteri congruere
 aut esse offerendum, quàm heroïci bel-
 li principi atque imperatori, sacrique
 regni moderatori Godefredo. Sub
 hæc munus rege mittente dignum & ad-
 mittente præbet, arietem crispantibus
 villis rutilum, cornibus unguisq; vi-
 brantem, auro solido mollissimè con-
 formatum. Ipsum metallum, quan-
 tum naturæ ratio patiebatur, totum
 cecidisse in vellus ac formam vivi arietis
 diceres. Theobertus donum his ver-
 bis ornavit : fuisse consentaneum, ut
 vellus aureum principi expeditionis
 Argonauticæ majoris non deesset. Ad-
 jecit Balduinus, optandum quoque, ut
 nec hujus expeditionis duci deesset
 conjux.

conjux. Subrisit Godefredus, cùmque parumper secessisset cum Theoberto remotis arbitris de Mathilde locuturus, Balduinus aliique proceres illatum de sponsâ regia sermonem continuavere, Petro Anachoretâ, qui arcani regij conscius videbatur, identidem jocante, cùm diceret, sacro Argonautarum Principi, si Iason esset, cavendum à Medeâ; sin potius Hercules, declinandum ab Omphale, quæ virum effeminet. Quare si cui jungendus sit, non alteri jungendum, quàm Amazoni. Theobertus quoque ex suâ procerumque sententiâ id magnopere Regi perpendendum esse dicebat, quanti esset ipsum & salvum esse, & habere ex se genitos, qui in regnum succederent. Cogitaret, quid turbationis & calamitatis rei Christianæ eventurum fuisset, si is ereptus nullis relictis liberis foret. Igitur ut conjugem duceret, ei magnopere auctor erat. Ita Mathildem Urbani Pontificis hortatu nupsisse Guelphi: ita Mathilde auctore Conradum matrimonio junctum Iolantæ. Regias esse

esse principes dotibus omnibus florentes, quæ tanti Principis thalamo gloriaturæ sint. Imprimis Regum filias occurrere, Francam Constantiam, & Scotam Mariam, ut de alijs taceatur cæteróqui præclaris, Helenâ Buamundi sorore, Morfiâ Meleteniæ Ducis filiâ, Floriâ sorore Corbagathi. Non fuisse quidem Godefredo digniorem conjugem quàm Mathildem, si nihil obstarret. Sed eam bis nuptam caruisse liberis: sacri autem regni interesse moderatori suo non tam uxorem esse, quàm liberos. Esto: supremâ auctoritate & gravissimâ illa causâ, ut sacro regno de heredibus consulatur, Mathildis cum Guelfone matrimonium, utroque volente, dissolvi possit, quia contractum tantum, non usu firmatum; at frustra id futurum, si Mathildis pudicitix proposito semper liberis caritura sit. Respondit Rex sibi omnino cordi esse ac fore, ne regni successores desint. Cæterum mentem de matrimonio adhuc celabat. Id tamen sciebatur satis, statuisse coronam auream

am ac regalem, quâ ipse uti noluerat, capiti dilecto transmittere. Neque est ignoratum, destinatum ei virgini, quam regio amore dignissimam rex censeret. Cum retulisset Theobertus Balduino, Buamundo, & Eustachio, quid regi suavisset, quid tulisset responsi; actumque inter ipsos esse de principibus quibusque feminis, imprimis de Francâ Constantiâ & Scotâ Mariâ, Buamundus motum animi dissimulavit in præsens; at indignè & ægerrimè tulit, agi de Constantiâ, quam nulli mortalium erat cessurus nisi ereptâ sibi vitâ. Et Eustachius Mariam flagrantissimè diligebat, non cessurus alteri quàm fratri, neque huic sine ingenti dolore. At non desperabat, Godefredum aliam electurum. Regis menti paulò magis cognoscendæ hæc occasio se præbuit. Dum Buamundus, atque Eustachius de dilectis matronis sollicitudine distinguuntur, Rex cum Balduino, aliisque proceribus consultabat de Ascalonitano (quisquis erat) captivo, quâ ratione liberari posset. Hæc res implicata
since-

sinceram lætitiā esse non sinebat, e-
 ratque prius expedienda, quā aggre-
 dienda altera. Captivum hostibus pos-
 se armis eripi tantum non desperabant,
 recurrente perpetuò acerbā memoriā
 crudelis mortis Gerardi Avesnatis, cu-
 jus desiderio Rex tamen adversus do-
 lorem invicto animo esset, tamen pa-
 tiebatur ingentem, quoties meminerat,
 se adolescentem illum caritate filium,
 velut alterum Isaacum, ferro petiisse;
 sed heu dispari exitu, quando Isaacus
 ereptus fuerat morti, Gerardus occide-
 rat. Dum eā de re exploratores Asca-
 lone expectantur, ecce nuncij non læti
 magis quā admirabiles. Præfectum
 Ascalonis, aliōsque Satrapas Saracenos,
 postquam cognoverant portum, ur-
 bēque Ioppen à Godefredo Rege re-
 stauratam, timor ingens, ac sollicitudo
 subjerat, ne viribus Christianorum per-
 mare commodè adventuris facile sub-
 jugarentur ipsi commoditate portus ex-
 clusi. Inde ad Godefredum alij super
 alios legati advenere. Prima Præfecti
 Ascalonis legatio fuit, eaque in paucis
 ma-

magnifica. Viri instructu exquisito longo agmine munera pretiosissima afferebant, sed inter quos adolescens equo præstanti vectus enitebat dignitate oris, & corporis habitu. Nec alium magis honestabat opulentiaë barbaræ cultus. Illi aureus torques, & ex hoc ensis gemmeâ vaginâ suspensus. Illi vestis auro purpurâque distincta, manicæ margaritis internitentibus adornatæ, tegmen capitis versicolore fasciarum instructu, gemmarumque candore interstinctum. Supra cætera vultus elegans, & qui virginis esset. Stabat Rex in aula proceribus circumfusis oratores in conspectum admissurus; inter quos ut observavit faciem ejus, quem dixi, adolescentis, obstupuit. Cumque propius accedentem agnoscere videretur, suis oculis non credebat. Omnes pariter Christianos proceres in ejus obtutu fixos idem stupor oppresserat. Avesnati Gerardo, quem Antipatride decem sagittis fixum viderant, mortuumque deplorarant, toto ore simillimus erat. Regi incidit dubitatio

Ge.

rardúsne, an ejus mortui species obij-
 ceretur oculis, quemadmodum Engel-
 ramus vitâ functus amico Ribodimon-
 tio se spectandum præbuerat, illámque
 æternâ memoriâ dignam vocem pro-
 tulerat NON MORI EOS, QUI IN NA-
 VANDA CHRISTO OPERA FINIUNT VI-
 TAM. Verùm jam in hoc adolescente
 nullum ludibrium oculorum appare-
 bat. Vigor, qui constat ex spiritu,
 non destituerat vultum. Cúmque af-
 fusus esset genibus Regis, nec manum
 erigentis, non brachia amplexantis elu-
 sit. Princeps legationis animadverso
 illo, quem expectarat, Godefredi stu-
 pore lætus, ad te, Rex, inquit, mitti-
 mur à præfecto Ascalonis, muneráque,
 & tributum afferimus; sed haud dubiè
 pretiosissimum, tibique gratissimum
 munus futurum est adolescens, quem
 meritâ cum admiratione intueris. Ge-
 rardus ille est obses tuus, qui, quod
 nescijsti, de malo depositus ab Antipa-
 tridenſibus spirans adhuc inventus est,
 & deinde præfecto Ascalonis missus.
 Qui sedulò curatum eo, quo vides, or-

natu

natu remittit ad te, & valde petit, ut & munera sua æqui bonique consulas, & cum eo non modò pacem, sed & amicitiam jungas. Suo, & vicinorum Satraparum nomine tributum tibi offert, quindecim millium nummum in singulos menses pensionibus describendorum, ut tuà amicitia & Ioppensis portus commoditate frui liceat. Suadere tibi videtur, quæ nihilo minùs ad rem Christianam, quàm Saracenam pertinent; quandoquidem hoc fœdere omnium circà finitimorum animos junxeris, tibi que omnes feceris vectigales. Rex oratoribus benignè, atque ex eorum voto, sed propter stuporem paucis respondit. Quibus dimissis rursus ad Gerardum convertitur ingenti lætitiâ. Hunc intuens, vixque lacrymis temperans se in illius collum projecit, paulumque cunctatus, ne vox abiret à majestate, an te, inquit, teneo, non tuos manes, mi Gerarde; Tunc es innocens illa victima à me devota, & instar Isaaci crepta morti? Hoc erat, quòd ferebar captivus; tu, hoc est, alter ego, custo-

custodiâ tenebaris. Mi Gerarde; hærebit æternum orbis memoriæ, quod appensus malo miles Christi eximius pro re Christianâ mori non dubitasti, moriturusque te Christo, arma & equum Christi sepulcro dicasti. Tibi reddantur arma jam Dominici sepulcri contactu sacrata. Reddatur equus religioso testamento tuo supra quadrupedes omnes nobilitatus. Ego verò quid rependam meritissimo capiti? Qui te, velut Isaacum Abrahamus, morti devoveram, cùm te nunc, ut illum pater, receperim vivum, in ejus rei monumentum, & clarissimi certaminis tui qualecunque præmium (a) tibi sacri Regni jure beneficiario castrum, quod ad sanctum Abrahamum nominant, & ejusdem Regni beneficium selibrarum centum dono, atque in perpetuum testis hac procerum coronâ ex animo largior. Respondit ad hæc modestè juxta, venusteque Gerardus: deinde in aliorum procerum expectantium brachia transmissus est. Quo perſalutato ab

Y y

omni-

(a) *Aquen.*

omnibus, bene est, inquit Rex, & auspicate, quòd nobilem adolescentem vivum recepi, jam ter opinione mortuum. Tum versus ad proceres, ac subridens: Quid mihi, amici, inquit, liberos deesse querimini, qui vos habeo incolumes, & patriâ caritate complector, cuique magna Virgo favens captos restituit, suscitâtque demortuos? Ex his non potest vobis deesse Rex tantis viris dignus. Urgentibus tamen Theoberto, Balduino, Eustachio, & jam etiam Gerardo, ut Regno certiùs prospiceret, &, quod decrevisse eum audierant, coronam regiam electæ ex omnibus virgini transmitteret, pollicitus est, omnino se facturum. Iam instabat tempus, quo Buamundo redeundum erat Antiochiam, & proceribus alijs aliò. Antè Godefredi regis voluntate, Patriarcha Hierosolymorum renunciatus atque inauguratus vir spectatissimus Theobertus. Ab hoc deinde Godefredus in Hierosolymitani regni & Buamundus in principatûs Antiocheni possessionem ritè missi. Dominico

nico Natali religiosè peracto proceres
 tum discessuri, tum mansuri cum rege
 privatis quisque negotijs dant operam.
 Magna res agitabatur à Godefredo, pro
 qua statuenda tempus sumpserat, ut se-
 cum & cum Anachoreta Petro delibe-
 raret. Qui ut eò studiosiùs ac matu-
 riùs de ducendâ uxore decerneret, Ge-
 rardus Regi regnóque addictissimus
 permovit omnes secum apud eum man-
 suos, ut jurati assererent se ad regni
 successionem nunquam admissuros
 quemquam, nisi Bullionij sanguinis.
 Interim magnis anxius curis Buamun-
 dus multa versabat animo colloquens
 cum Tancredo. Optasset Godefredo
 regi nubere Helenam sororem suam
 vel hujus causâ, vel suâ. Sed audierat
 Helenam ad patrum Rogerium ab
 Alexio dimissam, nupturâque Hun-
 gariz Principi. Nunc non dubitabat,
 quin Rex alteram ex regijs duabus
 Principibus petiturus esset conjugem,
 Francam, aut Scoram. Floriam enim
 Corbagathi sororem, licet Christiana
 sacra capeſſat, certè gente Turcam cur

præferret Christianis? Mathildem haud dubiè reliquis prælaturum fuisse, si nihil obstaret. At licèt Pontificiâ auctoritate matrimonium ejus cum Guelfone, quia usûs expers, dissolvi posset; tamen ab Amazone vel ætate, vel pudicitia proposito infecundâ sperari non posse regni hæredes. Iam duarum Franciæ regis filiarum utramvis peteret Godefredus, ducere eum, enimvero negabat se passurum Buamundus, qui Constantiam sibi, Cæciliam Tancredo destinasset. At Cæciliam ex Bertrada genitam non esse, cur ingenuæ Constantiæ præoptet Godefredus. Ergo sibi de hac cum illo magno rivali subeundum esse certamen. Scotam enim Mariam ab Eustachio amari non dubijs indicijs sibi compertum. Hanc autem fratri à fratre ereptum iri, non esse verisimile. Adhæc adesse fratrem alterum Balduinum, qui Eustachio patrocinator sit vel caritate in germanum, vel æmulatione in Tancredum patruumque Buamundum, quibus & quondam adversatus sit, & numquam satis æquus fuerit.

fuërit. Itaque Regem tum suâ, tum fratrum voluntate petiturum Constantiam. De hac eò majori erat in metu ac sollicitudine Buamundus, quòd Hugonem Magnum Godefredo intum audierat ex Franciâ redire in Orientem, amico Bullionio conciliatâ jam fortè Constantiâ. Parte aliâ Eustachius magnis & ipse motibus æstuabat, sed alijs ex argumentis quàm Buamundus, atque adeò contrarijs. Cogitabat Regem Godefredum animo æquo esse in ipsos æmulos suos adductum non timore quidem ullo, sed moderatione Christiana. Vel ideo non obstaturum amoribus Buamundi, ne hic rem Christianam in Oriente turbaret. Scotam ergo Mariam à Rege petitum iri, consequens erat, præsertim tantæ indolis virginem, sanctæque reginæ filiam. Hac de causâ Eustachij animum distrahebat hinc cara virgo, inde carus Rex frater, quorum utrique operam, vitamque devoverat. Inter amorem in Mariam & caritatem in Godefredum suspensus, ac veluti divisus secum ipse

pugnabat alternatione violentâ. Infelicem se censebat, si Mariam amitteret, at impium, si non cederet Regi. Huic ergo cedere decrevit; vel si mœrore ipse confici debeat. Tanti certaminis, quod Eustachij versaverat animum, tamque generosæ de se victoriæ confcios Balduinum & Gerardum ingens admiratio pariter ac miseratio ceperat. Interim de Regis consilio, nihildum certi procures colligere potuerant vel ex ejus verbis, vel Anachoretæ, qui fidem regij secreti religiosè servabat. In eventum ingentis, diuque expectatæ rei non modò Buamundus, Eustachius aliique procures animo intendebantur, sed eodem deditæ mentes universi orbis, cujus theatrum erat eâ tempestate Hierosolyma. Hîc Rex claro excellôque loco quotidie aliud alio insignius edebat spectaculum: verùm tunc regia virtus in uno capite exemplum omne complexa illustre in omnes partes documentum præbuit omnibus terris. Buamundus sollicitus, quid statueret Rex, ad eum adiit per causam
valc.

valedicendi, re verâ ut exploraret ejus mentem : at nihil à Rege de hac exprimere potuit. Cùmque Godefredus se nondum valedicere respondisset, aliàs & opportunius id facturum; abscessit Buamundus eo silentio minimè lætus, & obregi consultò ratus ab rege, quod rivali displiciturum sciret. Ergo domum reversus juvenis ardentis animi jubet arma, equos expediri, omniâque præsto esse vel ad discessum, vel ad pugnam. Inter hæc monetur à Tancredo, regem quoque armari, & itineri se accingere cum fratribus; (a) peteréque à Buamundo, sic iter moderetur, ut ad Iordanem pridie Regalium inter se conveniant. Hoc deerat ignominia mex, subjecit acriter Buamundus, ut ille me ultro provocaret, & pugnae locum diémque condiceret. Non satis erat, si mihi Constantiam præripere contenderet, nisi & præriperet provocationis decus. Simul in equum insilit, jubetque sequi suos & cum ijs iter intendit ad Iordanem. Eodem,

Y y 4 fed

(a) *Aquen. an.* 1100.

sed aliâ viâ, profectus Rex, instructus
& ipse pedestribus equestribusque co-
pijs. Abest Iordanes decimo ab Hie-
rosolyma lapide fluvius Christi baptis-
mate nobilitatus, & toto orbe celebrer.
Ad Libani montis radices oritur gemi-
nis fontibus; Ior alter, alter Dan voca-
tatus, qui confluentes Iordani nomen
indidere. Leni tractu infusus primùm
lacui Samachonitæ, dein marî Tiberia-
dis, utrumque permeat. Exinde lon-
gissimo cursu limpidas ac sapidas agit
undas, quoad has & nomen amittit
haustus Asphaltite lacu. Ripa amœna
ac patens, nisi quâ fluviatili arbore in-
umbratur. Is locus ultimæ procerum
congressioni destinatus erat, & dete-
gendò arcano regio. Eò tendens Rex
præibat agmini, & cum Petro Anacho-
retâ præsertim per viam de occulto con-
silio suo conferebat. Restabat hîc
exantlandus Herculi Christiano labor
postremus & summus. Vincere debe-
bat non jam aliquam immanem bellu-
am, non Gigantæ molis hostem, aut
objectam muro barbarorum aciem, sed
fortius

fortius his omnibus aliquid, seipsum. Neque satis erat victoriæ interioris genus aliquod auditum, quale prius alij quoque, vel saltem ipse retulerat; requirebatur inauditum. Arduum est cupiditatem vel in amoribus inconcessis frangere, magis arduum in concessis. Priorem illam difficultatem nimisquàm sæpe expertus erat in expeditione Christianus exercitus, sed tamen hortatione & exemplo ducis castissimi superarat. Posteriores experiebatur nunc par magnanimorum juvenum Buamundus & Eustachius, ille in amore Constantiæ, hic Mariæ. Barbarorum victores animum vincere in hac parte maximè arduum esse sentiebant. Buamundus sperati conjugij superare cupiditatem nequibat; Eustachius vix & ægerrimè poterat. Rex verò jam dudum quidem sui potens, & ad excellentiam formarum immotus, & ad conjugij illecebras adhuc intactus, omniumque victor voluptatum, intus tamen majori certamine versabatur. Perviderat Petrus penetrabile heroïci animi,

&

& ex causis intellexerat magnitudinem, gravitatēque luctu, quā nec majorem totā vitā habuit ipse Godefredus, nec insolentiorē habet historia. Omni licet voluptatis cupiditate superior, tamen urgebatur amore duplici. Mathildem amabat, & Hierosolymam; at utriusque amorī obsequi & facere satis auebat, nec inveniebat quī posset. Nempe alter amorū exigebat ab eo liberos, alter illibatum pudorem. Modò secum solus, modò cū Anachoreta suo loquens, amo Mathildem, inquebat, & maximè, quod in eā prænitet, amo formosissimum pudicitie decus. Habuit illa præ oculis domesticum exemplum insigne, quo ad summam virtutis ejus excellentiam impelleretur. (a) Mater ipsius Beatrix & avus meus Godefredus, par conjugum purissimum, præluxere, servatā inter se illibatā continentia. (b) Hos sic imitata est Mathildis nupta Gothiloni avunculo meo primū, ac deinde Gualfoni, ut castitate vicerit. Parum est dicere

(a) *Pet. Dam.* (a) *Domn. Florent.*

dicere castam Mathildem : bis nupta, semperque virgo , debet appellari castitatis prodigium. Heroïcam illam animi pulchritudinem eo flagrantius diligo nunc in Mathilde, quòd aliquando nullam inesse duxi Gibertinâ fraude deceptus. Atque, ut amoris est similes amantes invenire aut facere , ardeo (fateor) studio exprimendi in me speciem Mathildanæ illius heroïcæ virtutis. Quantulum illud est heroïum decus, corporis robur? quantulus ego, si à feminâ, quam vincam corporis viribus, animi robore superer. Hoc pudoris studio, sicut mihi Mathildis semper inter reliquas omnes summopere placuit, ità vicissim inter alios ego fortè illi non displiceo. Verùm, ut nosti, mi Petre, huic meo in Mathildem amori adversatur alter meus in Hierosolymam amor, qui regni successores à me exigit, quos Mathildis salvus pudor dare non possit. Quid igitur? disiungar ab imitatione Mathildis, an ab Hierosolymæ caritate? Castamne meam cum Mathilde conjunctionem perire, sinam, an Hierosolymæ

lymæ Regnum? Utrumque sic displicet mihi, ut nec prius pati satis possim, nec posterius debeam. Quod luctæ meæ interioris gravitatem auget, proponuntur mihi ducendæ vel Constantia, vel Maria, Principes quidem amore dignissimæ, in quibus genus regium minima laudum est; sed quarum alteram amat Buamundus, alteram Eustachius. Altera ergo à me eripienda est fortissimo belli socio Buamundo, altera amantissimo fratri Eustachio. Hancne illi à me vel utilissimæ bello operæ, vel caritatis mercedem ferent, ut alterutri sponsam, quam virtute meritus est, eripiam? Quid? quòd audio Eustachium mihi amores suos ultrò cessurum, sed non nisi cum acerbissimo dolore; Buamundum autem non cessurum, nisi pugnâ victum? An igitur vel alterum ferro, vel alterum dolore conficiam? Hisne auspicijs tam funestis uxorem ducet fieri Regni moderator? Vide, mi Petre, quibus angustijs undique premar, & ut me expedias, pro tuâ apud cælites gratiâ, & cælesti perspicaciâ da operam.

Hæc

Hæc Godefredus Petro antè exposita, nunc per viam cum eodem colloquens reputabat. Præjens agmini licet non exaudiretur à fratribus & Gerardo ex intervallo sequentibus, satis tamen significabat gestibus, quàm studiosè, quamque sollicitè rem agitare. Post plura ultrò, citròque interrogata, & responsa, sensim acquiescere, & denique tamquam re expeditâ & decretâ exultare visus est. Ubi ventum ad ripam Iordanis, in quâ jam antè erant erecta tentoria, Godefredus tabernaculum regium subit. Ibi in mensâ cistulam elegantem Hierosolymis allatam collocari jubet. Cùm mensæ assedisset, fratrem Eustachium intrò vocat. Cæteri eminus restiterant. Modestissimi quique, ne indagare secretum regium viderentur, averterant vultum inter se colloquentes. At curiosiores nonnulli rati sibi fas esse spectare, quæ patienti loco fiebant, in mensam regiam conjecerant oculos, & superpositam ei cistam intuebantur tamquam regni sacri fato prægnantem. Rex Eustachio assidere jussu
 arcu-

arculam commisit perferendam in Europam. Utque prius sciret ille, quid rerum gereret. Godefredus pusillâ clavi simul arculam, simul arcani sui partem fratri reclusit. Erant in eâ litteræ aliquot, sacra item cimelia, & rerum caput regalis illa corona, quam dilectissimæ omnium Principi missurum se Rex asseverarat palàm. Primam epistolarum inscripserat Paschali summo Pontifici, quæ extat hodiéque; Idæ matri alteram. Quam cùm ostenderet Eustachio, dixit in aurem, se his litteris significare matri, cuinam ipse coronam mittat, scilicet Mariæ. Ad quam vocem Eustachius, quantâcumque esset & in Regem caritate, & in subactos prius affectus potestate, tamen expaluit, tremuit, & quæ verba deinde rex adderet, præ animi turbatione satis capere nequijt. Interim Buamundus cum agmine suo ad eandem Jordanis ripam accedebat. Qui (ut rivales pertinentia ad amores suos cuncta indagant, & oculis vel suis, vel alienis perspiciunt) minimè ignoravit hoc regis cum

eum fratre colloquium; rescivitque Eustachij turbidos primùm fuisse motus, at secutos deinde sedatiores gestus. Lætus ergo principiò Buamundus non dubitavit his auditis, quin Rex omissâ Constantiâ Francâ ad Scotam Mariam adjecisset animum. Id Eustachium amantem turbato ad Mariæ suæ nomen vultu prodidisse. Quod deinde visus sit, solante rege, sensim animum colligere, & confirmare, censuit Buamundus eum juvenem conatum affectus frangere, amorem in Scotam vincere, & tandem regis electioni cessisse. Laudavitque etiam Eustachij caritatem in fratrem, & robur animi seipsum superantis. Verùm ubi intellexit, Eustachium denique ad ultima Regis verba non solum acquievisse penitus, sed exporrexisset frontem omnibus lætitiæ notis, & regi grates exultantem egisse, enimverò vicissim ipse turbatus est. Excidere habitu oris, de priori opinione aspectu deijci, nec dubitare, quin Rex miseratione Eustachij mutasset consilium, eique Scotam concessisset uxorem.

Ergo

Ergo Constantiam eripi sibi à rege, nisi impediret arte, industriâ, armis. Inter hæc irâ calens appropinquabat, cum videt armatum regem tabernaculo excedentem, ascendentemque mox in equum. Hic Buamundus age, inquit, arma stringamus priores, nec sinamus rivalem id quoque decoris nobis præripere. Monebat Tancredus avunculum id videri procul abesse à regis mente. Venisse hunc potius ad Iordanem officij ergò, & valedicturum abeuntibus, quæcumque causa fuerit arma induendi. Quare ne quid ipse intempestivum, præproperumque committeret. Et verò rex cum procerum comitatu, vultum, gradumque convertit aliorum, quâ Iordanes Arabiam spectat. Profectus inde nobilissimus Mahometani nominis Princeps Godfredum, petitâ prius facultate, conveniebat id temporis, jamque propius ab erat. Quâ mente esset Rex, declarare coepit in eo celeberrimo conventu, cui non Christiani modò, sed & barbari multi proceres interfuerunt, ad vulgandam

gandam toto orbe facti regij famam;
 æternamque memoriam. Arabem se-
 quebatur frequens, splendidusque co-
 mitatus, ingentibus belluis vectus.
 Dromades cameli erant, quibus bina
 in dorso tubera, & in his bini sessoris.
 Animal prævalidum, & laboris patien-
 tissimum, quod trium equorum onus
 facilè ferat, inediàmque & sitim tole-
 ret ultra triduum. Ut equo tantò ma-
 jus, ità multò velocius ad centum mo-
 di Italici milliaria uno die conficit.
 Ibant Arabes pompæ quadam specie
 divisi in ordines. Longa dromadum
 colla bullis ornaverant, prægrandia ca-
 pita frontalibus & cristis, dorsaque pi-
 ctis eleganter stragulis. Anteibat a-
 gmini Satrapa cultu specièque corporis
 visendus, in eximiæ magnitudinis bel-
 luà sedens. Quam ubi incussâ pedi-
 bus virgulâ procumbere in genua iussit,
 reliquæ simili signo admonitæ (ita in-
 stitui solent) demisere corpus in terram,
 & commodum descensum præbuere
 sessoribus. Venerant Godefredi Regis
 non modò spectandi gratiâ, sed etiam

æstimandi. (a) Eodem studio adfuisse quoque, sed latentem alieno cultu, Turcam Solimanum Nicææ, nuper Regem, memoriæ proditum est, & hæc contigisse citius, quàm Antistes Tyrius scribat. Arabs, ut erat inter gentis suæ Satrapas imprimis industrius ac perstudiosus rei militaris, tractus famâ Godefredi conveniebat eum, vocaturus in experimentum virium. Quem veneratus dixit, omnium sermonibus à virium robore celebrari inter omnes Christianos bellatores Hierosolymæ regem. Nempe eum esse, qui & Nicææ fortissimum Turcarum sagittâ transfixum è muro dejecerit, & magnum Arabem popularem suum ad Antiochiæ pontem secuerit medium, &, postquam primus Hierosolymæ muros transcenderat, ad Ascalonem ingenti cæde prostraverit pugnacissimos Æthiopum. Rogare se majorem in modum, ut in specimen illarum virium dromadem camelum ingentem, quem ideo adduxerit, ferire gladio Rex ne gravetur
spe-

(a) *M. S. Bibl. Lamottan.*

ſpectante ſe , ut virtutis ejus non tantum admirator , ut adhuc , ſed etiam teſtis eſſe poſſit , & præco. Rex minimè ſui oſtentator , quia tamen hoſpes adveniſſet procul , & rem poſceret Chriſtiano nomini conducturam , annuit , & ſtriſto ferro vaſtæ belluæ colum non ſecus ac gracile quiddam atque exile perſcidit. Admiratus barbarus , ſed ratus multum in eo factò tribuendum bonitati enſis regij , quæſijt à rege , an alieno gladio præſtare tantundem poſſet. Godefredus re ipſa reſponſurus gladium Arabis ipſius poſcivit , quo perinde uno iſtu camelum alterum obtruncavit. Stupens hoſpes roboris comperci miraculo , regem fixiſſimum , deinde ductis per omnes artus oculis menſus , ubi paulum ſe collegit , interrogavit familiarium , undenam ipſe , qui corporis magnitudine non ſuperaret alios , poſſet , quæ aliorum omnium robur excederent. (a)

Mox audiijt memorabilis illius roboris

Z z 2 mc

(a) *Baldefan. Doutr. Hiſt. Pontivi & Morin.*

734 LABORUM HERCULIS
memorabiliorem causam. Respondit
Rex, quia, inquit, MANUS HÆC FEMI-
NAM NON TANGIT. Digna manus
sceptro, dignus ensis qui omnibus po-
steris spectaculo sit, regiae pudicitiae vir-
tutisque testis. Et verò meritò appen-
sus hic sepulcro Dominico, nec non
ibi hodie quoque servatus, quo accin-
gantur, inaugurenturque sancti sepul-
cri equites, stimulenturque proceres
ad sacram militiam fortiter castèque
capeffendam, atque ideò castè, ut for-
titer obeatur ad exemplum pudici ac
verè Christiani Herculis. Arabs regis
facto dictoque applaudens subjecit, se
prius quidem audijisse, Godefredum for-
tem pudicūque celebrari à Reginis
regiisque puellis, quas captivas non
modò intactas, sed etiam non aspectas
dimiserit: verum se nunc minùs auri-
bus, quàm oculis suis credere. Addi-
dit ejus præclaræ famæ fructum hunc
inter alios fore, ut nulla toto orbe vir-
go Princeps non ambitura sit ei nube-
re, & nulla non minoris æstimatura
reginam Palæstinæ fieri, quàm conjun-
gem

gem Godefredi. Postquàm Regem magnis & laudibus ornavit, & muneribus coluit, discessit, testatus se ubique spectatissimæ virtutis fore præconem. Interim dum hæc geruntur à Rege, Buamundus accesserat, eoque loco constiterat, unde & spectare quæ fiebant, &, quæ dicebantur, audire posset. At in ijs ansam invenerat iræ magis accendendæ. Ergo, inquiebat, ideo huc vocabar à rivali, ut testis essem illius roboris, quâ belluas sternit? At non ejusmodi virtutis ostento terruerit Buamundum. Huc accersebar hodie, ut audirem à barbaro prædicari, virginem Principum nullam non ambire Godefredi torum? Verùm fides elogij sit penes arma; quibus illi aut mihi Constantia conjux hâc ripâ quæretur. Furienti aderat Tancredus, qui ad ultimum dimicationis rem venisse ratus, orabat avunculum, daret spatium iræ, dum Godefredi mentem perspexisset. Ne tot annorum famam in unius horæ discrimen daret: neu Christiani contrerraneique duo duces eximij se mu-

tuo sanguine respergerent. Non esse id spectaculi gaudiique præbendum hostibus barbaris, ne resumant animos, & congressos armis Christianos confectosque, victum & victorem adorti victoriæ præmio fruantur. Neque verò facile credendum esse, Godefredum perspectæ antehac in Buamundum voluntatis, qui ipsum ter præsentis discrimine liberarit, nescire in valle Gorgoniâ, in munitione Antiochenâ, & in Antiocheno prælio, nunc mutatâ mente, quem vitæ periculo voluerit toties ereptum, velle frustrari Constantiâ, præmio laborum vitâ cariore. Certè id meritum esse tot officijs præteritis clarum Ducem, & nunc sacrâ majestate principem, ut nihil in eum præcipiti consilio designetur. Buamundus conceptâ femel irâ calens sententiæ quidem jam dubius, sed more humani ingenij in eam, quam timebat, partem propensior, hærebat. Ecce autem repente videt Regem dimisso Arabe versis frenis iter ad se flectentem cum fratribus. Oppressus in eo tumultu affectu-
um,

um, abreptusque priori animi impetu capulo manum admovit & tantum non ferrum strinxit. Verum obsecrante Tancredo compescuit sese, &, ut erat excelso animo atque in omnem partem acri, consiliaque non minus tegere, quam exequi prompto, composuit vultum, & quorsum fata vergerent, expectavit. Accesserat Rex oris illo habitu, quo solebat, nihil suspiciosum, nihil dissimulatum, sed sincerum candorem, & humanitatem ipsam præferens. Quo parante de equo descendere, desiliit in pedes Buamundus, & pariter universus utrimque comitatus. Rex officiosè salutato illo, vellem, inquit, Princeps, aut, (quando ea est suavior appellatio) frater, res Christiana in Oriente eo loco esset, ut nos tuo conspectu diutius frui sineret. Nunc quando nondum nobis tantum est securitatis à barbaris, saltem statui tuâ præsentiam alloquióque potiri, quoad licet, ideo huc profectus. Armatus veni, quòd & infesta hæc ripa esse solet Arabibus, & ejus gentis Satrapa me hic conventum cupierat. Non

debui tuum meumque latus nudum
præbere barbaro, nequa fraus lateret.
Adversus hostes ubique adsint tibi su-
peri, cui nunquam sua deerit invicta
virtus. Et mihi utinam occasio non
desit animum in te meum luculentius,
quàm antehac, probandi. Equidem
nunquam commiserò, ut operam me-
am tibi adhuc parum utilem ullâ in re
desideres. Certè, (addidit familiariùs
admotus ad aurem Buamundi) si quid
vel hîc, vel in Europâ possum tuâ cau-
sâ, si quid non omninò ignotus in aulâ
Francicâ valeo, ubi scio regiam Princi-
pem Constantiam esse te dignam,
quàmque non odisse diceris; nihil mihi
jucundius fuerit, quàm ad eam tibi
conciliandam contulisse aliquid. Sed
nimirum in hanc rem non alio eges,
quàm inclyto Buamundi nomine, quo
terram implesti. Apparebat optimum
regem candidè, atque ex animo locu-
tum. Ergò Buamundus tantâ sancti
Principis fide, & humanitate attonitus
obruitur novorum affectuum turbâ,
Qui nunquam timuerat ad hostilium
armo-

armorum minas, titubavit ad postremas
 amicissimi Regis voces, & gaudio tre-
 pidus ad ejus pedes, cujus dextram in-
 ter agendas grates tenebat, tantum non
 cecidit. Par erat adstantis Eustachij
 lætitia, parque grati animi sensus in
 fratrem, cujus concessu, atque adeo
 hortatu, nuptias Scotæ virginis spera-
 bat. Subridebátque identidem, quòd
 rege sibi coronam modò tradente pal-
 luerat ad nomen Mariæ perperam in-
 tellectum. Neque verò quisquam erat
 in eo procerum cœtu, quin se prædi-
 caret acceptâ gratiâ aliquâ singulariter
 obstrictum esse Regi. Tancredo for-
 tissimo juveni, sibique amicissimo at-
 tribuerat Tyberiadis Dynastiam. Ca-
 ro adolescenti Gerardo Avesnati Ca-
 strum Abrahamium amplósque pro-
 ventus ad æternum facinoris sui decus
 concesserat. Theoberto, ut Patriar-
 chæ dignitas conferretur, fuerat auctor.
 At Petro Anachoretæ, suo illi quon-
 dam optimarum artium magistro, quid
 gratiæ conferre posset, dubitarat. Se-
 nex fortunæ contemptor ac sanctus, ab-
 dicatis

dicatis spontè caducis bonis , si qua ejusmodi offerrentur, non erat accepturus. Excogitavit ergo rex aurei doni genus, quod is recusare non posset. Ac primum officiosè coram proceribus conquestus est de Petri sui probitate, quâ cogeretur ingratus esse in eum, à quo tum alia omnia, tum militarem artem didicerat. Cùm respondisset Petrus grande illud sibi præmium esse, quòd habeat tantum Principem bellandi discipulum, vincendi magistrum; at patieris saltem, inquit rex, te, qui profana respuis, donari auro sacro, eoque coronario, & omnibus profuturo. (a) Simul obtulit parmam insignem areâ viridi, tribus argenteis quinquefolijs distinctâ, quod erat Anachoretæ gentilitium symbolum: at ei curaverat rex appingi auream precatoriorum globulorum decadem, cujus Petrus inventor extiterat. Aureo hoc additamento pietatem ejus in Virginem pius Rex coronavit, & commendatam transmisit ad posteros. Nec indonatum reliquit sonori-

(a) *M. S. Nic. Campis.*

rorium suum Montacutum Anachoretæ intimum, & cum eo futurum Novi monasterij ad Hojum conditorem. Fratribus suis Balduino, Eustachióque & faverat semper, & majus erat quiddam, quod gratificari statuerat. Atque ità ille quidem officiosus in omnes, singillatim aliorum votis anteverterat, aliorum obsecundarat, relictis Principibus, quas conjuges optabant, virginibus. Constantiam ab Hugone Campano consanguinitatis causâ tandem se-junctam ducturus erat Buamundus, Cæciliámque Tancredus. Ducturus item Sibyllam Conversanam Robertus Normannus, hujus frater Henricus post Rufum Angliæ rex Scotam Editham, monastico quidem obnuptam velo, sed nullâ voti religione (contrâ quàm putabatur) obstrictam; Eustachius verò sororem Edithæ Mariam. Sic responsurus erat eventus vaticinationi Eduardi Regis.

ARBOR FATALE VIRIDIS SUCCIDITUR
 ICTU :

PARS

PARS ABSCISSA SUO STIPITE SUMMA
CADIT.

HOC AMOTA PROCUL TRANS IUGERA
TERNA FERETUR :

POST ITERUM STIRPI REDDITA, PO-
MA FERET.

Postquam enim Anglicanæ familiæ regnatrici ablatum fastigium regium ceciderat in Edgardo, perveneratque, velut intervallo trium jugerum, ad tres externos reges; denuò redijt ad regiam stirpem in Edgari sororis progenie; primum quidem in Editha, quæ Henrico Rufi successori nupsit, mox in filiâ Mariæ Eustachiique Mathilde, quæ Stephano Campano post Henricum Angliæ regi collocata est. Iam Buamundi soror Helena regio Hungariæ juveni nuptura erat, Morfia Burgio, Roberti Flandri soror Gertrudis Theoderico Alsatia Principi. At incerti hærebant amici procures, quamnam denique elegisset rex Godofredus donandam coronâ regiâ, quam in cistâ delaturus erat Eustachius, Floria, & Amazon
Ma.

Mathildis restare videbantur. Floriam Corbagathi Turcarum ducis sororem non probabant quidam regio toro admoveri. Nempe orituram ex eâ non dignam sobolem, quæ Christianæ imperet genti. Feminæ Turcæ filium esse inauspicatum nomen, quod non solum colere, sed dicere pigeret Christianos. Cur enim ipsi vicissent Turcas, ut eorum stirpi parerent? Verum Rex, cum ad hæc dixisset, Floriam paterno quidem genere Turcam esse, materno tamen Calabram, versus ad Gerardum suum addidit, insignem illam formam & minimè Turcicæ indolis virginem, si Christianis sacris procuretur, & amet Godefredum, non illibenter nupturam Godefredo alteri, Gerardo suo, si ab eo hæc ametur. Gerardus verecundè blandèque respondit sibi gloriæ futurum, dicto audientem esse regi: at facta ejus semper se gloriosius secuturum, quàm dicta. Expectare à rege exemplum, quod imitari conetur. Cæterum ex hoc Godefredi sermone colligi poterat ab eo Floriam magni quidem

dem fieri , sed pluris aliam aliquam
cariorem. Cum multos procerum ur-
gebat cupido pernoscenti , quænam il-
la esset , tum Gerardum præsertim , ju-
ratum in fœdus non admittendi regi
successorem , nisi Bullionij sanguinis.
Regem ipsum interrogare prohibebat
viri majestas. Ergo sciscitatur nunc ex
Eustachio , nunc ex Petro Anachoretâ,
quos censebat arcani regij conscios.
Cum respondisset Eustachius se id sci-
re , coronam à rege mitti dilectissimæ
omnium virgini , & potentissimæ in
hâc sacrâ expeditione adjutrici , Gerar-
dus continuò hanc esse Mathildem co-
gitavit , eamque sibi in Italiâ pernotam
dixit unam omnium præstantissimam
fortunæ , corporis , & animi dignitate,
planéque dignam Godefredo , si modò
liberis non sit , ut adhuc , caritura.
Subdidit interrogatus Anachoreta regi
id primis esse cordi , ut ne sacri regni
successores defint. Multis deinde sol-
licitatus à Gerardo , multa in rem , sed
obscurè , ludebat , sumptâ occasione
nunc à die , nunc à loco , quo agebant.

Illu-

Illuxerat festus Epiphaniæ dies, dicebátque Petrus non aliam aptiorem, quàm trium Regum, sacram lucem eligi à rege potuisse, quâ fratribus valediceret, & regalia cum eis ageret. Qui sermo revocavit in memoriam Gerardo vaticinium Idæ de filiis tribus, quod Petrus sic explicuerat aliquando, ut eorum trium quemque futurum Regem innucret. Quid si? inquiebat secum Gerardus, habemus hîc germanos tres reges? Redijt & in mentem Gerardo nuper Anachoretam, cum hortatus erat proceres, ut Godefredum eligerent regem, hoc usum argumento, quòd ex eâ familiâ Godefredus esset, quâ nulla magis aut virtute clareret, aut vigeret numero capitum; cui proindè successores defuturi non essent. Hæc reputans secum Gerardus, an rex, inquiebat, non alios quàm fratres, quos summo opere diligit, vult Regni heredes? Quid si Anachoretæ indicavit hanc suam esse in caros fratres voluntatem, & Anachoreta ideò jocatur de Regum trium festo tribus fratribus congruente?

Hæc

Hæc quoque confirmabat Gerardus recordatione venditionis castri Bullionij, in qua Godefredus caverat eam arcem mansuram in eementis potestate, nisi pretium repræsentaretur vel ab ipso, vel à trium, quos nominabat, successorum uno nullâ factâ mentione liberorum, quorum nempe loco habiturus esset fratres, consobrinumque Burgium. Scrutanti de his apud Petrum Gerardo, quid, inquit, Anachoreta subridens, requiris liberos Regis? aut cur vobis Regni successores non placent, nisi qui nondum nati sint? An divinatis marem conceptum iri, vel dignum qui tantis viris imperet? Nihil opus futurâ prole habentibus successores, quales, & optat Rex, & æquitas poscit. Balduinum, & Eustachium, quos rex paternâ caritate complectitur, cur non cogitatis esse filiorum loco? si similes regi Godefredo cupitis successores, vel nulli, vel illi futuri sunt, juvenes spectatâ probitate, fortitudine, sapientiâ, regique ut sanguine, itâ cæteris laudibus proximi.

Ma-

Magnorum operum hâc totâ expeditione socij, & sacri Regni cum Godefredo conditores an non regium capiunt nomen ? Hi, teste Idâ matre sanctissimâ vate, futuri Magni, imò geniti, ut regnent. Quinam vel æquius, vel fortius hereditarium vindicabunt imperium, quàm fortissimi fratres, qui id laboribus, & sanguine suo meriti sunt ? Quorum alter ad Edessam immortalibus operibus propugnaculum sacro regno condidit, alter Hierosolymæ muros proximus à primo Godefredo supergressus, expugnata decus secundum meritò tulit. Ita differebat Petrus. Et verò fratres Godefredo successuri erant in Hierosolymæ regno, primùm Balduinus, deinde Eustachius ; sic tamen, ut constaret veritas prædictioni Matris, Petrique appendici.

TRES MAGNI PROCERES DUX,
 REX, COMES: ATTAMEN HORUM
 QUEMQUE MANET REGNUM, REGIA
 VIRGO MANET.

Aaa SED

SED VERSABIT AMOR SORTES: HOS REGIA QUAMVIS

IURA MANENT, HI DUX, REXQUE COMESQUE MANENT.

Balduinus enim ex tribus solus Hierosolymæ rex appellandus, & coronandus erat; Godefredus autem retenturus appellationem Ducis Lothariæ, & Eustachius Bononiæ Comitis. Nempe AMOR VERSAVIT horum SORTES. Namque Godefredus licet jure & auctoritate rex, amore & reverentiâ Servatoris abstinere perrexit regio insigni & nomine. Eustachius verò, tametsi futurum esset, ut Balduino successor electus Hierosolymam evocaretur, tamen audito, consobrinum suum Balduinum Burgium, ne Terra sancta periclitaretur à barbaris, coronatum interim Regem; caritate in consanguineum, & studio concordiæ, Burgio & ejus posteris relicturus erat regnum. Ita QUEMQUE TRIUM fratrum manebat regnum, nec id tantum, sed etiam VIRGO REGIA. Iamque regali genere claram

ram Andam Armenam habebat in matrimonio Balduinus, & Scotam Mariam habiturus erat Eustachius. At, quænam maneret Godefredum, & cuiam coronam regiam is transmitteret, manebat in obscuro. Lucis aliquid hac in re quoque Gerardus à Petro elicere conatus est inter ambulandum ad Iordanem. Sudum erat cælum, aura pro anni tempestate perquam clemens: Iordanis aquæ placidè voluebantur nullis turbantibus ventis. Regem invitaverat non modò liquor, sed & sanctitas amnis, ut religionis ergò solito ritu corpus ablueret. (a) Itaque vocatis ad idem officium Buamundo, fratribus, aliisque proceribus descendit ad flumen. Ibi alij manus, alij faciem lavèrè, alij cavâ palmâ laticem bibère. Nullus non ijs aquis tingi voluit, quas Servator contactu sacrarat. Ita lotos ambulatiuncula oblectavit, epulo regio mox excipiendos in prætorio ad ripam erecto. Hanc inumbrabant partim can-næ prægrandes, ex quibus lanceas con-

A a a 2 . . . ficiunt . . .

(a) *Aquen.*

re rex, qui cum fratribus agens non procul restiterat, advertit subitum Gerardi sui silentium, & benignè causam ejus ex Petro sciscitatus est. Quam ubi intellexit, pro illo paterno, quo erat in Gerardum, animo, volo, inquit, ego ipse tibi, mi Gerarde, nodum, cujus solutionem scrutaris, expedire. (a) Coronam mitto Virgini omnium amabilissimæ juxta ac potentissimæ in hac sacrâ expeditione adjutrici Mariæ; non Scotæ (quod primâ specie existimarat hic noster Eustachius) sed cælesti, quæ in icone missâ divinitus ad nos Bononiæ colitur. Subjecit exultans divinâ quadam animi permotione Petrus, nullam à Rege inveniri potuisse digniorem regni diademare, quàm cælestem illam Mariam, electam sacri belli præsidem, in vexillis depictam & prælatam ducem, exercitûs apud iratum filium patronam, totâque expeditione propugnatricem. Eam esse, quæ Ducem, ac milites innumeris periculis eripuerit; quæque eis annulum faventissimæ voluntatis suæ

A a a 4

pignus

(a) *Hist. Pontivi, Morin, &c.*

pignus miserit. Eam denique, cujus favore obtigerit tantus rex, sacrumque regnum in Oriente sancitum sit, & firmius sanciendum. Nempe Reginae illi Virginum, acceptâ regiâ Hierosolymorum coronâ, cordi & curæ futurum etiam impensius quàm adhuc regem, regisque successores. Ita perfectissimè cum rei eventu conventuram Petri Bartholomæi prædictionem.

CHRISTIADÆ VINCENT: FAVET EXORATUS IESUS.

HOC TRIBUIT PRECIBUS, MAGNA MARIA, TUIS.

PROMISSI FULSERE DIES: MARIANUS EOO

CHRISTIADUM REGNUM SANCIET ORBE FAVOR.

Hæc Petrus referebat & ipse vaticinans. Quo sermone quoscúmque impertijt, implevit certiore spe, quàm quantam fides humani promissi, aut ratio ex fiducia rerum subijcere solet. Inde exitit ubique piorum exultatio & laudatio maximi regum Godefredi, decora
ejus

rardus ex Petro satis intellexit, cum audiit loquentem in hanc sententiam: si, inquit, Godefredo regni socia & adiutrix adsciscenda est, cujus virtute, & opibus res Hierosolymitana firmetur, nulla sanè præponenda Mathildi. Nempe illa est, cujus studio & auctoritate apud Pontificem Urbanum sacra expeditio promota, cujus operâ & opulentia huc missæ tres instructissimæ copijs victricibus classes. Mathildis est, quæ in Occidente vicit, ut in Oriente vinceremus. Nec quisquam in eâ fecunditatem desideret. Abunde fecunda est tot bonorum procreatrix, quæ nobis plura adjutorum millia suppeditavit, & porro suppeditatura est. Neque verò ejus Amazonis cum Hercule nostro matrimonium requireret, qui intelliget eos jam dudum pulcherrimo omnium conjugio, admirabili, inquam, animorum, studiorum, facinorum, virtutum omnium, atque imprimis illibati pudoris consensione, vinculoque conjunctos. Nisi fortè ad rei Christianæ decus ac firmamentum conducibilius est, ut rex

ejus prædicantibus belli gloriæque focijs, tum ijs, qui cum eo manserunt in Oriente, tum cæteris in Occidentem reversis. Sacri heroës à subactâ Hierosolymâ merito cognomento dicti Hierosolymarij, palmâsque, quas Hierichonte de more acceperant, reportantes in suas quisque domos longo clarissimóque triumpho invehébantur. Ita provocabant spectatores ac posteros ad egregium imitationis decus. In omnibus spectabatur Godefredus; quóque duce omnes vicerant, in omnibus triumphabat Godefredus, & cum Godefredo Mathildis. Ubique audiebantur plaudentium ambobus voces, & bene precantium vota.

Par Heroicum

GODEFREDE, MATHILDIS,

Inclytum par castorum amantium:

Christiane Hercules, Amazon Christiana,

Insuperabiles armis,

At, quod tantò difficilius est,

Invicti voluptatum illecebris:

Fortiores,

Quod

*Quòd vos ipsos,
Quàm quòd fortissima Roma, Hierosòlymæ
que mœnia vicistis:*

G O D E F R E D E

*Virium Miraculo Hercules,
Sed perpetua virginitate plusquam Hercules:*

M A T H I L D I S

*Amazon Heroico animo,
Sed quia bis nupta, semper virgo,
Amazonibus omnibus superior;
Uni Heroum Godefredo par,
Ceteris Heroibus major:
Gemina mundi lumina,
Quorum alterum eminens Hierosolyma.
alterum Roma*

Orientem & Occidentem illustratis:

*Gemini Ecclesia oculi
Sejuncti locis, ut pudicos decet,
& invicem inaspecti,
Sed longè pulcherrimum spectaculum orbis.
Celeste par amantium,
Calibes corpore, conjuges animo,
Immenso terrarum intervallo disiti,
At conjunctissimi amore virgineo.
Inclyti virginitate per omnem vitam illiba-
ta, sed non infecundâ,*

Quâ

Quâ peperistis

*Vobis æternum decus, orbi Christiano
majestatem.*

Vivite ambo immortales in Heredibus

GODEFREDE in Regibus,

MATHILDIS in Pontificibus.

*Fortunati Virginis Matris imitatione &
cultu,*

Cui dicavistis

*Alter diadema regium, altera sponsalem
annulum,*


*Ambo triumphali corona immortalitatis
ornandi,*


Æternum agite triumphum

Auspice celesti Virgine,

Et in ambobus triumphante.

F I N I S.





PROTESTATIO AUCTORIS.

REliquum est, ut sanctè profitear, me huic operi tantum fidei tribui velle, quantum sola humana scriptorum, quos produco, meretur auctoritas.

Errores Typographicos, benevolâ conniventia, Lector prudens faciliè emendabit.

